

御制乐善堂
全集定本

乾隆

文硕阁

wenshuoge.com

目录

关于我们	4
御制乐善堂全集序	6
上谕	7
奏议	8
庚戌年原序	11
目录	25
卷一	69
卷二	75
卷三	79
卷四	84
卷五	89
卷六	94
卷七	100
卷八	107
卷九	117
卷十	122
卷十一	133
卷十二	140
卷十三	146
卷十四	152
卷十五	159
卷十六	166
卷十七	172
卷十八	180
卷十九	186
卷二十	193
卷二十一	200
卷二十二	208
卷二十三	215
卷二十四	224
卷二十五	234
卷二十六	244
卷二十七	253
卷二十八	262
卷二十九	272
卷三十	281

跋 290

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

御制乐善堂全集序

钦定四库全书

御制乐善堂全集序

朕少读尚书见二帝三王以及继世之哲后君臣咨儆惟是身心性命之本原其敷政命官亦惟根柢道德而不规规於事为之末及考诗易四子之言凡论政者皆与书所称同其指归互爲表里其後博涉诸史则虽明盛之世所殫心竭虑者大概详於事功而略於本原教化之升降治象之崇卑其分岐实判於此用是日有孜孜求所以取道入德之门蒙

皇考示以明理立诚之大训而略得其统贯又念修辞必本乎诚故凡见於古文诗辞者咸以是为宗而不敢有贰焉往者岁庚戌曾録数年中所作序论书记杂文诗赋次为十有四卷置诸几案时就所言以自检其行嗣是所作盖四倍前继序以来躬理万几兢兢业业惟恐一事失宜负

皇考付属之重思如曩时从容文墨之娛不可复得然少有余闲未尝不考镜经史以自观省爰取庚戌文钞所载存十之三续作未订入者存十之七总为一编共若干卷非欲以文辞自表着盖是集乃朕夙昔稽古典学所心得实不忍弃置自今以後虽有所着作或出词臣之手真贋各半且朕亦不欲与文人士争巧以转贻後世之讥则是集之辑有不得已者记曰本诸身徵诸庶民曩予自检所行以勉副所言者乃日用酬酢之常今兹所行事无大小莫非政教之平陂生民之苦乐相倚不可以中立者也因此益自警惕而克艰天位颇畏民瘼庶几明理立诚之学参前倚衡永永勿替也夫乾隆丁巳仲夏望日

上谕

乾隆二十三年六月十五日奉

上谕近日偶閱乐善堂集缘初刻所存卷帙颇繁其中多有不甚愜心之句昔人云文章千古得失寸心朕非悔其少作博不愜情去留之名政以随时删订则今昔诣力所到端可藉以自验其令内廷诸臣悉心校閱分拟应存应删签贴进呈候朕裁酌重订定本以付剞劂钦此

奏议

协办大学士户部尚书【臣】蒋溥等谨

奏乾隆二十三年六月十五日奉

上谕近日偶閱乐善堂集缘初刻所存卷帙颇繁其中多有不甚愜心之句昔人云文章千古得失寸心朕非悔其少作博不愜情去留之名政以随时删订则今昔诣力所到端可藉以自验其令内廷诸臣悉心校閱分拟应存应删签贴进呈候朕裁酌重订定本以付剞劂钦此【臣】等恭奉

乐善堂全集公同敬谨校閱仰见我

皇上德协天行学勤时敏散体之文囊括六经自先圣以至先儒之理无不陶熔贯串体大思精骈体之文轶唐驾汉笼罩羣言风格高古诗章则融洽三百篇温柔敦厚之旨博采历代之英华而机杼自出是内圣外王之全学无不统备兼赅实足以

训行万禩兹恭承

圣训

命【臣】等校拟签呈恭候

钦定【臣】等谨遵

谕旨详细恭绎窃就管蠡之见分别贴签恭呈

御览伏候

训示裁定俟

发下之日交

武英殿刊刻再【臣】等伏覩初刻内恭遇

御名未经敬避深属未安谨一并拟签进

呈仰祈

睿鉴再集内所刻制义理醇词茂雅正清真洵为文章榘矱今【臣】等恭查制艺卷内计文共得二十七首似应於目錄末标附錄制义四字而附刻於诗赋杂文之後标签书乐善堂制义下刻一小附字则於刻集体制更为妥协至原本久经颁行今後订成定本在我

皇上制作如日月经天原可听其并行但现在定本既经详订而出海内艺林宝购必当奉为指归所有原本自应陆续恭缴【臣】等请

旨凡内外臣工曾蒙

颁发初刻及书坊翻板并外省官刻本并令随时收缴不必立定期限及行文追查在内交军机处彙缴在外由各该地方官转送布政司敬谨收贮定本刻成时仍乘便发交各布政司照依摹刻印行嘉惠天下【臣】等愚昧之见是否有当伏候

圣训谨

奏

协办大学士户部尚书【臣】蒋溥

吏部尚书【臣】刘统勲

工部尚书【臣】嵇璜

吏部左侍郎【臣】董邦达

户部左侍郎【臣】刘纶

户部右侍郎【臣】裘曰修

礼部左侍郎【臣】介福

兵部左侍郎【臣】观保

刑部右侍郎【臣】王际华

工部右侍郎【臣】钱维城

内阁学士【臣】钱汝诚

乾隆二十三年八月十五日奉

旨制义不必刊刻余依议钦此

庚戌年原序

庚戌年原序

余生九年始读书十有四岁学属文今年二十矣其间朝夕从事者四书五经性理纲目大学衍义古文渊监等书讲论至再至三顾质鲁识昧日取先圣贤所言者以内治其身心又以身心所得者措之於文均之有未逮也日课论一篇间以诗歌杂文虽不敢为奇辞诡论以自外於经传儒先之要旨然古人所云文以载道者内返窃深惭恧每自思念受

皇父深恩时聆训诲至淳且详又为之择贤师傅以受业解惑切磋琢磨从容於藏修息游之中得以厌饫诗书之味而穷理之未至克己之未力性情涵养之未醇中夜以思惕然而惧用是择取庚戌秋九月以前七年所作者十之三四略次其先後序论书记杂文诗赋分为十有四卷置在案头便於改正且孔子不云乎言顾行行顾言书曰非知之艰行之惟艰常取余所言者以自检所行倘有不能自省克以至於言行不相顾能知而不能行余愧不滋甚乎哉

六经之教皆以明仁义中正之道而感发人之善心也降及子史必依於经义足以备劝惩辅教化然後为後世所诵法故唐宋诸文家自言所学必原於六经仁义之旨然则乐善不倦固敦行之要而亦发为文章之根柢与雍正十年冬

皇四子以所为乐善堂文钞示余而属为之序发而观之经句涉月犹不能穷其奥美也其义理一本於五经四子而折衷於宋儒之言其文之意度诗之风格按以古人成法无毫厘分寸之不合而每至忠孝友悌言之尤肫诚而恺切足以感发人之善心盖

皇子之文乃乐善不倦之诚之积於中而发於外者也我

皇上圣德天纵以仁义中正之道陶冶一世而

皇子亲承

谕教近仰

仪型朝夕观感浹於耳目心志之间者尤深且切而又笃志好古深思力探於古圣贤人之言而近体诸身故发为文章充实光辉而不可揜如此乃

皇子且自以为未足自序之文犹曰彙而成帙置之案左以便改正即文之不敢自是而望道之切可知矣又曰常取所言以自检所行惧言行之不相顾也则进德之诚可见矣此古圣贤人乐善不倦之实功也余浅见寡闻不足以发扬

皇子之文而区区之诚所欲効於

皇子者惟是检身之严密见於自序之文者永矢而勿渝焉斯已矣

雍正十年冬月谷旦和硕庄亲王允禄序

文以载道道之体於身者为德而发於言者为文故韩子论文曰行之乎仁义之途游之乎诗书之源又曰仁义之人其言藹如孝弟者仁义之实道德之根源也

皇四子幼侍

圣祖仁皇帝特荷慈眷朝夕

训诲且见我

皇上视膳问安致爱致敬无事不与往圣同揆至性薰陶耳目濡染由是体诸身心发於言动者不待模拟自成方圆夫圣经贤传所以勤勤亹亹翼万世其道无他父子君臣之大伦而已

皇子性资乐善於道德仁义之根源既得之

圣祖之渐涵复申以

皇上之谕教而又切磋於师友研极於诗书早夜孜孜日新其德故发为文章左右逢源与道大适衡以古作者之法中规中矩不失扶寸而事关人纪言

之尤恳切而周详使读者忠孝友恭之心油然而生夫自古文人学士有一言之几於道其文必逾远而存况

皇子之实体於身而藹然溢於言外者乎

皇子夙以乐善名堂因以标文集即此见平日心力之所注而所以为文之根源具在於是矣壬子八月以序属余反覆寻绎深庆

皇子之德业日进加益而自忘其学之肤言之不文也於是乎书和硕果亲王允礼序

我

圣祖仁皇帝燕翼诒谋尽善尽美

皇上纯孝天亶当居藩邸时先意承志尤得

圣祖欢心康熙六十一年爰命

皇四子宝亲王入侍内廷以示宠异是时王年方舞勺而予齿亦埒相对甚欢及

皇上绍膺大宝余以冲年特承

恩命忝封贝子晋封贝勒自顾无寸长足録惟以恭谨

慎自检束遂蒙

恩眷每入覲

皇上时遇

王辄承奨许把握深谈大有乳水之合癸丑夏月出所着乐善堂文钞见示余为庄诵一过见其论记文序赋颂诗歌无体不备约数万言因为舌桥不下作而言曰古谓立德立功立言为三不朽在古人非欲岐之也太上不易得得其次亦可以不朽

矣而衡以圣贤之道则德其所内蘊耳着之而为功宣之而为言莫不皆备於一身则三而一者也今

王以乐善署其堂而复以名其集盖善即德也德备而功与言随之如水之有本木之有根其条达流行有不期然而然者然而混混汤汤观澜而知其本也刁刁调调揽叶而知其根也则欲测

王之德与功者又何不可於其言观之哉今为取其文而读之於其藹以和者见仁之德焉严以毅者见义之德焉畅情而不繁洞物而非察坚确而不移者见礼智信之德焉夫浑而名之之谓善得之於己之谓德

王之乐善

王之取善也盖善无穷而取善之心孳孳矻矻日有积而月有累故其发而为言得心应手自有行乎其所当行止乎其所当止之致斯其蘊之也深而养之也素矣刘昼慎独有曰枕善而居之不以视之不见而移其心聽之不闻而移其情也老子曰上善若水水利万物而不争故几於道斯二说者可举为

王赠也夫文所以载道也言者心之声也而非蘊之养之则不足以资其本而培其根今

王之乐善如此扩而充之於以优於天下而驯至於大舜之域其可涯量哉将见为德为功为

言皆以一身备之裕如矣苟浮慕词章徒以着述相引重又乌足以读乐善堂之文哉

雍正十一年癸丑五月上澣允禧序

夫文所以载道也自汉唐宋明以来有道诸儒皆发为文辞以明圣贤之奥旨作为诗歌以畅一已之襟怀令後世读之者玩其词绎其旨称扬做法之恐後文之有功於後世岂浅鲜哉若夫稟穎异之姿而精研典籍日与贤师友称先则古讨论藏修弟之视

兄虽所处则同而会心有浅深气力有厚薄属辞有工拙未敢同年而语也吾

兄随

皇父在藩邸时朝夕共处寢食相同及

皇祖见爱养育宫中恪慎温恭

皇祖见之未尝不喜

皇父闻之未尝不乐而又念弟之在家不能常聚迹虽

两地心则相通吾

兄纯孝至悌可谓肫然无间矣及

皇父尊居九五吾二人下帷读书朝夕共处寢食相同者如旧同气之欢岂语言文字所能尽载乎吾

兄於问寢视膳之暇每有所得发为文词日课文一首虽退居私室亦不敢自懈手披心绎欲力追古作者八年秋九月彙订其序论诗赋杂文若干卷而命余序余曰载道之文真儒为之无实之文务名者为之务名者不求实得真儒则本之躬以见之言而可垂於後世今观吾

兄之文本平日所为讲明践履者积於中而发於外上不负

皇父慎选天下英贤而教育之之心下不负十余年穷经力学愤乐相寻之笃志处帝王之家居富贵之位书史所载未数数然也

兄之乐善无穷而文思因以无尽凡古圣贤之微言大义修身体道之要经世宰物之方靡不发挥衍绎娓娓焉畅所欲言即至一吟一咏亦皆扬风扞雅温柔敦厚有合於三百篇之旨岂扬华摘藻徇外忘内者所能髣髴其万一哉又岂弟之浅识譔词所能赞美哉弟弘昼谨序

文以足言而载道也内而极於天人性命之微显而通於经纶事业礼俗百为之蹟皆由根柢深厚诣极精微而後出之有原发之莫测所称閤中肆外贯乎道而济乎义臻於玉振金声之美盖徵圣垂文而作述以隆非偶然也【彭】弱龄猥蒙

圣恩受读

内廷得侍

皇四子朝夕讲贯窃见

皇四子问安视膳之余耳目心思一用之於学考合古今徵论同异虽单词只义必条分缕析铢黍弗差每为文笔不停缀千言立就而元思泉涌采翰云生盖天资敦敏而又缉熙光明实为天人并臻其至者也积数年著作既富所裒乐善堂文钞成【彭】盥濯读之数过其研穷心性也则德成於天而明出自然微言探蹟弥纶彝宪合心源道法一以贯之而无余也其阐发经学也则深明博察探其奥而约其旨糟粕羣言彪炳至义发前人所未及而开後学以津梁也至於史事有难评之迹千秋积未发之疑抉隐解蔽往往出人意表盖举治乱兴衰之故是非得失之衡莫不包括隐显变通会适标论立义足以超古而信今矣旁逮诗歌赋颂体制美备写天地之辉光琢元黄之丽藻虽组织辞令排比声律然皆衔华佩实酌雅富言而非寻常之外饰雕艷所可拟於万一者夫惟知之始能言之顾【彭】浅何能知高深之际而陈赞颂之言哉【彭】侍

几席诵习之下每苦於窒而难通也辄蒙

片言提撕旷若发蒙而因端

指示引绳授矩

训诲无倦所以培而植之者甚至顾以钝质业不加修而识不加长受读兹编所谓出有原而发莫测贯乎道而济乎义者【彭】诚不足以知之惟略陈梗概恭缀数言以为鼓吹休明之一助焉尔

雍正十年岁次壬子十月朔平郡王福彭谨序

善者一心之主宰万化之根原事理会归之极则也然非实有所乐乎此则见之不真信之不笃而其发为文章着为事业者终不能笃实辉光可传於後世

皇四子宝亲王性资纯粹自幼为

圣祖仁皇帝所笃爱

特召育於宮中薰陶

德教

皇上切義方之訓廣延師保諮經稽史惟日孜孜所以培養德性恢閱學識者既厚且深矣【
爾泰】以封疆之臣入參政事恭承

恩命获侍

講筵窃見

皇子动容出辭溫肅之氣具備偶聆議論則窮本探原有經有緯未嘗不私庆

皇子秉元善之德而誠心體道不獨文學迥出乎尋常也間出樂善堂文鈔若干卷以示開章
二篇則曰立身以至誠為本讀書以明理為先此我

皇上御書以訓勉

皇子者而即首以命題所為念茲在茲以迪元德而會眾善者莫不基於此矣至於推闡經義
尚論古人窮極事理辨析羣言實有特出之見超乎前賢思議之外其或敷揚功德吟咏性情
可歌可誦使讀者忠孝悱惻之情油然而生蓋

皇子樂善之誠充積於中而英華外發有不知其然而然者昌黎韓愈所謂原於仁義而其言
藹如者於是集見之矣窃考六籍所載言善者甚詳而樂善一語獨發之孟子與道性善稱堯
舜之旨更相表里

皇子誠由斯集而充之明善以誠身本之心而驗之事則精一危微之訓上接列聖之心傳者
莫不於此會其極而世际昇平太和翔洽皞皞焉各相感於至善之中而可以被之賡歌垂之
簡冊者其善為何如其樂又何如也鄂爾泰謹序

雍正元年

皇上紹登大宝

命廷【玉】隨侍

皇四子

皇五子講讀經書蚤夜趨承仰見我

圣祖仁皇帝垂光锡祚曷奕绵洪我

皇上敬承

庭训以裕後昆

圣学相传缉熙光大

皇四子粹质天稟明敏博达而功力缜密朝有课夕有程寒暑靡间有非专攻文学之儒所能希其万一者自经史百家以及性理之闡奥诗赋之源流靡不博览精择讲明而切究之每发一问立一义辄超出於思议之表而皆前人所未发覃心实学者之所宜辨析也含咀酿郁蘊蓄富有时发抒其胸中所见着为论说诗赋诸体之作常不假思索

一挥数千言立就清词邃旨首尾烂然数年来俱不下千余篇

皇子自加?择得如干首彙为一集以示廷玉廷玉受而循绎焉大抵意义渊深文采博赡而笔力之雄俊健捷迈越等伦所阐明者圣贤之精蘊宇宙之名理而所吐露者经籍之膏腴艺林之芳润自昔以文章名家者莫能逮焉

皇子之於文可谓才超而学邃矣抑尤愿

皇子之不以此自多也闻之文所以载道古圣贤修己治人明体达用之大要胥於是乎在匪直工其文词以为观美也故曰非言之艰行之惟艰

皇子以天授之才博通古今之学循循乎祇遹

圣训敬勤无斁誠於载籍之指要平日口诵心维者既能言之又允蹈之自此进德修业日新岁益廷玉所乐得而扬其美盛者诃有涯哉

雍正八年岁次庚戌仲冬月张廷玉谨序

雍正元年我

皇上绍登大宝

特命朱【轼】侍

皇子读书时

皇四子

皇五子年甫十三岁已熟读诗书四子背诵不遗一字已乃精研易春秋戴氏礼宋儒性理诸书旁及通监纲目史汉八家之文莫不穷其旨趣探其精蘊由是发为文章实大声宏彬彬乎登作者之堂矣雍正八年

皇四子自订其所作诗文为一集名曰乐善堂文钞命【轼】为之序固陋如【轼】何足以知

皇子之文伏念

皇子以乐善颜其堂又以名其集读者徒以文视文虽扬扞讽咏咨嗟叹赏乌足测斯编之涯涘乎凡人为一事而或作或辍者所乐不存焉耳

皇子之於文穷年累月抽思探赜俛焉日有孜孜诚有味乎其言之矣然

皇子之所乐者善也非文也如以文而已矣虽如宜僚之弄丸庖丁之解牛得心应手亦徒虚车之饰耳於善乎何与哉乐善之说见於孟子所谓善者仁义忠信而已专言仁则为心之全德而义在其中兼体用而言则仁为体而义为用对忠信而言则仁义又为用而以忠信为体苟存诸中者有一毫不忠不信求几於仁义可得乎易曰立天之道曰阴与阳立地之道曰柔与刚立人之道曰仁与义阴阳刚柔之流行不息迭运不穷者诚也圣人之於仁义亦如是而已矣自圣人言之则为诚诚者天之道也自学者言之则为忠信忠信者思诚也人之道也思诚之功维何格致以启其端克复以践其实戒惧以立其本慎独以谨其几循循於下学以渐几於上达久之而私欲潜消理与心融而乐生矣生则乌可已也乌可已则不知手之舞之足之蹈之天下娛心快志之事孰有过於此者乎钦惟

圣祖仁皇帝德合乾坤功参化育我

皇上钦明缉熙圣以继圣本精一执中之心法发而为

荡平正直之

皇猷万方臣庶是训是行矧

皇子天稟纯粹志气清明晨夕侍奉之下其薰陶涵育於

圣德圣训者固已日新月盛莫知其然而然矣从此敬承无斁优游厌饫戒於思虑之未萌恭於事物之既接进德修业之功孰得而窥其所至哉【轼】尝闻

皇子之自言其文也曰诗歌赋古三百篇之流吾将以为山水以为乐音以养吾心焉耳旨哉斯言凡知者之乐水仁者之乐山以及先儒乐观天地生物气象无往非善即无往非乐无往非乐即无往

非养也书曰非知之艰行之惟艰夫无所得於中而强而行之则不胜其劳苟从事於穷理尽性而涣然有得亹亹不倦夫何难之有

皇子勉之哉

雍正九年辛亥十一月长至日朱【轼】谨序

雍正八年夏六月廷锡蒙

恩命得陪侍

皇子讲席窃见

皇四子孜孜典学日就月将自五经四子儒先性命之精言以至史籍之纪载名人大家之文集靡不探索研究广览博辨务求理道之要归事物之衡鉴文章篇什之桀度根柢融洽条贯浩然有得於中至讨论服习之既久廼举其所得者而见之文抒为论着形为歌咏大抵充实醇粹和平浑厚得天地中和之气亹亹乎蓄之深而出之裕也所作积多彙次成帙题曰乐善堂文钞命【廷】锡为之序昔文中子有言文必贯乎道学必济乎义夫离道义而以为文鞶帨之工虚车之饰固君子所弗尚即援道以张其词引义以畅其说荟萃经训而祇以供文章之用是犹未免岐文与道而二之未得为文之至也二帝三王之道周公孔孟之传见之貌言视聽日用动静之间施之礼乐政刑天下国家之大蘊之为德行措之为事业无适而非道义之衍溢故其着於典谟垂於经传精微广博足以觉世牖民阐道立教而至文出焉朱子所谓有是实於中则必有是文於外其条理分明光辉发越而不可掩者非有所强而後能也仰惟

圣祖仁皇帝神灵天纵圣学高深我

皇上缉熙光明心传相接羲轩尧舜之统绪近在庭闈

皇子朝夕侍奉祇聆

慈诲提命之所启迪耳目之所濡染固已薰陶涵育於圣贤道义之中加以稽古居今考德问业味经史之膏腴撷典籍之芳润宜其发而为文炳炳麟麟若是其盛也若夫体之身心验之行事道义充粹於中而至文辉着於外则可以上媲乎典谟经传而与子朱子之言默相符契又何文与道之岐而

为二哉廷錫因读

皇子之文敢敬绎其义为

皇子诵焉蒋廷锡谨序

我

皇上至德广运圣敬日跻丕显丕承宏兹继述经理万

物悉以我

圣祖仁皇帝之所渊蘊者发为久大之规启佑後昆亦以

我

圣祖仁皇帝之所翼贻者着为纘承之美觀光扬烈继继

绳绳诚哉万古之所独隆者也诸

皇子日承

圣训观感最真莫不器识深厚德性温良勤敏问学不

敢暇逸以故习复之余遂多着述今

皇四子自集其比年所得诗歌论赋选择若干首为一集以示【敏敏】雒诵紬绎至再至三论着则机杼自出罗列万象昔人所谓宏深渊博义理精到者何以加焉至诗歌诸体之作亦莫不毕臻其妙金相玉质和雅冲融求之近古实少伦比向非我

皇上训迪

皇子之方实有承先后垂裕於无穷

皇子之敬承

圣教者实能亲炙其光观感而益善则奋笔抒词之际何以洋洋洒洒迈百家而超伦类也哉夫言辞之中可以见道

皇子之着述固已诸美毕备矣窃念自古圣贤之学非独占毕之为功盖将举身心性命之理家国天下之故一一践履而昭彻之夫而後发之事业者皆为有本之经纶着於文词者亦皆亲切而有味

皇子其母以文之贍美者为足多而尤以行之光辉者为可贵则修词明道德艺交隆庶可不負我

皇上之训诲矣【敏】不胜区区期望之忧福敏谨序

雍正元年【世远】蒙

恩特召入直

内廷随侍

皇四子

皇五子读书相晨夕者九载於兹矣仰惟

圣祖仁皇帝尊经典学久道化成我

皇上圣以继圣学贯天人万邦作则凡所为诒谋燕翼建极以锡天下臣民之福者莫不是训是行

训诲

皇子尤为精详恺摯

皇子仁孝聪明逊志时敏自四子书五经性理纲目大学衍义诸书以及古文渊监名臣奏议之有关於学术治道者莫不讲贯习复蘊之为德行发之为文章不为雕饰藻绘之辞而皆有以合乎仁义中正之旨八年秋九月

皇四子自订其前後所作论序杂文诗赋分为十四卷名曰乐善堂文钞命【世远】序之夫所谓善者在天则为元在人则为仁元者天地之心举天下含生负气灵蠢动植喙息之伦莫不有以若其性而资之以始仁者万善之长爱恭宜别俯仰酬酢莫不由恻隐之心以发故在天曰元善由天而之人曰继善赋之於人曰性善吾性高明广大与天同体乐之者必至於浹洽畅遂乌可已而不自知然其要有三曰穷理曰克己曰虚心人伦物则之原未彻则好善之心不笃书曰惟精中庸曰明善言善否之介当精以决择也然累於有我曷以克乐大学曰慎独濂溪曰果而确言念之初生当谨持而充扩也已克则私去私去则心虚易大象曰君子以

虚受人虚则诚诚则公公则人我之界胥忘咸之感以无心贵故曰天地万物之情可见矣

皇子以此内治其性情敦善行而不怠因之着为心声情深而文明醇茂而雅则

皇子勉之哉古之人无斲示我显德行乐己性之善即乐天之善也乐人之善犹己之善也以名其集以裕诸心以措诸行若谷种之生生而不息亲之若芝兰之臭闻之沛然若江河之决善孰大焉乐莫至焉徒文云乎哉

雍正九年辛亥夏五端阳日蔡世远谨序

濂溪周子曰文所以载道也道无所不在而见之於文自天地之大至於品彙之细皆有以宣其义蕴而发其精华垂之为经纪之为史所以明乎其大也着之为辞赋咏之为歌诗所以该乎其细也而兼综条贯於其中者则莫非道也我

朝

列圣相承凝禧积庆毓秀之源既长且厚

皇上睿智天成文思光被而

庭闱之近所以

垂慈育德者必谆谆於立诚明理之功焉

皇四子以粹美之姿仰承

圣训涵养深醇英华发越宜其施之简墨者炳乎有光

也【基】以浅学叠荷

殊恩备员中秘洊历台垣今复得侍书

皇子日近光仪而亲讲论

皇子以所着乐善堂文钞示【基基】受而读之其气象之崇宏则川渟岳峙也其心胷之开濬则风发泉涌也其词采之高华则云蒸霞蔚也其音韵之调谐则金和玉节也充实光辉包涵衆美文也而进乎道矣抑周子有言圣人之道入乎耳存乎心蕴之为德行行之事业

皇子循是而不已焉则寻流以溯源明体以达用凡仁义中正之规齐治均平之理体验愈深

发挥愈盛洋洋乎岂特为文章之大观哉圣贤要道统会於斯德行事业殆将一以贯之矣

雍正九年岁次辛亥长至月邵基谨序

文何昉乎自羲皇肇起卦图虞书首陈谟典文明之运实由此开然尚书之文简而该周易之文奇而法知非後人摹拟彷彿所可貌为形似者也至尼山辑为六经天下文章莫大於是郁郁之叹厥有由然此後踵事增华分门别类日易月迁而岁不同矣若夫风云月露草木禽鱼触境书怀因时寄兴此逸士之文也熔经铸史含英咀华绣口锦心敲金戛玉此学士之文也割裂经传摘取雅驯帖括自珍科名是竞此举子之文也远追洙泗近师濂洛进德修业修辞立诚此理学之文也至於经国理民布纲陈纪誉隆国乘德遍寰区此士君子得志於时大有为之文也然文虽不同莫不理以主之识以运之气以充之藻采以华之故文之有理即太和之保合运量各正而肆应不穷者也其识见之周详贯注则血脉之流通也其格局之一成不易则肢体之上下有定行止有节也其经营组织光芒外焕则盛德之符睟面而盎背也故思欲深不欲浅识欲精不欲粗格调欲高不欲卑包涵欲大不欲小至於事本浅也而文特深之事本粗也而文特精之物本卑也而文特高之物本小也而文特大之则其取精绘神超然远寄不屑屑於目前腐近文人墨士之习径实寓笼络一切函盖万有之光华则【煦】於乐善堂之文钞独有深契焉盖乐善堂

皇四子馆课文也

皇四子无日不酌古准今朝吟暮诵无日不构思抽秘据案舒毫如是久久所作不啻千余爰叙次甲乙聚而成帙【煦】於雍正八年六月内奉

命在

皇子书房行走因得日亲

仪表细领嘉文总由积学广博兴寄宏敞高步远追扩然无垠用能漱六经之芳润根柢道要增益光芒挥洒於片楮尺幅中俾读之者志翔神豁应接不暇如登大雅之堂而天球河图之萃然灿陈也如聆韶濩之音而金石丝竹之翕然竞奏也如观多宝之藏而奇珍异品之骇目惊心其出不穷也故可以振颓懦可以维风俗可以绍前圣可以诏来兹将於斯文乎是赖又奚必韩潮苏海燕许如椽始克愉心称观止哉胡煦谨序

雍正七年十一月【成天】蒙

恩召至京邸八年三月得入伴

皇子讲读草茅微贱不谙天下事惟洛诵圣言粗识义理辰入申出窃异崇高富贵之地何功之密而心之虚加於寒畯也日既久窃见自孝经四子易书诗春秋戴礼以及左国史汉唐宋

诸家之文靡不淹贯性天之微妙纲目之是非政要之从咈名儒名臣之论理论事达人骚人之言忧言乐靡不列眉指掌而究其精详所着作若论若序记若铭赞若赋若诗盈千累百靡不内朗外润从容愜适於规矩之中乃踊跃懽忭念我

皇上之所以为教

皇子之所以为学至於如此也气质既已清明义理既已昭着问学既已渊洽而言动愈以恭谨以【成天】之固陋所挟者惟此欸欸愚诚耳然土壤细流山海之高深未尝让且择焉盖所见者大而所志於圣人之道者笃矣秋日清暇

皇子自披其所着择其中什之三为一集而曰知之匪艰行之维艰予之言其无谬於古先哲人之言乎果无谬矣其敢遂谓几於成乎昌黎云愈之所好者道也惟恐人之以文视文也老泉谓非天之所与求一言之几乎道而不可得不亦夸大其枝叶乎吾非自珍其文将取以自验也轮辕饰而人弗庸则为虚车此之谓矣至於不涉理不涉事可以助人养心者有三曰乐音曰山水曰诗歌赋亦古诗之流吾将当乐音山水而资其养心也

皇子録而存诸座隅者以此【成天】奉

教序简端绎思经月无踰

皇子面诏之意矣惟恭述

知遇之隆纪课程之实且以见

昭代文明之盛薄乎四海者始自宫中云尔雍正八年庚戌冬日顾成天谨序

目录

钦定四库全书 集部七

御制乐善堂全集定本目錄 别集类六 【国朝】 卷一

论

立身以至诚为本论

读书以明理为先论

休休有容论

信而後谏论

寬則得衆论

修道之谓教论

敬以直内论

上下交而其志同论

君子以虚受人论

家人上九有孚威如终吉论

惧以终始其要无咎论

物不可以苟合论

卷二

论

嘉言罔攸伏论

有言逆于汝心必求诸道论

夙夜基命宥密论

春王正月论

晋荀林父帅师及楚子战于邲晋师败绩论晋侯及楚子郑伯战于鄢陵楚子郑师败绩论作三军论

三月公会晋侯宋公卫侯郑伯曹伯莒子邾子薛伯杞伯小邾子于溴梁戊寅大夫盟论

诸侯同盟于平丘公不与盟论

卷三

论

爱亲者不敢恶於人敬亲者不敢慢於人论以仁育万物以义正万民论

为万世开太平论

动亦定静亦定论

治天下在得人论

传说论

周平王东迁论

宋襄公论

晋悼公论

宋伯姬论

卷四

论

汉武帝论

汉元帝论

韩淮陰背水阵破赵论

西汉总论

汉光武论

李固杜乔论

东汉总论

蜀汉兴亡论

东吴总论

东晋总论

北魏世祖拓跋焘论

卷五

论

唐太宗论

长孙皇后论

唐肃宗论

唐德宗论

唐宪宗论

唐穆宗论

褚遂良论

郭子仪论

陆贄论

李晟论

裴度论

李绛论

李德裕论

唐总论

卷六

论

後唐总论

张承业论

宋太祖论

宋宣仁皇后论

吕端论

韩琦论

明道程子论

程明道告神宗当防未萌之欲论

北宋总论

宋理宗论

岳武穆论

文天祥论

南宋总论

元仁宗论

许衡论

说

复性说

卷七

序

贞观政要序

韩文公文集序

杜子美诗序

朱子资治通监纲目序

大学衍义补序

送五弟奉

命往祭

阙里文庙序

送平郡王奉

命往盛京修理

福陵前河道序

送定边大将军平郡王西征序

稽古斋文钞序

卷八

记

皇祖圣祖仁皇帝恩赐御书记

瀛台记

丰泽园记

田字房记

时应宫记

乐善堂记

四余室记

二希堂记

跋

恭跋

世祖章皇帝御注孝经

恭跋

皇祖圣祖仁皇帝御制避暑山庄三十六景诗

恭跋

皇祖圣祖仁皇帝千叟宴诗

恭跋性理精义

跋朱子大学章句

书魏郑公十思疏後

书新唐书兵志论後

书朱子戊申封事後

卷九

杂着

读二南

读鹿鸣至天保六诗

读鄘卫风

读秦风

读无逸

读吕刑

读秦誓

读董江都贤良三策

读杨涟劾魏忠贤二十四大罪疏

拟程明道请修学校尊师儒取士劄子

拟胡安定置经义治事二斋记

拟尹和靖六有斋记

卷十

表

拟

上颁

圣祖仁皇帝御纂易书诗春秋讲说朱子全书性理精

义等书谢表

拟

阙里文庙告成贺表

颂

九符

赞

十臣赞

箴

虚受箴

铭

乐善堂铭

卷十一

赋

耕藉赋

四时勤政赋

东郊迎春赋

喜雨赋

秋阳赋

灯花赋

凤凰来仪赋

重修

阙里文庙告成赋

卷十二

赋

万寿日庆云见苗疆赋

为善最乐赋

良玉比君子赋

指佞草赋

松竹四时潇洒赋

帝赉良弼赋

天爵赋

相马赋

九日登高赋

五日角黍赋

六艺赋

日方升赋

瑾瑜匿瑕赋

水轮赋

白鹿洞赋

卷十三

赋

文战赋

望峰山赋

迎长日之至赋

景陵瑞芝赋

五丝赋

稼穡惟宝赋

南风之薰赋

书同文赋

秋河赋

荔枝赋

多稼如云赋

圣德合天地赋

鸟求友声赋

麦秋赋

夏云赋

学问至刍蕘赋

卷十四

古体诗

古风十五首

新竹

海子行围同闻之蔡先生五弟读杜子美秋兴诗分韵得肉字

关山月

题李白泰山观日图限韵

喜雨四言诗

读昌黎集

铜鼓歌

读贞观政要

傅修期

公莫舞歌

蠲租乐拟乐府

黄石授书

读司马温公谏院题名记

芝兰曲

高其佩指头画庐山瀑布

观获

拥罍读书歌

煖砚歌

腊八日

自鸣钟

题宋宣和清明上河图用骆宾王帝京篇韵题戴天瑞指画山水图

新蝉

卷十五

古体诗

古砚

拟苏子瞻游赤壁诗

题王原祁秋山图

郊围见西成有象即事志喜

南苑观鱼

驯象歌

白马行

德寿寺古鼎歌

沍寒行

高其佩指头画马

冬夜煎茶

读西山先生大学衍义

饲金鱼

开圃

王瓜

新荷

题静憩轩

鹊营巢

读杜诗

翠云砚歌

冬夜偶作

沈石田秋林独步图

五弟有葫芦笔筒用十年矣属余题句

题白居易养竹记

望雪行

丈室

烧香曲

剪烛词

祀竈毕啖糖饧

屏风謡

水仙

玻璃镜

春夜偶成

相风

填仓日

催耕鸟

素几谣

玻璃窗

卷十六

古体诗

长春

二月十一日晚烹雪水偶成

春蔬

雨前茶

古意

楼松

王叔明山水图

大理石牀歌

春暮西廡骑射

移碧桃

高其佩指头画虎

水竹村

有鸟二十章

采松花

新涨

读苏子瞻题司马君实独乐园诗即用原韵观刈麦

雨後聽溪声

热

读书乐

秋兰

投壶

蓍簪吟

拟杜工部东邻枣树歌

鬪蟋蟀

卷十七

古体诗

题唐岱重溪烟靄便面

读白乐天集

拟柳子厚始得西山宴游诗

相马吟

猛虎行

拟桃花源中人送渔郎出源

拟渔人复至桃花源不复得路

聽鶴鸣

芸香

冬夜偶成

换烛词

吊宋末张陆双忠

遣兴

拟杜工部洗兵马行

传闻

冰牀

帝京岁暮八咏拟乐府

读陶诗

春水泛舟

寻春见山桃始开

晓起闻雀声

马上吟诗好

所见

晓阴

过通州浮桥

灌麦

读范文正公神道碑用宋陈傅良原咏韵鸠唤雨

玉带生歌

雨工

陶琴

蝇拂子

蔺相如

卷十八

古体诗

燥丝曲

北风图

冰碗

拱极城

松风

青玉簪

王明君

雪浪石

骑秋雨

静夜吟

唐寅山静日长图

关山月

櫂歌行

古意

神弦曲

秋夕读高青邱大全集

芦白花

壮士行

织锦词

灌园

虞美人曲

吊孟黻

李夫人歌

题高其佩指头画八骏图

秋夜词

读申屠蟠传

谢人送墨

美人磨镜图

鸥捕鱼

倒挂

牧牛词题马贲画

班婕妤

戲拟禽言

卷十九

古体诗

古风十三首

苏卿节

侍中衣

郑公笏

段太尉笏

侠烈行

秦吉了

藏雪

烹雪用前韵

冬夜闻空钟

射雉行

学仙谣

向火

寒月

过曲涧花香游流杯亭日知阁诸胜

充隐

秋夜遣兴

夜坐

忆远

綠珠

题二十一叔父山静日长小景

鹤媒歌

雉媒歌

冯媼好

神仙曲

海市

觉生寺大钟

题晋戴逵剡山图

恭瞻万壑松风图感而有作

行宫遣兴

雨中舟归

放鲤

舟行

折芳图

卷二十

古体诗

夜雨斋中焚香

雨中闻雁

种松

暮春曲

西海捕鱼

采芝词自题照

缚鸡行

春蚕食叶声

秧马

闻蛙

五日芒种

销夏

花石纲

野田行

姑息行

夜卧聽雨忆平郡王

伐枣歌

郭河阳关山积雪图

探雀儿

?拂子

丰碑行

遣兴

燕引雏

食莲

拟古七首

马贲牧牛图

中枢歌

青青水中蒲三首

鴈奴謡

丹青树

度竹钟声

古别离

唐寅秋林高士图

新月

七夕词

弋鴈篇

见桃下栽松感而有作

饥鹤行

羽林执戟郎

卷二十一

古体诗

题刘松年武夷九曲图忆闻之蔡先生

少年行

雨

同五弟月夜舟归

远将归

城门歌

废宅行

蓼花风

有所思

月夜芦洲

云台歌

除架

秋原草

渔舟唱晚

秋浦泛舟

高其佩指头画鱼

有初行

八月三日作

仲秋曲

夜闻觉生寺钟

桑条韦

游西海

南苑雨中即景

双柳树

海子外行围

鹰搏兔

南红门捕鱼

寄衣曲

瀚海石子歌

濬沼

题唐岱秋山不老手卷

赋得霜花扑晓鞦

题李思训寒江待渡图

风篁笙奏

雀噪

冬夜对月书怀

游法海寺即景

法海寺题壁

冬夜读韦诗

蜡珠謡

村赛曲

霜晓炊烟

嗇夫词

鹤氅裘

草色

萍始生

石径松云

渔庄晚霁

野寺残阳

野店风帘

过觉生禅房

卷二十二

古体诗

熏香谣

渔乡曝网

松阴午憩

温泉荷花

闻鸡起舞曲

题林朝锴苍松霜隼图

六月十四日闻蛰

卧月

题赵文敏中峰怀净土诗画卷

陌上桑

封鮓行

疾风劲草

七夕篇

古风

细柳营行

折槛行

寄衣曲

咏塞上达兰海兰松木笔格

观刈

月夜泛舟

招鹤行

秋江曲送梁学士假归省亲

慕容垂

放灯曲

待月

秋日泛舟西海

题朱贞女传

鹤唳行

鸣雁行

奕

金笼鹦鹉曲

秋日过广通寺

西山下故宫曲

瀛洲亭

明窗秋影

骢马御史歌

江臯曲

秋日同二十四叔父五弟游玉泉诸名胜即事志兴用爽气澄兰沼秋香动桂林为韵十首

题赵孟頫洗马图

卷二十三

今体诗

御赐书经传说彙纂恭纪二十二韵

暮春喜雨

恭和

御制三月三日得雨原韵

题十八学士图

赋得春风传我意

白鹿洞

花影

柳塘送春

夏云

赋得秋水长天一色

水中楼影

新秋夜雨

九日

乾清宫侍宴恭纪

寒夜闻霜钟

题仙子图

游玉泉山见秋成志喜

恭祝

皇父万寿

雍正己酉仲冬阙里

文庙上梁前二日庆云见

上躬诣太学致祭恭纪二十四韵

留侯

郭汾阳

己酉冬十一月二十一日

皇父御书立身以至诚为本读书以明理为先一聯恩赐悬挂书斋以寓训诲至意恭纪

临池柳

行围

春日雨後海子外行围

青云店民家见梁上双燕偶兴

杨柳风

顾孝廉蒙

圣恩特赐进士诗以贺之

赋得鹭立芦花秋水明

九日讲武恭纪

九日登高

霜隼下晴臯

寿五弟

帝京杂咏

辛亥二月朔

皇父赐御书对联恭纪

辛亥仲春

上幸丰泽园演耕藉礼

上躬四推

命【臣】等终亩恭拟应制十韵

西廡习射即事

佛手

晚眺

丁香花

卷二十四

今体诗

燕山八景诗

阙里祭器新成

赐观簠簋鏐登豆爵六色恭纪八韵

恭祝

皇母圣寿

赋得一雨便如秋

雍正九年六月

上以近畿三省雨泽愆期豫筹赈恤之策甘霖叠沛恭

纪十二韵志喜

赋得七月流火

秋露如珠

秋日播麦新生

将猎南苑检点所携书籍

校猎阻雨

辛亥秋九月出南苑行围以穡事未竣不果猎而还

读杨忠愍集

御赐诗经传说彙纂恭纪十韵

恭瞻

皇祖恩赐御笔感赋

镜中灯

雍正九年十二月二十日

皇祖实录御训告成

皇父陞殿恭受礼成羣臣庆贺恭纪

赐乌铜鑪恭纪

平郡王修理

福陵前水法告成还京赋赠三十二韵

孟春十日夜偶成十六韵

玻璃盘

恭读

皇祖御制避暑山庄三十六景诗并閱图感成长句五

首

东作

赋得花随春令发

题蒋南沙相国画屏五景

春日寄朱可亭先生五十二韵

卷二十五

今体诗

三月十三日随

皇父驾幸圆明园得诗六首

赋得好雨知时节

柳溪垂钓

听松

赋得泉和万籁吟

濯缨泉

恭和

御制咏竹原韵

从军行

送邵通参奉

命典试江西

顔鲁公祠堂

读项羽纪

读武侯出师表

裁衣寄从军者

送毅庵鄂相国奉

命经略西陲

赋得鹤舞千年树

活水

冒雨寻菊

挽戴九臯

吊睢阳双忠

恭读

皇祖圣祖仁皇帝御题耕织图四十六景诗敬和原韵

挽蔡忠烈公

卷二十六

今体诗

石鼓

闻军营大捷志喜

景陵宝城山上产石芝一本彩芝四本恭纪二律赐哈密瓜恭纪

恭和

御制冬至斋宫诗二章原韵

再拟冬至斋宫三首

橘

冻云凝雪

冬早闻雀声

恭读

御制丁未长至日诗敬依原韵

村墟夜春

冬日寄蔡闻之先生

诗思

奉和二十一叔父用蝉联体赋得松风雪月天花竹鹤云烟诗酒春池雨山僧道柳泉原韵

立春前五日以诗代书问蔡先生病

腊月十九日立春

玉河冰泮

玉河春柳

探春花

牡丹芽

奉和二十一叔父癸丑元旦早朝原韵

花信风

雍正癸丑二月七日

经筵恭纪

二月八日随

皇父驾幸圆明园恭纪五首

千里镜

清明奉

命恭祭

景陵感成八韵

憇慈云寺

渔阳

盘山

草色

春社

赋得独倚修篁看鹤笼

盆鱼

赋得买夏欲论园

芦塘放鸭

风车

鱼米树

赋得船痕半载书

弹琴峡

朱草

鹤迹

卷二十七

今体诗

奉题二十四叔父裕德轩三十韵

萤

芭蕉

逐凉

立秋夜作

小园闲咏十五首

秋日寄高安朱先生

凉州词

破秋

荷灯

槐市

清河送平郡王西征

秋社

卖菊翁

夜聽落叶声

始裘

赋得野径寻梅见小春

櫟括苏子瞻後赤壁赋即用赋字

送桐城张先生暂假归里

西廡骑射

万年松

御赐端砚恭纪

归鸦

十宫词

帝京杂咏

题宋徽宗竹枝双雀

题吴梅村集

十一月十三日恭遇

皇祖忌辰感成长句

橄?茶

癸丑冬至

上躬祀

南郊回銮?纪

冬至後一日同二十四叔父五弟游西苑试射

卷二十八

今体诗

题唐岱画页

夜坐

水云榭

读王安石传

幻景四咏

冬夜忆平郡王

冬夜食哈密瓜

龙翰傅先生蒙

恩简署司寇诗以贺之

游蕉园

赋得自锄明月种梅花

与唐岱

百衲琴

题易祖栻墨竹卷

雪事八咏

题董元山狩图

题邹一桂花卉十二幅

甲寅元日立春

雪消

春晓

上林花气

清明前三日

御试命和唐人韵口占应

制

榆荚雨

春云

题唐岱仿古十二帧

甲寅三月

上耕藉回銮迎驾?纪

读董仲舒传

同五弟舟过万寿寺小憩

御园从耕?纪六韵

积书巘

蜂衙

赋得沙留鸟篆斜

辘轳声

蝉始鸣

卷二十九

今体诗

烹茶

石笋

过雪上人禅房

赋得得雨溪声壮

雨後池塘闲步

颁冰

题元佑党人碑

夏日园居即事

夏日寄龙翰傅先生

雨中舟行看山

避暑

夏日寄二十一叔父索诗画

赋得人立藕花风

六月晦日作

咏史十首

竹里流萤

雨夜闻梵声

新秋

秋热

秋英

前寄诗索二十一叔父近制承惠尺幅兼辱和章仍用原韵志谢

雨夜闻蛩

阴阳石

晴

郭河阳峨嵋霁雪图

军装八咏

昼漏

洞庭始波

斗蟋蟀

赠从军者

秋畦

秋

中秋前一夕对月

澄江如练

闻鴈

暮过御河桥

吴殿怀古

瀛台观木变石

水始冰

板桥霜迹

刻漏

题焦秉贞人物画册十二帧

卷三十

今体诗

冬月盆菊

冬日同五弟游西苑即事

甲寅冬至

上躬祀

南郊?纪四律

蜡日坐冰牀度太液池志兴

冬夜

灯花

探春

春晓

隔花宫漏

过淋河

清明日奉

命?祭

景陵感成五律

远烟

王原祁雨景画

书开元遗事後

雨中访僧不遇

题赵松雪竹院鸣泉图

题赵伯驹仙山楼阁卷

夏兴三十首

赋得岸痕新雨过

清簟看棋

郑宅茶

夏日园居即事

有至自军中者诗以慰之兼忆如心居士荷珠

题高其佩指头画鸡

平湖雨渡八首

晚晴

野塘月色

水底霞天

新凉

题唐寅画簏

秋信

题丁云鹏罗汉卷

曝书

雨

题石屏二絶

万寿寺方丈小憩

秋晓

重乳燕

过玉簌桥三首

【臣】等谨案

御制乐善堂文集定本三十卷乾隆二十三年协

办大学士尚书【臣】蒋溥等奉

勅重编我

皇上诗文总萃富有日新雍正庚戌之秋始订为文钞十四卷乾隆丁巳取

文钞所载十之三益以乙卯以前续着十之七彙

为

文集颁行宇内至是复以初刻卷帙较繁

特诏内廷诸【臣】校閱删订省去制義一卷得旨刊布愈有以见

日进无疆之学与

圣不自圣之心并昭示无极矣乾隆四十年九月

恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

御制乐善堂全集定本卷一

论

立身以至诚为本论

夫诚者万物之原万事之本天所赋物所受之正理也故在天则为乾元坤元而万物资始资生在人则为能尽其性参天地而赞化育然人咸具是理而鲜能全之故曰蔽於私溺於习而天理几乎失矣圣人者出作君作师修道以立教教人由诚之之道以驯致至诚之域故曰立身以至诚为本岂非实理本於生初在人之自勉乎盖至诚圣人也诚之者择善而固执之者也既能择善又能固执则可进於诚矣而身立矣夫立身不外於言行而言行不可以外饰言必期於有物则言可为天下法矣行必期於有恒则行可为天下则矣诚故也立身必先於忠孝而忠孝不可以伪为视无形而聽无声则养志承欢可云无忝矣公忘私而国忘家则尽忠补过可称匪懈矣诚故也其要在克己己不克则私欲潜滋何以能诚其功又在慎独诗曰相在尔室尚不愧于屋漏先儒有言曰学始於不欺暗室良以独不慎则发念行事终为小人之归耳然则克己慎独者求诚之切务也历观古来圣有安勉而皆本於诚书曰钦明文思安安尧之至诚无间也又曰元德升闻舜之至诚上达也仲虺之诰曰以义制事以礼制心丹书曰敬胜怠者吉义胜欲者从此汤武之勉而诚也勉而诚与至诚无异尧舜汤武莫不称之为大圣故曰及其成功一也然则欲诚其身当择善固执克己慎独以驯致於至圣之域以之参天地赞化育不难矣

读书以明理为先论

天地之间万事万物莫不有理理者天之经地之义民之行也是故日月星辰之朔望躔度陰阳寒暑四时之推迁往来皆天之气也而有乾健於穆不已之理主宰乎其中山川河岳百谷草木之丽乎地以生者亦莫不赖坤元载厚之理以为之根柢人性之仁义礼智赋乎天之正理也因之而见为惻隐羞恶辞让是非之情及变化云为万有不齐之事由是观之天下事物孰有外於理哉故圣人之教人讲学亦曰明理而已矣盖理者道也道之大原出於天其用在天下其传在圣贤而赖学者讲习讨论之功以明之六经之书言理之至要也学者用力乎明理之功以观六经则思过半矣所谓明理者明其所当然与其所以然所当然者父子当亲君臣当义夫妇当别长幼当序朋友当信之谓也所以然者父之所以慈子之所以孝君之所以仁臣之所以忠夫之所以率妇之所以从长之所以爱幼之所以恭朋友之所以责善辅仁之谓也知其所当然然後信之笃而不误於岐趋知其所以然然後喻之深而不能以自己至於一事一物亦莫不明其表里精粗与夫善恶是非之宜夫如是然後理明而有所持循此大学明明德之功必以格物致知为先中庸择善之目必在於博学审问慎思明辨而先儒讲论亦

必以讲明为践履之本先圣後圣岂有二道哉虽然明理要矣而既明之後则又在於行之之功苟或知有余而行之不足则虽精义入神亦无当实用盛德至善竟何有於我哉故致知与力行相须为用而致知则在所当先何以言之知都会之壮丽而欲往观之必先悉其所由之路而後行焉悉其所由之路是明理也身往由之是力行也苟不知之悉而往行之则有失径迷途之讥为学之功亦如是盖知仁为万善之本必不逞私欲而为利己害人之事矣知义为万事之宜必不自昧其羞恶之良而为偷安苟合之事矣此讲学之必以明理为先也故书之称尧曰钦明称舜曰文明尧舜天下之大圣也而其所以成大圣者则以明为本焉彼不务明理而徒以记诵词章自耀者是犹舍璞玉而贵碲碲而彼不知而冥行者是犹去烛而夜行均为惑之甚矣

雍正七年

皇父驾临上书房

亲洒宸翰

恩赐御聯题曰立身以至诚为本读书以明理为先余兄弟盥手祇领谨悬座右爰以

宝训着论二首庚戌之秋手録文钞即以此弁冕全集非敢云阐扬

圣教特以纪过

庭慈诲并志书绅微愀尔

休休有容论

盖尝读秦誓至其心休休焉其如有容焉未尝不喟然叹兴曰懿哉贤人之为国宝而容贤者之利人国家至深且远也可以为千古相臣之法矣古大臣之相天子也其容人有包荒之量其任道有冯河之勇果贤也不遗於遐也果不贤也不昵於朋也是其休休之心根於中休休之色见於外贤人争为之用争为之用即争为国用也岂树党立朋者所可假托哉彼小人者冒嫉为心怀私修怨所致者奸人附势者也所斥者直士抗言者也其訑訑之象见於顔面是以贤人远去君子道消而国亦随以衰微三代以下称贤相者汉有萧曹唐有房杜萧何荐韩信以成王业曹参礼盖公而民歌清静新唐书赞房杜谓帝定天下而房杜不言功王魏善谏争而房杜让其直英卫善将兵而房杜济以文夫萧曹房杜非前古大臣之比就其所以称贤则皆以有休休之量也李林甫卢杞韩侂胄贾似道之徒妬贤嫉能固小人之尤矣即以李德裕之忠直未免有朋党之失王安石之才学终有不容人之讥此容贤乐善之所以难也此秦誓所称休休有容曾子特表而出之於大学之卒章以为万世大臣之标准欤

信而後谏论

诗曰袞职有阙惟仲山甫补之夫仲山甫之补袞职也柔嘉唯则天子是若盖其诚信素达於人君而人君鉴其诚谅其忠故諫无不从言无不聽虽宣王听言之美亦山甫取信有素也故子夏曰君子信而後諫可谓知进言之道矣盖君臣一德上下志通然後可继都兪吁咈之盛而致治於熙皞故人君聽言之道固不可懈而为臣者亦当思所以善进其言之道焉夫人臣諫君非可易尝也必能进思尽忠退思补过职业修於莅官之後忠诚达於未定之前然後法语不伤於猛異语不嫌於諛是故为人臣者必无愬而不諫之理但当素尽其诚使人君信之而已若素无忠诚之心则虽激於一时犯顏强諫而於国事终无济也虽然信而後諫理也若事至於危急一日不言则民受一日之害一日不言则天下之害甚於一日斯亦可以待其信而不言乎故魏徵之与太宗信而諫者也陆贄之与德宗不必待其信而諫者也而後之人均是之者以贄虽不能信於德宗而其忠诚天下後世自信之也

宽则得衆论

昔周公系泰之九二首言包荒解之者曰圣贤之心无弃物尧舜之道欲并生非包荒则不足以体天地之心而尽君师之道也夫子历论尧舜禹汤武王授受之命而继之曰宽则得衆盖自古帝王受命保邦遐迩向风薰德沐义非仁无以得其心而非寬无以安其身二者名虽二而理则一也故至察无徒以义责人则难为人惟寬然後能并育兼容衆皆有所托命易贵包荒职此之故耳盖宽者仁之用也仁者元之德也元者善之长也以是而推之则所以位天地贊化育者皆在是也泰山不让土壤故能成其大海河不择细流故能就其深王者不却衆庶故能明其德何则寬以容之故也诚能寬以待物包荒纳垢宥人细故成已大德则人亦感其恩而心悦诚服矣苟为不然以褊急为念以刻薄为务则虽勤於为治如始皇之程石观书隋文之躬亲吏职亦何益哉孔子举寬信敏公以明历圣之道而以宽为首圣人教人之意其深切而着明矣乎

修道之谓教论

道之大原出於天稟乎天之命以为性而因乎性之良能以为道故率性之谓道实天地自然之理也然性无不善感於物而动则有欲欲日以引而道或有所不行上天眷命作之君师使有以节民之情而复性之善以行其道故曰修道之谓教非道之外别有所谓教也盖人稟五行二气之灵首万物而具五性仁义礼智之德忠信孝弟之行皆备於我然圣者能之而贤不肖则有过不及之差焉古昔圣王之治民也渐之以仁摩之以义节之以礼和之以乐薰陶涵养使德日进而道自修自十五入学廸以性之所固有老而靡他焉故仁让之风周於十室而人民醇厚後世莫及盖教之以孝友睦婣任恤之行而仁道行矣分贵贱定上下明赏罰辨等威而义之为教行矣乡饮社会以及冠婚丧祭莫不有礼而礼之为教行矣师友以解其惑学校以导其趋而智之为教明矣立此四教而使民日就月将无诡异之习诈伪之萌而信之为教得矣故君师之责修而道乃不虚三代以下致治之盛如汉之文帝唐之太宗宋之仁宗皆朝乾夕惕勤劳匪懈然不图其本而务其末徒有惠爱之政而无教养之实方之汉唐则令主比之三代则庸君此无他教不能行则道无由明於天下也夫天无不赋以性之人则天下无不能率道之人人君果能明德以新民修道以立教则朝行而暮效矣何难之有哉而昏庸之

君自谓不能而不行英明之君自谓己能而不屑此三代之治不可以一日复而民之固有之道不可以一日明也夫正身以正朝廷正朝廷以正百官正百官以正万民因民之善以立教即因我之教以复性而古先王所为牖世而觉民者在是矣其於复三代之治乎何有

敬以直内论

人之一心至虚至灵具衆理而应万事备五常而制百行盖人所得於天以主乎吾之一身应乎天下之事者未有大於此者也然放而不存日以昏昧衆欲攻之旧习锢之故杂虑纷纭而不能复完其至虚至灵矣惟当主一无适以全其无妄之体则吾心之虚灵不昧者庶几复存夫子赞易所谓敬以直内者是也盖心者一身之主宰而敬者又一心之根本圣贤之学无非欲人存此心而所以存之之要亦不过教人主敬敬者所以成始而成终者也苟存心不以敬则无以澄其源又何以制其流由是而致知必不能默会乎事理之当然由是而力行必不能笃实返躬以还其性之本然是故文王小心翼翼而孔子告仲弓以出门如见大宾使民如承大祭盖深知敬乃彻上彻下之圣功偶离於敬便非圣人之学也学者当存己之心齐庄中正勿使有一毫之虚妄惰弛终日乾乾闲邪存诚则所谓敬者卓然在我本心存存不放於外而万事万物之理可随时而照察矣

上下交而其志同论

夫天下安寧治登上理必赖明良一德咨谋啓沃然後上下一心庶绩允凝而万方顺则也易曰上下交而其志同可以覩治世之气象矣盖天高而地下君尊而臣卑理势之当然也君之不可下於臣犹天之不可卑於地然天地之形不可交而以气交上下之分不可交而以心交故陰阳和而万物顺上下交而万民化此天地之常经古今之通谊也上下一心君臣相得则治反之则乱合若符节信如应响故尧舜之於臯夔稷契成汤之於伊尹成康之於周召皆以圣明之君交圣明之臣而其致治之盛也勃焉三代下如齐桓之於管仲昭烈之於孔明苻坚之於王猛太宗之於房杜王魏虽未及上古君臣之以圣交圣然亦各以贤明之资得贤明之臣为之辅同舟共济言聽计从故其治亦得小康贞观之风後世称盛盖上下志交则天下义安民受其福理不爽也至於亡国之君莫不由君尊而臣卑志骄而意满臣之忠言不达於朝廷国之大宝弃之於草野小人日侍左右而专事阿諛以取容虽有上下之分实无君臣之谊岂得谓之交哉故二世之宠赵高桓灵之任赵忠张让隋炀之用虞世基岂非交所不当交而远所不当远之祸乎故易之理无定而惟在於贞与君子交则谓之泰而吉与小人交则谓之否而凶书曰纣有臣亿万惟亿万心予有臣三千惟一心夫纣之所与朝夕共处者岂无股肱心膂之寄哉然不交正人而所交皆小人故殷以之亡武王之臣皆周召吕散诸人一德一心故膺天禄而保祚无疆夫人君莫不欲得贤才以自辅然而庶事未康至治不见者盖所谓贤非贤而才非才也然则果无贤才之可用欤曰彼所谓贤者乃善己者也所谓才者乃能以巧术奉上者也方是时草野之贤才深藏不出而已矣在位之贤才逊荒行遯而已矣间有硕果之存亦今日用之明日黜之而已矣又何能久於其朝哉诚能举天下之贤才登之於朝而不疑诚以接之信以待之上下一心交修罔懈则天下有何不治而隆古有何不复哉虽然此特为为君者言之耳书曰臣哉隣哉隣哉臣哉古之大臣一日立乎其位一日尽乎其道陈善闭

邪补袞职之所阙其用与舍惟君之命耳不谓君弗用而有懈惰之心夫如是然後上下相和得交泰之道而都兪吁咈之风日见於朝廷矣

君子以虚受人论

夫君子之进德修业也立身行己不可不诚应事接物不可不虚故易之中孚言立诚之学而咸卦则言受人之学中不可不诚又不可不虚程子曰廓然而大公物来而顺应可谓得行己受人之要道矣大象之云岂有异乎夫天地之常以其心普万物而无心圣人之常以其情顺万事而无情心普万物故万物之心即吾之心也情顺万事故万事之情即吾之情也以万物为心万事为情尚有一己之私心一己之私情乎故天地之大无不覆帔圣人之德同其博厚高明皆以诚积於中而顺物无沮也君子希圣希天必当以虚中为本如山之虚如泽之润则物有感而必通事无隐之不达虚受之心即可以成中孚之化矣夫以山之峻絶似可无借夫物之助矣而能受泽故益增其润君子之谦牧善下方且自视未及培塿之卑也而能虚以受人之言则当日见其益矣彼小人者或予智自矜而耻过作非或狎侮善人而不受其言或外从而内拂之独何心哉

家人上九有孚威如终吉论

治国必始於齐家而齐家又在於修身身修则孚与威自然而合待之以诚而不使之怨临之以庄而不使之狎则家道永昌以之治国平天下将无所不可矣易家人上九之爻曰有孚威如终吉可谓得治家久远之道矣盖居卦终而有刚德得严威之道惟卦终故以象家道之成惟有刚德故能孚威以待下治家之道当慎於其始防之不可不密故初曰闲有家谓及其志未变而闲之也又当善乎其终待之不可不诚御之不可不严在上曰孚威信与威相济则永得治家之道矣不但父子兄弟夫妇之间必如此而後得吉也凡家之中长幼尊卑皆当率是道以行孔子曰惟女子与小人为难养也近之则不孙远之则怨夫惟以威御之则近而不至於不孙以诚待之则远而不至於怨虽然所谓威者岂鞭撻箠楚之加而所谓孚者岂煦煦焉徒事姑息为哉自胜其私语言可爱行止可法而不蹈非礼则人自畏其威矣自勉以仁立爱惟亲立敬惟长妻子好合兄弟既翕则人自感其诚矣此又反身之要而治家者所宜先也

惧以终始其要无咎论

易之为道大矣以在天者言之体天地之撰括陰阳之精而统备乎五行万物之理以在人者言之君臣父子夫妇昆弟朋友之伦日用酌酢吉凶悔吝忧虞得失之事莫不具载而原始要终之道有操之一心而有余者故易大传曰惧以终始其要无咎乃总易之道而提其要以示人也盖人之立志行己欲自践於圣贤之域者其术固非一也然總而言之不外於戒惧一心何则人受天地之中以生其性固善然为私欲所蔽则心放佚而莫知自省以至有过行而入於凶咎圣人欲其思也乃教以成始成终之道莫若以惧为本故系泰之上六则曰城复于隍否之九五则曰其亡其亡系于苞桑夫泰之为卦上下交而其志同也否之为卦上下不交而天下无邦也然吉凶顿异者泰之上六治极当乱之时而志满心骄不能戒惧故凶否之九五

乱极当治之时而戒谨恐惧故吉此非惧以终始之大验乎推之谦之六爻皆吉震之六爻无凶以能戒惧而得亨也豫上九之象曰冥豫在上何可长也谓不知惧则自吉而向凶也夫之九二曰惕号暮夜有戎勿恤谓能自惧则虽危而无咎也盖易之要以贞为本惧则能守贞矣以孚为贵惧则能有孚矣危者使平易者使倾而终归於惧以终始人能以此为法既惧之於其始以防微杜渐又戒之於其终以持盈守成则处事之要为学之法皆备於是矣

物不可以苟合论

天下之事未有可苟且以行者自小以及大自近以至远莫不皆然故礼者所以辨上下定民志天下之事不正之於始必不能成之於终若不由礼而以苟合则吾未见其可也盖自上古结绳以降尧舜以文明治天下於是焕焉称治自兹以往圣帝明王为治莫不以礼为本然後渐之以仁摩之以义和之以乐而天下化成以之奉宗庙则有奉爵焚燎肃雍恭敬之仪以之接宾客则有宴享进退揖让升降之等以之理民则有分田兴学教齿教让等威服用之文凡诸冠婚丧祭皆彬彬然有节有文而从无苟且以从事者秦汉以降无圣明之君能复古礼惟以一己之便宜而行一时之权变故有宋大儒皆以为苟道盖凡物之所以成始而成终者莫要於礼而易之所谓物不可以苟合者其义诚广大而精深也且道心人心之分君子小人之辨皆在於是焉何则人之入於私而不能自振者皆由人心之动不能抑制遂尔因循苟且以至於不可救药而天理?矣至於君子正身修行不入於小人之域然小人或伪为善以诱君子君子不察而与之交终身为耻此尤不可不慎者也故予推其意以戒後之人当惩苟合之失而造次必由於礼庶几永终而无弊也

御制乐善堂全集定本卷一

卷二

钦定四库全书

御制乐善堂全集定本卷二

论

嘉言罔攸伏论

人君表正万邦富有四海万几庶政日陈於前诚有所不至明有所不周差之毫厘谬以千里古先哲王之明日达聪咨岳咨牧者亦期嘉言之罔攸伏而已盖天下之智有不同而天下之理无一定故恃一人之智以为智不若兼千百人之智以为智人君虽明足以照万邦烛万事然天下千百人之智又何能尽兼万事之至赜至动参错不齐者又何能尽明所赖人臣陈善闭邪补袞职之所阙使嘉言谏论日闻於前然後明微烛隐政无不通而明无不照然人臣之能尽言者由人君有以启之耳苟人君孜孜黽勉乐受尽言则人臣亦何惜而不言哉故大禹之祇承于帝曰后克艰厥后臣克艰厥臣帝之答禹曰允若兹嘉言罔攸伏君难其位而好聽正言臣难其位而思尽正言此野之所以无遗贤而万邦咸寧也夫君如舜臣如禹而一时君臣之所共勉者惟在各艰其位而受尽言舜又不敢当以为惟帝时克则後世之欲图治者舍是岂有二道哉三代以降推汉文帝唐太宗宋仁宗为令主然文帝仁厚俭约有余而一时无大儒骨鯁之臣宋仁宗有韩范富欧诸臣而不能尽其用惟唐太宗以英武明智之资得房杜王魏为之臣终日陈言绳愆纠谬太宗屈已从之贞观之风远过於文帝仁宗者职此之由由是观之纳谏聽言顾不亟哉桀纣幽厉始皇之亡也其时之嘉言无闻焉岂果无嘉言之臣哉龙逢有嘉言而桀杀之比干有嘉言而纣杀之厉王设监谤之巫始皇有妖言之禁夫舜禹君臣兢兢焉惟恐嘉言之伏而此数君者方遏之絕之又从而罪之欲其不亡岂可得乎尚论者所以游心於都兪吁咈之世也

有言逆于汝心必求诸道论

人君以一身抚驭天下臣民之衆虽有聪明睿智之才而耳目所不及思虑所未周则或壅蔽不明必赖忠正之臣谏言之士明辨事理之是非以启其聪而开其蔽然後正心以正朝廷而天下皆化於正虽其言之逆心亦求诸道而已矣今夫草茅巖穴布衣韦带之士白首穷经服膺圣学将以兴治教於天下效忠愍於吾君凡天下之事知无不言言无不尽虽履尾批鳞而不顧如是者固有猷有为有守之纯臣也然不可常见也吾观古来之臣欲言数事而进对之际十去其七八者多矣非天威咫尺难於尽言乎然犹不可多得也人君出一言而百诺承之行一事而争先颂之谄諛之日进佞巧之日精其心惟在持富贵保宠荣於天下之治乱安危固不存於心也人君何赖焉故为人君者当纳谏求言其言而逆於心者必察其衷情求诸正道而虚心以受之锐志以从之如是则嘉言正议日闻於耳而於天下之事理臣工之贤佞民情之疾苦风俗之厚薄明若秉烛易如指掌以之出治理民何难之有哉即以太甲一身论之

不惠阿衡之时伊尹作书以告矣而王维庸罔念闻是逆於心而不求诸道也是以有永图之戒既克终允德而复位则惟伊尹之言是听是逆於心而求诸道也是以为守成之令主不求诸道则乱求诸道则治听言者当知所鉴矣

夙夜基命宥密论

周自后稷公刘太王积德累仁至於文武而新天命抚有四海然继续其先明以承前业者则又成王之宏深静密之德有以夙夜基天之命也盖王者受天命以临天下其所以潜通帝载俨然若临者固无时而间也然不宏则体有亏不深则用易竭不静则不能定性以立极不密则不能使冲漠之中万象森然毕具故宏深静密则寛裕而有容粹精而不杂宏深者乾道变化各正性命阳之德也静密者坤厚载物德合无疆陰之德也合是二德而夙夜无怠以承之非至德其孰能若是乎不显亦临无斁亦保者文王也我其夙夜畏天之威者武王也夙夜基命宥密者成王也其畏天保命则一也是以文武以之得天下成王以之守成命延祚八百子孙永赖岂不宜哉

春王正月论

春秋为尊王之书始自隐公不曰王春正月而曰春王正月者其意深矣盖春者天之所为也正者王之所为也欲王者奉若天时诸侯上遵王法示大始而欲正本也是故以春生之气贯四时以王者之命正诸侯以正月之月统一岁王者所行必上本於天不承天以制号令则无法故以春居王之首诸侯不尊天王则无正故以王居正月之首政者正也政莫先於正始故以正月为一岁之首所以教後之王者上承天以制法度下建极以制诸侯则政行而教举矣至於体元调元之说既失之穿凿胡氏行夏时之说虽以伊训证之而夫子乃从周者况春秋所书春正月无冰春二月无冰若用夏正则无冰不足为异矣冬十月陨霜杀菽若夏之冬则不应尚有菽矣周之改月改时何待论哉

晋荀林父帅师及楚子战于郟晋师败绩论

夫战而言及主乎是战者也春秋善救困晋师之为郟之役也为救郑也救郑而春秋不书又不言楚晋战于郟而使晋主之以罪晋者何也陈人弑君而晋不讨春楚子围郑晋又不能速救以至郑与楚平至夏六月而後使林父帅师救之斯缓矣故救郑不书责缓也至於林父之罪则在不能制驭其属畏失属亡师之罪从韩厥分恶之言知难而冒进是弃其师也而又鼓于中军首为弃甲曳兵之举故後诛先穀不去其官此称败绩特以林父主之所以着其失权惶惑败衆亡师之罪也晋侯及楚子郑伯战于鄢陵楚子郑师败绩论

称及以战者志乎战者也君伤则不言师败绩者君重於师也是故鄢陵之战书晋侯及楚子战主乎晋也书楚子败而不言师君重於师也郑伯伯也序於楚子之下者凡战先主兵者楚主兵而郑从之也称师以败者君无伤则师为重也而抑楚子罪郑伯幸晋胜之义一举而备矣盖自齐桓没後楚势方张横行列国凭陵诸夏若非晋文城濮之一胜则楚害有不可胜言

者晋文没而楚复盛自荀林父邲之败楚之陵驾尤甚十三国盟蜀俨然主列国之盟晋之灵成景公屏息而不敢动至厉公乃能一败之於鄢陵可谓幸矣不然者楚将倚郑为援长驱中原周之宗祀其几不为荆蛮所?乎然文公自城濮之胜主臣一心用垂霸业厉公胜於鄢陵而遽自骄纵以殒其身以是知范文子之言可谓远虑君子也

作三军论

周自平王东迁政令不行礼乐征伐自诸侯出于是朝覲之礼废尊王之典衰而会盟征伐一归霸主顺者安之逆者伐之王纲陵夷而天下之事不可为矣鲁自隐公至於襄公凡九世而襄公之世三家始专政所谓自诸侯出十世希不失者也三家之专政始於作三军三军者鲁先公之受於天子者也鲁颂曰公车千乘公徒三万则三军为鲁之旧明矣而云作者盖鲁已废三军为二军至是忽以私家之乘补公室之伍而为三军圣人谨书其作毁而季氏险戾无君之罪毕着矣盖季氏专鲁已数世至於宿而遂怀窃国之心故乘襄公幼弱托於增兵备敌而作三军三分鲁地而十二分其民季氏得四叔氏得二孟氏得一而归其五於公以事大国徵师承贡则季氏沛然有余而公室用多二家力少其势不得不毁又显令於国中入季者无征入公室者倍征则二家之民属公室者如?坑阱急思自脱故一旦尽夺之公民咸顺焉而公莫可如何也方作三军时公年始十三故叔孙虽知其不可而不敢固争至於毁之则四分鲁国之地与民季氏得二二子各一不独君若赘疣而二子亦不得不屈服於季氏矣其毁中军亦乘昭公初立叔孙身死家乱而急夺焉故余尝谓宿之陰鸷狡谲乃万世乱臣窃国之渠魁而三军之作毁则田氏篡齐三卿分晋之前辙也故特发其义以补先儒所未备云

三月公会晋侯宋公卫侯郑伯曹伯莒子邾子薛伯杞伯小邾子于溴梁戊寅大夫盟论

自平王东迁王室卑微诸侯放肆会盟征伐一归伯主而政在诸侯矣及其末也大夫擅权政归私室会盟约誓出自诸侯转不能保其无寒出自大夫则可必其守信此溴梁之盟所以徧刺天下之大夫也孔子曰天下无道则礼乐征伐自诸侯出又曰天下有道则政不在大夫凡所以伤周之衰陵夷至於诸侯专政又陵夷至於政归大夫风愈下而俗愈卑天下之事不可为矣故溴梁之会诸侯皆在大夫主盟圣人谨书之以为诸侯相盟已非正矣而又至於大夫专盟使君若赘疣焉则人心安有不乱世道安有不衰者乎自此之後晋移於六卿鲁入於三家齐权属崔高卫权归孙甯皆溴梁之会有以启之也故曰溴梁之会大夫不臣也

诸侯同盟于平邱公不与盟论

春秋为本国讳臣子之於君父理当然也然内屈外直则讳之外屈内直虽受辱不讳也曷为不讳人以无礼加之适足以见彼之无礼耳故黑壤之会公不与盟则讳之屈在公也平邱之会公不与盟则不讳屈在晋也同不与盟而一讳一不讳焉圣人之意可见矣盖平邱之会德则不竞矜兵甲之威以肆胁持之术非若黑壤之正也受邾莒之譖而不见公非若彼不相朝聘公实有罪也是则晋恃兵力贪财贿而以无礼加兄弟之国於鲁何有焉且王臣无下盟之礼公不与盟正可以免盟王臣之罪耳况平邱之会晋之甲车四千乘徒欲示威於衆至自言

虽以无道行之必可畏也而终不能禁烦言之啧啧方之桓文衣裳之会盖亦末矣晋之君臣乃施施然安於不竞无愤耻自强之志而齐人不盟郑人争承叔向皆以辩给幸而胜之晋伯之不振自是而益甚矣

御制乐善堂全集定本卷二

卷三

钦定四库全书

御制乐善堂全集定本卷三

论

爱亲者不敢恶於人敬亲者不敢慢於人论

书曰立爱惟亲立敬惟长始于家邦终于四海古昔圣王之治天下也修孝悌忠信於一家之中老吾老以及人之老幼吾幼以及人之幼然後化周天下而风俗醇美故书之称尧曰九族既睦平章百姓诗之美文王曰刑于寡妻至于兄弟以御于家邦圣帝明王之致治保邦惟推此心以及天下亲亲而仁民仁民而爱物舍是无他也孝经所谓爱亲者不敢恶於人敬亲者不敢慢於人盖孔子教治天下者以大孝也夫人君以天下养其亲岂非大孝哉然非徒养之又必以得其欢心为贵而欲得亲之欢心则在爱之敬之而已矣虽然徒爱其亲而恶於人徒敬其亲而慢於人未足为孝也必上而爱亲问安视食欲其身之康强而无他也则推而以及在下之民皆欲其丰衣足食以享太平之业内而敬其亲视於无形聽於无声欲其亲之欢心而无间也则推而以及在外之臣工皆敬之以礼而弗敢狎侮夫如是则可谓能推已以及人不恶於人而人亦不恶矣不慢於人而人亦不慢矣爱敬之道尚有大於斯者乎盖爱敬者仁义之用也爱亲敬亲者推施之本也尽爱敬之道而由近以及远所谓以不容己之心行不容己之事得乎其本焉故也否则不爱其亲而爱他人者谓之悖德不敬其亲而敬他人者谓之悖礼彼薄於所亲而於人貌为爱敬则所谓伤礼败伦之大又可谓之不恶於人不慢於人乎夫子推言其本而大其施是在君人者推此诚心以及於万类焉斯已矣

以仁育万物以义正万民论

天以陰阳五行化生万物阳以生之陰以成之生仁也成义也阳以时出布施於上以主岁功陰入伏於下而时出佐阳是以阳开陰闔春温秋肃而万物生生不息於乾覆坤載之中此天地之大用也圣人法天而立道辅相天地之宜以左右民亦必仁义兼施德礼相维然後能致大顺大化以成参天地的功故通书曰以仁育万物以义正万民以见圣人与天道无二也盖古昔圣王制治保邦其养民也为之分田树畜五亩之宅树之以桑使之饥饉有备祁寒有御网罟佃渔以取山泽之利衣服宫室以安其体舟楫服牛乘马以逸其身仁以育之者至矣又恐养而不教则近於禽兽於是制庠序学校以教之使知父子有亲君臣有义夫妇有别长幼有序朋友有信有不率教者为乡遂寄棘之法以纠之为嘉石圜土之罚以懲之终不移而後附於刑其以义正之者又如此於时之民泯知识而顺则者遍於作息耕凿之伦被声教而暨讠者届乎东西朔南之远是以黎民於变而教化大行不然者仁育而不义正则民即於悖淫义正而不仁育则民苦其严急二者本相资以为用也後世人君施一二善政於民曰此仁育也然其实惠於民何有焉甚者以刑殘民以罚困民曰此义正也则民反受其毒而生

灵苦病矣故仁育义正君人者治世之大本位天地育万物皆由是以达之耳

为万世开太平论

夫天下和平万世永赖者以圣教之昭大道之行可以垂之於天下後世也去圣久远道丧文衰故民有相争相怨之弊士有偷惰苟安之习无奋然而起以拯天下之溺开万世之业者惟赖圣王尽己之性以尽人之性明明德以新民使天下礼明乐备雍雍然於光天化日之中为千载之规范然後谓之貽厥孙谋万世永赖可也盖民受天地之中以生仁义礼智咸备於我首万物而最灵惟溺於私欲无明善复性之功故尊卑上下智愚贤否强弱衆寡不能秩然而受范然其本心之良未尝尽泯圣贤者兴因其固有之良而施其礼乐刑政之法聚之於庠序学校董之以孝友睦婣使民咸归於善大道灿然於天壤虽有後圣者出不易斯道此张子所谓为万世开太平也然其所以开太平者亦不过穷理克己修此身以治人而已是故尧舜禹汤文武周公衍道统之传有敬德勤民之功孔子孟子虽不得用於时亦修道明伦垂世立教其为天下後世计至深远也彼管商申韩之学徒以刻薄诈伪之私?溺天下後世之人心而已太平之开尚何望哉张子谓为天地立心为生民立命为往圣继絶学为万世开太平目虽有四其理则一而已耳何则天地之心即所谓大哉乾元生物之心也人能体天地生物之心去私以行健仁心以爱民斯亦开万世之太平也为民立命即教养之谓也苟能养之有道教之有法礼乐刑政平中明允而可以为千载法斯亦开万世之太平也继往圣之絶学即道统之所由以传也果能修身体道阐精一执中克己复礼之学以绍先圣之微言开後来之志士斯亦开万世之太平也故曰其事虽殊其理则一也有志於圣贤者当用直内方外之功知行并进使体立而用行德崇而业广则所谓开万世之太平者当不为虚语矣

动亦定静亦定论

天地之大德曰生终万物始万物而万物莫不生长收藏之各得其时然其所以大生而广生者亦曰易简而已矣圣人体天以治其心以修其道以合体用而贯显微然其所以聪明而时义者亦曰定性而已矣定性者岂不思一事不虑一物兀若槁木而已哉动亦定静亦定乃其所以为定性也善乎易之咸九四曰贞吉悔亡憧憧往来朋从尔思贞者定也定则吉而悔亡矣憧憧往来者不定也不定则朋从尔思朋从尔思凶可知矣程子亦曰天地之常以其心普万物而无心圣人之常以其情顺万事而无情无心无情者非无心无情也无私心无溺情也惟无私心故心普万物无溺情故情顺万事非动亦定静亦定之谓乎君子之学廓然而大公静之定也物来而顺应动之定也静定故主一无适虚明洞彻而内邪无自而生动定故顺理而行措施咸当而用志不纷於外内外兼修本末俱备入圣之功岂外是哉

治天下在得人论

夫人君受天明命表正万邦必当使天下熙皞治登上理泽被苍生仁及庶物然一人之聪明有限尧舜之圣犹待臯夔稷契之辅以亮天工而熙庶绩况未及乎尧舜而可不以用人为急乎古之圣王自公卿大夫以至百执事皆称其任贤者在位能者在职故天下治而华夏安百

姓乐业风俗淳厚惟其用得其人而已历观三代以下愿治之君必求贤良之臣故汉高祖之兴汉有张良萧何故也光武之复汉有邓禹马援故也唐太宗之兴唐有房杜王魏故也宋太祖之兴宋有曹彬赵普故也即继世之君使天下富厚治几三代者如汉之文帝则有周勃申屠嘉宋之仁宗则有韩范富欧阳故当时大治後世颂圣而人君亦享其安康诗曰济济多士文王以寧书曰惟后非贤不义苟人君知用贤为贵上焉者待以师傅之礼隆其体貌推以诚心聽其谋猷专其职任俾有以行其道而尽其才虽中才之人亦待之以礼勗之以诚使之黽勉以任百执事之职则天下有何不治而政事有何不举者乎若曰用贤非难而得贤为难则是自画矣夫以人主之势心之所向天下景从虽珍禽异兽远方难致之物外国絕域之所生心苟欲致之亦可以致也况贤人君子未出寰中也其心亦未尝絕世也而独以为难不亦惑乎今夫为巨室必求工师雕璞玉必使玉人焉有治天下而不求贤才是何异夫却行而求前乎使人君好贤之心若渴聚天下之英才任以朝政信之无疑又使各以其所识举之朝廷如是则天下之贤咸登用於朝大臣有臯夔之风牧民有龚黄之绩庶司小吏各称其职百僚师师中外相维虽有一二小人苟容於朝亦如裴矩之佞於隋当太宗之时则化而为敢言者矣由此观之人君一用贤而其效如此彼昏庸之君妬贤嫉能亲小人而远君子者其亦惑之甚矣孔子曰去谗远色贱货而贵德所以劝贤也盖贤人君子正己不屈若人君聽谗君子将救祸之不暇又何能尽其谋猷乎近色则心昏贵货则志鄙尚能用君子之言乎君子亦将飘然而远去矣此又用人之最要而人君不可不知者也

傳說論

昔在高宗旧劳於外爰知小人之依旧学甘盘乃切求贤之意用能恭默思道帝賚良弼而嘉靖殷邦论者谓高宗素知傳說假以梦寐乃圣人之神道设教耳夫高宗苟知说可相矣以人君之力何难於擢用而为此诡诈之行哉诚以精诚通於神明纯一不二与天无间故梦寐之间帝賚之以良弼亦如舜之见尧於羹墙文王之卜得吕望孔子之梦周公此皆非机心巧术之所能为乃圣人至诚感通之妙道也说以版筑之人一朝履相位左右殷宗首以从绳从谏进说用能启沃王心纳诲辅德迹其交勉之言皆经世综物之要克副盐梅舟楫之任君臣相得益彰岂不堪与帝廷之賡歌比隆哉或谓君奭之篇称武丁甘盘而不及傳說者何也盖成就君德则盘先於说绥民治世则说多於盘且周公推本高宗求贤之美而归其功於甘盘耳至若招俊乂而列庶位暨海邦而仰皇风绍乃辟於先王对天子之休命则舍说孰克当其任哉

周平王东迁论

夫武王营洛邑使周公居之以监殷顽民非有意於迁也卜居九鼎以象天下之中以抚殷民而已其後平王迁居洛邑而周室遂微虽未即亡然终以不振矣故苏子瞻曰周之失计未有如东迁之谬信哉是言盖王都者本也本摇而未安者未之有也今平王舍其本而求其末欲求其安其可得乎诗曰古公亶父来朝走马说者谓古公迁岐而兴周当是时太王一小侯耳迫於狄难不得已迁岐以立国也盘庚之迁复殷之旧也迫於河患非捐所有以与人也今夫有盗贼之患者必隆其墙焉防其户焉斯盗无由而入矣未有一遇盗而弃其宅者也平王之

东迁也一遇盗而遂弃其宅者也弃其宅而求安此平王之所以谬也羿浞之乱也少康能兴之厉王之中衰也宣王能兴之是皆不弃其旧物而有所恃以为安者也东迁之後诸侯不朝政归盟主虽有天子之名而无天子之权非平王之过其谁之过哉故曰周之失计未有如东迁之谬者也

宋襄公论

夫修内者王修外者霸汤武行仁义而王天下齐桓假仁义而霸天下修内者本於心物来则应事毕则止修外者以一人之智力应天下之万事故一日少懈而智力穷焉此齐桓之所以九合诸侯一匡天下功盛业炽而终不免於意满心怠身没国危何则修外而不修内也若宋襄者内不修德外不修政至愚而可嗤至陋而可悯者也夫齐桓用管仲而信任之城邢救许存卫图伯之日如其勤也协比诸侯辑宁东夏垂二十年内外无患然後问包茅之不贡而楚受盟定伯之功如其难也而宋襄欲以顷刻霸天下甫纳孝公而谓霸统在已矣邾曹来会而谓诸侯归已矣至於用鄫子执滕子围曹邑其暴虐无道已甚矣而欲求诸侯於楚不求之已而求之人孟之会执之自楚薄之会释之自楚辱亦甚矣为宋襄者当修己睦隣养威植德以图後举而不自量力伐郑致楚泓之战犹狃於迂论以为不鼓不成列不禽二毛身伤而死亦可悯矣夫襄公无所树立而列於五霸之中诸儒多论其愚谬而不言其所以霸及其所以败者余尝考之左氏传宋襄公之为世子也让国於目夷目夷不肯既即位以目夷为仁使为左师以聽政於是宋治则知宋之所以治与其所以霸及其所以败皆由目夷之用与不用也使目夷聽政而信任之则宋治用鄫子目夷常谏矣围曹盟鹿上伐郑目夷皆谏矣而皆不聽於是前有被执之辱後有身死之耻由是观之用一贤而一国治失一贤而一国乱不惟国乱身且死焉岂不可鉴也哉桓公用管仲而霸文公用子犯而霸秦穆用百里奚而霸楚庄用孙叔敖而霸宋襄始用子鱼而霸後不聽其言而死霸天下者犹当以用贤纳谏为急则欲行王道而正身以正天下者岂可不以用贤纳谏为急乎

晋悼公论

自晋文倡霸後之子孙世嗣其业然灵成景厉四公之时楚势渐张晋霸不振灵公政堕柄分无抗霸业之志成公力弱事浅无霸诸侯之权景公心劳谋舛无馭天下之略厉公外强中乾无服人心之道至於悼公乃能以幼冲振霸略其入国也施舍己责逮鰥寡振废滞匡乏困救灾患禁淫慝薄赋斂宥罪戾节器用慎用民欲无犯时以定国本其图霸也举不失职官不易方爵不踰德师不陵正旅不逼师以靖内而抚外忠厚而不迫坚忍而持重有长虑却顾之思无逞志快意之举是以无?譚灭遂执曹卫之失而诸侯从之不令而来岂非霸业之盛方之桓文为已过哉然称霸者独许桓文为盛而不言晋悼者岂其萧鱼之後霸业遂衰大夫用事之故欤且不讨孙林父甯殖之恶而盟之以定卫剽则桓文必不若是也岂非中行偃貽之患哉盖其始之盛也以用知罃其後之衰也以用中行偃用知罃则讨宋鱼石九合诸侯服郑弱楚而悼公亦清明而无失政用中行偃则伐秦迁延不讨卫贼悼公亦怠终而不振余故表而出之以明君天下者必自择相始

宋伯姬论

春秋乃圣人经世立教之书忠臣孝子义士节妇之事未尝不大书特书屡书而不一书所以獎人为善之意深矣故纪宋二姬屡见於经岂非以守节不渝贞义昭着足以为天下妇人之轨范乎然纪叔姬之守义善终又未若宋伯姬之遇灾而守节不渝之难也其处变不改其常遇灾不失其志实足以为天下後世之标准也今夫安居无事之日自许其身为贤圣不以死生患难动其心者岂鲜也哉及事变之猝至横祸之突加失其志易其心者多矣男子犹然况妇人乎而伯姬年至六十火炎其宅必待傅姆之毕至其心以为越义求生不若守义而死遂逮於火巍乎泰山不足以为高暴虎冯河不足以为勇若伯姬可谓大勇矣是以圣人笔之於经以戒後世之处变者此义若行天下岂复有乱臣贼子哉伯姬非特天下妇人之轨范亦天下男子之轨范也

御制乐善堂全集定本卷三

卷四

[集部,别集类,清代,御制乐善堂全集定本]

钦定四库全书

御制乐善堂全集定本卷四

论

汉武帝论

世之论武帝者以为穷奢极欲好兵黷武与秦皇无异贬之矣然余则以为犹有可嘉焉何也人莫难於知过莫难於悔过莫甚难於改过武帝即位以来内多欲而外施仁义繁刑重斂崇尚方术内侈宫室外伐四夷中外疲敝远近困乏实无以异於秦皇而秦皇身死国危为天下笑武帝歿後称为世宗上配太祖子孙承之历数世者岂非轮台悔祸之功哉盖武帝英明之主其向之所为者固溺於一时之私而不自知及其翻然改过旋乾转坤视昔之所为恍如二人非英俊明智其能如是乎至於兴太学举孝廉修祭祀改正朔定历数協音律考礼仪则又有功於後世者虽然与其知过而能改孰若无过之为全哉况天子一时之过即天下无穷之害也使武帝而无前非加以休养生息用贤进能虽古之贤君亦何以过哉

汉元帝论

自古亡国之君或失於刚暴或失於柔懦刚暴者其亡速柔懦者其亡缓亡速者一知其将危而济之以寬和犹或可救於末路亡缓者日甚一日沦胥以渐虽有贤者亦无以善其後矣故刚暴之亡国也或聚斂诛戮之已甚衆叛亲离而祖宗之德泽未泯身虽亡而国祚有不絶者焉柔懦者或权臣或国戚或宦寺或女谒大权一失威福下移身虽苟安於一时而至子孙未有不亡者是柔懦之亡国又甚於刚暴也元帝之失失於柔懦当即位之初萧望之刘更生周堪张猛皆正人也使元帝早能英断收揽乾纲诛殛恭显为国除害岂不与宣帝比隆哉顾乃信宦寺之谗望之之死而更生废堪贬黜而猛自杀望之之死仅得恭显辈免冠一谢而已小人亦何所惮而不为哉虽质本仁柔性好儒学贡薛韦匡迭为丞相然所谓仁柔乃姑息之爱妇寺之仁也所谓好儒乃徒事文墨嫺典故之儒而非笃学守道直节不阿忧国忘身之儒也汉业之衰不自元帝始哉吾故因元帝而备论刚暴与柔懦之失着於篇

韩淮陰背水阵破赵论

兵以正合以奇胜所谓出奇无穷者乃由谋审志决虽外见危形而实立於不败之地若韩信背水之阵是也盖以数万乌合之衆深入远鬪以当二十万守险待敌之兵若以正合必无幸矣信谓驱市人而战之非置之死地则皆走其自审可谓明然使置之死地而无必胜之道是

以其卒与敌也故以精骑二千伏赵营侧然後诱赵以背水之阵赵方以信为失计故空壁而出而二千赤帜已入赵壁矣既背水为阵以固士卒之志又伏其营以乘其隙赵人果空壁而出而营拔於汉动其本矣还顾则本既动摇以战则我有固志奋死之卒彼军虽多亦无如之何矣所谓谋审志决外见危形而实立於不败之地也白起自言其破楚败魏溃韩乃计地利军势自然之理不足为神与信之破赵参观则知兵法之奇变皆握必胜之谋知己知彼而非尝试以徼幸明矣

西汉總论

自秦失其鹿海内扰乱英雄羣起以争天下项羽?秦以暴易暴而高祖用贤任能豁达大度平定海内卒践帝祚传之子孙为三代以下享国长久之首虽天命有归亦高祖之英明足以为开创之贤主也观其以张良为谋主以萧何为相以韩信为将而终以?楚岂非知人善任之明验乎独即位之後刻薄少恩有功之臣鲜能全者虽帝之失亦诸臣之身无兢兢於当世之禁云惠帝天资仁厚乃遭吕后之虐耽於酒色以自戕其身若无周陈之忠宗藩之强则汉室之祚几何不为吕氏所窃哉文帝入继正统寬仁恭俭爱民务本身衣弋绋帷帐无文绣约已师俭为天下先南越自立以德怀之匈奴入盗令边备守专务以德化民培养汉祚帝有力焉景帝遵父之政与民休息亦称小康然听鼂错之言遽削七国又怵七国之强而杀鼂错周亚夫以方正功臣被杀则景帝不无少恩之讥云武帝内多欲而外施仁义穷兵黩武疲民弊国宫室苑囿盘游怠敖神仙方术开疆扩土凡害民之政无不行焉独其崇儒重道求贤纳谏为可称耳孝昭以幼冲之年辨霍光之忠可谓明矣使天假之年得儒学名臣为之辅则周之成康不是过也宣帝起於闾巷知稼穡之艰难褒赏名吏信赏必罚官称其职民安其业可谓贤矣然好刑名而杂霸道赵盖韩杨之死为累多矣至於元帝优游不断贤望之堪猛而不能用恶弘恭石显而不能退汉业之衰始起自帝孝成荒於酒色委政王氏哀平短祚王莽乘势遂篡汉位夫自古国家有盛必有衰理势之必然也然所以亡其国者亦在人君之自取耳使元帝不任恭显成帝不任外戚刚明以莅政则汉祚之传孰絶之哉天不祚汉遭汉中微国统三絶而孝元皇后以壽考为之宗主使新莽得肆其奸慝以成篡盜之祸幸而文景之化在老百姓未忘汉故光武起而天下响应遂成中兴以是知人主朝乾夕惕爱民培国不敢少遑者所以上承祖宗之重下植子孙之福岂特一时称贤君而已哉

汉光武论

自古中兴贤主夏有少康周有宣王汉有光武尚矣考其所以兴皆由英明大度用贤任能寬以爱民仁以抚下天下归心用复旧业岂非天顺民归受命而帝者乎当王莽之乱也汉家宗室几絶废斥王侯以翦汉祀城邑为墟邱陇发掘其祸甚於羿浞之乱奔彘之辱而光武乃以布衣仗义奋袂大呼天下响应邓禹冯异寇恂耿弇吴汉辈皆一时之杰光武得而用之用平赤眉张步之乱成陇蜀之功戡乱诛暴平定海内卒践帝祚功烈不让於少康周宣矣及天下平定口不言兵尊儒重道褒赏循吏西域遣子入侍却之不受又非好大喜功者比而保全功臣恩昭九族则又远胜於高祖可谓贤矣是以培养东汉二百年之祚明章继之休养生息至於灵献董卓之乱甚於王莽而建安之位号依然岂非光武垂教立则有以培其风俗庇其子

孙哉石勒绌光而尊高非尊高也彼盖见夫当时若项籍淮陰輩咸勇智絕伦高祖皆得而荡灭臣伏之故不得不俯首北面光武仁心厚德与勒异趋亦岂勒所能窥测哉曹子建之论汉二祖卓识闕议信百世所莫易也

李固杜乔论

东汉自光武明章孜孜学术培养气节故虽数传稍衰矣而袁安杨震何敞朱穆张纲傅燮诸君子皆靖共正直临患难死生而不易其操若李固杜乔者尤疾风劲草之卓然杰出者也盖梁冀擅废立之权利於幼弱二公与胡广赵戒共争之既而广戒顺冀而二公之志终不可移争而不得继之以死其为汉室忠矣夫权奸之欲擅国柄也必害其忠直不挠不与己合之大臣以震其余梁冀之於李杜是也彼以为此人一去则在上之势孤在下之望絕其余皆软靡易制贪位苟禄之人耳後世奸臣多效其为而人君咸不悟焉卒之一身孤立於上而左右前後皆彼之人岂不可哀也哉汉末忠臣李杜并称者三李云杜衆李膺杜密是也要当以固乔为冠

东汉总论

自王莽篡汉处非所?败礼乱度以文奸言毒流华夏民不聊生由是人心思汉光武起於南阳拨乱反正平定海内克承丕业较之少康周宣中兴之盛用力尤难成功尤大及即帝位守之以文兴学校选廉能尚风化敦士行西域遣子入侍拒之不纳方之汉武开边致衅相去远矣不任功臣以吏事使得终享福祿又远过於高祖之少恩独废郭后杀韩歆为盛德之累明帝以英睿之资加以好学重道亲临辟雍尊桓荣李躬为更老所以劝贤励能崇尚圣教者至矣而友爱东海王则又常棣匪他之意始终无间也章帝寬厚长者爱民务本休养生息尊信东平王用第五伦为相而天下以治和帝幼冲嗣位行政无失能用郑衆五人以诛窦宪然宦寺之祸基於此矣殇帝早世安帝庸昏顺帝赖常侍之力以得反正外戚之祸息而常侍之乱起其後梁冀用事冲帝短祚质帝中毒桓帝有可为之几而不能自强外有强臣内有常侍正士废斥贿赂公行迨及灵帝党锢之祸益烈献帝犹寄生之君而汉祚移矣夫西汉以文帝培养元气入民之深故光武起而民心归之东汉光武明章皆令主也爱养元元培壅国本亦未尝不善也乃自和帝以後外戚常侍相继而作罗天下之贤才置之网罟?阱之中如是而民心不离天下不亡者鲜矣然董卓肆虐守臣位者二十余年昭烈继统延汉祚者四十余载岂非祖宗培养气节之余烈乎开国承家貽厥孙谋者当知所尚矣

蜀汉兴亡论

汉自桓灵以来王道中絕奸权乘衅曹操孙权公孙瓚袁绍迭起窥伺名器而昭烈以王室之胄怀忠义之志抱雄杰之才欲恢复天下扫除大憝然归於陶谦依於公孙瓚寄居於袁绍为客於荆州其间遭危困被祸乱不可枚举而英雄不得用其武狼狽奔走几十年既得孔明於是待以股肱寄以心膂用其计谋而得荆州诸郡之地有涪城成都之险以成鼎足之势然终不能克复天下仅得一州者固缘曹孙盛强立国既固不能卒?亦以不专於图魏忿兵伐吴

之所致也使如赵云所言居河渭上流以伐逆寇汉事未必无成卒至大败於猇亭威挫势蹙是亦昭烈之失矣延及後主信用孔明成都大治守父之余烈保土安疆七擒之威六出之锐敌国畏之如虎迨孔明歿黄皓陈祗用事殄民误国而汉祚告终嗟夫治乱之理岂非系於人君之用贤与不用贤哉当昭烈之狼狽奔走以未得孔明故也後主之克守前烈为敌国所畏者以孔明在相位故也其用黄皓陈祗而丧国败家者以孔明既歿故也贤人为国家之宝岂不信哉

东吴总论

自刘氏中衰孙坚据江左之地虎视中原子策继之与周瑜相友收合士大夫江淮之间人咸向之善於用人濶达有度弟权因之用贤纳谏周瑜鲁肃张昭顾雍陆逊皆被擢用於是成鼎足之势开有吴之基兵强将勇敌国畏之曹操智计殊絶於人而大败於赤壁曹丕累兴大衆临江而阻盖以英雄布列内外共展策力故也延及亮休物盛而衰祸乱内作孙綝小人为乱於内然亦外无边患政无大阙降及孙皓苛刻用刑肆虐日甚任既非其人刑复非其辜使黔首有倒悬之苦而吴随以亡虽有忠臣死节之士亦复奚救是故王濬之才非如曹操之雄也王濬所统未如八十万之衆也而赤壁之战孙权以之兴石头之战孙皓以之亡者岂战守之道险阻之利有异於往时哉刘禅以昏而亡皓以虐而亡天厌之矣於魏晋乎何尤

东晋总论

晋自贾后乱朝八王迭起刘石交战中原人民涂炭元帝据江左之地继而中兴是时有王导周顗为之谋卞壺顾荣贺循之徒分掌庶政祖逖刘琨各拥雄兵使元帝果有恢复之志亲统荆吴之衆兴除暴之师速诛刘石克清天下则晋业永安六合为一而乃迁延日月苟图偏安识者於是知晋业之不复振矣及其晚年复有王敦之乱以致怀恨而崩明帝少而聪敏躬殄大憝然历年不久君子惜之逮及成帝内有苏峻之乱赖温峤陶侃卞壺忠勤为国社稷无虞然勤俭爱民亦当世之令主也康帝享国日浅国家无事及至穆帝外有桓温之跋扈哀帝短祚至帝奕遂为桓温所废晋氏之政於此遂衰简文孝武孝安数帝不过庸庸无为尸位於上而已而内多秕政权奸数出至恭帝而司马氏之天下改而为刘氏之天下矣嗟夫创业难而守成亦不易惟在人君用贤纳谏则天下自安而国家永固晋氏君臣崇尚浮虚无用之词风俗既薄天下浇然故王敦苏峻桓温王恭殷仲堪辈迭起为乱向非王导温峤陶侃谢安数君子则晋几乎不国矣况能转危为安光复旧业哉国势之振莫过於刘裕之时裕不忠诚为国而思篡盗君子所为三叹也

北魏世祖拓跋焘论

北魏自拓跋珪以来国富兵强政和民安逮及世祖藉二世之资奋英雄之志南侵北讨东征西伐使魏国地广兵强者大抵皆其功也虽好尚异端坛受符籙是其所失然能听高允之言又从而美之尊祀孔子祭以太牢令公卿子弟入学徵世胄遗逸亦駸駸乎令主矣独功业不终卒有宗爱之祸盖亦平日任术好杀所致如悉诛境内沙门不太苛乎伐宋之後河南赤土

无遗归燕巢於林木不已酷乎吁天道好还可不戒哉

御制乐善堂全集定本卷四

卷五

钦定四库全书

御制乐善堂全集定本卷五

论

唐太宗论

当隋炀之时天下瓦解羣雄睚眦窥伺名器於是太宗以英雄之资备仁义之德复得高祖之贤为之父易曰包蒙吉纳妇吉子克家盖高祖以柔中之德赖太宗以阳刚之体发而用之以安天下固宜唐室之兴也勃焉然太原兴兵长安立帝不必诡行诈伪以冀利也不必尊江都而立代王也宜正其罪名声大义以讨之即位之後励精图治损己益人爱民从谏躬行仁义用房元龄魏徵之俦君臣相得不敢怠遑用致贞观之盛令德善政不可殫述可谓三代以下特出之贤君矣虽征辽之役志满意盈然既失之後即复魏徵之碑劳其妻子深自损责其於改过亦已敏矣夫贤君不世出成康以降数百年而有汉文帝汉文以降又数百年而有太宗要之以虚心待物损上益下用致天下之盛太宗与文帝率用是道文帝质美德纯过於太宗然致治之盛岂能及贞观哉人或论太宗有魏徵而身修国理魏徵既没而骄满之意生者是不尽然惟其有太宗之君然後有魏徵之臣使太宗中人之主则虽有魏徵其亦如之何哉独心无知道之实而身有好名之念屈己从谏而不免以术驭人故不能致天下於熙皞耳然後世有逆谏而恶贤骄奢而自满者方之太宗则又不啻倍蓰矣

长孙皇后论

夫闺门王化之始也诗三百而必以关雎为首礼严大昏书重厘降易上经首乾坤下经首咸恒盖知正家之道必本於闺门闺门正而后家齐国治也王者立后上法乾坤必求令德有以裨成内政安贞载物然後协厥坤仪为天下母故太任太姒秉德而昌周明德马后克恭俭而光汉古今所称不可诬也文德皇后长孙氏者实闺门之令望也仁孝恭俭少好读书赞成内政裨益弘多训诸子常以谦俭为先太宗亦敬其有德常朝回怒曰会杀此田舍翁后问为谁帝曰魏徵於是后退衣礼衣而称贺於上曰臣闻主圣则臣直乃陛下之圣故也妾敢不贺於是帝喜而徵言无不聽夫唐太宗岂实欲杀魏徵哉然虽无此意亦微有不乐谏之心皇后一闻此语即借贺以讽谏之徵益宠信而帝善益彰然後知正内之益所不可少而有乾之健必得坤之贞以顺承之也易曰牝马地类行地无疆盖马陰物也陰之德利柔顺然必利贞而行地无疆然後辅乾以行泽及天下若徒柔顺而鲜贞则又何能助乾道而沛膏泽哉若长孙皇后不预朝政虽帝问之亦终不对可谓知安贞之义者矣其资送公主讽谏以安直臣得疾不事道释之教尤为贤明名垂百世媲美周姜宜哉

唐肃宗论

天宝之乱明皇幸蜀肃宗留灵武其秋即位尊帝为太上皇君子曰肃宗之立非礼也虽云依衆人之情顺明皇之命而速取大位开後世幸乱之端岂非悖於子道哉及其削除大难天下迎上皇还西京奉养晨昏亲修子职可谓善矣然听嬖幸之言迁上皇西内以兵守之又非人类之所为矣世称其克复之功目之为中兴然而惭德实多当是时子仪効力於外李泌谋之於内故平逆乱易如反掌迨反正之後肃宗之志荒矣始则兴复方隆而建宁身死後则身没未几而良娣被弑身为人子而不保其父为人父而不保其子为人夫而不保其妻三纲沦矣夫何足论之有

唐德宗论

世之论德宗者以为有三失焉一曰事姑息二曰任阉宦三曰好聚敛而不知其致乱之由则在於用小人而忌君子也观其即位之初用崔佑甫为相而天下清宁屡有善政却李正己之币而赐其本军非务姑息也杖中使邵光超非任阉宦也诏罢四方贡献非好聚敛也故翕然称治几於贞观而卢杞一用三者皆反之驯致泾原之乱岂非治乱兴衰之明验与在奉天时朱泚围城救兵不至於是始信陆贄言听计从下罪己之诏而军士感泣怀光再叛帝幸梁州中路失贄至於痛哭用其谋社稷复安至於复国之後鸟尽弓藏以谗见远惧藩镇之祸而继以姑息念窘穷之敝而加以好货中使事天下衰微是犹弱病方愈而惩其不能饮食加之以饱食酣饮岂不殆哉原其本末则始之清明由用崔佑甫其乱由用卢杞其复故都由信任陆贄其後复几至於乱由不卒用陆贄而贬斥之一人之身所为如是盖能戒之於有事之日而不能谨之於无事之时也其致乱顾不宜哉

唐宪宗论

自天宝之乱天下分崩民人涂炭藩镇强梁权移宦寺肃代德宗屡致播迁国势陵夷叛臣巢布迨及宪宗以英武之资用贤能之相听言纳谏约已安民翦除藩镇易於发蒙於是平夏灭蜀朝江东从泽潞致魏博淮蔡来成德奋五世不振之威拔数传擅命之寇威福在上政由人君发号施令罔有不臧虽有强镇顺从朝廷奉命唯谨号称中兴不亦宜乎及其天下平定四海无事乃进言利之臣信方士之说志满心骄祸起所忽惜哉使宪宗克永其终任裴度而行其道斥皇甫鎛程异之徒加以休养生息为万世业则贞观之治复兴未可知也

唐穆宗论

自古亡国败家未有不由子孙昏弱乖先王令典以致丧乱唐自明皇末年不修太宗之业外用小人内宠妃子天下大乱职此之由延及宪宗独能奋前世之威烈监於成宪削平藩镇天下归心至於穆宗复不能修宪宗之政游畋声色放心嗜欲宰相萧俛段文昌杜文穎辈又无远略於是朱克融作乱於卢龙王庭湊倡逆於成德魏博诸军以次叛乱数十年经营而得之者皆不复有而唐竟以此亡岂非後嗣不肖不能守父祖之业而以致丧乱哉欧阳公曰忧劳可以兴国逸豫可以亡身观宪宗之延英论事汗浹御背与穆宗之耽湎好色其勤逸何相远哉

褚遂良论

夫天下之治乱系於人臣之邪正而人臣之邪正又在人君之用与不用也当有唐之兴也太宗以英武之资得魏徵佐之言听谏从历有年所用致贞观之盛天下安宁几於三代迨及高宗昏庸淫欲内政既倾天下亦乱虽有褚遂良之忠正而无私攻君之恶适足受其斧斤耳又何能辅弼匡救以安天下哉由是观之正士忠臣世不乏人而人君信用与不信用实相为感召也是故有尧舜之君必有皋夔稷契之臣有桀纣之君必有飞廉恶来之臣尧舜在上则虽有飞廉恶来之徒必窜之於远方桀纣在上则虽有皋夔稷契之臣亦屏而不用云从龙凤从虎其气相感其理固不易也故太宗居帝位而魏徵用高宗居帝位而遂良弃使魏徵及高宗之世则亦不免有废黜之患矣致使忠臣陵夷女后用事奸臣窃福国家殄灭非高宗之咎其谁之咎哉遂良以公灭私忧国忘家当太宗之时即数着忠谏及武后欲立时帝召大臣遂良曰今日之召多为中宫上意既逆之必死乃请已独谏既进上果言后事遂良极谏不听乃置笏殿阶叩头流血上怒出为都督既而长孙无忌皆得罪遂良死於徙所嗟夫遂良可谓忠矣君有非也乃谏之既不听又谏之又不听又置笏殿阶叩头流血而谏之卒致颠沛流离死於徙所岂非高宗之过哉然遂良虽贬黜流离一至於此而忠名垂之千古浩气森於史册身虽没而可见太宗於地下为唐名臣志存社稷伟哉

郭子仪论

自古大臣出将入相为国安危者必有忠诚之德经世之才有以扶危?倾安邦守国然後立非常之功万世之业汉之孔明唐之子仪信其人也二公皆以忠正老成为当世人望加以非常之才功盖天下是故亮没而汉亡子仪存而唐复古今所称不可诬也当天宝之乱明皇幸蜀肃宗嗣位河南河北两京皆为贼有蜂屯蚁杂不可爬梳而子仪以朔方之兵平?中原收复两京唐祚中复其有功於唐大矣及天下略平大难略?谗臣伺间夺其兵权然朝命夕至无纖介於心单骑见敌感以诚信非笃於君臣之义动天地而泣鬼神者能之乎事上忠御下恕待人和驭将诚故朝恩以小人而知化承嗣以傲狠而拜使回纥以蜜貂而慕诚灵耀以据汴而卫币勲名显烁千古不朽惟其忠义笃诚根於心故也

陆贄论

治有不生於治之日乱有不生於乱之时有国家者宜正其本而辨之於早也吾读史至唐德宗之时谓朱泚之乱不生於姚令言而生於用卢杞复唐之功不在於用李晟而在於信陆贄天下之治乱社稷之安危在於人君用一人由是观之用人可不慎哉当奉天之难天下反者十四五藩镇拥强兵虎视中原而朱泚兵劲将强围城累月其破围解难冒矢石触锋刃以救帝复国者固李晟浑瑊诸将之功而经营大计调和天下使诸镇人人思慕唐德者非陆贄之功其谁之功与余故曰复唐之功不在於用李晟而在於信陆贄也贄为人刚方严正而有经世之才其奏疏皆可行可法措之於天下则有治安之效大抵以仁义为本根货财为末务论深切於事情言不離於道德至於君子小人之分忠厚苛刻之别推诚任术之判未尝不反复为德宗言之故在奉天之时悉听其言而藩镇畏威梁州 幸道路相失号痛如失左右手及

天下略平大难略定乃置於闲散者数年虽命为相不能信用又听裴延龄之谗而贬於远州盖君子小人之分若此其难虽贄反复言之而身亦不免於废黜也顺宗即位复欲用之诏未至而没惜哉

李晟论

唐室之乱始於藩镇强梁虎视天下相连为朋河北诸镇为尤甚盖自肃宗之时仆固怀恩怀不逞之心欲结强镇以贼将为节度遂世袭以为已有而不奉命朝廷其後泾原之乱德宗幸奉天诸镇虽有戮力王家以拒朱泚如李怀光者而稍有不合则复叛而归泚於是藩镇之势益横而天子之权益弱惟李晟则不然晟以数千之兵破朱泚解重围复居二寇之间卒以收复西京身居宠贵为唐宗臣功亦伟矣而张延赏之徒谗言一行则流涕目瘭人徒议其怯而不知此其所以为纯臣也使晟如怀光之徒受谗则叛岂其兵力才武不足为与亦明於君臣之分忠义笃而邪私不能动耳世称郭子仪忠厚诚信为唐名将故其麾下诸将如李晟马燧浑瑊皆有不世之功而晟尤其杰出者与

裴度论

宪宗首即大位即有削平藩镇之志用贤能之相时若杜黄裳李绹裴度诸人皆在相位而出将入相功烈显着者又推裴度为首焉当是时宪宗方望治於度而度亦以治平为已任国有贤相外寇拱手理固然也方吴元济之欲为乱也自请袭节度使朝臣皆务姑息欲与之帝曰吾用度一人足破二贼乃听其谋猷专任责成於是成德魏博淄青三镇皆归朝廷天下方翕然望治以为武功既成度相天子居庙堂焕文治明良之遇何如也不知志满骄生小人乘间方士鼓其邪说利臣中其膏肓而裴度出为河东节度使矣穆宗时三镇叛乱复以度讨之而小人沮之於内使无成功敬宗听韦处厚之言用以为相而复出之文宗有优崇之典而无信用之心度亦遂优游緑野而无志天下事矣嗟夫君臣之间若此其难哉以裴度之忠诚正直加以经国之才历事四帝独宪宗初年信用?笃以有成效余则或用之不专或出之於外皆由小人在朝而正直之人日以踈远以宪宗知度之深功烈显着犹不能保其终况於穆宗敬宗文宗哉

李绹论

唐自肃代以降威令不行藩镇跋扈宪宗初即大位即有削平之心用贤相听直言而绳愆纠谬靖恭匪懈者以李绹为首绹继杜黄裳裴垍为相宪宗欲治之心方殷常以太宗之治自任而绹亦以魏徵自况故君臣相得鱼水交欢言听计从无所违拂是故宠莫如吐突承璀则远而出之於外信莫如佛氏之教则断而斥其碑楼朋党之疑一言而开货财之好一言而解行之数年内安外靖承宗束手元济就擒虽云裴度之力亦由绹开之於先也余尝论太宗之於魏徵宪宗之於李绹其用与不用系夫治与不治未始不同轨焉何也太宗用魏徵天下大治米斗三钱夜户不闭而魏徵既没则有东征之後天下罢敝公私困乏宪宗用李绹藩镇畏威不敢横肆民财充足天下乂安而李绹一出则听言之心稍怠迨及平蔡而志满心骄愈不可

制矣由此观之以太宗宪宗之英明犹赖贤相为辅况於中材之君哉

李德裕论

唐自明皇以後为国大害者外则有藩镇强梁抗横天子内则有宦寺秉权威福已出武宗即位用一李德裕而河北三镇效命昭义军拒命即以两镇兵讨之仇士良屏息而致仕後复籍其家何其威命之行至於如此哉盖由贤相用事垂绅正笏不动声色而天下自畏其威也当是时武宗方信任德裕期以必治而德裕之才亦足以制服诸镇故诸镇使者至京必面谕之曰语汝使与其使大将以求官何如自结明天子以是三镇不敢有异志为国轻重者几数年功烈显名肩於裴度然而不能免於朋党之习因公以报私挟势以复怨君子未尝不惜之以德裕之才加之公正无偏虽古名臣何以过哉

唐总论

治天下之道当以正风俗得民心敦士行复古礼为先故其末也人思之而不忘後世子孙赖之以安唐承五代之末高祖创业之後休养生息易武以文太宗以英武之资加之以忠贞之辅听言纳谏用贤録能兴学校劝农桑行租庸调之法为子孙万年之计可谓谋之详矣高宗以柔暗之君承父余烈初即位时颇有善政末年嬖武后身没而祚移唐室子孙诛杀殆尽中宗循其覆辙为妇所弑方之高宗殆不如矣睿宗以明皇为之子复辟之功不与焉然父以子贵故明皇讨贼而睿宗入即大位鑒建成之乱立嫡以功继以传位可谓知权者矣明皇即位欲治之心方殷用姚宋为相二十年间政治几於贞观後宠杨贵妃用李林甫以致禄山之乱而乘輿播迁天下分裂遂始於此肃宗用郭子仪削平逆党复唐社稷然遂以贼党为节度使而河北三镇之祸终唐之世莫能定矣代宗德宗皆以中材之君好务姑息而内复有宦寺之祸顺宗即位数月传国冢嗣宪宗有平一六合复祖宗功业之心於是杜黄裳裴垍李絳裴度诸人相继为相河北三镇效命不敢横肆然末年惑於方士之说志复骄满故有陈弘志之祸穆宗不克负荷三镇再失敬宗即位三年而为宦寺所弑文宗受制家臣鬱鬱而没武宗用一李德裕而藩镇屏息宦寺敛足以享国日浅不遂其志宣宗以刻为明多用智术然纳谏不懈尽心民事不敢少怠懿宗骄奢无度元气已坏迨及僖昭而唐遂亡矣嗟夫观太宗之立法垂猷为子孙计者岂不详且深乎然而终至於亡者盖所谓得之难而失之易也总之明皇以前内乱为多祸多兴於女色明皇以後外乱为多祸多起於藩镇又加之以宦寺内讧然而僖昭数迁京城数危而羣雄相视不敢去臣位虽朱全忠篡位而奉正朔称天佑者尚数镇可不谓太宗之余烈乎书曰监於先王成宪其永无愆亶其然乎

御制乐善堂全集定本卷五

卷六

钦定四库全书

御制乐善堂全集定本卷六

论

後唐总论

余读五代史五十年间易国凡五未尝不废书而叹也曰嗟夫世道衰微人心偷薄朝梁唐而夕汉晋迄无定向然考其得国之正彼善於此者犹以後唐为差胜焉盖李国昌平龐勋之乱略有微劳克用当黄巢之乱有克复之功虽其拥强兵拒朝命亦不为无过然较之朱温贤且远矣末年兵弱锋衰全忠倡乱不能复平仅以自保庄宗首承父烈加以英勇之资屡战屡胜遂殲巨寇建国立社然徒溺一时之娱而不为万世之计甫得大位沉溺声色致使身没伶人之手岂不哀哉明宗本无欲立之心资性寬厚无苛猛之政然目不识丁而辅佐之臣不过冯道诸人欲期致治之盛亦已难矣闵帝幼冲享年不久潞王猜忌石敬瑭终以亡国呜呼使庄宗立法垂纪貽厥孙谋後嗣复得贤明之君则天下之乖离当不若此其甚也而一得志则宠女色比顽童艰难之际与太宗同英武逸暇之日与太宗殊兢惕宜乎僖昭之世已亡而犹存而後唐之业至於一败涂地也

张承业论

韩子曰人固有儒名而墨行者问其名则是较其行则非是亦可以与之游乎如其墨名而儒行者问其名则非较其行则是是亦不可与之游乎吾於後唐张承业亦云盖自古宦寺误人家国者多矣其类盖不可以殫数独承业以孤忠丹诚终身为唐其节用爱民为晋聚财者盖亦欲平梁而复唐耳岂非阉?其名而忠良其行君子之所取者乎呜呼五代之际世道衰微王纲扫地读书学圣之人皆入山林而求自乐当时如张文蔚杨涉蒋元晖柳璨之徒皆以国输人为朱温羽翼而独於宦寺之中有可取者一人焉则五代之事亦可知矣

宋太祖论

自三代以下治极生乱乱极思治者有之矣然未有如前五代後五代之分崩离析而乱若彼其久者也故吾於开创之君独以唐太宗宋太祖为不可及焉二君者皆以不世之才平一天下而以仁爱之心寬平之政保养百姓治功灿然昭於千古然家门之政兄弟之友则唐弗及也太祖继周世宗之後据有河洛即位之初首以安内为本兴学校褒忠良度民田开言路惩节镇之祸命文臣知州又以常参官知县事国内既定然後兴师出兵伐南汉克西蜀无不望风披靡稽首来廷偏师北指刘钧丧胆舟师南下李煜归命虽诸将効力之功亦由太祖处之有道也夫五代之君既得天下外则猜忌诸镇内则溺於声色太祖退藩镇之兵只在杯酒片

言之间君臣之分情义兼隆而俭约是务治定功成制礼作乐传之来裔为万世法其成功致治之盛几乎唐太宗而规模之正则又过之矣

宋宣仁皇后论

易曰家人利女贞言闺门王化之始必女贞然後至於兄弟以御於家邦故内助之贤人君治国之本也至於母后临朝尤难其任三代以下贤后不为少而临朝者未有能全令名以施恩於天下宋之宣仁人称之为女中尧舜洵以临朝无阙政而用贤録能以成元佑之治也当神宗败常乱度信用小人天下大坏宣仁起而拯之用司马光吕公着诸贤放弃奸回大变其法於是海内欣欣知有生之可乐岂非宣仁之施恩於天下哉天不祚宋宣仁崩殒小人之萌蘖复生大肆奸毒凡司马光诸贤死者追贬生者斥逐至欲追废后号赖向后而止小人之心欲快其意而不顾天下之治乱何其忍与嗟夫天下之事数君子成之而不足而一二小人败之而有余韩欧为治於英宗之朝仅能绍於嘉佑而王安石一变其法天下遂大扰司马光诸贤孜孜矻矻穷尽其力方使天下解倒悬之苦而章惇蔡卞一肆其毒诸贤固受摈斥之辱而海内复有涂炭之灾再传而为南宋矣小人之害国可胜言哉

吕端论

吾读宋史至吕端闭王继恩於室入立真宗然後升殿审视以拜未尝不贤其能定大计而想见其为人当太宗升遐李后异主幼时艰而端乃从容定计沮其邪谋扁其羽翼顷刻之间嗣君以定昔东汉李固当质帝之崩不能沮梁冀之谋徒以死自靖是时宰相权轻而梁冀威焰甚炽根缘蟠深故也宋初清明信任贤相端能不动声色处之晏如可谓善於应变矣端器量寛弘英才表表真宗雅重之先是李继迁叛军人获其母以闻太宗欲诛之端曰今日杀其母明日继迁可擒乎徒坚其叛心而已太宗乃悟後继迁死其子竟归歟端之力也太宗尝称吕端大事不糊涂可谓知端者矣

韩琦论

夫为人臣者当国家清夷之际进言纳谏理国致治固一代名臣也然值主幼时艰之日而能不动声色措天下於泰山之安者则又所谓国之柱石栋梁非具经济之才学问智勇迴出流辈者不能韩魏公两定大计辅相英宗调护两宫处之裕如天下以治岂非国之柱石栋梁而天下倚赖以安者哉及神宗即位出之於外然未尝顷刻有忘君父之心故青苗之法琦极论其病民辽使之来琦上言处置之方最为曲尽诚可谓古大臣矣当仁宗中年虽君子道长而小人时或并用及嘉佑以後专任魏公朝廷清明天下乐业英宗即位又用之不疑君子在朝用臻至治故用贤人者必使小人无以间之然後疑贰之心不生而向用之念弥笃也

明道程子论

自古兄弟俱为名儒德行显於一时流风被於百世无如二程夫子者盖明道伊川同受学於

茂叔渊源既正探旨寻微卓为儒宗上承孔孟之絕学然雍容冲邃规模宏濶有自然之矩者则伊川若逊於明道焉明道以王佐之才大用则大效小用则小效所上章疏引义陈善酌古变今可以坐言起行尝劝帝防未萌之欲神宗拱手曰当为卿戒之政事堂议事一言而安石为愧屈盖其诚敬所孚虽异己者亦心服所谓伪者献其诚慢者致其恭是也使神宗以用安石者用之内圣外王之道不外是矣而卒沮於安石不得显用及司马光入相方将大用而先生竟长逝矣使先生之道不得行於天下而天下之人不得覩先生之道之行三代规模不可复见岂徒有宋之不幸哉

程明道告神宗当防未萌之欲论

舜之告禹曰人心惟危道心惟微夫人心者至难防遏而易蛊人之聪明溺人之志气故大舜首以告禹禹圣人也而舜犹戒之如此盖谓不必见之於行事不必托之於语言略有所动即私心之萌也不谨防之於始可乎明道先生以当防未萌之欲告神宗诚大儒格心之至要也盖天理人欲二者不可并存於念虑之间如水炭之不相容薰莸之不相入不入於此必入於彼人或以为略有其几未至已甚而不防之於渐则天理从此泯而人欲从此炽矣是故微有贪声悦色之意也则吾以为声色之私动而致力以防之微有爱珍奇欲富厚之念也则吾以为货利之私动而勉力以絕之微有不乐亲正人不乐闻正言之心也则以为骄心之萌也而遏之惟恐不至微有宫室服玩之好也则以为侈心之萌也而杜之惟恐不严夫如是则何私心之不灭欲念之不泯哉易曰履霜坚冰至解之者曰霜陰气所结盛则水冻而为冰此爻陰始生於下其端甚微而其势必盛故其象如履霜则知坚冰之将至也夫欲念亦如霜之始结也不防之於未萌则必私欲大炽而有坚冰之祸矣神宗之行新法盖萌於欲富强好大喜功之心而安石有以中之也使能体程子之言以诚正为心而用其道以辅成其大有为之志则治功所就岂难远过於仁英哉

北宋总论

夫北宋之亡外无藩镇拥兵之横威福自上内鲜宦寺擅权之祸废立由已而金兵一至皆为俘虏者何哉民心解而士气弱也盖太祖太宗开国承家真仁英三宗休养生息至於神宗物盛而衰信任王安石用其新法取利尽於锱铢掊克罔不在位於是民心已瓦解矣而哲宗复庸暗无知宣仁临朝则为太平之盛世宣仁崩陨则为否运所肇端宣和继之信用小人奢华无度日甚一日而金兵至阙矣虽让位於钦宗而不久用李纲狃於和议致父子俱为臣虏而宋业中衰岂非民心解而士气弱贤人之正不能胜小人之邪哉幸而祖宗之德尚在民心故康王立而为南宋然朝奔夕逃无复朝廷之礼苟延宋祚而已由是观之人君修德爱民厚培元气非惟一时之治亦所以貽厥孙谋而为天下後世无穷之利也

宋理宗论

理宗为沂王时凝重寡言洁修好学待漏禁中诸王或多笑语独凝然自持矩度有常为史弥远所爱遂继大统观其始非不雍容有度而可尚也而即位之後德弥远之立已委以天下之

政威柄下移不得自主孤立於上朝多小人及弥远黜而丁大全贾似道之类复聯翩而进帝终弗悟以致奸臣贪功生事边防兵连祸结境土日蹙迄及於亡岂非理宗昏庸之罪哉惟表明正学崇信周程张朱为有功於名教然西山了翁见在朝而不克究用则知周程张朱生於理宗之朝亦难得其信任也尊既往之贤舍当时之贤夫亦何补也哉

岳武穆论

夫北宋之亡河北之失宋祚之不复振中原之不恢复人皆曰由徽钦而致然高宗实难追其责焉当钦庙北去社稷为墟高宗入援顺人心而即大位非不正且大也及即位之後当卧薪尝胆思报父兄之讎而信用汪黄贬黜李纲不复以河北中原为念岂非高宗庸懦用人不察之过哉其後诸将用命岳武穆以忠智出羣之才率师北驱所战皆克而以金牌十二召之班师淮北之民遮马痛哭曰相公去我辈无噍类矣然而武穆亦不得以自留也夫如武穆之用兵驭将勇敢无敌若韩信彭越辈类皆能之乃加之以文武兼备仁智并施精忠无贰则虽古名将亦有所未逮焉知有君而不知有身知奉君命而不知惜己命知班师必为秦桧所构而君命在身不敢久握重权於封疆之外呜呼以公之精诚虽死於桧之手而天下後世仰望风烈实可与日月争光矣独不知为高宗者果何心哉

文天祥论

夫士君子被服儒行以学古自名才德兼优者上也其次则以德为贵而不论其才焉故自古因有才而无忠诚之行败人之事者多矣未有忠诚有德而败人之事者即势至於不可为亦必竭忠尽瘁死而後已不肯忍耻偷生以辱其国也当宋之亡也有才如吕文焕留梦炎叶李辈皆背国以降元而死君事分国难者皆忠诚有德之士也然此或出於一时之愤激奋不顾身以死殉之後世犹仰望其丰采若文天祥忠诚之心不徒出於一时之激久而弥励浩然之气与日月争光盖志士仁人欲伸大义於天下者不以成败利钝动其心也公初被执既而得脱犹奉二王穷居海滨至於亡家沉族而不顾兵败身执视死如归而元人弗杀冀其忠义之心久而懈也於是归其妻还其族在中常之人固将感德而有转计矣而公方以百折不回之气行万变不渝之志妻子在前而不顾高官大禄而不慕心惟宋室是向自书其志曰孔曰成仁孟曰取义惟其义尽所以仁至可谓行践其言矣

南宋总论

人君立法垂猷培养元气仁施乎百姓教被於苍生非徒一时享治平之休亦子孙万世无疆之利也南宋僻处江南穷居一隅人君无英明出类之才在位多奸邪小人强敌在境军弱民贫然犹享国百五十年忠臣义士孝子节妇亲其上死其长不以仓卒死生易其操者屡见於时史策为光岂非太祖仁宗仁泽之厚德化之深而後世子孙犹蒙其休泽哉盖自高宗弃淮北而中原不守前惑於汪黄後制於秦桧有武穆而不能用有可复故都之几而屈膝请和失中原之罪高宗不得而辞焉孝宗有猷有为足以兴复而天不祚宋值金世宗之贤无衅可乘光宗宁宗昏庸不振理宗合元灭金而渝盟弃好任用权奸虽有尊儒之名而苛刻小民疏退

君子南宋之亡兆於此矣度宗荒於酒色亡国不於身幸也帝?身为臣虏然大木之倾亦岂一绳之所能系哉端宗帝昺僻居海滨国不成其为国而文天祥张世杰陆秀夫诸臣犹尽心力而为之亦忠臣义士舍命不渝之秋也卒之端宗惊悸而死帝昺投海而没国亡宗絕社稷为墟其亦可哀也已然自古无不亡之国汉唐宋为三代以下享国长久之朝汉唐立国强盛过於有宋而宋及末运全节死义之士远过於汉唐者则又祖宗之余泽与周程张朱讲明正学之功也呜呼谁谓德教学术非治天下之大本乎

元仁宗论

当成宗崩陨国家多难仁宗入定大艰克安宗社身让大位而不居可谓得友让之道远异篡窃攘夺之人矣及其即位首罢尚书省録用旧臣信任李孟开科取士尊尚孔子之道罢营繕屏言利盖有元数君之中帝实首出焉至於为政一遵成宪不事游畋不喜征伐待宗戚老臣一以礼貌大辟上瀝惨惻移时其寛厚仁爱有以培养民心後世永赖称之曰仁帝实无愧焉

许衡论

人君开国承家创业垂统必有通经明道规模宏大之臣为之立法垂猷使子孙有所鉴成宪而持永久斯立国之要也元自太祖太宗以及世祖并有天下莫不率服亦赖有一二名臣为之左右於其间使敷政设教有以成一代之纪纲则耶律楚材许衡其人也二人立纲陈纪为国成宪才智兼全经理庶务衡让於楚材而明道通经匡君定国讲明礼乐立一国之规模则楚材又让於衡焉观其首陈四策其立国规模一疏世祖累用其言已有成效至於言治道劝用贤言养民皆天下急务而不见大用於世乃天下之不幸亦有元之不幸也自朱子以来继传之儒代不乏人然推西山鲁斋为尤卓西山生於宋末虽为参政不究其用鲁斋当元初尊信朱子倡明正学世祖累见信用其功效颇着於西山云

说

复性说

性者体也情者用也制情以从性性其情也拂性以纵情情其性也情其性则性为情矣乌在其为本性也然则如之何而後可曰有复性之道焉复之之道何居曰克己以复天命之本然使和其情以顺其性而已在易复之初爻曰不远复无祇悔孔子解之曰不远之复以修身也言性本无失有失而能速复则身修矣在天为一阳复见在人心为本性复明岂有悔哉孔子举此以赞顔子刘屏山举此以教朱子以其为修身复性之要旨也六二曰休复吉孔子解之曰休复之吉以下仁也初阳乃天心之见仁也二近初阳有下仁之美言复之之道又在好德亲仁涵养薰陶以日复其性而休休然有余裕也六三曰频复厉无咎频复与不远者殊科故厉然能复则无咎矣六四曰中行独复卦五陰独四与初相应处衆小人之中独能与一君子合志同方不言吉而吉可知故孔子以从道美之至五之敦复则曰无悔上之迷复则曰凶以此见复性之道当谨几察微不贰其过修身以克之下仁以休之独复以持之敦厚以居之而

不使之频复而迷复焉则所谓天命之性五常五伦之美皆在我而不为习所远矣吾故曰复性之道在克己以复天命之本然使和其情以顺其性而已御制乐善堂全集定本卷六

卷七

[集部,别集类,清代,御制乐善堂全集定本]

钦定四库全书

御制乐善堂全集定本卷七

序

贞观政要序

夫三代以上君明臣良天下雍熙世登上理自东迁以降风俗日薄天下无复熙皞之美虽有质美之主望治甚切而所以屈己从谏力行善政者终不能有以震古而铄今及唐贞观太宗以英武之资能用贤良之士时若房元龄杜如晦魏徵王珪诸人布列左右相得益彰盖自三代以下能用贤纳谏而治天下者未有如此之盛焉史臣吴兢纂辑其书名之曰贞观政要後之求治者或列之屏风或取以进讲元至顺间戈直又刊其书以行於世余尝读其书想其时未尝不三复而叹曰贞观之治盛矣然其所以致治则又在於用此数贤而数贤之中又推魏徵裨益为多然魏徵不能自必信用於太宗以见其功业则又知太宗所以独信魏徵言听计从而见效若彼者固人君所当服膺书绅而勿失也书中分目目中有条条之末引先儒之言而论断之其有望於後王也深矣人君当上法尧舜远接汤武固不当以三代以下自画然观尔日君臣之所以持盈保泰行仁义薄法术太宗之虚己受言诸臣之论思啓沃亦庶几乎都兪吁咈之风矣

韩文公文集序

天下之事有其艺则必有精於其术无论小大精麤能使机应於心技疑於神则外物不能纷而後之习其艺者皆奉以为师法养叔治射离娄治规矩师旷之於音声仓公之於病匠石之斤公孙之舞皆造其堂而诤其蔽传之後世而无穷夫文亦天下之一艺也精其术可奉为师法者周有左氏汉有贾谊董仲舒马迁相如刘向此数子者虽非见道之文要皆卓自树立不合流俗而其文之古朴亦非浮华浇漓者所能及迨自五代剖分文弊质穷天下之言文者务以藻绩为事娓娓如妇人言世道衰微人心由之伪薄至唐并天下蔚兴文教殆百余年而後昌黎以六经之文鸣天下由是言之文之繫於世道人心亦大矣盖昌黎之於文所谓造其室而诤其蔽因文以见道以蘄至於古之立言者也其自用之功在於培养仁义以为立言之本而其所得之趣则气盛而言之短长与声之高下皆宜至其不蹈袭前人一语不烦?削而自合规矩不顾世人之笑誉反刳以朴剗伪以醇粹然一出於正後之习文者皆奉为师法而莫有能加焉噫亦至矣虽然公非徒长於文者其道德谟猷皆有唐一代之特出而不能大显於宪穆之朝者气运之迁流非人力所能挽耶抑使之少抑於一时而终扬於万世耶将全於此则不能全於彼耶孟子距杨墨而道以之传昌黎排老佛而道亦因文而见起衰反正始若未之

信终大显於时苏子瞻以之上拟孟子岂过誉哉

杜子美诗序

夫自上古康衢有击壤之歌虞廷有卿云之咏帝与皋陶禹益诸臣勅命赓歌拜手扬言於一堂歌咏之兴有自来矣爰逮姬周公旦公奭调宫协徵律其节族春容乎大篇堂皇乎雅辞化自二南达於列国上自公卿下至黎庶至於变风变雅亦莫非忠臣义士摅其忠悃发为歌辞好色而不淫怨悱而不乱皆可以劝惩当时为教後世诗三百一言以蔽之曰思无邪孰谓诗仅缘情绮靡而无关於学识哉然三百篇之诗不拘格律而音响中度所谓太羹不和而有至味也汉变四言为五言间亦有七言之体至魏晋而音韵愈盛入唐而格律益精盐梅之设太羹之害也七窍之凿浑沌之贼也至有不言性情而华靡是务无劝惩之实有淫慝之声於诗教之温柔敦厚不大相刺谬乎是以言诗者必以杜氏子美為準的子美之诗所谓道性情而有劝惩之实者也抒忠悃之心抱刚正之气虽拘於音韵格律而言之愈畅择之益精语之弥详其於忠君爱国如饥之食渴之饮须臾离而不能故虽短什偶吟莫不睠顾唐祚繫心明皇蜀中诸作尤致意焉屈原放逐离骚是作後代尊之为经子美之诗亦因其颠沛流离抱忠秉义不究其用垂於诗以自见故後世宗之参之於三百篇之列若夫较一字之长争一韵之巧摘华藻於篇章夸博赡以耀衆者艺也非所以求子美也

朱子资治通监纲目序

孔子作春秋而乱臣贼子惧夫春秋亦一编年之书而曰乱臣贼子惧者盖谓彰善瘅恶比事属辞诛奸諛於已往杜僭乱於将来使乱臣贼子不畏王法者读此书而知惧岂非有功於世道人心者哉三代而下孔子之道几乎息矣故臣叛其君者有之子背其父者有之而乱臣贼子无所忌憚子朱子生於周程之後修明絕学深痛而甚悯之祖夫子春秋之笔削因温公通监之书更创义例为书曰资治通监纲目其自序曰表岁以首年因年以着统大书以提要分注以备言洵哉善善恶恶是是非非具於一篇之中而无不备矣然後人知忠臣义士必获天休也虽不用於一时而後世莫不褒叹效法之恐後也乱臣贼子必撻天诛也虽幸免於当世而千载以下公议莫逃也彰善瘅恶比事属辞虽不足以尽春秋之义抑其大略则可谓同揆矣夫三代以下传世久远者莫如汉唐当其盛时政教恩泽入民之深非不可称然其易代之际死君事者可数焉自修纲目之後士知顾礼义廉耻以事二姓为辱故南宋之末忠臣义士捐躯而殉王事不肯忍耻偷生以求苟活者屡见於史策之中且元代宋明代元无分析割?如前五代後五代之乱者亦因忠奸贤佞褒嘉贬斥凛若袞钺人知有所惩劝惧见诛於後世也如是而谓之纲目修而乱臣贼子惧其谁曰不然

大学衍义补序

学贵於博乎尧舜心传十六字有终身不能行其一语者焉学贵於约乎往圣先贤作述相接有言之而不厌其详者焉大凡言理则欲其精简明切当而易守也言事则欲其详条分缕析便於中材而易行也吾於邱琼山大学衍义补盖知其义云夫圣经二百有五言为学之道备

焉为教之法具焉为治之理尽焉所谓理极精而易守也至於後世道衰文敝贤者且不能窥圣经之阃奥又何怪於中材乎故西山先生作衍义之书至齐家而止而治国平天下之道备具不待琼山之补然亦不可无琼山之补所谓多备规轴而易行也圣人言理贤人言事先代言理後世言事亦学有所不齐世有所不同而所以啓迪当时为教後世之心则一也然於此亦可以见琼山之有志於君民上下言事极其详而言理亦极其精矣至其书之条目义例则详於邱氏之序余因嘉其明於理而便於事故为序如右

送五弟奉

命往祭

阙里文庙序

雍正八年冬十月新修

阙里文庙告成殿庑门陞黄瓦丹雘既宏既隆圭瓚俎豆罇罍之器

颁自上方

圣天子亲书大成殿大成门匾额复命良工重摹圣祖御制文庙碑文孝思继述重道崇儒兼备於此既成例宜遣官祭告

皇父特重其礼

命皇五子斋居洁诚治装减从以行余与吾弟夙夜之与俱饮食之与共讲习讨论之日亲至於今二十年兹往千里之外能无依依繫恋而不忍舍顾思人自孩提以至於老大读孔子之书未必能志希贤圣穷理探源以至於知孔子之道也幸而知之矣而私累之未捐精进之不勇则鲜能行之既行矣未有不心慕孔子欲登其堂而入其室者吾弟力学敦修不敢自懈於圣人之道者有年矣今奉

命往祭阙里瞻宫墙之数仞则欲得其门而入以见宗庙百官之美富也对圣貌之巍巍则思温厉恭安如在其上而自省其躬修也游礼乐之区想见金声玉振之气象是行也不益以增其向往服行之心而为有生一大快乎

皇父犹有後命命吾弟祭阙里毕即往致祭岱宗吾弟往哉昔孔子尝登泰山而小天下孟子述之盖谓得登圣人之堂与闻圣道之精深广大则诸子百家羣言皆小也犹之登泰山之高者得观其嶽岑峻极则崩施培塿皆不足言也吾弟既登圣人之堂又登泰山之高诚敬之日积仰止之日深视瞻之广濶胸次之豁然古文人学士所谓游名山大川以助其文思笔力者又乌足云哉

送平郡王奉

命往盛京修理

福陵前河道序

皇清承

天命为天子

太祖肇基盛京奄有三韩

太宗积功累仁式廓疆宇以及

世祖拯明室之乱兴仁义之师平一六合定鼎燕京顺治八年

诏封

福陵山为天柱山

昭陵山为隆业山附祀

方泽四时大祭必命宗室一人往莅其事雍正八年四月

诏曰

福陵前水法历年既久稍更故道朕万几事重不能亲往经理惟是平郡王福彭小心畏慎克当斯任其代朕以行余与王敬业乐羣相晨夕也兹之往也其可以无赠窃惟古者山川都会恒随有德者为发皇我

太祖之肇基盛京义同於周文王之在丰我

世祖之定鼎燕京义同於周武王之在镐盛京为王业之丕基而

福陵实灵祥之所由孕育绵衍今以前河稍更故道圣天子慎重所使

特命王往王其慎哉祇谒

皇祖山陵敬恭将事宏仁孝之思审向背之势必能相地宜因利便计丈数度高卑揣远迩物

土方分司授职董其大要而责以成功以不负

天子任使王其可以胜任而愉快矣王虽年少而器识深沉谦卑自牧娴学问通事理余喜王之果足以当斯任也於是乎书以赠之

送定边大将军平郡王西征序

惟

上帝眷顾我国家

太祖

太宗肇基盛京既创既承顺天休命以造万世无疆之丕基惟时英藩良弼罔不一乃心力克宣乃猷董疏附先後奔走御侮之臣而甄其才以致其力用赞我王室式辟四方若川有舟实共济之若木有本实枝干之诗所谓维藩维垣维屏维翰伟哉隆古以来懿亲之宣力未有若斯之盛也逮我

世祖章皇帝定鼎燕京奄有九有惟时平郡王之始祖礼亲王实统貔貅之旅以勤襄王事功绩彪炳载在国史王其七世孙也王幼而侍

圣祖仁皇帝宫中躬承恩眷我

皇父临御凡事皆仰体

圣祖之心祇承勿替况在宗藩尤所惇叙以养以教罔不勤勗其身诱迪厥德而王以孙枝之近眷顾尤隆雍正六年

皇父特命王同我兄弟读书内廷以培其才又二年知王之可用也爰命管理旗务及为宗正理益以明政益以练又二年知王之果可大用也遂有定边大将军之命而统西征之师夫準噶尔自策妄阿喇布坦造孽据有波罗搭拉背我

圣祖皇帝曲赐矜全之恩及我

皇上赦过宥罪之德跳梁踣躅至於十余年今其丑子噶尔丹侧楞袭其凶逆抗我顔行幸不可 祸不可踵此盖天亡準噶尔之日而王建功立业之秋也王器量寛宏才德优长在书室中与之论文每每知大意而与言政事则若贯骊珠而析鸿毛也夫战者孔子所慎王者不得已而用之所以止戈戡乱遏刘诛暴我皇上克承

先志思维小丑累世负恩实天人所共愤王法所必诛而历年以来董兵之臣率不能宣德威而奏肤功用是以西陲重任畀之於王王必有以副

皇父简用之恩佐国家赫声濯灵之大业相事宜慎权变和辑我士卒淬厉我将校恩威并行信义昭着克殲逆慝永息边氛皇哉堂哉莫与京矣王以八月三日之吉褱旗啓行余与王敬业乐羣者六年於兹今之往也其可以无赠然惟赠人以物不若以言之为切也赠人以颂不若以箴之为益也言而以箴宜赠王矣复念王日承

皇父圣谟凡军机要务制敌御将之方筹饷治兵之略闻之熟而奉之谨以是始之以是成之总不出

圣天子定算之中而更何俟余之以言赠哉故为王敬述王祖父为国宣力勲名赫奕之事於右及引书传所言者欲王效法乃祖而以敬谨将事也王其勉之哉祇迓天之明命惟聿将其恪恭整我六师以伐不敬在此行乎在此行乎余自今数王至军之日请勒为饮至之歌以俟之

稽古斋文钞序

天地间有大本焉孝悌是也有大文焉诗书是也有本有文积於中而发於外有德之言是也孝悌以立其本诗书以畅其支而因发为有德之言英华畅达而不可掩能全此三者寡矣至若生帝王之家居富贵之地子道臣道交萃於躬夙夜匪懈笃念天显尊闻行知究极於高明光大之域非以道自勉者能乎哉吾弟少於吾甫三月

皇父在潜邸时育吾二人於东西室及九岁读书同受经於傅先生至十二岁时吾随侍

皇祖宫中不能朝夕共处者盖半载及我

皇父位登宸极妙选天下之英贤以教育吾二人凡八年於兹矣斯迈斯征日就月将以期不负

皇父顾复燕贻之至意无时敢自懈也八年秋九月吾弟彙订其序论杂文诗赋凡若干卷而属序於余余曰吾辈所重岂止於文而已耶必若向所云三者皆克全之然後尽吾职焉吾弟在

皇父膝下二十年爱敬恳摯从未有过愆与吾自孩提以至於今且孺且眊怡怡如也从诸先生敬业一堂既饜饫於诗书矣而发为文词观其言藹如考其意不外古圣贤名儒之旨所云三者翼翼焉亶亶焉日进而无疆岂止以文自鸣者哉余既以同气之亲相亲相勗於平日晨夕之与俱笔砚之与共尔我形骸之悉化兹序其文其夷恠欣畅又当何如乎

御制乐善堂全集定本卷七

卷八

钦定四库全书

御制乐善堂全集定本卷八

记

皇祖圣祖仁皇帝恩赐御书记

忆自年十二时随

皇祖圣祖仁皇帝驾往热河避暑朝夕随侍

皇祖万几之暇辄流覽书史或

亲洒宸翰从旁窃观心慕而未敢以请也

皇祖顾谕曰汝爱吾书乎赐长幅一复赐横幅一扇一皆持以告我

皇父宝而藏之其年冬

龙驭上宾哀痛沉笃每展阅

御笔手泽犹存涕涔涔下乃肃容拜手而为之记曰呜呼

皇祖之孙百余人其中聪明才识好学博闻年长於【孙臣】而任事於朝者彬彬济济【孙臣】年甫弱龄性复钝鲁顾特被

恩宠迥异他人者岂非我

皇祖推爱我

皇父之心比诸孙有独摯乎今虽八载

圣训慈顏宛然如昨岂徒杯棬之恻已哉昔欧阳修作宋仁宗飞白记谓仁宗德泽涵濡於天下者四十余年田夫野老犹悲歌思慕况得望清光而承恩宠者尤相与流涕不置我

皇祖君临天下六十余年圣德之广大化泽之弘深享年之有永过於仁宗万万欧阳修不过

受知近臣为僚采作记尚流连咨嗟慨想而不能自禁况【孙臣】日侍晨夕海爱特深亲侍皇祖之挥毫躬受锡予其流连咨嗟慨慕更当何如因书以志不忘云

瀛台记

入西苑门有巨池相传曰太液循东岸南行折而西过木桥遂宇五间为勤政殿自勤政殿南行石堤可数十步阶而升有楼门向北匾曰瀛台门内有殿五间为香宸殿殿南飞阁环拱自殿至阁如履平地忽缘梯而降方知为上下楼楼前有亭临水曰迎薰亭东西奇石古木森列如屏自亭东行过石洞奇峯峭壁鞞鞞蓊蔚有天然山林之致盖瀛台惟北通一堤其三面皆临太液故自下视之宫室殿宇杂於山林之间如图画所谓海中蓬莱者名曰瀛台岂其意乎

丰泽园记

西苑宫室皆因元明旧址惟丰泽园为康熙间新建之所自勤政殿西行过小屋数间盖

皇祖养蚕处也复西行历稻畦数亩折而北则为丰泽园园内殿宇制度惟朴不尚华丽园後种桑数十株闻之老监云

皇祖万几余暇则於此劝课农桑或

亲御耒耜逮我

皇父纘承丕业敬

天法

祖世德作求数年以来屡行

亲耕之礼皆预演礼於此乃知

圣圣同规敦本重农用跻天下於熙皞之盛若瀛台之建於有明飞阁丹楼辉煌金碧较之此园固为美观而极土木之功无益於国计民生识者鄙之行一事而合於天心建一园而洽於民情身率先而天下丕变吾於是乎知

皇祖

皇父之为首出之圣也

田字房记

流杯亭之西南有田字房焉丁未四月十八日

皇父万几之暇燕接亲藩游豫於此是地也西山远带碧沼前流每当盛夏开窗则四面风至不复知暑其北则稻田数亩嘉禾生香蔼闻於室盖我

皇父重农之心虽於燕闲游观之所亦未尝顷刻忘也古昔圣王临朝视政之暇必有怡情娱覽之地故灵台之诗美文王也卷阿之诗颂成王也今田字房所以命意重农者岂徒怡情娱覽已哉至若黛扫山颠风来苹末麦畦浪起柳岸烟开驯鹤从容而起舞文鸳匹偶而泳游蝶裁五色之文蜂喧万花之谷物华景丽则思饮和食德熙穰於光天化日之下而怡然以乐其或凉飈四起鸿雁来宾白露如珠緑云改赤千家之砧杵遥闻百室之仓箱尽实则思遗秉滞穗谁遗寡妇之利而悄然以忧时引儒臣坐而论道或率诸王公子弟修家人之礼讲燕好之欢所触目而会心者我

皇父之同忧同乐憩息於斯较之灵台卷阿意更深长矣谨为之记

时应宫记

夫天一生水坎精发祥凝灵聚液流为江海江海乃天地间物之?鉅者也江海之有神自三代汉唐以来莫不祠祀惟谨有宋大观四年诏天下五龙神并封王爵龙神之尊自是始厥後春秋牺牲之祀代有常典皇清受

天命禋事

上帝

后土怀柔百神江淮河济五岳四瀆之祀载在太常牺币之数俎豆之器既丰既隆神歆以格雍正二年天子以为龙神之位既尊宜特修宫观以致?禱乃於西苑内丰泽园北建时应宫所以致诚明神俾雨阳时若稼穡以成者也夏六月霖雨弥旬几至於涝

皇父步行往禱其日即晴又明年黄河清百余里此非神人効灵河海清晏之明验乎夫以

天子精诚通於神明以之事

天飡

帝罔不昭格而况於龙神乎信哉诚之能感物也是为记

乐善堂记

凡人之性未尝不善仁义礼智全备於我所谓得天地之正气而为人也然有智愚贤不肖之分者气拘之私诱之遂日以蔽锢而昏昧有能复其性者鲜矣人能自强不息以复性为功已有善念扩而充之人有善事喜而从之则本性呈露而有馨香之德矣是故明德之馨胜於?稷芝兰鲍鱼与之俱化未有乐善而不能修德者也余有书屋数间清爽幽静山水之趣琴鹤之玩时呈於前莱圃数畦桃花满林堪以寓目顔之曰乐善堂者盖取大舜乐取於人以为善之意也夫孝弟仁义乃所谓善也人能孝以养亲弟以敬长仁以恤下义以事上乐而行之时时无怠则能因物付物以事处事而完所性之本体矣是故大舜圣人也犹存虚受之心闻一善言若决江河汉明帝尝问东平王在国何事最乐王曰为善最乐余虽不敏然赖

皇父之明训师友之切磋於大舜之善与人同虽有志而未逮而东平王之为善最乐则不敢不勉焉是为记

四余室记

康熙壬寅三月

皇祖圣祖仁皇帝特命予随侍宫中承欢侍顔之暇每得追陪诸叔父诸叔父推

皇祖爱育之勤咸善视予而二十一叔父尤肫然有加也及我

皇父践阼谓诸叔父年尚少养之宫中择师以授之业二十一叔父克遵

圣训励志向学每返诸身以达於事

皇父嘉之用是於雍正八年三月封为贝子未数月又晋封贝勒叔父曰

天子友于笃爱之心有加无已顾自慙譎劣特受褒异中夜以思惕然而惧乃以四余名其室而属予记之且曰吾所谓四余者除恶树德以余庆舍巧用拙以余智知足安分以余乐存理遏欲以余寿也予惟人生於世不能无好恶则乐其有余者不能尽适於正视轩冕冠裳如饥之於食渴之於饮趋权附势以自求媚者欲其贵之有余也仓箱以贮之扁鐻以固之不受命而货殖者欲其富之有余也高其堂华其屋锦绣其土木镂刻其梁栋者欲其宫室之有余也丝竹之乱於耳青紫之蛊於目者欲其声色之有余也叔父服膺正学好尚既端若富若贵若宫室若声色皆不足动於心惟庆智乐壽则好之而欲其有余而所以求其有余者又皆本之於秉彝矩之以圣学以实其功可谓得立身之本矣予尝绎其言而有会焉书曰树德务滋除恶务本德与恶不两立树德至於滋长则恶之本尽除矣恶之本除则身心泰然何庆如之孟子曰所恶於智者为其凿也又曰如智者亦行其所无事则智亦大矣舍巧用拙以蘄余智者孟子之意乎晋人王昶曰知足之足常足矣知足则安分知足安分求乐之道也宋人王昭素

曰养身莫若寡欲君子之求壽也非偃仰屈伸若彭祖嘘呕呼吸如乔松也惟存天理遏人欲而已矣然养身求壽之道亦岂外是哉叔父以此四余名其室优而游之以求於心饜而饫之以得於己庆无疆而智靡穷乐日生而壽岁增於以养德修身对扬

一人之宠命虽书史所载若河间东平何多让焉是为记

二希堂记

吾师梁村蔡先生以二希名其堂而属记於余且曰士希贤贤希圣圣希天此古人之言也或者谓余不敢希天故曰二希然余之意固非若是也尝慕宋儒范希文真希元之为人因名堂以志之余曰美哉先生命堂之意也君子之立志也必以圣人为可学而至故孟子愿学孔子顔闵诸贤皆曰姑舍是昌黎亦曰世无孔子不当在弟子之列而诸葛武侯之自比也则以管仲乐毅卒之学术事功远超於管乐之上先生以漳浦名儒追紫阳之正学表率鳌峰因以所得於道德文章者发为经济事业嘉言说论日陈於朝虽古之名臣名儒亦无多让然犹曰稷契伊周之所以致君而泽民者非余所敢望也请希其次其次曰范氏希文孔孟程朱之所以传道而继统者亦非余所敢望也请希其次其次曰真氏希元夫希文之事业非稷契伊周之事业乎希元之道德非孔孟程朱之道德乎希希文而至希文希希元而至希元渐而进之稷契伊周之事业孔孟程朱之道德孰得而限之乎先生之立志盖可知矣抑余又闻吕本中及朱子论宋朝人物推范文正公为第一而朱子之後惟西山之传得其宗则先生之有志於希二子乃实见以为不可几与孔明志希伊吕而自比管乐之意异盖孔明以语於人故虑其或为时俗之所惊而卑之母高而先生自名其堂以志尚友之切则义固各有所当也故抒所见以质於先生而因以为记云

跋

恭跋

世祖章皇帝御注孝经

惟

上帝眷顾我

皇清克馨其德

太祖

太宗丕显丕承逮及

世祖提仁义之师救溺拯敝奄有四海天下已定韬黄钺卷白旄归马投戈讨究先王之道播圣人之训以休中外以育万民念孝经一书为孔子明伦治世之大法而自汉以来去圣日远古文今文之互异注疏训释之未精迺集古名儒嘉言懿论考订采辑间出

宸断名曰御注孝经备一经之体要明至性所周浹俾夫搢绅之士农野之民皆有以知孝为百行之本而爱敬尊亲笃摯有加虽古圣王木铎之徇路辟雍之鼓徵曷以加兹我

皇祖圣祖仁皇帝上谕十六条以敦孝悌重人伦为首及我皇父嗣登宸极迪光继述衍

圣谕广训之书於敦孝悌重人伦反覆开明惟恐人之弗知知之弗行而行之弗切以此见我

皇清

圣圣相承莫不以孝治天下依人性之本然以成淳美之俗而开宗明义则自我

世祖御注孝经阐发天经地义民行之确然而不可易肫然而不容己者以昭示奕叶垂之无穷爰盥手而谨书於後云

恭跋

皇祖圣祖仁皇帝御制避暑山庄三十六景诗

曩年十二时蒙

皇祖圣祖仁皇帝推爱我

皇父之肫摯特令【孙臣】随侍宫中朝夕承欢不离左右其年四月随

驾往热河避暑凡三十六景之地无不周览聆

圣训被赏赉不可胜纪【孙臣】时虽少然受

皇祖深恩尝思久侍

慈颜长领

训诲谨身约已庶无过尤以报高厚之德於靡穷昊天不吊其年冬

龙驭上宾我

皇父哀毀过礼食不甘味时同兄弟问安必勉怡顏色以舒

皇父之忧退而自号哭於庐次潛然不絕盖恐伤我皇父之心而每念我

皇祖哀恻思慕实不能自己也数年来

皇父屡命往祭

景陵冠剑犹存音容安在一望

山陵魂飞魄越雍正七年冬敬读

皇祖御制避暑山庄三十六景诗兼披图画回思曩时承欢侍顏蒙恩宠而被诲爱者如在昨日兴言及此泪欲沾衣夫以

皇祖天亶之圣卓越古帝王深仁厚泽六十余年浹於民心载在史册固非言词所能赞扬於万一【孙臣】在诸孙中最为钝鲁然天地之泽靡不均被而有得之最深者焉【孙臣】得

皇祖之泽最深者也敢恭纪於後以志思慕之诚久而益笃云【孙臣】 谨书

恭跋

皇祖圣祖仁皇帝千叟宴诗

古昔圣王诞膺天命表正万邦建中立极渐仁摩义胥天下之民跻之仁壽之域者必其身为继天首出之圣人然後能歛福以锡民而受非常之庆帝尧在位一百一年帝舜三十登庸三十在位履至尊者又五十载时若禹臯陶稷契夔益诸臣同心同德白首黄发賡歌喜起於一廷之中而击壤老人含哺鼓腹耕田凿井於光天化日之中者莫不忘帝力於何有用登世运於邳隆而後世颂其巍巍荡荡三代以降淳风寢微惟殷中宗严恭寅畏天命自度肆享国七十有五年高宗不敢荒寧嘉靖殷邦肆享国五十有九年周文王受命惟中身厥享国五十年然其时君若臣以至庶司百职及耕夫野叟同登壽域共宴一堂者自古无闻焉洪惟我皇祖圣祖仁皇帝久道化成深仁厚泽六十一年官称其职民恒其业羣生沾濡德被乎方外所谓继天首出之圣歛福以锡民而受非常之庆也康熙六十一年春皇祖於乾清宫开千叟之宴

命年六十以上者乃得预惟时在位之臣自大学士以下至翰林御史凡七十人庶司百职及致仕之员近畿之民又六百六十人雅歌赋诗和乐壽恺

皇祖命子姓孙枝百余人执爵献酬济跽在列远追饋醕之义弗限三爵之仪【孙臣】时年十二岁得与有事之荣觀兹盛典

皇祖又作为歌诗

命儒臣依韵迭和为图以壽世传之无穷雍正七年冬得诗与图而披读之窃见我

皇祖如天之德如天之福与春阳秋露同其煦妪甘雨和风同其润泽合朝野臣民老耆期艾而锡之以宠光介之以繁祉方之帝廷賡歌之景象华封颂祝之休风规模宏且远矣敢恭纪於後以志太平之盛事云

恭跋性理精义

夫欲致天下於熙皞振风俗於隆古焕礼乐於三代兴孝弟於十室者必本之於崇王道而王道之崇则又在於尊儒学古昔圣王之治天下也设为庠序学校以教之每岁孟春適人以木铎徇於路戴记司徒修六礼以节民性明七教以兴民德凡所以重教化之道致天下於文明者也我

圣祖仁皇帝崇儒重道仁民育物兴学校举孝弟励风俗崇礼让凡古昔圣王所以治天下之道靡不毕举而又谆谆勉勉默契夫尧舜之授受孔孟之心传谓有宋诸儒上继絕学下开来裔实有功於世道人心乃因性理大全之书删去冗杂摘取精要命儒臣斟酌损益而亲为折中之乙夜披览历久成书勒序简端以诏後世伟矣哉自三代以来未尝有也虽汉明帝之幸辟雍唐太宗之讲太学不过取美於一时又何能开示天下後世为儒学之宗主接尧舜之心传实政鸿名辉烁於振古哉采羣儒之精华而去永乐大全之泛自明德以及新民格物以至平天下先其本而後其末探其源而考其实周子太极图通书明天地鬼神之奥张子正蒙西铭发万物一体之微至於皇极经世律吕新书皆自成一家言则总载之以成一卷而集羣儒之言分门别类又各於其类为之辨世次先後学问浅深寧纯勿襍寧精勿濫读是书者必先究心於论学之篇立志以端其本主敬以养其中致知以穷理力行以践实然後玩味乎治道以明治民立政之方沉潜乎全书以见天地之所以显鬼神之所以幽造化之所以运行而无穷圣功王道之所以灿然而可循确然而不易夫如是则我圣祖仁皇帝造物育材之心化民成俗之意欲天下後世之共臻於理学之盛者不虚矣

跋朱子大学章句

六经之文备衆理该万事集羣圣之精华以立言君臣父子之大伦往古来今之大法莫不於此取则焉所谓焕天下於文明而圣人之所以垂世而立教其意盖深远矣六经之外则有四子书大学为曾子所述反列於孔子论语之前者以圣经亦孔子所制其言由近以及远端本而肇末则又实为入圣之阶梯云自汉以来此篇载於礼记而莫知尊重至宋程子始登之於四书朱子从而解释之盖孔曾之道絕於汉唐绍於周程张朱五子孔曾之书亦幽而不显於汉唐之间逮程朱表章然後赫然昭着而大行盖道传斯学传非程朱无以传孔子之道故孔曾之书亦非程朱莫能尽发其精蘊也传有之古之人自十五而入大学教之以明德新民之事夫格致诚正修身明德之功也齐治平新民之事也内圣外王之道岂外乎此由近以及远

自小以至大言简而味长理明而词约诚兼备六经之旨而又便於初学者可不知所致力哉盖人心惟危道心惟微明德者明道心而遏人心也推而及物则新民也允执其中止至善之谓也尧舜之道不外乎是而朱子所以解释此书又理明词達得历圣传心之要尤学者所当体验而服膺也

书魏郑公十思疏後

人臣责难陈善?愆纠谬必本之以忠诚将之以公正匡救将顺补袞职之所阙尤以格其非心为先务焉盖君人者天下万民之主而一心又人君出治之主也心一正则事事无不正矣唐太宗三代以下能纳谏之贤主也其朝亦多谏诤之臣而必以魏郑公为首者以其能格君之心也郑公之奏疏多矣而必以十思疏为冠者以其就发谋出虑之始而俾知所致谨也夫木本水源之譬非谓人君之一心为理天下万事之本乎固其本而浚其源非欲正其心以为出治之源乎思者心之发而未见者也心之将发未及於事则有此十思焉又何入於邪径而不光明正大之有哉易曰君子见几而作书曰惟几惟康郑公之所谓思即谨几之意也谨几而心正矣心正则天下之事无不正矣故贞观之治多郑公之功岂不伟哉

书新唐书兵志论後

治天下者以德不以力故德盛者王德衰者灭汤东征则西怨南征则北怨武王东征篳厥元黄惟恐後岂以甲兵攻战为取天下之具哉德盛而王天下莫不顺之故黎民归之如父母尚有以其子弟攻其父母者乎然自秦汉以来风俗日偷人心日下则有以甲兵得之以甲兵守之者矣其因时一切趋利苟便虽可用於一时终无传於後世惟唐立府兵与租庸调相表里其制颇为近古子孙废之遂至於亡以此见祖宗之法制不可以变更也唐初取兵於农分番入卫四方有事命将出师事成兵归於府将归於朝故民无怨心将无兵权及其後也府兵之制废而为彍骑彍骑之制又废而为方镇方镇盛强天子微弱竭天下之力以养兵而方镇用之以抗衡天子欲其不亡岂可得乎夫养兵所以禁乱及其弊也足以为乱不养则不足制变於一时养之则坐食而骄故规制不可不善也则为开创之君者固当深谋远虑以立法於永久而为子孙者兢兢於修德爱民以制治保邦又当谨守祖宗之法以无授权於他人而资乱阶焉则几矣

书朱子戊申封事後

朱子立朝四十余日前後所上凡七十余疏皆切於事务不畏犯顔虽古名臣以极言敢谏著称未有过此者焉至於戊申封事直指本原痛陈时事皆洞中窾要若仓扁缓和之能起已锢之疾而惜乎其时之不用也嗟乎此殆所谓正心修身齐家治国平天下之本为先生封事中第一急精竭诚不遑自顾以告其君者乎其大本急务之说与中庸九经相表里而大本则有一曰正君心急务则有六曰辅翼国本选任大臣振举纲维变化风俗爱养民力修明军政及末又以时之弊政与古不合者反覆陈之累累数万言而其文之灝气流行变化开阖使人读之鼓舞激发沉吟紬绎而不自禁盖大儒之啓沃宏矣夫学术与事功二者本相因而传道之

言与济时之言二者又一致济时有大小而传道有全功能为济时之言而身非传道者有之矣未有身膺道统之寄而功不见於时者也先生传道之人也则其有济时之言也固宜

御制乐善堂全集定本卷八

卷九

钦定四库全书

御制乐善堂全集定本卷九

杂着

读二南

夫闺门王化之端生民之始致其贞淑辅佐君子然後夫倡妇随内以闲邪僻而养中正外以施女教而化闾阎易首乾坤书重厘降而我夫子之删诗复冠以二南其旨深远矣盖二南所以着周初风俗之盛由闺门而達之邦国推之天下者也谓之风者其体制别於雅也繫之於周召者古者陈诗以观民风各以其地别之故作於岐周封域之内者则谓之周南召伯巡行南国采风而得之者则谓之召南然周召之政教即文王之政教也文王之政教本之关雎得内助也终之麟趾关雎之应也於是及於江汉逮於汝坟则国中莫不化其政教矣施於南国而南国诸侯化则鹊巢之诗作匪特人也且及於物焉则驺虞之诗作推而至於行露標梅则南国之人莫不化其政教矣室家之道修则天下之理得夫妇之义正则室家之道修男敬身以率其妇女敬身以从其夫有关雎麟趾之意然後可行周官之法度其语岂或爽哉

读鹿鸣至天保六诗

尝读易之泰象曰天地交泰解之者曰陰在上而阳居下君下交臣之义也又曰天地之体不可交而以气交君臣之分不可交而以情交古昔圣王所以维持世教平章百姓使万邦协和黎民於变者亦赖有此情以相维繫耳故礼以节之乐以和之饮食以荐之宾主以亲之歌咏以侑之使愜其情而不流焉其在诗曰我有嘉宾鼓瑟吹笙人之好我示我周行燕宾客而欲其示以大道则君臣交警之意亦寓於其中矣使臣奔走於王事故作四牡以劳之曰岂不怀归王事靡盬所以逆探其念父母之心而恤之徭也皇皇者华教使臣曰其谘事而为谏乎谘难而为谋乎谘礼而为度乎谘亲而为询乎欲其徭五善而事无违行也常棣之华燕兄弟也疏其所亲而亲其所疏失其本心者也故其诗曰凡今之人莫如兄弟又曰兄弟既具和乐且孺犹恐人之弗喻也又曰是究是图亶其然乎既乐兄弟且逮友朋焉曰相彼鸟矣犹求友声矧伊人矣不求友生人君以情接其宾客使臣兄弟友生者如此故其臣作天保之诗以答之其诗曰羣黎百姓徧为尔德盖既颂且规焉乐而不淫上下和穆醉以酒而饱以德吾於鹿鸣之什见之孔子曰郁郁乎文哉吾从周言其化行於关雎麟趾而施及於天下礼明乐备岂非文武周公之余泽哉

读邶鄘卫风

孔子删诗三百篇以周南召南为正风以下十三国为变风而以邶鄘为变风之首均诸侯也

圣人列卫於首何哉鲁卫为王室之懿亲既登鲁於颂矣则其次莫亲於卫又有康叔武公文公之贤是以圣人登之邶鄘卫三国也而所言皆卫事何哉盖卫之子孙稍并此二国而一之耳既并之矣又存邶鄘之名者土风各异其诗盖作於二国之遗民者也邶首栢舟鄘首栢舟卫首淇澳贤侯贞妇有恺悌之德无邪僻之行作为诗以自见所遇不同而终归於正然君子读绿衣终风之诗而知卫之无以为国矣继以墙茨偕老之刺兴桑间濮上之音作而国社以亡由是知闺门为王化之首而男女之际生人之大欲存焉可不大为之防哉张子曰周之兴也商民後革及其衰也卫风先变盖卫即商之地书所谓沫土诗所谓沫乡也其民为商纣所渐染日汨於酒色而不知故虽康叔武公之贤凯风之孝子北门之忠臣北风之智士干旄之大夫简兮之贤人考盘之隐者亦莫挽其颓风而至於淫荡而不自禁以是知恶习之易染而难革也

读秦风

秦襄公以兵送平王东迁王封之为诸侯能逐犬戎奄有岐丰之地君子於是知平王之庸委旧都以与人而周竟以不振也岐丰乃二南兴化之地其民质其风淳其土厚而水深秦之兴教之以猛驱之以利其强毅果敢之资足以成富强而诸侯畏之故其诗如车邻驷驖小戎无衣诸作莫不美其车马之盛战阵之勇而无室家之思论秦风者或哀世道之衰或叹强秦之敝而余独怪平王东迁之谬至於此极也夫以秦民之质秦人用之尚能鼓强毅之气成招八州朝同列之势岂其以天王之尊守祖宗之法而反不能兴起於仁义厚集其国势以怀天下哉故定都立国者当审其居重驭轻之势自上临下之方而祖宗一定之基切不可苟变也邵康节谓夫子定书以秦誓缀周鲁之後知周之必为秦也删诗亦然齐桓晋文之後惟秦駸駸始大周亡而秦兴夫子早见其兆矣余则以为不然鲁宗国也秦誓悔过之辞也故载於书至於秦风之後尚有陈桧曹豳四风何所见秦之代周乎钱天锡引吴楚诗无传而秦风卒不削以证邵言之不谬盖夫子删诗其存者则间存之其无者不求以补之也吴楚之诗本不列於周太师之所采则夫子亦置之不论又岂可以此而汨圣人删定诸经之义哉

读无逸

尚书自二典三谟以至商周之诰皆古先哲王明臣良辅相与咨儆一堂以为久安之图後之言治者舍是无他求焉然取其近而切明而审天子臣民皆当奉以为规则铭之於座右者则无逸一书又为最要无逸者周公以成王初政惧其知逸而不知无逸故作是书以警之也始言稼穡艰难重务本也次言前王之所以享国长久与後王之所以罔或克壽戒怠荒也次言太王王季文王之抑畏卑服者欲其法祖也又言嗣王无淫逸游田而以万民惟正之供者欲其无荒宁而省赋歛也又言古之人犹胥训诰胥保惠胥教诲者欲其纳谏也又言小人怨汝詈汝则皇自敬德者欲其谨已而无责於人也终言嗣王其监於兹者言虽有尽而情则无极故丁寧反覆欲其永监也自天命之精微至畎亩之艰难无不备具岂独成王所当奉以为龟监乃万世之龟监也或曰苏子瞻谓周公作无逸上不及汤下不及武王以为成汤武王非圣人此固非经旨矣然所以不及成汤武王者抑亦有说乎曰成王守成之君也无逸为守成之君而作也与守成之君言守成之事则欲其法守成之君故殷三宗皆继体之君文王虽维新

周室亦继王季而为诸侯也故不及成汤武王者盖谓汤武伐夏灭殷固不可与守成之君一例耳诗咏豳风书陈无逸周公之教戒维殷成王之敬勤无怠八百之基定矣

读吕刑

武王命康叔之言曰惟乃丕显考文王克明德慎罚又曰用肇造我区夏越我一二邦以修是明德慎罚者文王之所以造周而修及邻国也武王敬明乃罚成王辟以止辟乃辟是武王之代殷兴周成王之继志守成亦在慎兹祥刑也文王以之维新周室武王以之保有四海成王以之嗣受厥命其本皆在於慎罚用绵八百之基而过夏殷之历穆王用吕侯为司寇命之作刑以诰四方其有意於乃祖乃父之慎刑乎论者以为穆王老而耄荒车辙遍天下而财用不足作赎刑之法以歛货然孔子采之於书者亦取其谆谆教诫官伯族姓哀矜惻怛以民命为重耳其言惟敬五刑以成三德罚惩非死人极于病则与大舜明刑弼教之意何异然虞廷之赎止於鞭扑而此则及於大辟故令人疑以为歛货也读者知其五刑竝赎之非取其矜恤民命之意则几矣

读秦誓

孔子删诗书以商颂鲁颂次周颂以费誓秦誓次周书商即周所代以王者鲁则宗国而父母之邦也其登於诗书均宜至秦则西戎又非本国夫子何取於秦而收其誓於尚书之末哉或谓伯禽征徐奉王命以讨乱着其是也龙郑之役无王命而擅兵着其非也或谓秦代周有天下夫子逆知其然而存其誓也二者皆非也何也予夺是非者春秋之权也逆知後事者诞妄之说也二者於书何有哉登秦誓於书者取穆公悔过之笃而谆谆於良士也孔子曰过而不改是谓过矣子贡曰君子之过如日月之食焉圣贤之诲人改过昭昭甚明今夫布衣里巷之徒自信其志以为可行及遇差慝明知其非而不悔又遂之者皆是也况以千乘之尊自贬其志而从人之是岂非易之所谓见善则迁有过则改者乎且致戒於截截谰言之不可用黄髮无愆之不可弃休休者好善容贤如此其笃有利於国家者如此其至冒嫉者妬贤嫉能如此其甚有害於国家者如此其极故夫子收之简末以继典谟训诰之遗其垂训也大矣或曰春秋讥秦晋用兵之失起衅於龙郑即一事而圣人於书则嘉之於春秋则讥之何哉曰书之意主於劝善其词恕春秋之意主於惩恶其法严圣人何容心哉

读董江都贤良三策

汉承秦敝文教未兴高祖拨乱返正文?休养生息至於孝武表章六经兴学校之政首举贤良方正之士策之於廷而董江都以宿学硕儒实对其问首策陈天人相感之理二策言修明教化兴太学以养天下之士三策劝帝法天尽性知仁义重礼节安处善乐循理盖内圣外王之道修己治人之方无不备於三策之中而所谓诸不在六艺之科孔子之术者皆絶其道勿使竝进武帝用之以罢申韩苏张之学尤为有功於圣教使武帝信任仲舒大究其用则将有关於文景而贤相若萧曹辈俯出其下又岂有穷兵黩武之祸舟车缙钱之失哉而摈之江都以终其身君子读其策想见其为人盖不为江都惜抑为武帝惜也世之论者谓汉儒通晓经术

宋儒深於理學夫窮經即所以明理而理學未嘗不衷之於經術漢之董子宋之程朱又豈可以經術理學限哉程子曰董仲舒有儒者氣象可謂的論矣

讀楊澆劾魏忠賢二十四大罪疏

自古寺宦之亂人家國者多矣其始未嘗不為小忠小信以結人主之知使外言不得而入人主信之不疑然後攬權肆虐無復忌憚而君上之操柄失矣縱復疾其所為欲引外廷之助以除之而近在肘掖禍起蕭牆望夷之事甘露之變良可寒心予讀楊澆劾魏忠賢二十四大罪疏而知其不為趙高仇士良之所為者亦几希耳而熹宗略不加省專意庇璫吾以為熹宗之黯直甚於彼二主耳蓋二世文宗猶能知其為不善而欲去之熹宗則始終信任之靡他且屬懷宗以信任忠賢吁惑之甚矣然使熹宗而有欲去忠賢之心忠賢其遂甘心以受熹宗之斥哉是知人主不可不延納賢良以自為助而宵人在側附者如蟻大權已歸雖欲去之豈可得乎故熹宗之用忠賢也王心一首言之侯震陽繼言之周宗建又繼言之文震孟因講學之疏而直陳其奸劉之鳳因內操之疏而指其不測至楊澆二十四罪之疏上而忠賢之奸佞畢露蓋不可一日而容於天地之間矣使熹宗觀此疏而赫然震怒大振乾綱申春秋無將之誅比漢法不道之律則忠賢之羽翼猶未成而忠賢之流禍固亦未甚酷也至楊澆左光斗輩駢首被戮而毒流縉紳元氣凋喪余謂明室之亡不亡於崇禎之有流賊而亡於天啓之用魏璫然則楊澆此疏明室存亡之所繫也而不用且加誅焉甚矣熹宗之黯也

擬程明道請修學校尊師儒取士劄子

臣聞天得一以清地得一以寧聖人得一以為天下貞故天地之大無不覆幬而春夏秋冬分其序山川河岳效其靈天地惟以一元之氣主之而已矣聖人之德無不光被而三公六卿分其職百司庶吏效其勤聖人亦惟恭己南面而已矣何則大本已立而所任者得其人也古昔聖王之治天下少則習之業長則才諸位是以人君南面正位而人稱其官天下以治萬邦以寧與天同意者也有宋五星聚奎實主文治而教化未興郅治未隆者蓋事不師古未得其道耳臣愚以謂使賢者在位能者在職必先於取士取士之道在於興學校而學校之興又在於尊師儒請條其事陳之於左記曰司徒修六禮以節民性明七教以興民德書曰天降下民作之君作之師又曰若有恒性克綏厥猷惟后三代而上未有不明道重師以覺斯民者也秦漢以降聖學不明異端蜂起各守師說簞鼓於世是以上無以持一統而愚民不知所遵守為今計者莫若尊明正道選天下之賢才擇其學業大明體用醇備者以為太學之師其餘以為天下郡縣之師不數年間郡縣州里皆有英俊之士矣此興學校之必在於尊師儒也古者王公以下至庶人之子弟自八歲而入小學教之以洒掃應對禮樂射御書數及其十有五年然後入大學而教之以窮理正身修己治人之道是以國有學鄉有校黨有庠凡所以教民於幼稚以成其德而正風俗也漢唐以後學校為具文無教養之實願陛下申命有司俾州縣各立學校鄉學則散處於鄉以教八歲以上之小學擇其[?]者以教大學成人之士取民之俊秀者充弟子員則民知禮義廉耻而賢才可得矣師儒立而正道明學校修而人才衆然後使郡縣各以其學之子弟舉其賢者貢之京師萃之太學以考其才任之以事以觀其績察其善否而黜陟之則天下之英俊皆登於朝而取士之道得矣此取士之必在於興學校也夫如是則賢人在

朝风俗隆美使天下後世谓陛下为有宋致治明主子孙承之万世永赖臣不胜欣幸

拟胡安定置经义治事二斋记

学校为育才之地所以淑其性情俾归於道德明礼义廉耻之习兴孝弟慈让之行以脩国家异日之用古者百官得其人万事得其理未有不由於斯也今天子圣神宰辅贤明建中出治使天下郡各立学学有教授之员以诱迪秀民膺斯职者宜体君相牖民觉世之心彰古圣成德达材之教讲明正学陶冶羣英方为无忝余承命来是邦为多士师敢不殚尽心力以佐休明谨就学中立经义治事二斋其有学识开通潜心义训能辨同异不乖正道者入吾经义斋相与讲求至是而浮泛剽窃持其偏见者不与焉农田水利会计边防事之不可不治者也明於此者入吾治事斋相与究切实用而拘牵不通与夫俗士功利之谈不与焉盖明经所以立本治事所以達用本不固则用何由精而用之所以能达端惟本立是赖二者虽不可以分而教者当各就其性之所近多士尚体予意穷经者必因经以明事治事者必因事以求经体用兼修本末一贯而不为空言则岂惟不负教者谆谆之苦心将见才成德立济济彬彬异日立朝廷之上引经执礼守正不阿赞治分猷天工能亮者皆吾党之士也多士勉乎哉

拟尹和靖六有斋记

余尝思古之学者为己今之学者为人春秋时文人学士徇物丧己孔子已深切言之至於今更有甚焉其背驰圣道毫不为己固不待言即世所称为建功立绩思効时用以自见者原其心势利而已矣夫学也者古以养德今以饰名古以利人今以欺世思反其初其在内外兼修存存不已乎善夫先正横渠先生之言曰君子言有教动有法昼有为宵有得息有养瞬有存夫言期其有教则必不敢为悖道之言动期其有法则必不敢为非礼之行昼有为宵有得则无一日之玩愒也息有养瞬有存则无俄顷之滑湣也以是持已则内外兼修存存不已之道也於以反其初不难矣人之生也其性无不善而其情有善有不善吾亦人也吾安知吾性之果能制吾情乎吾安知吾情之果能若吾性乎情可制也性不可流也何以防其流而使之若哉有吾六有之法存焉六有者非吾言也横渠之言也非横渠之言也有言有动以昼以宵以息以瞬者所同有也日从事於六有之中而私与邪莫之有焉则所谓有其有有其有然後天良存恐吾之志不终也因以名其斋

御制乐善堂全集定本卷九

卷十

钦定四库全书

御制乐善堂全集定本卷十

表

拟

上颁

圣祖仁皇帝御纂易书诗春秋讲说朱子全书性理精

义等书谢表

伏以承

先启後实维

首出之君觉世牖民共仰

生知之圣亶聪明以作

元后绍庭敢懈於渊衷一道德而同民风建极不忘於典训

王言用布

祖制聿颁亿万年道运丕昌共覩文明之式焕五百载心传若接咸遵删定之维新至道光昭湛恩汪濊【臣】等诚惶诚恐稽首顿首上言窃惟羲皇画卦以开天性命之精始着尧舜传心以明道危微之义乃彰三百十一篇之咏歌教惟淑性二百四十年之笔削法在尊王是以穷本溯源不外诸经之旨然而循流竟委又有翼道之书故周程自濂洛以扬徽而张朱起关闽以建帜首寻圣绪刊落陈言他如同时之儒与夫私淑之士莫不抱遗经而叩其终始望先圣而溯厥渊源然而易道幽深孰识由来之理数书辞佶屈或参当日之方言笺注纷纭诗义因之而渐晦传辞交错麟经反致於难通议汉儒者曰无明道之功訾宋儒者谓鲜诂经之实惟知经自经而道自道岂解经载道而道传经虽宋儒极力以廓清而明季复多端以煽惑未有经明道显开通万世之津梁作圣述明昭揭千秋之模楷如

今日者也兹盖伏遇

皇帝陛下云日为瞻羹墙如见治薰蒸为淳古允迈百王学缉熙于光明式敷五典昭格

上帝时时以

圣祖之心为心涵育下民事事以

圣祖之政为政事惟师古道在率先念

圣祖仁皇帝探赜钩深既同韦编之絶执中建极实承道统之传扞雅扬风何异宣尼之删定属辞比事尽芟衆说之支离至羣儒皆已表彰而朱子尤加尊礼谓其言精而义尽允宜身服而力行几经

乙夜之勤犹分

万几之暇俱加纂辑重获编摩虽开雕备续於昔时而颁行有待於兹日我

皇上继承志切诱迪心殷永维

先志之宜遵嘉与薄海而共守徧颁直省俾钁版於学宫广励师儒使镂心於经术近自畿甸远暨寰瀛声名文物之邦益沾

圣化岭徼遐荒之地共覩

皇猷洛闽绵泽於无疆洙泗流芳而不竭从此遵道遵路悟断潢絶港之差学者是训是行识宗庙百官之富自天雨露育成济济之人材特地恩波酿作熙熙之大化【臣】等识同窥管学谢雕虫占毕徒呻每望洋於学海近光有志赓复旦於尧天叨与

赐书凜遵

圣训伏愿治如雨化学以日新蕴周情孔思以修文法放勲重华而御世默成太极岂惟歌咏怡情远接心传自尔是非立辨以引以翼存陟降之小心

作君作师布雍熙之大化则会其有极归其有极无不同之车书自西自东自南自北无不被之声教矣【臣】等谨奉表以

闻

拟

阙里文庙告成贺表

伏以

帝治崇儒九有仰乾行之健

皇猷重道三无炳离照之光辟雍振铎鼓以和声乐华层吐胶序集珪璋而制器礼叶旁敷元和洽而泰阶平文教昭而王道坦宫墙藻曜指桢影以增欢俎豆祥开望杏坛而色喜儒林雀跃文囿翬飞【臣】等诚欢诚忭稽首顿首上言窃惟分野奎娄原属文昌之宿储精泰岱实称礼乐之邦非造化所独私实生民之厚幸圣而拔萃开万世以儒宗集厥大成等百王而未逮是以尼山木铎响嗣千秋绣绂神区宅安万古牲牢过鲁昭汉祖之遗徽麟凤升歌着唐宗之芳轨然而祖述宪章之美上律下袭之隆既莫造其堂阶又孰知其阃奥音闻丝竹壁虽完好於鲁共像设冕旒宇仅葺宁於明代未有庙堂式廓应景运而维新典礼优崇际昌期而悉备煌煌钜制恰应珠联璧合之期奕奕弘模适当复旦卿云之日人文与天文并灿圣居与圣泽偕新如

今日者也兹盖伏遇

皇帝陛下胞与无私羹墙有慕节俭以先天下阶茨遵茅土之风仁孝以育兆民堂构美丹青之牖太平有象郅治难名弛张宽猛咸宜乐利貽夫四海雨阳燠寒时若怀柔暨乎百神频行

释奠之仪屡举

临雍之典观书则政惟由旧讲易则义备画前既化雨之旁施亦恩波之普被称先道古奚袭乎三老五更纲举目张悉協夫周情孔思

帝谓至人之庙貌宜增美於重熙累洽之余

天眷元后之精诚不屑循夫玉检金泥之举藉经营於昭代貽缔造於

一人既革故而鼎新益光前而裕後经始甲辰之夏落成庚戌之秋璆铁琅玕宝藏竞输精於鲁望榱桷杞梓楚材争矫首於秦封大木抡自工师高敞焕龙文五彩色瓦成於内府陆离瞻翬翟交翔默呵护於鬼神如松如竹显监司於卿尹其正其平準魏阙以定规仿岩廊而布象域显文明之气云呈卿裔之华青凤盘乎觚棱赤螭卧於榱桷圣时弘道新顔从入之门立体通方务塞奇袤之径仪物重修古制祭器

特颁上方允为前代莫覩之休宜在生民未有之圣【臣】等志存入室学仅面墙溯流以穷源粗识先河後海正谊而明道谨思义路礼门宗庙百官之美富难窥唐虞三代之隆平幸际伏愿冈陵巩固磐石奠安高以下为基若筑室之必根於坚碲诚以明为牖如容光之旁烛於

四隅无反无侧无党无偏元恺升而金壬悉化有冯有翼有孝有德珠囊挈而玉烛常调行举言扬隐致慰於猗兰之操耿光大烈永垂庥於阙里之居【臣】等谨奉表以

闻

颂

九符【有序】

粤若稽古典坟厥初生民低处者巢高处者穴取草木皮革罗鸟兽漉水物以为衣为食君臣父子上下长幼男女夫妇莫有伦纪圣人伏羲氏作始画卦以通神明之德类万物之情造书契以治百官察万民政令行民用遵约束时则有龙马负图之应迨黄帝轩辕氏宰制羣动垂衣以治作甲子天用锡以日月合璧五星连珠造律吕播其八音而凤凰巢阿阁与蚩尤战於涿鹿之野有云气止於帝上其後复有圣人曰尧治?象置州牧四岳明俊德以亲九族協和万邦时则百兽率舞廷生五色瑞芝舜承是道重华協于帝建学养老敕命赓歌卿云复旦凤凰来仪上下草木鸟兽鱼鼈咸若暨禹汤文武祗德建中无逸执竞时则有锡洛衔钩鸣鸟流乌之瑞揆古圣帝王罔不得天嘉祥为受命之符亦罔不在德其惟时叙罔不克加抑畏用兢业於有邦以答天之眷命自时厥後由汉迄明英君谊辟天亦默相厥德眎其所履以为協应其有矫诬谀佞诈作符瑞以欺中外以惑蚩蚩氓天弗与民弗信也洪惟我

皇清

圣圣相承宅中图治以抚四海德威并行汪濊暨讫天用锡以洪庥敬戒不怠用培我丕丕基雍正三年三

月太史奏日月合璧五星连珠

皇帝曰惟予

丕显考圣祖克圣克仁克膺

天佑予一人是赖有司其择吉荐牲以告

景陵羣臣固请陞殿受贺不许嗣是嘉禾瑞茧庆云芝草醴泉甘露河清凤仪之瑞先後疊奏我

皇上祗承

天眷弗敢自居或则归美

圣祖或则不以宣示且曰朕所喜者丰年为瑞及汝诸臣宣力四方斯朕志也【臣】谨按王者必世而後仁天人叶应嘉祥骈臻必俟仁而後益显故生民公刘之诗作於周召清庙明堂之什成於冲子我

太祖

太宗肇基新命我

世祖

圣祖克成先志永绥兆民功崇德溥累洽重熙胜於成

周我

皇上归功

圣祖盖本於世而後仁之义然非

皇上以圣承

圣覲光扬烈恩泽覃敷民饮其和

天歆其治应感之符必不若是速也且周之盛时虽宅丰作洛抚有千八百国而幅员尚小孰若我

皇清东至于海南尽交趾西届哈密北之七十四部羸膏橐负致诚贡献者岁岁不絕自京邑大都以至山村僻壤耕凿顺则各勤所业武夫战卒有老不识兵戈者由斯以谈

天之眷我

皇清於周有加焉记曰圣王在上天不爱道地不爱宝

人不爱情考之今时洵合其语

天子犹谦谦自牧敬德弗遑修我人事抚我烝黎方将上溯尧舜钦明文思温恭允塞之德中考汤武表正万邦敬胜义胜之徽以措诸政令以为万载规敬迓

天庥永永无极敢敬择其符之显奕者有九各系以词

以效颂祝之忱云尔

合璧连珠

昊天有命眷我

皇清奄有九有暨乎八紘以养以恬灏灏和宁曰惟圣祖文思钦明

皇帝纘之濬哲丕承

天鑑孔昭厥符惟祯自古在昔黄帝握历璧合珠联昭哉艺极旃蒙之岁单阏之月聿见嘉祥其祥长发宿躔营室位在姬訾双璧轮囷五珠迤迤星台告瑞太史书呈

帝曰休哉惟

皇考实膺爰陈於词爰告於

陵有谦其躬有让其衷惟

皇孝思格乎

苍穹岂惟民哉届於昆虫

黄河清

银汉焕光河精发祥九曲弥亘浩渺汪洋宿列崑仑流经积石匪澄伊黄浮天浴日曰既清止休符显奕徐邳淮泗千里静碧冯夷息浪河伯安澜五老上告紫盖缤翻涤而濯矣既清且泚漉其浊矣既迅且驶镜流弥弥素波涟涟上映下澈天水相鲜畴克澄其源畴克致其然颺自

苍旻景福永绵以光我万年

孝陵神蓍

景陵瑞芝

煌煌神蓍奕奕灵芝百茎九光神物应期

帝命东皇分植

两陵无节而秀不根而荣润以仙露灿于

宝城於皇

世祖开物成务远至迓安金瓯巩固

皇帝敬承羹墙见慕斋戒神明建中饬度是用产蓍以应嘉祚於皇

圣祖握符壽世育之以仁正之以义

皇帝敬承同归一致乃文乃武以葆以艺是用产芝以昭上瑞芝既苍矣蓍既长矣贞符彰矣
壽而臧矣暨万邦矣

嘉禾

有猗者禾在彼中田尔农来思越陌度阡芟之奕奕柞之泽泽五谷既播三时无失载甲载坼
载长载褒载穰载实载硕载茂

帝实顾矣稷实助矣风披拂矣雨灌注矣绥我屡丰言呈其瑞休我

皇风言多其穗远自滇南近兆

帝藉匪双伊九匪寸伊尺先民有言食为民天百谷用成自古有年

瑞茧

帝念民依惟农与桑孰饥莫食孰寒莫裳雕镂必黜爰勤三农纂组是省用紓女工

旻天维显聿降瑞茧瑞茧维何万蚕同簇曾不经纬曾不杼柚苑窳致力西陵效勤神功默相
嘉茧乃成尔纯尔素匪红匪紫尔质尔实匪锦匪绮言徵其应言发其祥佑此蒸民成以报章
太平之泽五十衣帛夏清冬温太和充溢

甘露

奕奕吴都沃壤甫甫有苗有禾有丝有紵其农于田侯主侯旅其贾于市侯笑侯语维时之泰
饮

帝之和含哺以嬉渥泽孔多

上天锡瑞降兹甘露零我吴都佑我休祚其凝如脂其甘如饴湛湛瀼瀼如珠之垂曰既零止
天下宁止曰既溥止万邦安止以兆嘉祥降福孔穰

醴泉

坤元载物厚德安贞孕祉毓祥乃效厥灵有醴者泉载甘载旨莫寻其源载清载泚惟泉之功
养而不穷我皇之心濬哲宏通惟泉之沔流膏润下我

皇之泽物无遗者惟泉之源用之日新我

皇基命浩浩渊渊惟泉之发挹之不竭我

皇虚已闻言若决在易井六勿幕元吉劳民劝相中正作繡

阙里庆云

巍巍

宣圣上律下袭祖述宪章斯文舄奕我

皇膺命心契圣时以养以教作君作师爰新阙里庆云式焕紃兮纍纍郁兮烂烂迺映杏坛迺
覆桧千金枝蓊鬱玉叶璀璨惟

帝之诚致云之卿以彰我文明以贲我太平

房山凤凰

四灵之一厥惟凤凰感我

圣化游我帝乡帝乡之南聿有房山離離喈喈来集其巔亦集爰止惟

皇之祉藹藹吉人维君子使六象其体六府是修九苞其文九夷来柔明明

上天鉴我

帝德朝阳叶应文明万国

赞

十臣赞

张子房

卓彼留侯家世相韩嬴殄韩宗心瘁力殫东得力士击之博浪匿游下邳受书圯上乃得其传
乃遇其主谓沛公英仁是殆天所与帷幄运筹千里决胜鱼水之欢谏从言聽既遂其志亦遯
而肥优游赤松烟水鸥夷眄彼渭滨同归一辙渺矣风清冷乎冰洁

诸葛武侯

南阳之藪有龙而蟠金玉其音硕人之寬昭烈下贤三顾弥?风云蒸变乃出其渊东聘吴都纶
巾羽扇業業楼船煌煌火焰摧曹和孙克定益州乃集其势乃成其谋白帝托孤实肩鉅任尽
瘁鞠躬王臣之苾七擒六出八阵千井集思广益澹泊宁静察变以明动物以诚奸回丕革宫
府肃清诸葛大名星辉云烂惟公一身存亡系汉

高伯恭

渤海之疆笃生伟人元气所蒸厚德无垠元伯夙誉阳平早庸清平自守讞狱惟公乃抗雷霆
乃蹈虎尾尤恐兹心负翟黑子忘身济物卒感主明数千人命赖以全生才本於学知发於仁
敦仁力学品乃大醇黄中内润文明外照百龄纯嘏六朝光耀

魏郑公

隋失厥政豪杰并争孰驱而除孰创以成有唐文皇龙準日角杜断房谋伟哉降岳九有同轨
仁义施治爰有郑公盐梅之器?纠谬愆献纳忠谏安国利人浩然盛养屡陈直谏事君以诚十
思十渐防患未萌维山岩岩维松植植猗欵郑公古之遗直

郭汾阳

河之曲贼厉其属矫矫汾阳疾驰搃其纛藁之城沦於思明皤皤汾阳偏师挫其萌乃搃乃挫
禄山丧谋卒帅虎臣克复神州灭安殲史旋定河中吐蕃夜溃代宗复国繄惟公之功招之即
来麾之即去往说葛罗仗此忠恕灵耀卫币承嗣拜使朝恩叹为长者怀恩麾下亦愧从於不
义惟诚感物惟明保身孰克当此维公之云

陆宣公

维山有玉惟璞藏之既斲其璞不圭璋之维水有珠惟蚌孳之既剖其蚌卒弃置之卓哉宣公
明珠美玉施之不穷守之弥笃弱龄侍从歌诗宴游兴元戡难乃展厥猷猷纳论思兴利除害
举直错枉靖内安外曾史之行管乐之才经纶奏列不待安排事急则需事缓则舍德宗猜刻

庸主以下君用则行君舍则藏宣公忠荃邦家之光维公一言自知甚确不负天子不负所学

韩魏公

奕奕相州维天之中孕祉毓灵间气所鍾爰生魏公金坚玉润相厥明时辅成景运弱冠登第
聿见嘉祥云辉日下五色呈光大材不器小用亦效西夏寒心两宫谐孝齐范驾富宏展经纶
临事决疑正笏垂绅皎皎易污嶢嶢易缺维公德量山崇海濶材既轶世学亦通方光辉事业
灿烂文章肫然而仁毅然而醇猗欵魏公古之名臣

范文正公

岳岳希文学修行淑本仁祖义正直明肃陶铸人材心宏诲育成两大儒横渠明复公之心事
天光日照谏垣气凜西夏威耀进忧退忧江湖廊庙天章论对十事聿陈长沙之策敬輿之文
参政九月潜毁交闻志未大展千载经纶公有至性内行克敦周友恤族率祖率亲义田之举
大惠宏仁有宋人物公尤彪炳维云之卿维星之景

司马温公

仁英继统韩富当朝谐孝两宫伊韩之劳爰有温公维持左右直斥守忠议礼匡救熙宁元丰
新法聿行惟公上言辨之甚明宣仁临朝自外召之爰立作相心乎好之维士与民万口如一
僉曰休哉相我君实既遇其时亦伸其志有猷有为补偏救弊惟公一生悉本於诚言可对人
达於生平德化遐宣膏泽普沐於何见之社祭尸祝

耶律文正公

一代之兴必有伟才元室肇造公实盐梅幼龄质异长究儒宗律历术数靡不精通诚以事君
公以律已纠谬?愆救恶将美育才举士立法垂猷元政之成维公之谋均税均科慎选守牧不
去君旁国用充足惧法之凉锡民以福恳款陈忠为百姓哭有元诸臣公为贤相允如公言治
天下匠

箴

虚受箴

天地之心普物而发圣人之情顺事而达其情其心无彼无此厥故维何惟虚而已矧兹下学
亟宜自勉胡不虚已以受万善天赋以性我受此中五常百行善量无穷黽勉终身犹惧有阙
矧其自足善心斯遏告我以过乃我之师訑訑声色谁则我规舍已之非从人之是如圜斯转
如影斯徙曷虚尔中曰克尔已尔不克已自满则圯相彼沟浚雨集则溃过而不留其涸可待
瞻彼渤海浩浩浮天厥惟不满克纳百川既虚而虚复实而实允为中孚豚鱼皆吉

铭

乐善堂铭

秉彝惟民气具理存圣愚曷异善恶是分其善维何仁义忠信知诱物化遂亡其正惟危惟微人欲天理操之则存舍则已矣曷惟其操是曰乐善动静弗违斯须弗间我既受中我则蹈之我有秉彝我则好之闻人之善我则友之非徒友之又克有之鷄鸣而起孳孳不已至乐因心其味孔旨乐正好善邹孟称优东平乐善厥德允修呜呼念哉善可乐哉乐而不倦天性其培诚能好之万福之根反是则殆衆祸之门爰作斯铭服之无斁朝斯夕斯果行育德

御制乐善堂全集定本卷十

卷十一

[集部,别集类,清代,御制乐善堂全集定本]

钦定四库全书

御制乐善堂全集定本卷十一

赋

耕藉赋【并序】

皇上御宇之五年青帝司方之二月春风普扇阳德方

亨

天子乃耕於千亩之田礼也臣闻圣王务本耕藉以劝

农功明主孝亲亲推以供祀事我

皇上孝以事

亲勤以率民二载甲辰既耕加一兹又

躬行耕藉之礼急粢盛重民食致诚匪懈其典则隆洪

惟我

皇上道洽天人化沾草木诞敷文德广运圣谟渥泽周於羣生至治昭乎天壤乃犹频兴重农之典时勤保介之咨追厥唐虞播种之踪为彼率土民人之劝万衆观仪上农终亩迨厥秋成登於天廩荐之

皇天供於

祖考【臣】知

皇天

祖考鉴

皇上之精诚歆

皇上之大孝必锡嘏降祉永保无疆明德惟馨聿怀多福【臣】不胜踊跃懽忭之至谨拜手稽首而献赋曰

繄惟重华之命稷兮播谷实继乎禹功必烝民之粒食兮始风动而时雍亲耕肇於姬籍兮意往圣之皆同我大君之首出兮屡三推以劝农岂玉食之是享兮惟簠簋之?供秉耒耜以率先兮符泽物之元功於是春阳初布青帝司方嘉万物之昭苏值千卉之勾萌农祥既见土脉方昌协风应律阳气滋彰

皇帝乃顺月令抚嘉辰念民力饬甸人当前期而致敬用有事於青春於焉载师清畿封人净路常伯献仪掌舍设栒尔乃青坛蔚其耸立华萼森其崔巍云移翠幕柳拂青帟后千畦之平壤欣四涂之腴肥逮夫元辰既届晓色方鲜

天子则御藻冕佩苍琬被龙袞鸣和鸾载青旗扬朱旆接游车之鳞鳞施梁輶之戈戈尔乃稷宫将近乐具班陈

天子乃降御辇飡农神祈嘉谷焚燎薪礼成而退有事藉田衣被襍褊趾履陌阡王侯卫後虎贲导前太仆秉轡牵牛奉鞭乃历广塲抚御耦执縻手底不辞瘁乎三推载耒御间试躬亲乎千亩王公卿貳或五或九白叟黄童歌呼奔走维诚敬之聿昭知乐恺之孔厚於是黛耜方辍紺轅遂旋雨廉纈以洒润风缥缈而净天侍从偕来睹

天顔之有喜馨香上达卜庆兆於丰年夫元凤下亲耕之诏永平垂开藉之篇魏主望公田而发趾晋帝帅羣后以祀先尚传为古今之盛事并书之史册而烂然况乎我

皇至仁大知既事治而府修亦成天而平地修稼穡以勤民谨神仓而蔵事所无逸以知艰重明粢而将癸三春暖兮播百谷四野宁兮进双穗也哉乃为之歌曰田之兴兮稷之功泽万物兮助鸿蒙我

皇展事兮千耦其同和协天人兮一哉

皇衷既耕既耨兮我稼其丰爰播爰植兮麻麦幪幪又歌曰思乐甸畿千顷其耦

鸾辂载临

躬耕其亩登於秋廩斯箱斯仓荐之

宗庙供之明堂神之格思绥祉无疆

一人有庆永奠万邦

四时勤政赋

惟圣人之建极兮法天运以自强历四时以勤政兮亦日就而月将尧兢兢而舜业业兮萃芳轨於我

皇禹惜阴而汤浴德兮繄日进以无疆道既立而化淳兮美光天之徧育如云日之为瞻兮统要荒而臣服大哉

帝德辉光被乎八埏允矣

皇风恩波沃乎四渎尔其一日万几宵衣旰食诵抑戒陈无逸昧爽丕显夜以继日既劳谦而匪懈亦健行而不息勤问夜於未央虽寸晷而犹惜若乃春居东以首岁夏居南而执衡秋居西而司藏冬居北而主成春动也物以之起夏任也物以之生秋收也物以之结冬冻也物以之贞圣人推本万物之理而钦象四时之行政刑准之以有度治教由是而皆平燠寒应候而时若雨阳顺序而咸亨此吾

皇四时之勤政而用致九有之和宁者也又若政要书屏箴规刻佩日移崇政之餐汗浹延英之背彼古事之云远睹今兹之盛代厘夕惕与朝乾用持盈而保泰信日昃而弗遑岂臣邻之可贷

圣主图治以励精庶政分司而用乂於是喜而歌曰九鼎奠兮泰阶平

皇风普兮庶物亨万邦惟怀兮歌永清

帝心犹戒兮无荒宁朝夕兢惕兮象天行锡极敷言兮惟至诚拜手稽首兮於王庭

万寿无疆兮久道成

东郊迎春赋

震宫初动兮青帝司辰勾芒节届兮木德惟仁条风入律兮鸟历纪新展东郊之盛礼兮观畿甸之迎春既备礼而备仪兮亦有则而有伦盖钦承上帝而敬授於下民者也尔乃迎春东郊既着於月令青珪礼神亦载於周礼斗柄东指而万物生地气上腾而蛰虫啓出土牛以示农驾玉辂而禋祀於是服苍玉载青旗宗伯前导王公後随有严有翼不疾不迟乐奏而凝寒顿减舞进而阳和自滋於是欢迎白叟笑舞黄童夹道霏微而洒雨平林缥缈而摇风喜鸿钧之气淑知大有之年丰自南自北自西自东此皇都迎春之令典而万国莫敢不来同者也於是勅庶司决狱讼非终必赦惟祥是用象暖律之发生乃省刑而寛衆又若降制诏劳三农助萌阳

劝田功法恩光之普扇布仁政以胥融於斯时也户裛彩旛檐飞轻燕柳绿绮宫梅荣芳殿和风拂兮帘惹游丝暖日长兮莺啼睨睨金屏丽而帖写宜春宝扇开而漏传玉箭溥禁里之春光煦闾阎而皆徧乃为之歌曰迎东郊兮肃以将舞云翹兮歌青阳乘时布令兮德施长亿万斯年兮纪春王

喜雨赋

客有驾輶轩乘云輶展轸乎南亩纵轡於东郊邀游客与徘徊逍遥尔乃白云起乎空谷甘霖降於崇朝震雷??飞电燁燁乃往田舍而息焉有二三老人逡巡而前曰斯雨之降时则时矣膏泽之濡普而施矣抑谁之功乎请吾子明言以告之客奋袂而起曰猗欤休哉盛世之民也饮其德而不知其力坐吾明语子方今龙飞九五圣人在位德配乾坤功参天地精诚通於神明政教化乎万类故上天眷命俾雨阳时若而万方以治乃致含哺鼓腹耕田凿井者实不知帝力之赐也老人曰圣人之德某既知之矣请吾子赋雨之泽及苍生者可乎客曰若夫金乌收景层阴蔽空雷殷殷以振响电灼灼以摇红鼓河伯之惊涛涌海若之幽宫泻天池之巨浸走万里之长虹远迷三岛近失千峯回生意於衆卉消渴望於三农此则雨之方作而其势最雄也乃其云开雨止霁景澄鲜山宛宛其染翠木蓊蓊其逞妍鸟嚶嚶其鸣树草芊芊其含烟柳暗归鸦檐喧乾鹊槐影浓兮庭宇清花阴转兮帘栊薄纖歌动兮高楼红袖飘兮绮阁绡帙开兮芸编博山焚兮绣幕莫不欣膏泽之滂澍喜溜声之频落此又雨之既足而万方共乐者也至若乌犍耕白水之涯黔黎艺绿野之亩白叟欢呼黄童奔走土脉既滋兮禾麦如云灌溉不劳兮田畴以阜尔仓尔京尔荷尔负此又二三子所终日服事而知利我之孔厚也於是老人倚杖而歌曰雨玉不可食兮曷若嘉苗满目屯黄云雨金不可衣兮曷若五风十雨利耕耘惟天降康兮稽首苍旻惟皇感天兮永眷日勤千秋万岁兮乐吾之君

秋阳赋

有畏炎公子驾轻车乘驷马停骖乎曲畛展轸乎广野见秋阳之高曝看流光之徐下乃油然而喜曰此其蓐收司乎三秋祝融谢於九夏故炎者变而为晶畏者化而为爱也悬清大夫过而揖之曰公子之乐秋阳者徒以昔之炎烁今之清明也爱其温和而畏其歊蒸也不知寒暑相迁而阴阳相生请为子赋秋阳之功而万物以成可乎懿夫坤兑司方商金属时潦收寒渚波净横池肃肃兮爽气森森兮梧枝萎芳兰之茁茁灿黄鞠之离离於时日出扶桑耀乎东方六螭爰骋兮光荧荧而闪闪九道发辉兮气灼灼而煌煌商飈助其清晖闾阖翼以高翔明无幽之不照朗无微之不彰尔其金门朝启玉漏初宣千官鹄立百辟鵷联晃朗兮照帝座而明袞展熠燿兮浮凤辇而映龙旂合璧兮彩焕抱珥兮祥连鲁戈返舍兮彼诡诞之徒尔汉世再中兮亦荒唐之空传岂若炳焕彤庭霭贡金之来万国焜煌玉阙恍会海之致百川哉又若六街三市甲第崇隆庭悬肆堵席列千钟当秋日之清爽兮喜拂筵之金风爱蜿蜒之六龙兮惜光景之融融缘隙通辉乘虚炫彩园林掩映以洁清庭宇当空而爽垲散菊圃之丛金霏桂苑之珠彩信照耀之无私而盈虚之莫改亦有黄云满目稼穡在望多黍多稌千仓万箱朗旭高悬兮舒农甿之炙背肃霜惟时兮届谷麦之登场歌尧年兮大有乐舜亩兮盈筐至若榆关罢戍玉塞晏兵万里寒光兮生铁戟三边曙色兮动危旌喜烽烟之久息俄怀乡之念生烁彼珣

弓耀兹宝钺莫不壮战士之雄心荡边氛於穷髮乃其林泉旷达隐士高人此日兮何日幽兰兮可纫霜零我园兮秋早露泫我径兮清晨美朗日之一照旋洗垢而涤尘是察察而皓皓者庶比洁於秋是於是公子抚掌而歌曰秋容淡兮秋日明冒万物兮晶以荧惠我百谷兮登西成吾欲系之兮以长绳

灯花赋

夫何三冬之夜永兮聽玉漏之丁丁耿宵寒之不寐兮羌读史而论经对银灯之熠烁兮何用夫随月与囊萤松风萧萧於户外兮爰闭窗而掩棂独兀坐於幽斋兮赖诗书之是娛引短檠而置前兮瑶篇卷而复舒注膏油以续余烬兮光灿烂而晃如何生意之忽发兮开花朶於斯须曾不根而自华兮焰炯炯而扶疎萼蓓蕾而金辉兮葩晶荧而锦敷丹艷灼灼兮火蕊煌煌离精发瑞兮内隐外光飞蛾嬉其来往兮恍如蛱蝶探撷乎春芳乍蔽乍亏兮若续若离匪青匪绿兮参错葳蕤可远观而不可近玩兮花无叶而有枝历四时而皆荣兮又如火莲冬秀乎雪池尔乃钗缀玉虫兮枝堆宝粟光炫缣纁兮影摇帷幕度长夜之迢迢兮喜银釭之续续静对而意蕊欲生闲吟而笔花交错方作伴於形影兮信有佐於诵读若夫庭燎通晨九华达旦鸡踏莲花之巧龙衔火树之艷丽乎未央之宫灿乎承明之殿斯金阙之壮观岂书斋之清玩又若帝城三五上元佳时鳌峯千仞金莲万枝缛彩与繁光共绚银花与宝炬争奇固游观之杂遝非静赏之所宜乃为之歌曰幻非幻兮色可亲实非实兮报先春朗瑶室兮席上珍照芸编兮日月新

凤凰来仪赋【以圣化感孚泰平瑞应为韵】

惟

圣皇之建极兮膺九五之宝命沛仁恩於四海兮教化洋溢乎万姓天不爱道而地不爱宝兮百福毕致而延庆乃威凤之翔集兮符

一人之神圣嘉彼休徵应我

王化向畿辅而高骞览德辉而载下惟羽族之三百实超羣而莫亚

圣德惟纯祥禽潜感稟鹑火之灵曜资和气之融暖信鹿後而麟前亦鸡喙而燕颌必梧桐之是栖非琳琅而不噉尔其九苞六像兮五色纷敷戴仁纓义兮蹈信惟孚负礼向智兮顺德不渝晨鸣贺世兮飞鸣郎都行鸣归嬉兮止鸣提扶是皆斯禽之神异掩余瑞於瑶图者也若夫黄帝阿阁之巢離離喈喈帝誉六英之舞萋萋翩翩虞廷来仪而神人格岐山和鸣而圣道泰孰若当郅治之休明集

王畿而远迈旷千古而一覩昭德感於

圣代是以六府治九功成金瓯固泰阶平上瑞駉臻欢声徧乎闾里嘉祥叠奏喜气达於寰瀛
乃为之歌曰凤凰来兮

皇之瑞集天畿兮拱

帝位

帝德光被兮灵祥萃

圣心弥寅兮勤自治敬

天貺兮罔或肆又歌曰吉士蔼蔼鸣鸟协应曷由臻兹我

后德盛万有千载遐荒安定

重修

阙里文庙告成赋

丕铄惟清

圣祖神宗既承显之式谷允精一而执中钦明文思克让允?洋溢涵煦万国来同

皇上御极是法是则焕天下於文明登九有於衽席重道而

先圣是钦崇儒而

素王惟式

天鉴孔昭佑我

一人谓阙里之经营既久斯尼山之庙貌宜新藉缔造於昭代貽制作於

圣君

天子乃命司空勅匠作尔经尔营乃量乃度走羣灵而驱八神鳩工徒而谘衆略鬪无间不注
之巉巖伐泰峤嵩高之参错良材川委大木神输授模定式审方辨隅陶埴鍛厉之俱备丹青
圻冶之咸胪凡工倕与匠石莫不奏技而待须尔乃日嘉时良爰动馨声锺徒奋力?人充盈既
阗阗而薨薨亦登登而冯冯大冶耀兮金烟霏屑喷兮琼英斧斤丁丁兮观揅度之胥法绳墨

绵绵兮看约榘之咸平矫枉兮既直削腐兮用贞晓畚橐橐昼杵訇訇俄而确辉玉碣采焕云楣丰融曼衍揭峩陆离秘殿聳兮盘凤杰阁矗兮卧螭何巨丽之方建乃卿裔之呈奇曜藻流光兮鬱蓊而承日丽悬华曳紫兮紉纓以布天垂斯固天文与人文并灿圣居与圣泽偕丕者也若乃级层阶於东西拱修庑於左右大成殿大成门实

御笔之亲书圣时门弘道门更

睿思之口授圭瓚俎豆之式新牺牲币帛之加旧添配祀之羣贤增执事之奔走色瓦颁自尚方

御碑摹以重镂丹楹列乎壤材采桷揭乎織绣则其为状也邈穹窿以宏壮亘硤磷而宵冥殖殖兮其庭吟吟兮其正宏卓烁以辉赫兮若烛龙蜿蜒而鬐鬐纷攢罗以崑崙兮若巨鳌鼉属而峥嵘斯翼斯棘兮属阁道之駉駉如松如竹兮卫鈎陈之纵横仿岩廊而布象准魏阙以为程礧礧既坚知为高之基下绮疏交映悟立诚之牖明至夫既落既成乃祭乃飨

命皇子而徂征昭

一人之敬仰牲醴肥腍黍稷丰穰衣冠肃?进退雍容笾豆既旅樽罍斯崇以间兮笙鏞於论兮鼓钟神既安兮和冲降多福兮隆隆盖尊圣之典无以尚统前後而莫有或同者也於是为之歌曰堂皇灵宇

天子是新既轮既奂乃?乃璘杏坛葱鬱桧干缤纷宣圣是安佑我後人历亿万禩丕焕斯文

御制乐善堂全集定本卷十一

卷十二

钦定四库全书

御制乐善堂全集定本卷十二

赋

万壽日庆云见苗疆赋

惟

皇清肇三韩而定业巩盛京以立基既应天而昌运亦抚民而顺时

世祖白旄黄钺仁义兴师於是乎抚有四海宅燕京而向离於皇

圣祖作则生知正义育仁以驭世制礼作乐以定规六十一年之湛恩渥泽逮我

皇而克享其雍熙丕铄

皇德

圣祖是式精神通於神明声色允其恭默勤政亶乎八年至仁孚乎万国击壤者歌何有之帝
力含哺者顺无为之帝则

昊天曰明鉴我

皇情何祥弗应有瑞毕呈乃撝谦而自牧更持虚而若盈或归

亲而不居或让美而弗称斯固

一人之大德巍巍荡荡而难名者也岁在上章月惟渊猷

帝泽均施

皇风普扇坤輿载辟红苗允致其共球版籍初登六里亦安其服甸乃宣布化海之初辰实诞
降吾

皇之圣旦鸭保寨之大吏初临地良坡之苗民同忭池河营之猺獐咸臻万荣江之老幼共见

异地而

王命颁陈同时而卿云灿烂归诚之愚民稽首何异华封之祝三宣意之将吏倾心允似嵩高之呼万氤氲捧日劈碎锦之千重缥缈丽天幻荣光於万变为楼为阁拱黄道以旁敷非雾非烟被清风而不散五文绚彩於璇霄十色流虹於碧汉此重译之来不闻奏於越裳七旬之格不闻歌其紕繆者也况於嘉时正午恰当景命之辰历未及申允愜绵长之?彼夫升堂於黄帝之时起河於伊耆之代入房於殷汤之宫浮洛於周成之载穆天子之王母为謡汉武帝之泰山纪再或一色而无文或旋聚而忽分岂如历三时之久当圣壽之辰现新附之地昭归化之民又何足称函关紫气帝乡白云哉乃为之歌曰於赫

圣治兮格於

苍天嘉瑞聿昭兮於彼苗田格愚孚顽兮王化普宣祝我

圣壽兮亿万斯年

为善最乐赋

居空斋以探索兮绎书史之幽深感前芳之美则兮羌遗予以嘉音渺管蠡之窥测兮天与渊其难?惟兹善之具备兮信足悦夫吾心伊吉甫之清风兮谓有物斯有则民咸秉此天彝兮孰不好是懿德私与欲其相争兮天良因以窒塞致儻忽之凿窍兮感浑沌之戕贼譬望舒之圆满兮蟾蜍乃以侵蚀智者觉以先反兮愚穷年而终惑解迷途之往譬兮回余御於中逵驾言骋乎义路兮谓先圣其可师纷既有此内美兮胡为汨以外务也何既知而弗由兮夫唯己未克之故也味宣圣之教渊兮禁视听言动之非礼既天君之泰然兮百体从而受纪斯已善之可乐兮乐孰能以愈此彼友朋之辅仁兮亦示我以周行日相亲於理道兮羌容与而相羊发我蒙而鍼我疾兮善日进而无疆嗟蚩蚩之庸衆兮昧虚灵其如狂忽背礼而弃义兮乃智力之相强蕢蒹施以为美兮谓兰蕙其不芳彼是非之颠倒兮夫何乐善而日将緬东平之修美兮为炎室之宗臣帝问王以何乐兮王惟乐善之云高宫崇隆以入天兮缀珠玉而为珍词士纷其侍座兮姱女翩其奉巾露鷄臞熊以为羞兮华文黼绣之错陈何耳目之不移於玩好兮乃惟德之日新吾将从此以?乐兮庶澡浴乎眇身

良玉比君子赋

焜彼太璞有韜其精蘊兹良玉尔晶尔莹润林薄兮凝秀辉冈峦兮挺英伊美德之莫匹吾将配君子之洁清尔乃涅而不缁素有余也廉而不刿坚如初也珪以为瑞珉砮砮也佩以致饰章衣袂也庇?嘉穀用弘敷也气比白虹光发舒也文质彬彬德均如也君子比之於焉自镜温润其形密栗其性一尘不杂无疵纇之可?全体胥莹有光华之交映夫何大璞之不完而匿瑕之为病哉

指佞草赋

铜龙晓启玉漏初传氤氲曙色缥缈祥烟朝万国之球璧列百辟之班聯爰有灵苗曰指佞草非时不见实天地之无私应候而生允皇王之有道则见夫峙丹陛而葱菁秀彤墀而缥缈金茎露洒润贞干之棱棱玉殿香凝霭斜枝而袅袅无心而应獬冠之触何殊有佞则知金镜之洞已早至若元恺登而儉壬化明良庆而庶绩熙虽间生於尧代实藏用於明时对右平兮左城承日照兮风披千官剑佩三殿威仪则屈轶亦呈其瑞而已矣又安得夫邪佞而指之

松竹四时潇洒赋【以题为韵】

观鸿蒙以元探步庭砌而从容伊植物兮不齐固赏心兮莫同或春荣兮秋萎或冬枯兮夏丰则有萧萧翠竹落落苍松劲枝戛玉贞干蟠龙历寒暑而妍媸莫易冒冰雪而绿?偏浓得天地之正气乃吾心之所宗若夫蜿蜒擎空扶踈绕屋不羨五株之封兼有数竿之绿三友称号仍须林氏之梅三径标名更待陶家之菊呈彼秀姿动予雅意匪赋性之或殊实秉气之独粹森森挺翠鄙木主与花奴矗矗凌虚笑桃三而李四於是潜意清心凝神构思而赋曰伟坤元之播育何磅礴而无私羌松竹之清劲独秉性之不移峙泰峤而云霞并绕?淇澳而风雨咸披伊何人斯移植助我兴兮犹夷暮霭朝烟之际轻风淡月之时柳絮因风每逊荣於冬日芙蓉贴水难竞美於秋朝况乎飘风弗弗暮雨潇潇嗟柔红兮嫩绿或坠琼兮陨瑶惟枝筱之挺出恒葳蕤而莫挠故曰逞妍者易摧仗节者不改宜赏之以吟哦树之於爽垲照晨暄之煦姬润宵露之沾洒惟四时而如一是松栢之所以乃

帝赉良弼赋

昔在高宗践丹宸之位居紫极之宫志恭默以思道心殷忧其如忉何精诚之弗懈允帝载之潜通神悠悠其若往梦忽忽而凌空於是陟崑仑历元圃游碧落之庭升玉清之宇谒乎上帝既拜且舞乃致词曰惟川有水惟舟济之惟鼎有羹惟盐梅备之帝集命於臣武丁将俾三无而治之臣恐德弗类请赉良弼以贰之帝乃命巫咸册之曰若有人兮山之窈云峩峩兮波渺渺清明兮其躬怡悦兮其貌资汝武丁以佐有道俄而晓钟催曙漏箭停传乍回清梦恍忆前缘爰徵绘匠造进廷前肖乎独见之容访其惟似之踪而说也乃在傅巖之野佣筑之中既威仪之不忒知经纬之靡穷置之左右相於厥躬允启沃之是赖资诲谏以折衷金之砺兮差可比木之绳兮将毋同是知天之载兮无声无臭诚之通兮无感不就惟高宗之圣敬日跻斯上帝之赉贤若授彼神道设教之言盖执理而疑诚不似密而实漏哉

天爵赋

帝浑沌之苗裔兮全衆美而尊安伊冲气之絪縕兮胚浑司乎五官处方寸之福田兮辟灵台其洞寛宏泰宇之坦途兮施耳目之屏翰蹈中正而为辙兮何奸匪之能干纷既有此内美兮乃上帝之鉴观帝用嘉其完备兮诏天君其听焉若曰予有四德厥首惟元廓然无我顺应无偏是用锡汝莫或不全在事有宜在理有义应酬裁度发强刚毅是用锡汝外以制事节文之

详厥惟有礼清明在躬中立不倚是用锡汝以绥福履人为物灵惟智尽之是非臧否洞然不疑是用锡汝以揆厥时惟是四德服行母怠惟信之功大小咸在是用锡汝动罔或悔心官既受此五爵於上帝也乃再拜而言曰皇天无私兮赋德在躬五典有秩兮委任实隆期笃守而莫忒兮副简命於苍穹庶天职之常保兮弗憧扰於朋从

相马赋

伯乐过冀北之野见羣牧焉在垧之野在阜之冈惟騂惟骐有骍有皇长嘶兮于林之下低饮兮在水一方或伉伉而绎绎亦祛祛而彭彭虽骐驎之在望恐驽骀之相妨於是舍举肥用心镜不观其外附之毛独察其内秉之性窥其心兮不趋於险相其目兮惟视乎正以之御兮则既佶且闲以之驰兮则进退惟命是盖独擅駟駟之场而所谓马中之圣者也於是饱以甘刍浴以清水既范我之驰驱可不加夫鞭箠星角目兮电发铁蹄蹄兮风驶耳凤耸以双峻髻龙腾而孤起蜿蜒堤陌之间徘徊闾阖之里是虽斯马之迥异亦因斯人之知己於是呼造父招王良腾六合歟八荒朝税驾於咸池暮返御乎扶桑顾羣驂而若遗继後尘而难望盖养之者有方用之者有矩节其力而不劳因其时而不苦不然者何异於扑缘之拊而东野之舞哉

九日登高赋

岁九秋之暮月兮天肃霜其寂寥羲和倏忽而躔在房兮又值重阳之令朝何景物之惨凄兮羌草木之萧条悴繁绿於寒渚兮萎柔红於荒郊命驷马余阻征兮驾言往乎山之椒凌高岵而遥睇兮度回壑以逍遥既流眄於平隰兮见落日之还臯鸿雁翩翩而来宾兮聽霜飐之翛翛至若龙山高会飀馆传觴楚台马戏沙苑鸿翔咸宴凯而吟诗兮仰清风之高遐何好事之传说兮独称落帽之孟嘉今视古其犹昨兮羌节物之堪夸聊容与而徜徉兮请采佩乎萸华

五日角黍赋

岁辛亥月天中客有以角黍请赋者主人曰唯唯昔在三闾大夫抱孤忠而无貳矢靡他而莫移悼方正之不容羌殷忧之日离攀芙蓉兮木末采薜荔兮江湄浴兰汤兮诂洁乃浮游尘外而自投於汨罗之涯盖仲夏之月而正阳之期也於是楚人哀之截彼竹筒贮兹糯米塞以楝叶缚以彩缋望水滨而相投亦社祭之变礼今角黍之制乃出於此也客曰此夫人而知之矣更请进焉主人曰伊五月之为卦实下巽而上乾惟五阳其既盛乃一陰之是旋覩菰叶之裹米方陰阳之包连此亦扶阳抑陰之意而圣人之大道存焉若夫煮龟之骨为菹烹鹜之羹以荐百索之号徒传九子之名空擅既无取於怀贤悼古之风更无涉乎扶阳抑陰之善虽养口体之微亦不可以不辨

六艺赋

居高斋以远绍娱情志於典坟藉义府之息游望宫墙其聿新伊六艺之为懿虽宿儒而必亲余下学其何知敢玩愒而不遵矧夫礼缘情以制物乐平情而返初射必先乎正直御必范乎

驰驱书贵六文之不忒数穷大衍而有余於身为终始之伴於道为行迈之舆请为言其美备俾达者其聽诸原夫礼仪三百威仪三千既安上而治民亦纬地而经天其制之也必传道之圣其行之也必守道之贤郊庙有飨祀之典朝宁有聘会之尊尊则衣冠拜舞亲亲则酬酢蕃骈尊卑赖以等杀进退恃以周旋是盖礼之大者而其细尤莫能以尽焉粤自轩辕云门定乐溯源必本於中和相济必分其清浊以歌则管声嘒嘒以舞则鹭羽翬翬五音六律之交宣八风九歌之相续审音兮既换羽而移宫吹律兮复度商而揣角入耳兮心以释傾聽兮欲心以平虽宜观於韶舞必先放乎郑声以宣民志以和民情惟乐舞之至正斯风俗其可成若夫敦弓既坚四侯既均可缘此而观德亦因之而序宾在泽在宫必有一定之制少筭多算难紊不易之伦驹虞之节兮天子所用狸首之风兮诸侯是陈慎其所举取制於中圣王合射以明教男子蓬矢而桑弓在昔宣尼曰执御矣平心正体兮在兹自下奉上兮以此四黄既驾兮总轡分镳两骖不倚兮过都越鄙追电兮逐风发犯兮殪兕鄙组舞於东野美辞乘之王良爱遽瑗之过阙驰造父於康庄孰谓御为贱役非君子之所方哉至若画始羲皇字肇苍颉史载观於蹄迹易称代乎绳结百官以治兮宣猷万民以察兮仰哲迨书契之大明快苞符之尽泄於焉籀斯造乎前驱羲献继乎後乘文皇飞白张颠草圣顏柳法严苏黄笔劲虽历代有作者要悉归乎心正乃若司天之职推步万端黄钟定其分至玉律辨其暑寒既参天而两地亦稽坤而考乾下至内府外府之岁会郊人之人之定田无一则何以成十有百则至於累千参伍而其法备错综而其数全岂若商鞅近功始按人而立税弘羊心计算舟车与缗钱盖所以裕国计敬昊天惟损上而益下乃自古而云然懿兹六艺用藉求若行远兮驾车若溯川兮泛舟嗟不学兮面墙期佩服兮优游庶不忒兮我心用黽勉兮前修

日方升赋

伊苍旻之悬象兮焕二曜之重明丽中天以临照兮终万古而健行分宵旦之行藏兮仰瑞应於升恒维光华之烜烂兮百昌欣以向荣伟魄渊之继照兮请仰观旭日之方升明万彙其伊始兮符天心之生生方其玉罢繫斗杓收指望舒隐曜以西驰启明藏辉而远徙覽东方其生白眇海水而焕紫沧溟罢浴驾羲御以遄征火驭载临迈天衢其自此璇图不忒兮正義仲之寅宾玉律无差兮合容成之步晷银虬渴兮烛龙翔阳鸟飞兮曜灵扬出渤澥兮经若木历阳谷兮拂扶桑瀛海磷磷洗宝轮而皎洁咸池炳炳拱神镜以汪洋玉衡隐约兮低度瑶华烜赫兮含章照彼蛟宫添轻绡之晃朗射兹龙窟增宝藏之辉煌则见金门初启玉漏停传天鷄唤兮报曙宝鼎列兮生烟阳侯执轡兮炫彤墀之璀璨后羿扬麾兮催青琐之班聯云旗缥缈兮映百川之会海霞车陆离兮霽万国之朝天此出震一人之有庆向离敷治以无偏者也至若六街香雾九陌红尘曙色方升晋謁之驄駟駟晨光乍烂计偕之车骎骎瞻祥光之错落覩瑞霽之氤氲此王路驰驱之士鸾翔鹄起而欣欣者也又若幽人旷逸竿甫逾三学士清严甄未倍四梳翻云髻兮晓景透乎香闺经开贝叶兮晨钟鸣乎古寺舟横野渡兮惊月落而乌啼猎合平原兮喜黄牵而苍臂草木向曙以敷荣飞走和鸣而得意此又临照无私恩光遍及於万类者也斯时也後天一度而辉烛於大荒出地咫尺而宣耀於无疆夜光无所施其用火齐无可耀其光杖何为兮夸夸父戈何为兮称鲁阳郢何用兮其丰绳何施兮其长考盈亏兮何与验中昃兮无妨若太极兮始判而将分如元会兮方流而未央又何必记合璧於伊耆之代举抱戴於晋帝之堂侈谈王字之瑞徒称五色之光哉客有兴寄泰山之峤神游日观之峰覩初

阳之炜煜揽颢气之冲融开怀抱畅心胸鄙熊曜琅琊之迹追青莲登眺之踪将游心乎太始
观造物之元功

瑾瑜匿瑕赋

尔其林薄生光冈陵焕美瞩宝气之烂然知太璞之在是命彼良工呈其巧技既剖既琢成文
成理虽连城之比价亦微瑕之在里磨为器允称夫圭璋调之音甚和乎宫徵若精求其瑕轻
弃其瑜则以分寸之翳累径尺之琼琚譬夫水至清无鱼人至察无徒故求全者舍细谋大者
略小不琐琐以求明不察察以致考瑾之疵弗以否而混臧瑜之瑕掩其里而扬表用成韞匱
之材为彼希世之宝尺有所短寸有所长伊尺璧之为贵讵点瑕之足妨程材以辨器舍疵而
取良愿寄言於铨才铭座右而莫忘

水轮赋

削竹为管揉木为轮假广川之利润代膏雨之宏恩因时制宜奚必资乎匠伯泽民利物乃有
待於梓人尔其东作云兴西成在望大田多稼或怀旱魃之忧密云不雨每厪旻天之赐虽抱
瓮之勤奚为即挈瓶之利亦让於是转岸上之飞轮汲江中之巨浪方来旋去陀机轴之周环
已纳而吐欣洪波之奔放划如雷鼓之声翻若飞鳧之状扬清激浊兮大泽旁通救患分灾兮
连畦滋畅鄙桔槔之小惠殊轳轳以致功匪疾匪徐兮运旋而不竭突如来如兮灌注而莫穷
盈科而进兮施有次第转轂而输兮用无始终流洋洋兮比润甘霖苗薿薿兮同舒律暖垂稻
穗兮壠亩匀黄筑场圃兮篝车载满是知轮者木之体既巽顺而有功水者坎之盈亦刚中而
有信相资以济引重之象何殊因物而施救嘆之功以迅敬陈泽物之奇勲用备风人之雅训

白鹿洞赋

流鄱阳之洪浸峙五老之奇峰星分軫翼以上耀境接吴楚而旁通谅地灵之所聚实间气之
攸鍾吾闻山苍苍其含翠水渺渺其如油松蒙蒙而黛蔚石磊磊其云浮伊眠鹿之町疃乃是
创而是修架修椽以为屋耸高构而成楼聚羣英以游息惟古训之研求陆有登邹之履水有
泛泗之舟想前修其未远知遵路之所由是地也李氏为之开先晦翁为之善後讲一理之渊
源致四方之奔走既道藪而学渊亦书左而史右绦帷卷处月霁阶前书带抽时翠迷洞口緬
遗蹟於匡庐仰先贤之启牖此向风者所以争先而至今长垂为不朽也

御制乐善堂全集定本卷十二

卷十三

钦定四库全书

御制乐善堂全集定本卷十三

赋

文战赋

甚矣人之好争也轩尤鼓怒於凶器羿浞鬪技於霜锋賁育逞力於举重般姿恃巧於雕虫良增鹳智於刘项仪秦驰辩於横从是盖所居者高则恶人之我并所操者异则嫉人之我同未有解构释纷齐天地於一指和光同尘归大化之元宗者也吾意文人学士知命乐天谦卑自牧慎重为先其游心於淡也若太羹之味其丽泽相滋也若共济之船宜其煦煦为儒鱼鱼为贤不慝我之?後不憎人之?前而孰知所谓文战者更有甚於前言当其属词锋排笔阵万夫之雄莫拟六籍之奥并进彻札之鏃必期乎中坚露穎之囊何妨於游刃鸢视而张弛咸宜虎变而雷霆用震於是绡帙缤纷尽作鼓鼙之响绦帷掩映俄兴旌旆之思呼十二之龙宾发摠奇策挥五千之文字奋迅偏师临局早分其胜负当场叠用其正奇弟子降心而歛手先生谈笑而解围是盖厉兵於学海藏甲於文山请纓同弱冠之子投笔似定远之班硯石如砥兮纪功莫尽霜毫飞白兮露布爰颁齐物子见而笑之曰是盖以文为战者夫文以载道而又何战乎请与子解干戈之扰而归洪荒之都

望峰山赋

居义府之邃深兮藉艺苑以遨游慙?纁之汲古兮羌魄渊其如流邈高山而景仰兮余独媿夫前修矢中志以日征兮庶自画之免羞闻峰阳之耸峙兮厥维在乎东邹余仲氏其再经兮为余道其缘由子车氏之故墟兮溯芳轨之尚留欲跻攀以顾瞻兮阻川原之亘悠爰徘徊而永念兮运绮思而裁句於丽则乎何有兮名望峰山之赋昔神禹之任土兮取兹阳之孤桐鲁僖公之保有兮乃遂荒於大东固坤輿所鍾灵兮气旁薄而莫穷配浩然之至正兮挽战国之颓风卑衍诡与仪辩兮非大丈夫之谓也排杨墨之淫辞兮曰维正道之足贵也丁钜艰而独往兮迈仔肩於千载也其功不在禹下兮斯言确其可味也惟树德之既坚兮吾独羨夫孕育之所由来奚必夸夫川原之绵衍兮侈形胜之崔嵬重曰望峰山兮鲁之邦隔千里兮天苍茫窃仰止兮路修长慎自迓兮勤就将指余驾兮息彼乡徇尼山兮犹可望

迎长日之至赋

惟大祀以事天爰考候而迎日时履端於方始迓初阳而诚壹既展奉常之仪乃协用牲之吉稽古之典黄钟正应乎宫县行夏之时葭灰亦飞乎缇室盖所以钦承上帝宜调象纬之平布政万方必始玑衡之一仰斗柄其始旋望扶桑而将出斯日也符上春以备仪诣泰坛而将祀

迎祥迓福兮必惟其时导气延和兮爰修其始迟迟暖律与圭影而并长烈烈凝寒避炉烟而自徙岂惟灵鼓之声不止陶匏之礼维父天而母地实覃诚而在此是知经纪不忒乃贞明之有常疾徐中度胡躔纬之失次盖日者阳之精君者德之成表着明於君象乃致敬而用迎万国共球望金门而和会千方辐辏仰旭日之长明羣僚景从而有秩千古辉煌而莫京斯固一人法天而有庆九有戴帝以咸寧者也

景陵瑞芝赋

盖闻王者孝慈则芝茂又曰君有至德则芝生仁恩覃敷於率土草木爰叶夫嘉祜考夫瑞应之图稽乎符命之经未有治功允协乎邳理而祥应不验於山灵者也钦惟

圣皇御世敬

天法

祖煦妪之泽比阳春汪濊之恩如膏雨亮功则克谐三事歌叙则允治六府凡溥大化於雍熙悉循

圣祖之遗矩

上帝是鑒灵瑞斯频河清海晏之纪麟游凤集之文与夫嘉禾甘露之迭见盖不可以指数陈是皆

一人格

天之元功而厚泽永逮夫生民者也乃若瑶光发辰象之精金色吐陰阳之秀衍

鼎湖兮亿载休徵巩

福地兮万年鸿佑缤纷芝彩表

圣祖盛德之常新灿烂芝房验吾

皇孝思之孔厚金枝琼叶浥瑞露於

宝城十色九光灿祥霞於仙囿镂珊瑚而作干葩盖高擎肖龙凤以呈形卿云低覆氤氲并日月以争华蔚霭与松楸而并茂岂与夫生於石室产自珠宫王母之台虚纪宓妃之馆成空秀甘泉之庭而传夸晋帝产延英之座而称美唐宗也哉

圣圣同揆德惟其至既丕显而丕承信格

天而格地嘉祉効乎百灵景运凝乎二气谨拜首而扬言赋太平之至瑞

五丝赋

律中蕤宾时惟臯月赏天中之令晨值薰风其南发抚兹佳景浴兰爰遍乎寰区文此太平竞渡亦盛乎楚越乃有金闺雅制綉幕芳思不止线添对日长之何遣聊同锦织象云烂以交披凭兹十指运彼五丝观宝缕之续续粲文采之离离延壽算於万禩传胜事於一时尔其香奩才罢彤管方陈丽学天孙之樣巧开地腊之辰鸭绿鵲黄选色而艷分八彩浅红深紫成章而手捻双纹皓齿含霜意运神工而不语青蛾歛翠心追天巧而宜嚙莺其羽莺其领难比方其烂熳丝五紵丝五緇更触绪而缤纷则见夫续比贝连艷羞花朵色如蟠螭迴射乎虹桥舞比羽霓直通於馭娑瑶筐用盛锦袱是裹方携蒲酌愿万年以祝君亦比葵忱藉一綫而达我重曰当午日兮结五丝综万绪兮抽巧思绵宝命兮壽无期纪岁华兮长如斯

稼穡惟宝赋

天之鍾異物也石韞玉而山輝蚌含珠而川媚金在沙而待披綃織鮫而成瑞火齊共木難而交朗都梁與五木而爭貴綉毯紅 赤羽文翠固海舶之夸珍亦大賈之網利者也然而飢不可食寒豈能衣惟土物之是愛乃民命之所依希代之姿莫匹連城之價在茲此聖世之至寶羌歌咏於周詩爾其既耕既耘既方既皂沃時雨而沾濡熟西風而堅好珠顆滿車兮無慙照乘之光玉粒盈倉兮絕勝琮璫之報故珍重上厪乎一人而滋培全仰乎大造為植物之獨貴豈異賄之足稱勤耒耜而莫怠謹播植而乃成爰藉亞旅之衆如施追琢之精力作三時兮類藍田之種玉有秋不日兮夸赤水之求珍冀千倉與萬箱兮寧必不貪為寶慶崇墉與比栢兮懸知有道則生信飢寒之可御陋琮璫之為輕不假居奇以市何須韞匱而藏余滯穗兮伊寡婦之利匪異物兮實饋貧之糧故曰寶金玉者心勞而鮮益寶稼穡者心逸而獲臧其為利也最溥其為物也孔良尚計九年之蓄以期兆姓之康

南風之薰賦

祝融司方朱明應節蒸溽暑兮鬱陶迟火輪兮炎熱美萬物之敷榮坐池台之清絕猗珍簟兮如霜皎冰盤兮沃雪乃其堦塵初動羅幕微飄協巽方以律轉應鶉火而候調出谷泠泠輕才偃草入林习习响不鳴条蒲劍刺波兮岸畔斜綯乎翠帶荷珠承蓋兮池心低曳夫紅綃解煩襟於九夏扇清景於崇朝客有廣廈披衣北窗延賞喜嘘拂之及時欣凱樂之有象鬱佳氣兮氤氳埽祥雲兮淡蕩爰符五日之期可卜三秋之穰吹來闔閭何須辨其雌?布自郊原欣可觀夫長養時也虞弦鼓尧厨吹有道聖人之世無為郅治之時着物如薰疑度籬邊香芷乘陽欲動微飄座上輕絺中八音之節族叶三光之舒迟豈比夫蘭台徒侈其詞華沛里空思夫勇士舞掌中而惧飛賞亭畔而稱美彼宮殿但泛其蕙蘭伊閭閻豈被其福履惟睿作聖惟風時薰宣和解鬱澤廣恩均既揚颺於八表亦應候於五辰冬暖吹葭管之律春和拂梅柳之津會南

风之入夏尤遍被乎无垠斯所以醞釀太和之气而王者法之以施仁者乎

书同文赋

伟哉书契之盛也丽光天而有耀敷海宇而无垠掌之保氏而肇夫小学观乎人文而成彼大勲代结?而为治因载道以称神洋溢之风普扇光华之治聿新书纪遵道遵路记称同轨同伦固草野咸钦其法式抑巘廊用布其丝纶繫夫庖牺造书仓颉创字蝌蚪成形鸟鱼志瑞原所始作不一其类迨後八体渐分六书遂制或篆隶而殊科或殳戈之异制或偃露涌泉而称工或离星垂珠以布势或揭象魏之条或质岁成之计或游元圃之麟或折蟾宫之桂莫不依乎典则遵我王章错综以尽其术采摭以备其详藻耀乎典册之府辉煌乎翰墨之场指事象形之中则协声转注之允臧润太平而有色宣文治於重光於是靖万虑之纷拏布一人之大化金殿春永而阁帖临余玉笔龙飞而黄麻草罢欲加点而无有诂一画之可假昭万里之同风自一人而逮下明廷敷奏曾无马字之讹在野遵从何有鱼书之诈则知圣人有作书文大同自南自北自西自东光如日月之烛遐届舟车所通布章程於画一阐治理於鸿蒙岂操觚而濡墨者徒工技雕虫也哉

秋河赋

暑风退秋月明丽银浦於碧落映金汉於丹京耿耿之波澜皎洁皛皛之气象澄泓露下而天津可渡风飘而微浪不生经渐台而逶迤亘玉?而清浅从碧海以分来岂黄河之上转入三秋以杳茫直万里而曼衍深莫测兮悬东井而昭回远莫知兮历南箕以舒展客有闲庭容与梧砌逍遥感砧声於野墅惊蛩响乎清宵眇明光而寄兴抒旷怀於沆寥夫其龙驾将临星桥初起弄机之女停梭河鼓之旗近止霞妆斜整映牛渚以非遥阁道潜通望鹊梁而甚迓乐莫乐兮旧相知悲莫悲兮久别离嗟阳乌之欲上又天鸡之早啼何绛河之倾而不竭兮抑天限固若是其难移徒见夫皓如白练之披皎夺景星之灿当霁夕而逾明吐霄光而犹烂兴无边之秋思漫题句於纨扇

荔枝赋

气稟纯阳根植炎方灿琼华之烁烁垂宝实之煌煌蔡谱爰稽纪方红与江绿白图聿考夸雪肉与冰瓢领味者叹为仙液观色者惊若绛囊张公之梨难并美安期之枣莫擅长江城之橘谩比拟瑶池之桃洵荒唐信乎天下之奇产而果中之称王者也尔其瘴雨初收炎风微扇条密抽旗花开缀霰殆有积而後彰岂无实而自炫翔彩凤以辉煌合彤云而绚烂红丸万斛纷玉树以流光神丹九成射瑶圃而掣电燕支颗颗欲盈闽客之筐火齐累累乍佐番舟之宴岂云憇之者如云叶之垂宝之者无斧斤之患而已哉时惟遐迩同风盛德昭融虽限山川之远竟如堂奥之通彼宣风之大吏乃方物之是共树植皇州岂分幅?之隔实垂上苑应知造化之功赐出金门羣捧玻璃之盞恩分青琐携归筠箬之笼此盖叨仙味於阆苑而沐圣泽於无穷也夫其朱殼才分脂肤照眼朗若玉壶之水润似清凉之散羌热中之始消岂病渴之用遣佐玉杯兮轻含白露之团列华筵兮共赏冰蚕之茧唇未沾而已香手含润而莫盥亦何必美

岭南之三百堆骊珠而满盃哉

多稼如云赋

出郊原而纵目爱金秋之气清草霏霏而露湿天寥寥而风生寒蝉收响陰虫载鸣绣错沟塍乍青连而散漫绮分陇亩正黄茂以纵横酬勤劬於东作告丰稔乎西成远而视之如肤寸之出石也近而睨之似朝隄之凝碧也当夫公田既雨沾膏泽之调匀嘉种徧敷披薰风之顺适厥田上上兮芒既抽而散芳实发芊芊兮花已飞而带白奄观南亩之收何异西郊之积则见夫绵邈铺川丰融亘田层阜遥分似无心而出岫千畦遍满若奇峰之连天氤氲散润兮既史书以占岁曼衍流膏兮果户庆於有年岂坻京之足喻恍荟蔚之愈绵於时庠乃钱鏐筑我场圃以乐农夫以御田祖丰滋漫若且闻束皙之诗悦茂油然欣听龠章之鼓方苞既实庆高廩於茨梁坚好不秕喜盈畴之稷黍故曰谷为君宝惟农是亲遗秉盈场玉食亦登其芬洁余粮栖亩金枝转掩其轮囷岂非圣德之格天而多稼乃得以如云乎

圣德合天地赋

圣人膺宝籙握灵图跻含生於富壽致万类之昭苏泽允覃乎九有道克奉乎三无钦明文思帝尧无以踰也温恭允塞虞舜曷以加乎纪巍巍与荡荡信一揆而同符天无不覆地无不载苍苍者昭丕冒之宏混混者顺发生之大窥博厚而难名测包容而无外是亘古此天地也而谁与为对待哉王者中和位育并立为三规模既同乎峙载对越尤致其精严故升中於天而神格告成於地而恩泽覃茂以对时而行无妄卑以自牧而体福谦於是歌一德之允若与二仪而脗合布政则温如春融育物则量同海纳明如日也丽九华以昭宣散如风也纪八节於闾阖然而高明既被朝夕弥昭事则几康是飭行健则元会永绵小心翼翼是曰法天若夫广大咸亨品物必遂既柔顺而利贞亦履仁而行义安土能敦是曰则地於是乎乾坤合德君师并修海宇仰崇高之象羣灵乐静謐之休徧尊亲於血气成参赞之谟谋岂非与清宁而永奠合上下而同流者哉

鸟求友声赋

暮春日永修禊风轻柳依依而始绿桃灼灼而载荣山含翠而水秀云触石而气清想羣贤之盛蹟追永和之芳声命我樽俎招我友朋既窥花而拂竹足乐志而怡情乃有流莺傍乎高柳乘春载鸣知时不苟既择木而迁乔亦因心而求友翱翔寡侣兮爰怀切切之思睨睨呼羣兮用发嚶嚶之口枝头乍啖兮念知我之犹希陌上频啼兮恨相应之恐後蜂蝶来往兮疑尚阻於羣猜鸾凤遥远兮冀以引为吾耦叹离羣之已久谓知音其可期友既不我弃兮吾亦岂不尔思自秋徂冬业过时而已矣穿堤泛柳尽今日以求之取则寧远流音在兹莫使鵬鸟兮得谗言之是肆应同鸣鹤兮愿好爵之与縻乃其谷里春深林间交订始也以类而相求终焉同声之是应是谓其音既谐其志亦正爰符金兰之契雅合风人之咏彼夫乌衣国里红绡楼前叫边秋之孤鶩啼蜀月之杜鹃岂得义同金石韵佩管弦也哉

麦秋赋

繫鶉火之司令疑商金之屆期影度朱明始散芳於榴圃律侵白帝独抽穗於麦畦爱芄芃之连纈亦离离之下垂南亩正勤於此日西成偏紀乎茲时披梅风而含颖润谷雨而双岐是盖四时之代序而万物各遂其繁滋者也乃其堤上莺啼陇间雉雊芳草未歇而犹霏綠树成陰而始就何銍艾之奄观兮当隆曦之永昼覩黄云之满野兮惊白藏之应候溽寒露而朝濡兮潜陰吕而夕秀杂收歛於长养兮参结实於纷茂炎炎当令硕硕成行紫茎兮搯爽青穗兮含凉大有占而丰登肇象兮中和顺而陇亩飞香对银绦而偶穗兮散珠颗而分芒岂非化工之独运而为盛世之嘉祥哉

夏云赋

夕阳退暑晚籟吹凉蝉嘒嘒其曳响榴艷艷其含芳挥羽扇兮纳爽坐冰簟兮生光既澄观兮潇洒爰延步兮徜徉策杖清流之畔响屐疎林之旁见夫夏云矗峰无心出岫峩峩而其气始升氤氲而其势渐就晦霭冈峦之崇蔽亏松杉之茂其方起也似迎日而流霞其上腾也如凌风而散华其纷郁也状彩纈而锦叠其轮囷也类玉叶而金葩或现神女之佩或驾王母之车依稀汉帝兮望祥而书纪宝鼎彷彿安期兮成仙而枣大如瓜同崑仑兮五色突嵩少兮三花驱不劳鞭兮乍峭峰之崒嶭斷何须斧兮已空窍之谿谿尔其炎蒸顿歇池台清絕抱翠石兮影留俯清波兮纹洁暝烟杳霭兮隔柳岸以深沉余景纷纶兮鏤残阳而明灭思添梨几之清病消文园之渴岂非覩鬱兴之势而忽解心中之热哉

学问至刍蕘赋

原夫泰岱之高不让土壤而尊五岳河海之广不择细流而纳百川载万物而不盈者曰地覆羣有而不居者惟天是以有大而能谦必豫见善而能迁始贤固至理之如此岂入道而不然盖自先民有言询於刍蕘既下问之不耻乃大德之孔昭野无遗才英俊弹冠夫廊庙政皆不应庶人罢议於市朝固已五风顺十雨调集济济之多士覩师师於百僚然而谦谦君子延访不遗夫草莽穆穆元后諏谘乃逮夫薪樵是以禹下昌言之拜汤勤有莘之招高宗默而得左右於巖野周公勤思而传吐握於崇朝凡其守谦以受益用是居上而不骄尔乃设铎设鞀而蒿莱亦及爰咨爰度而草泽无余道至广也岂必备乎垂衣之主心之虚也乃旁求於戴笠之夫迹言不弃良才必选大度於是乎彰隆业因此而显戒损用以持盈得师期乎主善此圣王乐取之诚心而非徒规仿乎先民之旧典

御制乐善堂全集定本卷十三

卷十四

[集部,别集类,清代,御制乐善堂全集定本]

钦定四库全书

御制乐善堂全集定本卷十四

古体诗

古风十五首

天地有至德健顺运万善阴阳迭往来寒暑互流转大生而广生畴能体其撰根柢祇一诚神功何易简羲皇初画卦犹以结绳治後圣继心传法夬兴书契岂徒充简编即是传道器君看六经中言言道仁义有苗蠹弗率大禹爰徂征三旬犹逆命岂云无甲兵伯益赞说言感神由至诚惟昔号旻日克谐致烝烝文德既诞敷远人亦来庭动物物不动今古无其情

高宗求良弼简在通梦寐傅巖版筑人一朝履高位和羹作盐梅朝夕资纳海阿衡岂专美嘉靖殷邦治惟此默思尚贤天所赐

隆冬无溽暑盛夏无祁寒寒暑协太和往来相推迁蚩蚩彼衆氓努力筹逢年我当惜寸阴黽勉期前贤泰山不让土河海不择流为学亦如此取益在广求见恶当自戒见善期自修三人有吾师近取乃日休孟山何迢窈有兽曰驹虞赋性本仁慈举趾惜藜芜终为王者瑞见乃盛世符南山有猛虎食肉如食刍馋嗜饱腹肠何论有无辜一朝猎者至咄嗟丧其躯仁残天道显视此何所殊

铜监正衣冠人监别善恶人苦不自知箴规已病药疑事莫蓄揲疑谋莫龟灼但聽善人言万事免乖错秋声何潇洒寥寥刁刁然吹万忽奔腾千里淡云烟振羽阶下虫吟风树上蝉物类本无情苑枯感变迁谩说蓬瀛洲居住不老仙三山阻且遥荒唐徒尔传我有不老药不用求金丹清心与寡欲可以延长年嗟彼名利人营营凋朱顏

郭公解布谷王孙能促织区区禽与虫因时亦有识人生性本灵充然备五德私利一薰蒸灵台因窒塞譬彼瑶台月忽被蟾蜍蚀克已万理明处事乃不惑

春风二三月花屿争芬芳出门踏青人车马沸如狂芳甸布绮席绣陌遗琳琅幽兰在空谷诘肯生道旁地僻人莫赏谁识王者香我来采盈把归植读书堂同游不同趣对尔聊徜徉

平原昔聚客毛遂乃下列备数入强楚碌碌何分别一朝脱穎出历阶骋辨说手招十九人从约自此决策士且垂名矧乃匡时杰

燕昭用乐毅连下七十城惠王信反间全功一旦倾齐威察毁誉左右计不行烹阿封即墨战
胜在朝廷外间与内间一伺主疑乘所以为政者去谗心乃明

屈原沉汨罗孤忠光日表贾谊过长沙临流抒怀抱楚怀本庸昏汉文称有道胡为志未伸悲
歌赋鵬鸟绦灌岂子兰洛阳英锐早龙门作合传孰谓善品藻

凤凰鸣崑邱惟食琳与琅九苞耀奇彩天宇恣翱翔岂比藩篱雀卑栖饱稻粱达人岂自枉鄙
夫巧趋跄尚父年八十犹自钓渭阳一朝遇西伯殊绩展鹰扬是知贤路辟斯为邦家光

新竹

新笋已成竹檀栾影帘箔风翻翡翠林露洒琅玕箨犹然婉娈姿已具坚贞格萧疎戛寒玉历
落吹竽翕长房漫骑龙公输宁飞鹄抚摩留仙人栖托迟鸾鹤梁园几万个盛事今寂寞森森
阶砌前添我兴寥廓烟凝翠欲流枝筱纷参错莫谓无妍华岁寒犹可托

海子行围同闻之蔡先生五弟读杜子美秋兴诗分韵得肉字

秋晓猎平原露重林如沐归来息离宫绕砌开黄菊岂以漫游荒往籍闲披读维昔天宝初杨
李窃威福道旁有饿殍朱门餍粱肉渔阳鼙鼓来惊破霓裳曲杜老时随征殷忧积诚笃伤心
秋兴诗令我劳往复硬语蟠虬松苍浑神味足锦江波浪愁巫山眉黛蹙何如屈问天空同贾
赋鵬遥遥千载心文囿仰芳躅

关山月

玉门关外秋风清玉门关上秋月明戍儿归卜刀鐏鸣离家见月几亏盈天河净洗兵不用早
晚可得酒泉封燕颌将军飞食肉每同甘苦均寒冻遥忆千家砧杵声旧衣未解新衣送举头
皓魄又重圆边笳四面方吹动

题李白太山观日图限韵

供奉沉香亭遣调若钟铄意在讽色荒不独词华擅五岳峙胷中礧礧难消遣长啸登太山日
观峯当面东望沧溟洲坳堂杯水转阳乌浴未乾鱼龙乘曼衍扶桑已三竿犹不闻鸡犬遐观
小宇宙形势天下选咫尺大罗天天帝端袞冕叩阍谒通明从容陪玉辇醉踏青芙蓉岂以佯
狂免骑龙恣天游白云共舒展帝女赐锦裳闻说冰蚕茧长鲸不复回奇传类诡辨何人写丹
青壁上裊香篆披时泰岳雄收处沧波卷即此当卧游悠然兴不浅

喜雨四言诗

明明

上天照临有赫至诚克应无感弗格穆穆我

皇乾惕朝夕鑒在

帝心九有是宅

皇帝膺籙丕显丕承洋溢暨讫被乎八紘民安其居物乐其生尔畊尔桑以成以平
瞻仰

昊天昭回云汉未日如焚亦云微旱

帝心用忧彻悬减膳亦保亦临日明日旦

有颁其丝有降其纶访自三公延及百臣式陈尔言庶裨我身用沛恩施以答

苍旻

有噎其阴有兢其雷云既油然雨亦沛哉日沾而濡日滋而培自我京畿遍乎九垓

民鼓其腹谷润於田沟洫潺潺沃壤??匪以灌而鲜匪以溉而妍

圣帝是?致雨泽是宣

雨而阳矣泽则洋矣遍农桑矣硕且长矣万斯仓矣供明堂矣祝无疆矣

读昌黎集

建安骋骈俪斯文体一变俳优务悦人靡软风相扇自此八代间羣言纷汗漫起衰昌黎公銳
然负谤讪劓伪还淳古籍湜愧流汗渤海收衆澜斗建失星烂尊圣卫藩篱帜树先登岸因文
道以见一语千秋赞

铜鼓歌

雍正庚戌秋九月广西抚臣金鉉进铜鼓一云民间垦田所得名诸葛鼓相传诸葛亮以鼓镇
蛮云因歌以纪之

赤帝失御火不燔冠以苴履翻坤乾靖王後裔英且贤慨然奋义振中原南阳之藪卧龙蟠下
车三顾意何?龙飞云路见在田君臣相得鱼水欢东使吴会骋辨言八十万衆成灰烟西入益

州奠本根鼎足峙立固且完永安宫里龙髯攀调和宫府整而闲命师南指定獐顽七擒七纵服诸蛮铸铜成鼓永镇旃风雨侵蚀年复年数易时代陵谷迁下巢蚯蚓邻黄泉照临无复资魄渊濡润还沾雨露偏崇鼎贯鼎增斓斑独於厚地全其天由来奇物终播宣一朝光气腾荒阡施厥畚鍤瓦砾翻有声鞞鞞非丝弦宛然铜鼓形不刊洗剔苔藓光泽鲜惊看老幼何喧阗大吏表进

九重前为陈檀案撒包匭聚观羣下充庭轩试加击伐声哼哼大鹏搏风长鲸喷上有四蛤狰狞蹲旁有双耳绶色緌龟文虬篆隐隐存覆之黄缣加束纯方今舜目辟四门两间并献贞符繁不夸宝鼎出河汾讎数劒气冲斗躔我闻置鼓召谏臣访察民隐牧元元此应其兆无乃然坐见说议日联翩鏞钟大叩张宫县

读贞观政要

薰风何习习朱明届长候北窗高卧起洛诵勤时懋贞观政要编覽罢再三复文皇治世功在汉文景右斗米值三钱太仓粟腐臭关东暨?南开门夜无寇论古缅遐思治功非幸覲文贞立朝端弥缝而匡救九重亦虚已勤政夜继昼励精图至治俗用臻富厚二十余年间中外称明后徵没明监昏志满渐差谬东征无成功幸能自引咎复碑念前规厚赐抚其後犹不负初心终身无罅漏信顺立丕基尚贤天所佑先哲留嘉谟後人当勉就

傅修期

昔有韜铃士投笔愿从戎终生美少年请纓志甚雄读书贵有用跃马驰边烽所在战必克岂是虚誉崇伟哉傅修期卓然儒将宗击贼万人前扫笔三军中勇力骇豺狼流文贯星虹非云尚血气讎是工雕虫小戎赋良人温然美玉同读史抚青编芳踪千古隆

公莫舞歌

昔人有公莫舞歌道项伯翼蔽汉王也然但言汉王有天命未及项王不聽范增之言及增不知几而事项故歌以补之

剗牛割猩殪封豕羞鉶实豆堆盈几锦绣筵开藏壁垒衷甲宋盟无乃是亚父腰下块三视项庄剑气寒如水公莫舞兮行且止以身为卫拂衣起增却顾兮良色喜隆准果是真天子怒撞玉斗亦徒尔同云集霰已如此

蠲租乐拟乐府

勾芒布令土脉濡荷犁早向东阡趋男耕妇织闲时无料理粟帛供正需食毛敢辞王税乎春回郢屋大泽敷小吏旁午捱门呼窃疑督赋惊农夫却宣王命传蠲租传蠲租蠲租乐新丝縠後新谷登换取金钱娛老弱

黄石授书

智勇非深沉难言天下事稍挫便拂颜斯为杯缶器留侯不世才佐汉膺重寄当其圯上游与衆了无异何来一老翁猝然命纳屣三进不为羞深折少年气所授是何书乃擅帷幄议当时林隐人踪迹略奇秘卻令谷城石受祀永不替

读司马温公谏院题名记

丰碑耸立高寻尺银钩铁画生光泽累累若若同时荣莫混贤奸一片石天风凜烈护刚坚表列平生胜竹帛他年元佑钩党臣义形石工传安民岂知後世翻宝爱几与谏院题名隣君不见山可砺兮河可带桑田沧海还相代此名一留不复败

芝兰曲

芝兰者芝花如兰非芝与兰也见陆象山集

碧空星耀明离离下映琼圃三华芝玉英绰约如兰猗幽姿特藉五云奇九光攢簇宝盖垂珊瑚玉树纷葳蕤亩畹之间斂葱蒨国香得并芝房荐瑶草琪葩种独擅采上彤廷露华滋

高其佩指头画庐山瀑布

庐山高高插天瀑布千尺飞其颠擘开玉峡白龙走空蒙万古生云烟七十老翁戏作此不用霜豪用十指丈山尺树都不论壁间彷彿流寒水

观获

秋声入园林凉风动高阁偶出步郊垧斜阳照墟落眇彼陇亩间黄云堆漠漠钱鏹已早庠銍艾声参错畦东与畦西是处竟秋获手刈赛疾迟背负争强弱遗秉与滞穗寡妇亦云乐吾闻四民中惟农苦莫若有年谷价低歉年委沟壑即今丰稔收租重主人索益信为政者仁民最先着

拥鑪读书歌

首山之铜出天然何人熔冶精雕镌镂蟠刻螭无斧凿天吴紫凤纷腾骞岿然不共桑海变苍弘血色生新鲜嗟予好古忽得此宝之不啻珊瑚鞭丰隆布云青女降凌空裁玉落地繁飘风弗弗起天末千里万里沉寒烟有怀赵衰苦莫遇博山独拥红炭然温怀续续吐?气性根理窟资探源我有会心非独乐常思衣被天下大小无号寒

煖研歌

阴凝北陆寒风多燕山雪片纷相摩山积皛素池停波翔阳隐光倏忽过指头冰冻真无那我
方临窗事研究空斋赏玩烦磋磨纵有翠涛端石可奈何呼童为添煖研火更济之水陰阳和
寒热均调融墨气安置几上平不颇浮光含润露精彩佐我终日之吟哦抒长句歌煖研君不
见当时此法无人传乃令嫔妃呵笔於便殿

腊八日

索飧大蜡伊耆始夏日嘉平殷清祀周家蜡礼举岁终文武之道均张弛秦复夏名缘祈仙权
輿定腊实刘氏蜡八相沿讹腊八八日号腊何所指当年饮粥成风俗果麋杂和期相侈或传
此日浴佛节阿谁能辨非与是岁在庚戌月己丑羲娥丸转穷次纪哉生明後後五日作粥吾
亦聊尔尔松榛枣栗杏胡桃黍稷粱豆堆累累水火既济入鼎烹声泻松风万壑起便啜数椀
润诗肠侑以新句加绮靡明窗静赏送流年不随猎骑平原里

自鸣钟

扶桑日出海门红大秦西洋扬景风悬撞度索底贡同於皇声教敷天通梯航山海来朝宗厥
献奇物自鸣钟铜轮铁弦凡几重机轴循环运其中应时滴响声春容挈壶无所施其功精巧
絶伦疑鬼工倕班流汗难追踪异哉兹物无始终周历昼夜春与冬悬置几上胜金镛晚报日
昃晓嵎东我闻宝贤宝物虽不同咸宾亦足效球共考时定律佐三农此钟之利贻无穷

题宋宣和清明上河图用骆宾王帝京篇韵

大禹敷水土导河过龙门潏泆万里间卓为羣渎尊流经积石走函谷东过洛汭绕甸服土中
自古称洛都襟带山河雄地轴维昔宣和全盛时寒食初过一百六淡烟轻雨清明天踏青岁
岁侈华屋华屋朱楼金阙限千门万户天边开飞花香满宜春苑称觴献寿柏梁台佩响千官
入山呼万乘来簪裾艷文藻云汉俨昭回梯航万里至辐辏日中市绮縠扬粉排连袂如云起
柳阴暗沙堤花光明御水宝盖蔡京车高牙童贯里中枢甲第起崇墉相国高堂列鼓钟道君
礼乐三千盛孺国山川百二重春入上林迎旭日云开水殿跃飞龙龙楼凤阁相辉映山城鼓
吹春游盛春游处处多贵臣青骢駟车邻邻明月楼中邀上客紫薇花下宴嘉宾满堂珠履
珍羞错从容欵曲金兰亲斜阳返照天欲暮汴水桥边车马度桥边街市何喧阗万货千商夹
道路路旁桃李纷芳菲游人杂遝白马肥朝催玉勒花间去暮拂金鞭柳岸归颇厌锦绣服新
裁白紵衣剧孟风未峻郭解力犹微五陵擅游侠戚里相因依平生但言凭义气舍身许友未
觉非郊畿霭霭带晴云稻田桑圃望中分村墟景象多幽趣点缀蚩蚩忘帝勲妇子嬉无节长
幼略无文常乐昇平烽火息霸陵闲却故将军柳堤游客舣船待一棹轻移山势改嫣红粉白
夹岸矫兰桡画舫中流在中流竞渡各纷驰渡口鱼矶叠石为更有一川风景别身在蓬莱自
不知蓬莱宫殿何繁华瑶岛琼台入座矚仙人炉炼长生药羽客丹成九转砂灵素作安期遗
我枣如瓜驱山走海丹青变笔底烟云纸上见神思妙艺出清新偶然展轴惊万人巧赡夺天
工结构含精气远过顾虎头不数陆仙尉仇子此卷何为哉燕雀嬉嬉画里来驱邻自召强邻
侮繁华侈泰祸之媒牛车俛首受缚去冰天雪窖嗟徘徊即今歌舞地花发为谁开空留遗迹

在凭吊费诗才

题戴天瑞指画山水图

玻璃贮碧无涯津田田荷叶出水新草堂坐对清埃尘忘机养得鹤性驯潇洒更有松与筠远
峯扫黛青嶙峋有客有客来访频高山流水无俗缘苔径曲转过柳樊主人不用迎出门笔墨
渲染古来闻指头蘸墨见此人吁嗟絶艺工且神一指乃能探其元无因得悟天龙禅

新蝉

今年天气炎五月新蝉噪初聽声尚澁渐觉羣喧鬧饮露抱高枝临风曳长调傍晚响愈繁先
秋未免躁榆枋恣往还决起安所好未能万里游且共鷺鸕笑

御制乐善堂全集定本卷十四

卷十五

钦定四库全书

御制乐善堂全集定本卷十五

古体诗

古砚

雀台旧瓦埋烟草追琢为砚诚坚好端溪紫石石质良金文鸛眼成文章何如天然古砚省磨礲淋漓墨海变云龙他山之石无所用隐相呵护烦神功翠涛剡剡露精彩恍疑宝气浮晴虹藏之七十有二代以为金泥玉检充东封

拟苏子瞻游赤壁诗

赤壁赤壁何崔巍清流蹙浪如银堆我来携客弄小艇一轮秋月光徘徊座中洞箫吹莫哀酩酊恰有新秋醅眼前好景不易得何妨磊落玉山颓君不见红楼绮阁管弦高富豪子弟争游遨又不闻鼓钟歌舞府中宴日食万钱殊未餍惟有清风明月不外求几人江上为勾留东方既白且归去得闲还拟重来游

题王原祁秋山图

屋壁淋漓悬尺素琅琊妙笔写烟树草堂空对夕阳闲伊人宛在知何处苍苍暮景遥空白云山涵翠迷咫尺檐前弗弗起飘风独与高秋留本色

郊围见西成有象即事志喜

去冬雪盈尺占之利东作今春雨如膏可卜丰登乐一自入夏来云汉光煜爚崇朝歇甘霖祝融扇炎灼圣皇念民艰忧勤倍咨度对越保无斁

昊天鉴诚恪未几三日雨沾濡徧村落庭除景色佳苔痕茂参错那知郭外田良苗助长若承

恩猎南苑平野秋风掠气爽马蹄轻天高鹰眼矍合围出红门更觉郊原廓行行历野店去去穿林薄中林施兔置歇骄奋噬搏田事亦云毕农夫罢秋获眄彼场圃间黄云堆漠漠妇子利秉穗老幼饱藜藿从识天人理应响如鸣鹤宵旰

圣人心顿起下民瘼太平徵有象永言志其略

南苑观鱼

霜寒秋水澄镜光天一色泼泼巨壑鱼潜跃咸自得猎罢解征鞍网罟颇谙识观鱼寄我情岂为贪口食鲲鲕夙有禁留以繁生息为语捕鱼儿取之不可极

驯象歌

皇灵赫濯昭八荒西极咸池东扶桑于阗?况求王章岁岁奉贡来九阍厥贡惟象象云驯龐然巨体性孔良金羁锦襜饰身首正朝分立金门旁玉辂金辂高数丈驾缚安稳行堂堂昇平仪卫匪异物屹然排仗威遐方我闻象形如珂雪又闻象力絶羈纆生花拄地曾耳聽究竟未见嗟荒唐辛亥九秋猎海子路西却过驯象房因缘一览愜宿愿长准大武诚昂藏蛮奴五六蹋其背随所使令如驱羊或俯厥鼻一叩地特作鼓声鸣铿锵仰天时亦夏长韵鼻孔呕哑吹笙簧渴来吸水尽巨瓮俄然喷出如西江作乐昔曾效率舞占星闻说散瑶光俊猊狮子称善吼山林讵足供庙廊

白马行

秋阳皎皎秋风起千山万山收红紫南苑平芜晓色寒游丝白日长空里我从前岁罢秋围经年未到南海子重来历历忆旧游真教见猎心犹喜黄羊麋鹿满平郊捷射争夸驰騄駼就中白马夙我随德力相谙已久矣神姿嵒峩隅目荧峻骨昂藏驥上指罽织鞍稳革鞅牢牵来不骑且熟视翹然长鸣向我前意气棱棱蹄股峙旧闻天马老能行雄逸何用加鞭箠合围少试秋草原骁腾未改旧时美一驰射中双兔儿再驰殪彼一封豕亟命解鞍休息之秣以甘刍饮以水劳尔汗血历有年爱护驯良宜若此岂令老却青丝络盐车伏枥终厥齿但使长游圉牧间一年一度一骑尔

德寿寺古鼎歌

龙宫巍巍紫气轩辉耀棖萱焕崇垣寺名德寿庵罗园刹竿高挂珊瑚旛停鞭卸轡山门前一滴欲寻曹溪源东瞻紫雾明朝暎清凉顿觉隔尘喧香浮宝殿谒世尊兀然古鼎吐云烟何人熔冶工雕镌金翠斑斓历岁年上文雷回下云纁狰狞状类狮子蹲籀书斯篆迹难分世次那辨癸与辛蝌蚪?屈蛟龙奔周彝虞敦恍犹存葆精凝润疑琼璠寒光欲流不可扞日月照射轮朝昏濯洗全资雨露恩在昔盛事传横汾此鼎神异迈等伦我欲负之千蹄犍移向帝阙镇厚坤充以大武佐鱼豚万斤木火为之燔有实大亨养圣贤

沔寒行

阴凝北陆元冥朝皛皛天表飞琼瑶小池冻叠层冰裂博山独拥兽炭烧重帘暖阁有如此爱日负暄聊徙倚沙漠龙堆雪蔽胫念彼万里从征士

高其佩指头画马

平川苜蓿烟蒙蒙一株老柳秋阳中二马昂藏趁西风连钱蹀躞杰且雄一匹摩痒一匹卧惊鸿脱兔凡马空当年画马称韩干安排笔墨成欸段何如一指运千钧墨汁淋漓法不乱自今绘苑传奇观不在毫端在指端

冬夜煎茶

清夜迢迢星耿耿银檠明灭兰膏冷更深何物可浇书不用香醕用苦茗建城杂进土贡茶一一有味须自领就中武夷品最佳气味清和兼骨鲠葵花玉???旧标名接笋峰头发新穎灯前手擘小龙团磊落更觉光炯炯水通无劳待六一汲取堦前清渌井阿僮火候不深谙自焚竹枝烹石鼎蟹眼鱼眼次第过松风欲作还有顷定州花瓷浸芳绿细啜漫饮心自省清香至味本天然咀嚼回甘趣逾永坡翁品题七字工汲黯少戆宽饶猛饮罢长歌逸兴豪举首窗前月移影

读西山先生大学衍义

晴窗披典坟望古兴遐想眷惟希元翁体道粹涵养着有衍义书妙蕴资寻仿大含亦细入渟泓包万象孔曾绪不坠千载揭昭朗读书思其人高山欣景仰

饲金鱼

弯环碧水满方塘文鱼翕忽朱鬣张闲坐石矶抛饭馐百千争唼乐徜徉维河有鲤潜渊藏见人辄避奔如狂暂自为计虽云良终入鼎烹供客尝金鱼何幸鲤何辜试言其故客听诸金鱼有智鲤不如不知以近为远兮以实为虚君不见呢呢喃喃梁上燕絶塞秋鸿遭羽箭

开圃

开圃种新蔬垦辟堂隙地壠畦绣错分种植从其类宁同抱瓮勤未使桔槔智灌溉苟及时烟甲抽次第萝卜白玉花蕨芽青线穠晓露带如珠朝餐足佳味岂云佐盘飧聊以观生意

王瓜【嘉佑本草作胡瓜拾遗录作黄瓜今以其最先出名王瓜非月令王瓜也】

老圃种王瓜鬻市争及先长无二寸芦管圆高价直欲索千钱豪家富室张锦筵相夸早啖王瓜鲜曾无几日王瓜老味全色足方美好豪家富室偏不买贫人每食王瓜饱天非愚富却智贫都由人眼尚鲜新

新荷

晴瞰照兰沼荡漾波光浅贴贴小绿钱水面八九点已足泛盃盘尚未擎青繖芳心不肯舒半为苹蒲掩

题静憩轩

非静不能憩非憩何由静心与境相忘一泓止水定小轩仅容膝颇足适幽兴临窗俯碧池波光入眼净炉有香可焚牀有几可凭即景裁短句岂复论声病喜得大自在而无俗虑竞安佚非素怀聊以适吾性

鹊营巢

亭柳青青绿阴锁柳下乘凉亭上坐飞来双鹊构巢居上下枝头不避我一日复一日营巢亦将成传说巢成始上梁上梁开户卜阴晴卜阴晴如其语旧年上梁南其户由来多是北风雨今年上梁户向东定知西雨兼西风嗟尔鹊兮识天工胡为世人昧所从不解趋避吉与凶

读杜诗

大雅止姬周何人继三百卓哉杜陵翁允擅词场伯歌谣写忠恳灝气浑鬱积李韩望後尘鲍谢让前席缅想浣花溪披读仰高格诗史非妄评良足娱朝夕

翠云砚歌

松花江之涯有石质坚色绿磨而为砚不减端溪爰以翠云名之而歌以诗

松花江水西北来摇波鼓浪殷其雷波收浪卷滩石出高低列翠如云堆蜀相八阵此其种江间水流石不动日月临照晶光华波涛濯洗如璧珙长刀槎枿绳修蛇刀割绳缚出滩沙他山之石为之砢礨包车载数千里远自关东来至此横理庚庚绿玉簪长方片片清秋水爰命玉人施好手质坚不受相攻剖磨礲几许研乃成贮以檀匣陈左右龙尾凤咮且姑置铜雀旧瓦今何有自憙得此迴出羣锡以嘉名传不朽

冬夜偶作

天寒鸦归早月上人语静融融地炉煖纸牕散清影白日虽苦短迢迢爰夜永敲句和残更惕然发深省帘幙重重下兽炭旋旋然犹恐寒侵肌向火争趋前悬知玉关外雪积层冰坚出征衆军士皴瘃实可怜况当岁云暮家室情更牵所恃雨露厚兼赖主帅贤凯旋应指日永不成穷边

梅月窗外横漏滴响未了心闲吟思生境静俗情扫每从物理中略识清心道拨火且烹茶一杯供软饱昔者诸葛公南阳一隐士攘魏兼和吴早定方寸里一朝遇主知终身不易此鞠躬

更尽瘁总为酬鱼水设非刘王孙畴展经纶美

沈石田秋林独步图

壁上高挂七尺练沈子石田之所作安排妙意神淋漓摹写秋容气萧索梳空白云起峯头弗弗金风荡日脚长林深樾何畏佳一气怒号万叶落何来潇洒杖策翁独步有似云中鹤板桥石磴一径通山腰茅屋看束缚远山无皴树无枝非复寻常具邱壑满空烟雾如欲滴目极天边更寥廓

五弟有葫芦笔筒用十年矣属予题句

物贵朴质不贵奇用贵长久不贵暂譬如君子小人交或如醴甘或水淡何处西风蒲柳姿忽成雅制佐铅槩日与湘东三品俱位置安排母乃僭吾弟用之已十年资益吟哦恒不厌磨礲本自无圭角日事摩挲光泛潋腰胸肩顶相称停映射溪藤云藻挾架笔何须红珊瑚只此天成质无欠伊予鴈序愧先行十有四年共笔研枯韵同拈工拙殊心中欢喜兼艷美不辞复作笔筒诗已费苦吟一日半

题白居易养竹记

潇洒白少傅妙理寄清谈自为养竹记竹性颇能谄森森抽枝筱千头绿玉簪欲踈不欲密三昧还须探亦思覓几个琅玕栽宅南

望雪行

今年三冬未见雪同云苦被风吹撒夜观望舒如镜明晓看翔阳似冰洁秋麦全资冬雪培遥识农家望岁切我闻三白兆丰年望霰先集心如结上帝穹窿坐玉京青女滕六分行列如何不一驾云车试剪飞琼喷玉屑飘飘洒洒顷刻间利我三农都喜悦

丈室

丁东漏声寒更长甲乙夜万籁俱闐寂宵钟响亦罢聊拨炉中灰向火消闲暇鼻观趣自永旋添兰麝香爇不能眠静中观造化

丈室有余清寒宵正三五纸窗近檐阶月色差可覩地炉兽炭暖夜永灰更聚手擘小龙团闲向松瓷煮读诗品古人心许杜工部篝灯一再披恍似促膝语

烧香曲

镂银匙子红芙蕖双金细筋头珊瑚宣铜流金乳耳炉活灰冉冉云翠铺兽焰光腾红映座分

来细壅安隔火霜天如水月华寒玉槃三两明珠堕小炷沉香灰半残黄云一穗袅帷幰静参得意六根遣呼童且莫卷重帘

剪烛词

漏声丁丁催落日鼓声冬冬唤月出朱扉半扃金屈戌兰釭独朗窈窕室雕栏匝匝护丹葩长光暗云浆密并州霜锋黑燕尾双飞拈得金英起落花贴贴流水寒琼枝却在红纱里

祀竈毕啖糖饧

糯花浮光细如丝菽豆磨末白如粉肃具盘盂为供养瓣香束楮申谢悃家家此日祭竈君得食祭余身安稳烛光照盘堆错杂甘如崖蜜供口吻破腊今知岁序周交年渐觉春光近挑灯且复坐匡牀清茗一杯润舌本

屏风謡

锦纯方寸虬蟠拏岌岌两扇端不斜纸面木骨非炫华轩窗闲敞为周遮朔风度雪松翻影当门瑟瑟虾帘冷霜刀落烬银兰明一缕香云坐夜永

水仙

女夷裁冰作仙骨色香净洗水云窟天风吹送洛浦春虞妃小步瑶台月金钿掠鬓玉簪横向人不语如有情采芝皓腕浑不见倚屏却坐羞银槃

玻璃镜

斲檀紫翠蟠龙蛇锦帘半揭文绣斜中含冰月无点瑕水精云母羞精华西洋景风吹海舶海门晓日摇波赤梯陵度索万里遥价重京华等球璧虚明应物中何有妍者自妍丑自丑匡牀坐对寂万缘我方与我周旋久

春夜偶成

开年喜阳和月明三五後挑灯裁短句闲消清夜久敦敦书案前积册纷左右缅怀古作者杜韩期尚友汲深苦纓短奥衍终莫剖譬之水在器量物随所受惟在适我心岂计悦人口

我思天地间孰非造化功冬春相代谢循环嬗无穷一气鼓大冶万彙形色同如皇建厥极颁令自法宫垂衣端拱理四海声教通阴阳无愆期百昌乃告丰象魏布始和八表扇仁风此理非臆谈权輿自鸿蒙

侧闻斗有柄四时异所指仰首望斗垣又见向东徙乃知阳德普万物资於此大哉行健心妙矣於穆理

相风

长竿三丈绳丝直上揭飞轮如鸟翼雨淋日炙更阴晴风飘籁静随兴息二十四番曾惯经三百六旬立亭亭朝看披拂送落月暮看飒沓呼羣星等闲尘市罕得见未央宫里明光殿御籬香霭午昼长飘扬每被阳和扇即今五两春气融岂是寻常雌与雄但使巽二欲吹万那管东西南北风

填仓日

月正己过二十五阳和布作新春景东风次第催物华隔窗晴度迟迟影共传此日填仓节不吃糜饭惟嚼饼青青早韭列盘香细细茆芹入齿冷食罢高斋步几回帘栊深鎖炉烟静更喜今朝风日佳豫卜黄云堆万顷

催耕鸟

条风天宇布百昌欣韶熙村原趣已佳綠水明千畦秉耒耕南亩提壶饷东菑郭公何丁宁催耕田畔啼高栖嫩柳梢低唤柔桑枝分明为一言东作当及时田老闻之喜胼胝非所辞田妇闻之喜饷馐职所司但愿岁丰穰辛苦甘共之几度闻此声蚤起竭力为那似香闺中惊眠翻怪伊

素几謡

素几素几胡为乎不雕不斲不丹漆直方之中存本质深山大壑储良材工倕裁制陈书室使我凭之不肯以汝佐尊俎不肯以汝供梳栳惟有乘兴赋诗时蛮牋藉尔快吟笔

玻璃窗

西洋奇货无不有玻璃皎洁修且厚小院轩窗面面开细细风棂突纱牖内外洞达称我心虚明暎物随所受风霾日射浑不觉几筵朗彻无尘垢溪畔高枝宿鸟飞门前小径行人走秋添潇洒看阶菊春回消息凭庭柳一径入望尽分明万象为呈妍与丑依稀对镜延清赏裁诗可似铭座右

御制乐善堂全集定本卷十五

卷十六

钦定四库全书

御制乐善堂全集定本卷十六

古体诗

长春

春华秋实催年改繁卉辞条想弱蕾驻春惟有月季花点缀四时胜剪彩绿叶杂间深浅红亚
盆巧笑凌东风不笑东风放花色惟笑东风吹不得

二月十一日晚烹雪水偶成

仲春溽天飞瑞雪不异甘霖及时节预卜二麦兆丰收田夫村叟咸懽悦吾曹此乐正有余清
兴更与寻常别呼僮藉席为收取满贮磁缸水甘冽晚来活火事煎烹一瓯香乳看清绝自啜
自省沁诗脾银兰焰长光明灭因思上苍霏琼霰祗缘大地春方茁如何吾曹擅妄取但为口
腹供饮啜复思此法古有之清味不须和梅啖吾曹所饮能几何万物资生亦不缺竹炉茗椀
相周旋哦诗夜半寒更彻

春蔬

春融地气如膏滑一畦烟甲随雷发檐前小鸟唤春眠裊露携篮勤采掇早韭初菰纷列?清芬
细嚼冰齿寒淡泊有味取次领旦晚为尔还加餐君不见一食千金丞相府犹说区区难下箸

雨前茶

穀雨前春雷後色染鷺黄新上柳携笼男妇谿山走争试采茶三昧手日烘山腰暖碧云枪旗
半吐摇酣春卖与商人博衣食徒劳曾未沾其唇伊余品泉逸兴除啜罢还忆贫民家新丝新
谷都已卖即今又卖新芽茶

古意

好花早萎谢佳人半顛顛天非惜雨露尤物人所忌宝钿羞黄金傅粉夺珠翠清晓临荷池脉
脉含愁思上开并蒂莲下有双鸳睡繁英且耐时接翅缘同类一朝秋风凄中路还乖异物理
有如此那得长相萃惆怅倚朱栏旁人诨解意

宁为山下草不为山上松雨露苟及时荣长争茸茸忆昔当结褵原以托始终如何颜色改弃

置等飘蓬青楼系玉驥二八桃李容君脱紫锦裘贯酒击歌钟不念贫贱时以我曾御穷

灼灼海棠花关关黄莺儿彩袖倚阑干盼彼芳菲枝芳菲岂常住况复莺语迟离愁已若此会合应无期素手援龙梭织成回文词回文有断絶此恨无已时

绵绵洛阳道道旁何所有多见送行人悲歌折杨柳杨柳折不尽络绎驱车走愿为路上尘逐君马蹄後君行求富贵金印大如斗还恐宦途艰荣华不可久何如早归来与君长相守

楼松【即偃盖松也见抱朴子】

?山之侧双株松擎空森竦翠色浓落落不改四时色萧萧独韵三秋风几年驱车蓟州路摩挲古干不能去高耸浮图带野烟平飞画栋凌云雾品题曾记抱朴子楼松鬱鬱差相似梢振寒声卷浪涛根蟠巨石叠阶阨当时铜雀已成尘此楼独占千年春婀娜何曾贮歌舞幽秘或可栖仙人可怜路旁桃李枝阳和发育争参差西风摇落无顔色空令独树含清悲安得韦偃写直干倩伊图入鵞溪绢挂壁凉颼镇日秋坐卧青云眄银汉

王叔明山水图

吴兴王叟风流客爱向生绢写丹碧画家六法占高科气韵生动神奕奕粉墨惨淡费经营悬之高堂满秋色胷中邱壑鬱?礧安排三远【画家有高远深远平远之说】无形迹主峯耸峙客峰赴山带溪流相络绎溪边钓艇任风斜溪上人家隐竹柏仰睇高渺若无路梵宫忽向青冥辟千寻石壁挂瀑布匹练遥空泻飞白?擎撑突老松枝三面【画法石分三面】还看多怪石笔思纵横夺化工恍惚烟云生几席摩诘风流难再续此图珍重等球璧

大理石牀歌

皜皜雪质排云黑葆光含润如球璧来从滇南万里遥量度长材越数尺良工琢磨成匡牀紫檀为架文锦席天然山水石纹间倪黄手蹟横空碧窈窕洞壑藏神仙瀑布飞流挂松柏峯峦层沓云气深滩头溪尾相连绎坐中恍惚秋风生何必买山娱泉石

春暮西廡骑射

离离紫陌花萋萋暮春天纷红一以萎緑杨全锁烟可惜流莺语惊起晓窗眠秣我青骊驹策我珊瑚鞭乘兴聯骑去晴郊草芊芊驰射平原中随意娱芳年君看女夷功三月韶华鲜九十弹指过有似箭离弦何如无心者万物任其然荣华何繫恋风过百花穿维时日西下归鞍三五聯有客兴春绪中怀凄以牵劝君莫伤春四时相代迁与君消惆怅淪茗烹山泉即此目前景可味南华篇

移碧桃

园中碧桃树滋生随处有日久未剪治丛条觉渐丑游赏寂无人隐荣山之後嗟哉繁华姿弃置谁之咎幽斋一日闲呼僮荷畚走丛者去其杂隐者出诸藪移植小池前间以垂丝柳三月花盛开殷红映纱牖桃兮不徒荣报我亦已厚我既悟此理愿告灌园叟良材莫使沦嗟尔能聽否

高其佩指头画虎

铁岭老人阎李流画不用笔用指头纵横挥洒饶奇趣晚年手法弥警適为吾染指画苍虎气横幽壑寒飈飈落墨伊始雅雀避着色欲罢豺狼愁怒似苍鹰厉拳爪炯然霹雳凝双眸万里平川望无极三株古柏擎龙虬老人閱世如云浮独於画法未肯休此图赠我实手蹟笔绘还输第二筹高堂昼静风生壁却忆行围塞北秋

水竹村

清溪左右环綠玉参差绕悠然水竹村迴絕尘氛扰细籟韵琅玕月监澄光皎中有静观人托兴何幽渺春涨起平波小园发新筱可以钓修鳞时或集佳鸟披书绿窗陰得句萧斋晓访客过溪边回望丛篁杳

有鸟二十章

孔子教小子曰诗可以兴又曰多识於鸟兽草木之名鸟兽草木中触吾性情有兴机焉若徒追琢字句强裁声韵乌可与言诗哉唐元微之作有鸟二十章备载鷖鷁老乌诸恶鸟之可憎虽疾世之愤辞然不失三百诗人之旨余读而慕之仿其体亦成二十章所咏者皆凤皇鷕鷁诸名禽微之以刺而示戒余以美而示劝其有助於性情一也至於风格之高锤鍊之雅余固未能及古人观者取其意而略其辞焉

有鸟有鸟百鸟王雄为凤兮雌为皇朝栖崑圃饮玉露夕宿蓬岛餐琳琅九苞六德耀文明恢恢天宇恣翱翔厥惟圣人修至德来巢阿阁呈嘉祥蔼蔼吉士驰王路千秋万载邦家光

有鸟有鸟名朱鹭波静昆明常顾步汉鼓曾标乐府声周舞亦载诗人赋振振有序羽翮聯和鸣未许杂孤鹭玉笋班中识尔名由来博得人人慕

有鸟有鸟双鸳鸯接翼交颈游方塘共宿兰沼何容与同飞镜浦相回翔若有人兮翠?裳思夫君兮天一方春朝步兮春池旁覩佳禽兮增慨慷

有鸟有鸟在水浒飞鸣行摇如相语如相语相急难相急难兮食不安远罗网兮泛清澜啄芦头兮心共闲君不见悌有鵲鵲孝有乌人稟秀灵如不如

有鸟有鸟声缙蛩迁乔求友出谷间楚楚金衣綠陰里谐鸣玉管叫春阑高斋日午帘幙悄侧

耳徐聽音未了生平不少素心人关山迢递予怀渺

有鸟有鸟曰灵鹊羽族本天似先觉但不告忧惟告乐惠迪则吉宜忖度凭兹作喜易舛错鸟智人愚非见谗有鸟有鸟名布谷高唤枝头村柳綠村老闻声急荷鋤趁时耕作还相勗东邻西舍催耕遍喉吻苦乾饮水曲不似笼中双画眉巧言但博主人肉

有鸟有鸟枝上啼啼声风送到深闺声声催织当春日织女聽罢顰双眉饱蚕方作茧那易成新丝新丝还要卖匹帛安可期我愿拖绦曳锦者常念茆檐忍冻时有鸟有鸟如轻舟毛衣皓洁名沙鸥稳宿洞庭秋夜月闲泛潇湘烟水流将雏命侣颇自得对尔还似逍遥游有鸟有鸟名鸿雁秋去春来期不变成羣饮宿向沙洲芦苇萧骚波潏潏古人重尔信义敦嘉礼亲迎用致奠如何世人转不如糟糠富贵分欣厌

有鸟有鸟雉将雏雏儿声湓学母呼壠上风摇麦浪綠引雏拾虫却相逐大堤年少挟金丸见雉此意不肯弹弹雉雏儿谁为哺弹雏却怜雉心寒收弓掷丸不复看有鸟有鸟慈乌鸦飞集庭树声哑哑声哑哑引其雏羽毛翩翩尾毕逋尾毕逋雏亦长乌老更借其雏养母为慈兮子为孝禽鸟亦识人之道

有鸟有鸟清秋隼独韵金风利爪吻劲气狰狞似骏骢眼疾身轻双翅敏晴臯一下万山青狐兔燕雀藏伏尽有鸟有鸟名黄鹄轩轩霞举超凡俗矫翮翮跼来玉京却向太液池边浴随仙去後空余楼入琴弹罢犹思曲冥冥灏气恣翱翔引我欲穷千里目

有鸟有鸟云锦文巴山灵禽夙所闻的的彩色映日丽煌煌绘羽翻风新奇姿藻耀欺凡鸟雕笼饮啄为君老却胜埭头村鸡鸣瘦立风霜报天晓

有鸟有鸟呈符瑞援毫作歌纪其事伊昔明皇即位初贝州飞蝗害苗穗乃有白鸟凡数千一一喙啄蝗尽毙当时姚宋作相公调和燮理称郅治开元天宝易治乱玉妃擅宠昭阳殿禄山食人如食禾嗟此蝗兮可若何安得白鸟大如盖食此蝗兮安内外

有鸟有鸟志不移衔石填海无已时海却何时满石亦何时断但见羽毛秃兀爪喙疲咄哉汝鸟尚有志人而无志鸟所嗤

有鸟有鸟双白鸕清秋玉立菰蒲滩踏波缓舞藻文动澄流照影翩珊珊性情高洁如其色自首至尾无点黑俗眼欲看看不得

有鸟有鸟金翠斑厥名孔雀产巴山产巴山来帝里屏张藻耀文明起羽仪为国献嘉祥不甘戢翼岩阿里有鸟有鸟云间鹤万年枝上欣所托劲羽梳风意态孤清声韵月响深壑常伴仙家丹鼎烟不虑虞人施矰缴有时洒翮一高飞迢迢天路翔寥廓

采松花

綠蘚遍松陰松花帖蘚落嫩黃映深碧清香入帘箔我持碧筠筐采采盈筐着服食為清心非欲驂元鶴

新漲

雨余眄兰沼泛瀲新波漲碧沚蹙羅紋紅荷搖翠浪新浴鷗鷺羣沙嶼遙相望我欲置扁舟鼓枻空明上讀蘇子瞻題司馬君實獨樂園詩即用原韻

挿架萬卷書隨手自拈下披覽結遐心似游霄霓野當時獨樂園溫公開樽俎清吟薄云天曠談述虞夏洛中九老人來往涉風雅事同東山游迹非白蓮社東坡生花筆自是天假者題詩硬語曲高和者寡獨樂悅性情衆樂看陶冶惟公入朝時衛卒擁其馬惟公入園時一切浮榮舍蕭然物外游不似歌渥赭猗欤匡濟才閑情寄嘔啞

觀刈麥

麥苗入夏結穗黃東隴西隴碩且長老農此日走田忙腰鎌遍割樂歲穰笑看黃雲各成片密莖隨手行行亂肩挑背負晒檐頭饘粥有餘他不羨呼兒莫逐飛來雀令渠亦識收成樂

雨後聽溪聲

流雲猶在青天上霽景澄鮮風蕩漾因風泛起是何聲但見溪頭新水漲溪流宛轉繞芳堤采采蒹葭覆水齊宿潤全滋菡萏色新晴不斷鶻鶻啼鶻鶻啼處烟波繞直泻流泉鳴未了決決長疑佩響搖潺潺低咽琴聲悄耳根塵雜苦匄入聽從教洗滌清我非智者亦樂水幽情逸韻相交并幾度臨流閑徙倚風力漸停溪漲止莫謂溪聲斷續殊動靜循環理若此

熱

連朝祝融氣正作碧落無風雲脚破揮扇招涼涼不來匡牀暑熾誰能卧我思上蒼運四時祁寒暑雨原相佐冷暖由來有定期怨咨自是人心過平情可得避暑方深屋下帘獨靜坐

讀書樂

周孔未云遠典籍良具陳深造乃有得面牆終自淪伊余本下學敢忘書史親轉念學海濶未易窺涯津汲古乏修綆貽消腹笥貧昌黎讀書篇字字堪書紳况復饒至味好與結芳隣樂意寓靜觀優游期日新

秋蘭

崇蘭泛清飈婆娑翠帶長采采欲誰贈徘徊步中堂露彩含莖潤日華映蕊黃蜂蝶不知采古

澹含幽光我持金剪刀更攜綠筠筐非为纫芳佩爱此王者香

投壺

秋风动帘幙晓陰忽开晴中堂聚嘉客投壺怡我情一中詎云巧三辞礼亦成胜负不相角新诗还共賡余韵杂踈籟入耳声琤琤

著簪吟

韩诗外传載孔子游少源之野有婦人中澤而泣使弟子問焉曰鄉者刈著薪亡吾著簪弟子曰刈著薪而亡著簪何悲焉曰非傷亡簪也蓋不忘故也余讀而有感焉作著簪吟

忆昔妾簪著结事夫君和鸣如鼓瑟自卜将终身妾失著簪日乃在彼中泽良人天一方谁能覓其迹妾泣亡簪非泣簪可怜郎心异妾心君不见新衣称体旧衣舍世间谁泣亡簪者

拟杜工部东隣枣树歌

春光晚晚春风斜东隣枣树方开花大火西流届秋日东隣枣树纷结实开花结实年年好催得东隣人欲老儿童不解惜流光但爱秋来饱吃枣西隣有客常着书闭户不出一月余东隣枣亦觉少否不似王吉夸出妇

鬪蟋蟀

百草收芳秋瑟瑟乌衣王孙应候出儿童不解秋声凄延入高堂壁为室壁为室瓮为城厉锋养銳期相争甘刍好饮供其腹豪气凌秋喙爪速是时晶阳照华屋两童角胜谁输服乘闲偶作壁上观沙塲不见戈戟攢当前勇力先手搏怒气奋张敌胆寒濶颡修腰振两翼牙排利锯目如墨羽林十二汉家郎虫达功高居第一轩髻仰面试长鸣临敌拏攫如鸞英草间窃伏堪鄙笑阵前持重功方成功成破敌立不动应机变化多操纵黄髭鲜卑见股栗独身跳免呼伯仲燕然峯上勒勲功螭螭塞外靖边烽定州花磁赐汤沐飞将军是人中雄须臾角罢两童起负者蹙眉赢者喜呼童来前聽我言自古兴衰皆若此楚汉雌雄迹已陈三家鼎峙徒纷纷将军汗马功难并钟鼎勒字生埃尘独不见开元天子宫内宴玉妃小赌昭阳殿金笼不啻十家产万金之资费一旦又不见咸淳丞相半间堂翠盆香褥临秋张但爱山河鬪蛩触那知六载围樊襄由来此物亦有时荣华昔日今安之浮生误落汝童手驱之阵战焉能辞一朝偶败非得已应看再战出新奇聆我此言气始释梧桐月上天将夕匡牀静倚未曾眠更聽盆中鸣唧唧

御制乐善堂全集定本卷十六

卷十七

[集部,别集类,清代,御制乐善堂全集定本]

钦定四库全书

御制乐善堂全集定本卷十七

古体诗

题唐岱重溪烟霭便面

山容迢迢开屏障前溪後溪遥相望雨余烟霭湿未乾流云不卷青天上溪流宛转抱花源茆舍几间面青嶂板桥架波通径窄梵宫结构层峦壮山水与我有宿缘每遇佳景辄欢畅名山万里未曾游对图逸想那能忘唐生当今称妙笔知我心胸爱清旷晴窗为我图便面泼墨淋漓传景状千重林麓抹苍翠一片烟云作供养远峯近态无不兼樵路疑闻牧童唱莫辞复为一拈毫添个轻舟双桨荡

读白乐天集

元白夙齐名并号能诗者後来趋向殊品格别高下以此评其诗我爱香山社况复无?削体裁极闲雅吟咏摅性灵後人继者寡弗弗纱牖风炎炎朱明夏把玩不能置博山香细炷

拟柳子厚始得西山宴游诗

佳境天所储常以供幽客我得游西山追踪谢公屐高峯插天汉嵌空叠翠碧其下森万山朝拱归一脉古磴长奇葩灵局多仙迹得意亦何有会心聊自适盘桓抚长松清风生野席

相马吟

知人固非易知己良独难譬彼驾盐车太行阻且峘惜哉骐驎良徒共弩骀餐一朝遇伯乐三鸣感多端秣甘饮清水饰之锦绣鞍西极崑仑墟东穷渤海漫追风四蹄轻飘飘如羽翰聊藉酬知音不顾汗血殫伯乐不世出骐驎空自残谁怜伏枥者执策一长叹

猛虎行

东山无虎兽迹多西山有虎兽迹少白日绕林鸟雀惊耽耽後逐三子小秋风猎猎原野平饥腸未饱山中行鹿儿被获供大嚼老鹿长逃不敢鸣将军笑捻铁丝箭不射虎腰射虎面可怜三子亦被擒穽里同来入虎圈虎圈晨开铁作门聊凭一息定惊魂乞生也向人垂首昔日威

风今何有

拟桃花源中人送渔郎出源

日长山静春归早千树霞绡缬林表无赖东风吹落英沿溪为引渔郎道晋代铜驼荆棘中秦家宫阙埋烟草何缘几日共盘桓翻知多少纷争扰君有家乡君自归来路去路两杳渺送君还复闭洞天洞里花香春浩浩

拟渔人复至桃花源不复得路

忆昔入桃源万古仙家趣桑麻满平畴绯英缬千树惜我羈世网未能骖云雾洞口执手别殷勤频属付重来问仙源历历想前度云水两渺茫欲涉迷故路归来日已西租吏守门户烹鸡送租吏自愧初心误

聽鹤鸣

白云卷遥天澄潦收寒濑入秋诗思清吟望中心快何来警露音清越振林外在陰无子和孤鸣何幽介是时田间雀喙啄羣喧哢儿童驱不起杂沓殊无赖忽聽九臯鸣清耳如梵贝会心岂在远霜风度天籁

芸香

青油隔子屏风曲青简缤纷三万轴屈戍不闭午风凉吹送芸香香馥郁都梁五木不须焚芝印未结飘幽芬老蠹辞家堕双淚坐失书屋三千春可惜三仙未餐罢避舍有似云中下

冬夜偶成

人苦冬日短我爱冬夜长皓月悬长空朔风飘碎霜重帘垂 璚红烛明深堂博山炷水沉和以梅蕊香敲诗不觉冷漏永夜未央

招摇正指北黑帝方司辰三余饶乐事华屋夜如春我屋虽如春广厦安得均因念雪霜里尚多僵卧人展转不能寐闲敲诗句频旷怀天地间人我本相因鸿荒始判初有如一家亲後來生蹊径肥瘠异越秦我愿读书者立达自其身

乌雀集庭树哑哑叫风冷无食哺其雏羣栖叹夜永岂如青田鹤梳雪毛羽整不用稻粱资高空盘孤影九臯一声唳聽者发深省

换烛词

焰焰琼枝绽红萼兰膏四下玉珠落熏炉甲煎篆烟消将炆幽光暗锦幙寸心不惜尽成灰斜倚雕阑玉如削玉镜台边新睡起春兰秋菊皆相似独有幽人悟火传前灯未灭新灯是

吊宋末张陆双忠

午潮乐作檣旗仆苍天不遗一块肉海边拮据两孤臣有泪何能向天哭陆公负帝先沉海张公露祝天心改两公先後死不同忠肝凜烈千秋在呜呼委身事主不两全竭心成败斯由天赵武得生帝昷覆嬰杵当年难独贤

遣兴

陰凝北陆盛魄渊穷次纪甯发晓风寒霜花拂窗纸偶思弄翰墨排籤列十指一字不能作阁笔且已已因思寒暑易天道固如此暑雨与祁寒怨咨岂明理况复阳和近转眼物华美譬彼养狙公不出三四耳失者何必愁得者何必喜我愿世间人平等观如是

拟杜工部洗兵马行

长云不隐关山月沙漠龙堆多戍卒壮士横戈古战场将军饮马长城窟长城水寒马不嘶刀环入梦多归思少妇楼头咽横笛一声秋韵临秋吹吹笛声高复声下惊起匡牀高卧者侧身吟望兴咨嗟向天长歌洗兵马谓天盖高聽自卑电光倏忽雷车驰云师雨伯扬青旗陰昆水族功并施盆倾瓶注遐迩滋洗尽尘氛永息师男归其家妇育儿九州安堵乐雍熙壮士勇力亦奚为欲挽天河安用之

传闻

传闻西师秋大捷露布军中踵相接零星困兽争逃生駝走喙息震且慴

皇清赫濯扬声灵共球万国均臣妾何来小丑扰西北此败惊心定安贴太平有象当偃戈喜动中心上眉睫男不戎行罢戍归春风四海咸和燮天心仁爱定如是但看明年进降牒

冰牀

御河腊月层冰冻河干辐辏千人衆往回争欲倩冰牀空设輿梁恒不用细长明铁当车轮架雕文木铺重茵平湖舟驶不惊浪广陌车驰那有尘客来不须劳问渡但向河边镜明处隐隐雷声聽未休坐中疑向瑶台去

帝京岁暮八咏拟乐府【并序】

四时灰琯知玉律无差九有春台庆熙朝乐事十二月之佳景妙笔难描亿万载之休徵金瓯

永戴况乎天中旭丽辇下云屯汉京兆之楼台绮疏绣幕宋汴梁之车马香雾红尘万国共球
望金門而献岁千方辐辏向玉阙以输诚暖带春风喜椒花之有颂寒辞冬雪堆柏叶以为盘
韶景丽万物以蕃鲜犹少苏家三首芳辞申八咏而点窜非同王氏七人虽即事以兴怀邈缘
情而绮丽不拘成律各赋一章

腊八粥

腊月初旬才八日都人醞釀年华出招提兰若结常缘竈下火光然百室黍米枣栗杂胡桃煮
粥朝餐如一律如一律异甘旨贫家不似富家美华屋雕盘肉侑餐茅檐一碗充肠耳充肠饱
腹却欢然人人争道新年迹

祭竈

乡村腊廿四家家祭竈王城中二十三比户灯烛张传言辇轂百神聚竈君奏事非荒唐竈君
奏事向何方九天之上有玉皇年年此日竈君升云旗龙马宵翱翔且祝家事莫短长为乞明
年安且康我闻作善斯降祥竈君直奏职所当天君自有定赏罚陰氏由来费黄羊

立天灯

金龙护柱长数丈四柱撑如巨灵掌彩灯左右列丹墀万寿灯明丹陛上年年腊月二十四缚
架悬灯声扰攘百夫鬻柱齐用力一一都聽铜锣响灯上聯书细金字惟乞岁岁登丰穰瑶宫
乐事与民同从识太平真有象

贴门神

家家岁底贴门神门前一望景象春将军铁甲逞威力丞相冠带容彬彬更换桃符粘福字等
闲恶厉不敢亲陈陈相因门板上新神还与旧神邻神岂隔年旧习俗尚鲜新只愿闾阎跻仁
壽常見期颐百岁人

馈岁

刺绣新惊添几线团团绣得荷包面就中各盛金豆儿开匣争看文采绚亦有文房杂珍玩苕
溪紫颖端溪砚易水松烟黑似漆倭牋蜀纸生东绢红橘黄柑与鹿兔渴能生液饥堪咽帝里
豪华固如此三元令日人争羨试想村中老灌田此景何缘一闻见

供天地

新年淑气霭百祥?供天地通万邦由来帝里制更详中宵华烛纷炜煌屏风设列庭中央盘堆
果实罗酒浆主人前跪烧瓣香一年户口安且康荷神之德报所当今值除夕归帝乡更迎龙

驾锡福长五更晓起未出房迎喜避鹤择向方後趋庭院拜玉皇送神爆竹声硠硠夙兴欢喜
谨立旁遥瞻炉烟缥缈光霭霭天门辟九闾

炷岁

地炉然松枝续续烟缕起暖气满户庭炷岁今宵是岂云借其煖诂为闻其香但愿一家人和
气致千祥东邻拨新灰西邻烧硬炭烟熏霭如雾自夜达明旦明旦天未明三五灿踈星贺年
人毕至喜气迎新正松枝不用添留为今年计弹指又除夕仍复供炷岁

守岁

赴壑修蛇留半尾堂堂去势谁能止万户千门守岁人守至明朝新岁是今年还是旧年年倏
忽更新万象鲜人生会有百除夕高堂且复列华筵华筵开处罗老幼家僮欢喜忙奔走屠苏
递饮亚元正少者在前长者後出门看天斗指寅由来一夕变冬春书佣总是为书役绕架更
复呼长恩

读陶诗

风雅久失坠三百无人继斯文苏李徒权舆成五字子建嗣其音清辞发幽思卓哉彭泽翁别
擅此能事自然无安排一以道已意至味寓澹泊字句絶诡异寄情五柳间潇洒标逸致我今
读公诗数过不能置拟学眉山叟和咏良匪易

春水泛舟

新流滑笏如油绿柳带回溪曲复曲轻舸载我逍遥游满眼韶光看不足水清鱼静舟子闲独
下青天白鸥浴

寻春见山桃始开

寻春在何处乃在山之阳晓风吹料峭着体如沾霜远甸草未绿长堤柳渐黄乍见山桃树参
错吐花房露颗裊幽馨日暄淡素粧呼僮折一枝归插胆瓶香犹忆去年时九十惜韶光转眼
春又到此意浑欲忘女夷回造化迟迟日正长

晓起闻雀声

檐牙冻雀侵晨语似唤春眠觉行旅昨朝小园花正开不见飞向枝头来今日寒郊草未绿却
自成羣上林木晓寒喉澁不成声何如且在林中伏

马上吟诗好

马上吟诗好即景堪驱用途长诗思长不复畏炎冻忆在书斋里一作和者衆虽云足赏识转
觉苦吟弄何似自歌吟却去安排重亦有从行者且喜不成诵我得此中味愿与识者共莫学
东坡老但欲续残梦

所见

东皇回星轺和气遍六宇应候百昌苏默默春风鼓皇州景物饶广丽洵天府临风跨紫骝缓
轡过郊墅垄上事春耕驻马问田父小立汗不乾向我情毕吐去年冬不雪今年春未雨野老
望云心此意良辛苦清晨负鋤出努力向日午亩耕次第完下苗何日举我闻田父言仰望默
不语天心本仁爱自有元功补甘霖应在即如膏润沃土伫俟西成时万户仓箱贮

明月当三五流影遍万方万方同一照所在分辉光昨夜出东林映我读书堂今宵行帐宿亦
复明煌煌人处境地异月不改其常古来贤达者用贵物我忘

清明重拜扫贵贱良俱然弥望村郊中士女车马阗富室罗祭品高堆白纸钱贫者伏路旁空
余涕泪涟生有荣辱争没後迺甚焉何人能解此便是无为仙试看古墓道亦复犁为田

我从御园来夭桃花半放路过桃花寺遥从山底望未见一枝开春风疑两様春风固如常前
後亦须让

晓陰

晓看西北云峯起奴仆蹙眉主人喜仆言长路多跋涉雨积涂泥艰步履爰命来前聽我言若
輩徒知自为尔不见辛苦三农望岁賒此日方资插秧水

过通州浮桥

烟郊蒙蒙多白沙晨行更值寒风加马蹄踟躕不能进回头迷眩眼欲花却到潞河风日静浮
桥横卧波中影南望飞鳧接远汀何似江乡呼舴艋

灌麦

大麦五寸长小麦三寸半地乾苗欲枯离披陇亩畔犹幸灌溉便近傍河之岸清晨课僮仆辘
轳转双腕初看土湿湿渐觉流漫漫须臾苗尽起生意良可玩尔仆聽我言莫怨体流汗不见
万顷田农夫徧浇灌

读范文正公神道碑用宋陈傅良原咏韵

入夏南风薰花木围我庐我庐何所有插架古人书希文古大臣不与伊葛殊特达圭璋器心

迹天日如今读神道碑更识为名儒中庸赖公显程朱继其余庙堂而江湖忧乐与民俱天章
十条陈忠恳岂区区仁宗称贤主郅理亦可期参政仅九月不及大有为徒令范老子声名播
荒陲

鸠唤雨

我闻鸠唤雨又闻雀呼晴还来鸠雀争相鸣劳劳对语频入聽窗前柳色正深綠芳郊未雨迟
春耕小雀得意叫不止嗟尔鸠兮胡不灵

玉带生歌

玉带生端人也事文丞相为文墨宾

神工踏云割寒玉追追琢琢虬盘綠曾为信国席上珍墨渾犹疑血泪哭乐作午潮事已非玉
带生从信国归海滨战衄门生散玉带生为信国伴嗟尔玉带生我独叹尔卓尔皓洁胡为乎
却笑褚渊犬不如

雨工

柳毅见泾川妇人牧羊问之曰此非羊雨工也盖雷霆之类毅回视之矫顾怒步饮斲自异见
异闻录

碧潭潭底开珠户乌龙昼卧当琼树神女割云补锦裳闲却雨工睡元圃天上人间隔夜晨一
朝还过九十春何日鞭渠令行雨大慰田间望岁人

陶琴

壁上挂何物亦被琴之名犹然徽轸具而无疏越声古来多宝器亡失糞土轻兹琴存十一特
以陶公称伯牙弹不得颖师奏难成人皆指上覓我独虚中听有弦弦有止无弦弦外鸣不独
学彭泽自取琴中情

蝇拂子

驱牛不可驱蝇可玉丝霜缕垂婀娜华筵六月风日炎独将潇洒登君坐濯濯驥毛洁且修闲
供挥拂随右左王谢家风何足云爱渠亦复周旋我

蔺相如

和氏匣中一匣水十五金城持易此城不归赵璧亦归狼虎强秦亦披靡嗟乎人宝玉宝岂可

同年语相如自知赵二虎秦廷斲藺赵如何和璧虽归藏外府君不见鸿门玉斗应剑碎子房
依旧逡巡退

御制乐善堂全集定本卷十七

卷十八

钦定四库全书

御制乐善堂全集定本卷十八

古体诗

缲丝曲

吴天风软春光暮吴蚕三眠丝欲吐日上茅檐火馭迟白絮红尘夹两路中妇晨起中心忙乾桐晓炊付阿香缲车轧轧转幽澁一年衣食凭茧肠釜中丝断愁不断良人戍远交河畔

北风图

我闻古人精艺事绘月有色水有声更闻绘风殊妙手庭中六月常清冷笔法墨法超象外逸气独擅箕星精天中候届迟朱明暑风拂拂翻可憎陶令北窗不知快列子御行我未能安得刘裒北风图悬我高堂之素屏图岂有风作卧对能移情我今静观图便挂满堂觉有清风生

冰碗

浮瓜沉李堆冰盘晶光杂映琉璃丸解衣广厦正盘礴冷彩直射双眸寒雪罗霜簟翩翩坐中似有冰壶仙冰壶仙人浮邱子朝别瑶宫午至此古人点石能成金吾今化冰将作水

拱极城

九重城阙双丹凤万国车书归禹贡向明丽照巩金瓯百二山川作提封梯陵度索尽拱极此城获名独标衆南过都城十里遥斜日秋风拂尘鞅策骢城下怀古蹟儿童十言九不中由来太平久息兵穷黎不闻呼楚痛还见城头磨盘石尽是当年防盗用流寇近畿肆刼掠明代君臣邹鲁哄

皇清受命定遐荒小大共球奉一统弱妇春深惟饲蚕丁男雨足事耕种堡上健夫夜熄烽城中秀士朝弦诵礼纲义维被遐迩建极坚牢逾铁瓮迢遥万方朝拱人筐筐都由此城送

松风

绕宅栽苍松虬枝盘碧盖涛声万壑传飒飒引清籁六月不知暑妙境殊可会飘飏葛衫轻挥霍麈柄快我得松风趣珍重如球贝人间恐无价持向何方卖

青玉簪

赠君青玉簪荐君玳瑁牀珠帘绕四围布设庭中央去去夏云半满眼秋水光晚雨涤暑清肌肤生微凉夜静人未眠扑牖花气香闲身藉琅玕旷逸怀潇湘

王明君

菱红飞碧春风老琵琶抱出长安道长安北去达王庭四弦弹破知音少君王不是怜妾面未画时应赐一见君王不是怜妾身犹胜独闭汉宫春四弦嘈嘈弦绝声高绝弦续弦马上音调青山绿水皆听取生女应须辞父母此日穹庐号阏氏不愈老作巫山女

雪浪石【石在定州

文庙宋苏文忠知定州时所留雪浪斋中物高广二尺余苍质白理承以石盆有亭覆之】

雪自天上降浪从海面生何时相荟萃却与石为名雪浪本非石石以斋名称如今斋不见此石犹峥嵘定州庙貌敞左城对右平巍然踞其间万古凝坚精不共桑海变棱棱瘦骨撑谁言承有盆漫说覆有亭须知雪浪斋亦以木石成尤物贵特立此理不须惊欲唤眉山老新诗还共赓

骑秋雨【江南谚一夜骑秋雨遍地是黄金】

雨工骑龙不肯下油油云阵铺平野魄渊瞞人独三旋今日新秋前日夏江南老翁笠底笑作农年久知天道但得骑秋甘雨淋今年遍地是黄金

静夜吟

玉绳迢迢向西转长空月上浮云卷十二时中秋思多都付幽情作排遣博山吐尽香雾深萤光点点流疎林空庭万籁俱闐寂独有诗人静夜吟

唐寅山静日长图

我非山中人爱说山中话行遇好山水自觉中心快岂能长留玩聊且娱眼界山静日长图相传伯虎画为爱景物幽持向壁间挂峯峦翠欲滴树石纷古怪缚茅为屋宇飞泉流数派中有常住人看经不行迈伊余劳逸殊徒此偿诗债静对转增慙烹茶洗蕝芥

关山月

关山月如弯弓看月不与乡里同乡里关山岂异月关山月下多戍卒怕见清光似镜明月明却照沙塲骨

櫂歌行

江南少妇能櫂歌櫂歌一曲凌江波欲知幽情有几许脉脉离愁春水多春水复秋水莲花复
莲子莲子独苦心鱼书失双鲤失双鲤可奈何收珠翠叠绮罗侍郎归日舞婆娑郎不归时空
櫂歌

古意

春老金条脱尘生玉镜台分明陌头望不自陌头来明月入高楼上有绰约人只见楼中秋谁
知楼外春熏炉炷水沉拜月衣裳冷拜起步阶陰桂香弄寒影青青杨柳枝淡淡和风吹忽见
一枝折无情复阿谁

神弦曲

冬冬鼓娑娑舞纸钱飘风神欲下【叶】神不能言巫代语椎牛刳豚汝莫後【叶】疾病销
除还福汝石马汗流神已回老巫腹饱酤颜开今日西村病者死明朝更向东村来

秋夕读高青邱大全集

碧潭秋水清寒山月华白水月两澄明中有静观客披襟乐容与爽籁生几席偶读青邱诗尚
友获莫逆短作纷珠玑长歌戛金石不事追琢巧浑浑含光泽伊余岂能诗对此仰高格抚卷
吟寒空中心聊自适

芦白花

芦白花狎洲渚一片苍茫迷处所翻风着意作金声坐中有客怀秋绪怀秋绪逸兴賒渚边独
立弄蒹葭逢春戟戟且得意秋老烟波君莫嗟

壮士行

生肉亦能噉悲筑亦能击不学三军师只学万人敌少小长幽州生憎绕指柔今朝受君惠明
日报君讐易水送荆卿秋风拉瑟声一去不复返咄哉壮士行

织锦词

睡鸭盘盘翠云吐漏添细把丁东数凤梭千掷素腕疲寸锦难成愁不语明明寒月照流黄三
日一匹临秋张并刀象尺分明度莫教裁破双鸳鸯裁破鸳鸯作春被惆怅空帏独徙倚年年
织锦却徒劳良人远道寒无袍

灌园

种树围小园种菜数亩余绿畦足野趣且复得嘉蔬春风千顷浪秋雨一犁锄四时供盘餐青藿与茹今朝柳阴下课僮转辘轳吸彼井华水灌我珠玉畚芳坂润新绿勃然生意舒自饶尘外味何必山中居

虞美人曲

露泠泠湿啼眼空忆帐中欢幽情不能绾芳心全是恨心抽乌江江水至今流至今流非汉土虞美人兮犹楚舞

吊孟贲

孔悝之难子路死於石乞孟贲後乞奔楚贲在卫子路之子仲子崔以复仇请於夫子子曰行矣子崔遂入卫使人告於孟孟曰君子不乘人於闇明日战於西郊蒲弓木矢以往死焉盖伤子路之贤而成子崔之孝也事见金管集

古有侠烈者轻生等弁髦嗟哉彼孟贲乃以义为高心伤戕善良大讐不可逃捐躯执蒲弓舍命齿霜刀由也非合道孟也岂行超委贄輒间已是附猿猱君子慎所事生死如云霄

李夫人歌

夜风吹开琅璫鎖绣房灯暗兰膏火分明记得拥衾时是耶非耶帐中坐翩珊珊来何迟死怜更比生怜痴金鸡鸣鸣月如练相见何如不相见

题高其佩指头画八骏图

苜蓿平川数十里几株杨柳秋风里两驹并驰若惊鸿一匹齷草闲且喜卧者有二立者一老马磨痒如龙视就中紫骝独称神滚地烟尘幅上起奚官无事但立望两人容与踈林底古人画马用秋毫铁岭老人用十指腕下生风何足云指头随意传神髓悬之高堂秋意多晒余兴在南海子

秋夜词

桂风吹送西阳疾海风吹送水轮出千山暮色转苍苍清絕虫声上瑶瑟睡鸭香凝暖雾深更长夜静凉生衾罗帷销光霜簟老忽惊凄切鸣寒砧零露溥溥白於水池边晓看芙蓉紫

读申屠蟠传

多士清流太皎皎由来尾大难为掉汉纲陵夷何足云言高致祸不为少飘然惟有申屠生孤鹤盘空絶羣鸟林下鸿名播士林逸气凌凌光日表呜呼邪正原不容薰莸臭味岂同道宋室洛蜀标名字室中操刃相攻讨金人三緘实可师处士横议身难保梁碭春深山水闲鈎党吏不寻门考非但容身叔世间中庸品行谁能绍

谢人送墨

徂徠老松辞山阿元霜夜捣万杵多丸成浑似悬壁月砚池鼓浪腾风波古来作者难屈指前朝潘生近曹氏嗟君此墨从何得锦囊赠我光生几秋风飒飒透书帷霞牋未拂含淋漓此物宜归青玉案勒文竹石垂无涯太学碑前纪功德燕然峯畔标鸿绩不然台中草谏章直令万里流王泽何来高斋供染毫吟诗独自裁风骚从来所宝慎所用珍重还欲方琼瑶

美人磨镜图

阿娇阶下烧银水瘦玉春慵日晏起梦醒芳情却惘然纖纖手把芙蓉洗璧月光沉鸾影破画眉挿鬓谁为佐欲拟磨成旧樣明照出新愁更无那

鸥捕鱼

芦花丛里风猎猎秋浦波寒人鲜涉双鸥飞下浴澄明饥肠未饱波上行却顾波中探长嘴衔得游鱼出深水几番吞吐恣果腹鱼何苦兮鸥何喜尔鸥尔鸥喜莫亟江边有人施罾弋

倒挂

画栏翠柱春宫晓顾影怜恩异凡鸟绿衣倒舞不曾翻只妬能言秦吉了蝉鬓新梳短梦阑手握香稻添朝餐更呼小凤听分付闲言莫向人前诉

牧牛词题马贲画

老牛角弯环小牛角蜩栗岁初祭耒罢村村驱犊出东坡草半芽西坡草未长草乏牛苦饥牧儿愁惘惘不是爱怜牛南亩功正稠牛肥好耕种黍苗青油油获黍输官租莫漫偿私债官租苟不足还将此牛卖

班婕妤

婕妤辞辇後废处长信宫盖古贞女之流唐人诸作率比之怨女思妇夫忧愁幽思则有之而借问承恩者双蛾几许长又何以云乎

深宫人静秋英馥永巷遥连三十六昭阳丝管风送闻且喜君王欢意足妾居长信犹金门妾

生一日皆君恩君王安乐妾愿毕区区辞辇安足论千秋万岁长如此莫中披香博士言

戏拟禽言

提壶卢提壶卢提壶远向村南沽快哉快哉提壶去来婆饼焦焦婆饼婆去饷孙村路永田中
稻苗新发颖秋成有食好光景尔莫忧婆焦饼

郭公郭公山中树中一朝西北来金风徘徊四顾家室空身寒腹饥叫不止生不如杜鹃死

泥滑滑雨淋漓行不得中夜啼我在枝头犹自可道路难时须忆我

得过且过得过且过有身不愁室家破日头出来枝上坐得过且过

布谷布谷风和日暖春水绿趁时耕作应须速汝莫学富家翁晏起早眠食肥肉

御制乐善堂全集定本卷十八

卷十九

钦定四库全书

御制乐善堂全集定本卷十九

古体诗

古风十三首

尧舜传心学危微十六字禹汤继其传执中与礼义文王躬亹亹不已功常粹唐虞三代初大道中天丽比屋皆可封无烦别义利诗亡春秋作风薄俗亦伪惟时王道衰人人骋私智天生我仲尼金声振洙泗删诗定礼乐尧舜功不啻一自泰山颓弥天布妖彗杨墨逞邪说申韩建私议邹峰乃扬徽奋然辟险詖战国逮嬴秦道蚀斯文坠祖龙轻狂儿辄敢燔典志刘季提三尺儒风岂云炽武帝始求贤董子明正谊三策醇乎醇天人理咸备昌黎称闻道犹未诘其截自汉迄宋初道昏人如醉伟哉无极翁粹然秉道气学不由师传理已臻极致二程实见知主敬标赤帜朱子集其成经天复行地缅维千载心授受本同契絶续通相衍斯文统绪寄午运数恰中自协唐虞治作君兼作师吉士踵相继

东皇运洪鑪发生滋万象卉木争芳菲春和风淡荡入夏气益舒夭乔俱荣长凉飈西北来一吹天地爽洞庭木叶落空林月色朗万物何萧条摧残委草莽惟有岭头松苍颜挺百丈伟哉君子节千载令人仰

巢由避尧舜遯世心自安严光继其踪隐钓富春滩光武曲成之高节难跻攀东汉尚名义廉立懦与顽奸雄且顾忌千古一钓竿

比干既已死後世仰忠诚吾於三代下复得楚屈平諫君君不聽汨罗抱孤贞詎不惜身死未忍楚祀倾今读离骚篇凄然伤我情

中天秋月皎四野秋风生庭梧一叶落陰虫相和鸣鸿鴈横远塞音响一何清蝉嘒忽已寂又催刀尺声物理皆如此随时有枯荣

鍾期既弃世伯牙不鼓琴管鲍贫时交意气称断金豫让报智伯吞炭自成瘡知已有高下友道有古今骨化不能泯千秋同此心

东海有瀛洲僊人居其间安期羡门子九转成金丹自谓得长生飞昇如羽翰伦物苟遗弃孤生亦何欢子房报韩讐倾产不谋家去项而事刘迹如博浪沙功成托导引岂曰栖烟霞全身更全名飘然高风遐高风本血诚莫使毫厘差

濂溪惟爱莲渊明惟爱菊吾於羣卉中特爱渭川竹严冬草木枯依然挺青绿扶疎绕屋栽朔风鸣寒玉直哉君子节所守贞且笃

秦王失其鹿英雄争逐之沛公入关中三章法令施伟哉萧相国策力咸会时鸿门宴诸侯端坐袞冕垂一增不能用勇力徒尔为矧乃恣残暴衆志均乖离用贤兼爱民斯为王道基

煌煌诸葛公大义炳宇宙三分计先定三顾始勉就拒曹挫其锋和吴息战鬪七擒孟获降六出仲达走汉祚竟不振星落莫能救惟公仗忠诚中心思克复虽未跻伊吕犹在萧曹右岂徒仰勲名宫墙辉俎豆

渊明既归田门前种五柳心与世俗隔读书快饮酒惟结山水缘那复恋五斗微意殊可风亮节不挂口同云布层陰密雪降九霄乾坤大地间化为琼与瑶六龙回日御中天光孔昭蔼蔼复融融积素一时消人生秉性良胡为自刻雕理欲战其中复被外诱摇安得如日出陰气无冻胶执中存道心吾闻诸唐尧

苏卿节

羶庐夜嚼天山雪一腔血性犹然热空教泪洒李陵襟独重千秋苏武节秋草萧萧老茂陵幽宫路杳唤难膺持谒荒原痛衷曲节旄落尽如髮秃

侍中衣

侍中衣慎勿浣草中天子识良佐官墓叫罢肉糜残此日何能救饥饿仓皇应悔晨鷄鸣荡陰秋色闇櫓枪正色从君却佳马侍中浩气今如生犹忆知几卫伯玉抚牀惜座伤衷曲

郑公笏

贞观天子能纳谏黏壁封章盈便殿当时贞亮数郑公君臣一德堪歆美十思才上十渐陈仲山补袞抒忠纯只今遗蹟传公笏想像进奏风霜新卓哉牙笏因公贵正直常留浩然气立碑可仆妇可改此笏千秋只姓魏

段太尉笏

饥军蚁杂提霜戈琼林库贮何其多仓皇羸马奉天道宝玦珊瑚可若何封帛梁楣旧相识一时北面非羽翼几事不密乃害成此日司农见本色气似虹霓目似电不击贼身击贼面慨慷一死重太山凜凜秋霜飞白练公笏非石亦非铜一腔血性流其中桑田有改笏不坏即今见笏如见公

侠烈行

侠烈复侠烈血性肠中热能为百折纲不为绕指铁能为易坏齿不为长存舌一身与一剑衆
中推人杰毕命报知己中心差自悦

秦吉了

雕笼绣柱光离离语阑芳意情凄迷空庭新緑围四面家在关山西复西主人怜爱比小凤筵
前艷曲曾三弄等闲不敢学鸡鸣蛟绡只恐惊春梦

藏雪

青女昨夜回鸾车忽遗徧地琼瑶屑朝来爱日正三竿霁景更与寻常别蝶梦初醒扶短筇踏
破瑶京屐齿裂却观秃兀玉山颓更爱长林素蕊缣课童藏雪聊复尔大瓶小盞分行列随圆
掬起古镜冷因方裁破瑑圭坼映日晶英心似冰渴肠未沃寒生舌比之满贮瓮头春自谓此
举犹非拙古香仙露沁诗脾高斋清供天然设何须杂沓争後先霁後晨寒市踪絶

烹雪用前韵

瓷瓯瀹净羞琉璃石铛敲火然松屑明窗有客欲浇书文武火候先分别瓮中採取碧瑶瑛圆
镜分光忽如裂莹彻不减玉壶冰纷零有似琼华缣驻春才入鱼眼起建城名品盘中列雷後
雨前浑脆软小团又惜双鸾坼独有普洱号刚坚清标未足夸雀舌点成一椀金茎露品泉陆
羽应惭拙寒香沃心俗虑蠲蜀笈端研几间设兴来走笔一哦诗韵叶冰霜倍清絶

冬夜闻空钟

空钟者以竹木为之系於鸽尾鸽飞空中则冲风而鸣泠泠然如清夜霜钟信可听也

屋门下垂帘归鸦寒不起朔风户外飘霜天净如洗我时聊复闲吟弄虚斋里何来空钟音唤
醒敲诗耳徘徊云霄中清越难为比乍如焦尾琴调自伯牙指又如寒蝉声咽露晞且美春容
招提烟清冷三峡水耐冷不能翔飞鸣殊未已鵲鸽尔何劳归鸦已安只一劳而一逸为君评
其旨野鸦不受羈动息由於已鵲鸽恋豢养由人而已矣束缚其羽毛玩弄凭童子傍晚放之
飞达旦何能止嗟哉天地间何事不如此

射雉行

麦塍臯月浪花长雉母呼雏翠堤上雏儿?褰才学飞翅弱母心愁惘惘少年初挟燕角弓芳畦
缓步薰风中雏飞不似雉飞疾箭翻绣羽飘腥红归来日暮心中喜不怜老雉伤心死

学僊谣

东东叩齿鸣天鼓希夷内景昇琼户莲台坐婴闭三蛊僊名已入玉清府海尘渐起蓬莱山瀛洲方丈飘渺间淮南鸡犬不易及碧落龙髯那许攀始叹平生空费力家乡欲归归不得

向火

人生贫富殊畏寒情无二暖阁下重帘兽炭罍中炽岂无轻裘暖向火时坐地芳馥水沉销联翩蜡珠坠春融丈室间清供良具备是时万籁收徙倚犹未睡忽闻街市声寒宵风送至劳逸乃尔异伊人亦我类苦耐霜飈冷为覓锥刀利祁寒而怨咨闻之周书纪所幸阳旋复春和归次第贞者元之基成者君之赐况复雪新晴丰年已告瑞

寒月

寒月上窗夜方丙归鸦栖稳松梢影篆烟一炷袅沉檀静坐高斋听漏永年来颇得三余乐妙趣当前默自领何用文牀卧翠衾正是幽人蝶梦醒

过曲涧花香游流杯亭日知阁诸胜

西苑旷且奥肇自明代作琼华万玉堆太液千夫凿平地起蓬瀛城市而林壑松篁几百年参天秀崖?秋深鸿鴈鸣春暖桃李灼肃庙求神仙林亭更开拓方士朝扶鸾虚皇夜飞鹤丞相冠莲花将军赤符缚鸡犬倏已昇殿宇还如昨

盛朝建邦畿旧制因城郭何独废西苑姑亦存其略高居非昔比偶幸行宫若雍正二年夏承

恩开讲幕避暑供游息胜迹频探索湛湛芳草青泼泼游鱼跃葱葱梧桐枝烂烂莲花萼或宴水云榭佳景开芳酌或赋迎薰亭妙句随兴落师友得从容昆弟善笑谑是秋猎塞北奇峯峭天削回思此间山宛似日出爚因缘不复至抚景怀佳约时过玉蜨桥波光含漠漠烟际辨楼台松竹纷筍龠弹指十年间何异风鸣铎前日重来游未能穷其乐遥瞩淑清苑冻岸不可泊今朝好风景迟日中天爚步自瀛台桥踏冰行蹢躅乾芦寻曲径虚殿开金钥穿云洞户深步石川梁迳乃知洞里天自与寻常各冬深景寂寞翠剩琅玕簪闲坐流杯亭更登日知阁会心濠濮间呼朋嗒然噉其北乃假山巉巖何磊砢攀援径絶处深涧戏腾蹕时我径过之我童犹畏却其上挂瀑布结构俨庐霍飞沫杂水流玉牙排斷?其池乃不冻疑有冯夷托当年观鱼亭尘土生珠箔归鞍适然返聊尔何住着我闻山水缘好者不为恶何必买山钱底须蜡芒屨前居水中萍兹游林里雀异日得清暇还教度略约

充隐

小隐隐山林大隐隐朝市如何末世人充隐称君子安车假徵求赂资嘱莫起盛朝有遗贤乃是皇甫氏清流本皎洁咄哉濫於此

秋夜遣兴

春华复秋实来往运橐龠世人於其间忧喜随时作欢赏乐青阳金天叹萧索但知逐境流触处成执着何人能解悬便是希夷乐皎如秋月心大哉天地幕

夜坐

夜坐悠然欣自得地鑪火煖灯花直年来诗兴富冬宵清吟消得铜壶刻朔吹生寒雪洒天窻前梅蘂饶顏色因思劳劳市上人半身僵冻还谋食有时西北来凉飈边陲天末频相忆劳逸忧娱顿尔殊惭愧吾庐独宴息九臯生去不生归【戴九臯以七年出征十年鬻骨而返】前年梦见伤心极天心仁爱应洗兵旋看明年太平贼军营十万壮男儿各各归家勤稼穡

忆远

银烛垂金英夜长人未睡重帘下 稊邈然动遐思边陲万里遥故人勤王事雪花大如拳朔风劲如刺虎帐不禁寒征衣远难寄我辈拥重裘宴然读书次况复岁华近团圞一家萃何当息烽燧凯旋歌饮至遐迩共欢娱仰首望天赐

綠珠

学舞按歌足灵慧翠钿珠落乌云髻筵前击碎紫珊瑚盈盈弱质天教丽倾城未得却倾家石侯东市堪咨嗟高楼一夕恨惆悵玉树朝来惜落花此时楼废无消息野草还作伤心色

题二十一叔父山静日长小景

吾叔乃诗翁裁句清而好近复参画禅颇得画中道高斋长日暇为我濡毫扫即景绘为图笔法特高老一峯插天青波面池亭小峯腰瀑布飞亭畔清流绕更无别粧点写意殊了了我闻诗兼画妙品古来少摩诘真蹟无元镇清风渺吾叔乃升堂况值青年早从知天授奇不凭人力巧嗟我学画法年来曾探讨高山但景仰兴洽林泉杳

鹤媒歌

童子开笼放鹤媒音长翅短清池隈上有野鹤翩然来青莎顾步相徘徊主人喜得新鹤易剪羽还将稻粱餵鹤媒有声不能语长叫寥天韵凄楚但愿闻声鹤莫来却得高飞不笼汝

雉媒歌

平冈草浅雉媒叫游丝飞絮纷斜照野雉归飞带夕晖回视雉媒如相召翻同饮啄不加防上下鼓翅争翱翔雉媒引雉入罗网弋师欢喜媒徜徉呜呼同类且如此机诈相倾殊未已雉媒

欲报稻粱恩莫辞自赴烹调里

冯婕妤

上林虎圈双门开奔熊正对官家来弱支胆敌千夫勇当前直立惊同侪同侪惊上心喜始识
婕妤真爱已得宠不如失宠安惧心才定妬心起君不见呼天谁白中山冤致使人传大内言

神僊曲

飘飏羽佩凌天风云裾娑娑曳彩虹西池阿母烦守宫梦中几过桃花红下视蓬莱尘欲起吹
来铁笛兰烟紫鬱罗萧台空劫中骖鸾谒帝云霄里却去竹山穿石窟泉底今朝葬仙骨

海市

蜃气遥浮沧海东离离晓现蓬莱宫璇题银榜幻空影重楼掩映扶桑红蛟绡骊珠灿光泽市
与麻姑饰瑶席坐令人间眼界新烟云万顷连天碧君不见方士回舟阻风水僊踪大抵皆如
此

觉生寺大钟

洪钟二丈高其围乃数倍隆栋系旋虫含光耀精彩摩挲古质想前朝精镌表里龙蛇高标题
岁月去如海空余钜响振云霄即今犹眩俗人眼那论曾倾万家产道場水月幻庄严此语吾
闻诸内典层楼重建梵王家彷彿诸天散雨花一声击撞狮子吼沙界同音演法华【钟上有
全部法华经文】

题晋戴逵剡山图

山川灵秀称江南伊人小隐为结庵竹篱茅舍颇自适云容水态曾相谳老松落落蟠翠色高
峯矗矗烘朝岚兴来扫笔作长幅故知邱壑性所耽三径虽开人迹絶先生杖策独幽探何须
絶琴夸逸致个中妙趣谁能参

恭瞻万壑松风图感而有作

老松经万年幽壑纷千派蜿蜒扫黛眉虬龙结青盖耳际无余声飒?泛天籁奔腾铁骑驰遥见
卷旗旆神韵动诸天妙意殊堪会大哉造化功金泉创仙界高堂临万壑一泻松风快当年诸
孙行惟我承

恩最

赐居亭畔室虬枝森一带盛夏如秋深日夕静相对谡谡吹衣襟谷神守清泰转瞬成昔游感
企瞻图画

行宫遣兴

春风布始和昭苏百卉萌霭霭景物佳曙鸟相和鸣砌畔抽新草緑意含生生何幸承

恩来南苑薄言行芳郊未合围朝暎映檐楹随境可怡悦吾谁与系情欲开有山桃未语彼黄
莺借问造化者何复殊枯荣

雨中舟归

夕阳西下春云布霏霏细雨迷蹊路中流双桨荡归舟十里横烟暗村树岸柳冥蒙待暮鸦寥
天低黯催孤鹭咫尺玻璃太液池幻作寒江烟雨渡

放鲤

修鲤扬朱鬣双双卧筠篮失波受困缚吐沫心难堪有人持赠我将以佐旨甘剧怜苦涸辙犹
可潜深潭春风漾水纹新藻緑毵毵拨刺彼游鱼各各生意含呼童?鲤至放之小池南赴波渐
旋泳倏逝如脱衔我非好清况不为口腹馋今春放双鲤明春百倍添寄语饕餮者放生乃大
贪

舟行

御湖三月春水生微风不动玻璃平楼台咫尺方壶耸杨柳千条烟霭横兰舟容与荡双桨飘
飏浑似坐玉京绯桃緑李夹两岸綰绮错绣春色并我思去夏泛太液荷香十里疑蓬瀛即今
光景正明媚緑波摇漾鸥鳬轻等是舟行别今昨年华荏苒何须惊

折芳图

乌云兰馥翠未整阿香烧水帘枕静晓寒初试五铢衣庭栏小立胭脂冷笑折芳枝佐玳钿露
凝粉气犹鲜鲜归来徙倚香奁侧胆瓶漫插怜清妍对镜簪花长太息年年不改枝头色

御制乐善堂全集定本卷十九

卷二十

[集部,别集类,清代,御制乐善堂全集定本]

钦定四库全书

御制乐善堂全集定本卷二十

古体诗

夜雨斋中焚香

虚斋坐清夜斗室如方丈容膝且自安忘机心宇旷忽惊洒窗雨因风送微响唤醒吟诗耳焚香助清赏细细沉檀烟篆丝裊直上帘垂避轻寒静听閤万象更深香影残梦与蝴蝶往此中乐趣多户外非所想

雨中闻鴈

萧萧夜雨飘风鸣新寒料峭着体轻空中鸿鴈三两横音彻虚斋凄以清上苑景物争明媚倏尔变作三秋声芦荻苍茫漫含思潇湘烟雨空复情沙暖鸳鸯远浦净明朝从看春光荣

种松

园中足桃李锦绣争春容一朝朔风撼寂寞芳条空欲储岁寒景当春乃种松抽枝始落落含气方蒙蒙风雨小亭侧乍见出窟龙漫言少丰韵莫嗤乏丹红君子苟相顾劲节在三冬

暮春曲

暖云晴日烘春老残红埋迳消芳早绿杨十里暗朝烟得得催晨莺语巧荏苒风光已似奔轻寒料峭金猊温抽毫为写留春句时向窗前惜晓暝天津暖涨明如镜指日应看芰荷盛

西海捕鱼

平湖荡漾春波长万顷玻璃暎日朗唼浪修鳞水面游争驾扁舟荡双桨渔人那晓生意多不舍鯢鲙尽收网网罟纷絶流时作求鱼想嗤彼贪利人吾宁号清赏劝君解网放羣鱼篙撑绿水中流响花片飞香几处漂宿鸥眠起冲云上刺刺新蒲欲出波远?烟光含莽苍乐哉此游逸兴多鱣鲟洋洋任触榜残照西山返棹归别舟笑我成空往

采芝词自题照

何来潇洒清都客逍遥为爱云烟碧筠篮满贮仙岩芝芒鞋不踏尘寰迹人世蓬莱镜里天霞巾彷彿南华仙谁识当年真面貌图入生绡属偶然

缚鸡行

缚鸡莫缚牝留以蕃孳生缚鸡莫缚牡留报长短更牝牡皆有用金鼎将谁烹君看羣雏长颇足供馘羹口腹恣饕餮所欲难满盈何如留有余长以佐生成

春蚕食叶声

吴天三月春光荡吴蚕三眠蚕更长陌上新桑叶叶抽晴窗镇日风雨响唤起深闺未画眉携筐急就饲朝饥流水潺潺箔间落爽籁瑟瑟帘前吹日长莫厌耳根闹蚕饱丝多足相报但愿今年官绢输却免门前租吏到

秧马

清和四月新秧绿一壠分来千壠足桐马平驰碧浪轻鬃鬣森森稻苗束北人使马南人船两蹄踏破横塘烟畦东畦西来往速插罢侬家几顷田戟戟青针波欲没载驱终日何曾歇草壁高悬睡老农好与吴牛同喘月

闻蛙

竹影摇夕凉清光入窗牖霜簟含风漪文室周旋久抱枝蝉噪寂蛙鼓羣如吼昆虫各任时日月双丸走一径绕溪行丛苇盖数亩千百沸成羣嚼啜不住口我闻雷鸣夏汝蛙功何有徒供小儿辈垂钓出渊薮转眼堕笊簍因鸣受灾咎九夏能几时胡不以默守

五日芒种

南风薰薰麦苗绿稻鍼出水如新浴五日天中节物佳却逢芒种农功促平湖潏潏欲生烟角黍蒲尊杂管弦老农炙背溪田里那得闲从竞渡船暮归偶自街头走买得灵符贴门首但愿神呪沛曼陀指日西成看大有

销夏

销夏凭何事清吟兴欲催心闲日晷永绮思方悠哉天际凉飈动槛外山花开俛看明月上入我户牖来即境自怡悦拈韵无安排何须逐晓凉步履登高台诗成哦几过清夜闲徘徊此乐足销夏非云夸别裁

花石纲

江南花石新编纲舳舻衔尾达汴梁延福五位争工巧地狭更廓皇城墙深壑崭岩极险邃难妨驰突燕山骑徽庙精思百艺能如何独昧经邦智

野田行

驱车古城道寒烟湿秋草欹倒缭墙垣悲风白杨老白杨树下谁家园苔迷碑字棘生门年年墓道无人扫空余麟卧石虎蹲生时富贵夸得意不惜万金营幽隧叨荣已结上公仪殊恩更赐东园器熏人势焰今安在百年事业归桑海老松秃兀祇余根子孙鬪倒旁人买

姑息行

君不见明皇开边用边将禄山秉钺临牙帐又不见代宗无智用承璀三郡河北幕府开子嗣弟及殊未已自此朝廷事端起德宗为政事姑息封拜无能振披靡琼林大盈膳库新泾原兵至玉石焚由来悖入亦悖出坐看宫阙生埃尘呜呼姑息真无济令人却忆贞观世

夜卧聽雨忆平郡王

朱明届候天方永如烘暑气焦尘境座间挥扇手欲疲林下乘风吹不冷今朝一雨洗烦囂入夜蒙蒙万缘静杨柳陰中罢暮蝉梧桐枝上收清影时有匡牀高卧人一杯芳润浇苦茗夜凉霜簟好安眠芭蕉响滴残梦醒醒後悠悠动远思思在龙堆连雪岭如心居士在军营年来王事劳驰骋即此清凉夜雨秋行帐残灯悬耿耿天心仁爱当偃师坐看絕塞狼烟靖百万健儿归故乡净洗兵戈只俄顷犹忆去年烟雨中绿簑共泛沧波艇清宵蝶梦亦偶然人生何必叹浮梗借有好风吹送诗知君应在三秋领

伐枣歌

老翁持斧林中过伐取供人轮与轳我游枣林惜生意谓翁计拙如之何轮菌枝茂叶婆娑结实应比寻常多年年秋成但卖枣管足早餐与晚醪何忍急取目前利坐令大树投斧柯老翁揖谢言难采低价还愁人不买纵令留树计久长只今枵腹谁能待

郭河阳关山积雪图

层峦积翠数千里磴道盘空连玉垒铃驮风霜得得行长途跋涉间关里世人驰利未肯休风卷红尘扑马头河阳一幅炎凉景不徒妙笔夸风流

探雀儿

小雀出卵才数日老雀将雏雏六七儿童缚木作高梯巡檐探得雏儿出雏儿无知不忆母老雀殷勤抱辛苦翮翻羽翼未长成嗟汝何时离哺乳

拂子

驱蝇拂子绦丝缕垂如何有用物壁间闲置之高堂珠箔围四面冰盘清暑神安怡座中恍似蓬莱岛苍蝇卻避将安施亦如太平羣蠹息海宇不用驱除为我愿拂长如此莫资谈柄频频挥

丰碑行

夕阳返照辉道周驱车古路西风秋路旁丰碑何其稠森森插笏盘龙虬谁能细考姓氏留但闻土民说所由明代貂璫威福擅司礼还兼御马圈秉笔曾标封事题内操更教昆明战没後养子不扫坟羣埋此地多无算当时威焰剧熏人只今草掩流萤乱我闻此语识兴亡秦汉唐宋皆殷监私昵何曾念履霜窃权顿令愁飞霰勒石犹夸爵里高千年青史谁能逃辛勤汗马创业劳大半抛掷由若曹

遣兴

数日忽成月数月忽成年年月何曾异秋枯复春妍而人於其中胡为感变迁浩浩东海水旧时为桑田清风拂我面明月照我前馥郁芰荷香澹荡杨柳烟即境自怡悦饥餐困便眠

薰风送兰香清芬透纱牖烈烈夏日炎谁能户外走霜簟含清润北窗高卧久心如止水澄物来随所受漫云苦烦歔静观暑何有

日昨策轻舆适从街市过见彼逐利者流汗肩相摩岂不畏炎器辛苦出无那归来竹窗下月影含松萝回念市人尘境甘消磨九夏尚如此三冬当若何

轻舟泛晚湖一棹烟波绿荷芰袈衣香鵲鵲傍人浴天地一画图俯仰供清瞩何必蓬莱洲云霞覓仙躅黄昏蛙鼓鸣还似云山曲

我闻古人语诗以道性情题韵随手拈易如翻手成乃有追琢者格律严为程槌字苦幽澁结响务鏗鏗情性转拘迫未得天趣并广厦避烦暑心闲尘境清即事摅别裁得句还独赓譬彼苍松枝风来自在鸣

燕引雏

营巢屋梁头抱卵雏儿长捕虫饲其饥双燕心悵快羣雏长大巢居难褊弱翅凌风单引飞庭院愁欲堕愿借已力为羽翰嗟汝老燕胡不悟谩教飞来又飞去羽翼成时会远扬可似乌鸦能反哺

食莲

平湖参错芙蓉紫看罢莲花食莲子轻舟棹入碧洲湾犹有新红才出水出水新红未吐花晚风轻度香云霞几回流赏冷衣袂蚤秋消息知非谗笑对冰盘珠玉净清芬恰与幽怀称莫教入口嫌苦心从识生成有本性

拟古七首

离离山头花青青墙上草夭夭松下桃茕茕阪田稻雨露苟不及指日成枯槁空谷有佳人幽闲而静好忆昔出门时蛾眉未曾扫日夕侍舅姑小心奉栗枣夫君久不见出身事君早只恋洛阳花不返洛阳道日暮掩柴扉脉脉空房老

露蝉挂高树声入西北楼晚景可怜生伤心楼上头罗衣掩秋扇风度寒飕飕伊人天一方远戍并凉州家居有如此冰雪况迟留深悔失斟酌却令覓封侯

织成鸳鸯锦裁成鸳鸯被鸳鸯本同心同生亦同死嗟哉末世人其心不如此朝爱芳草青暮怜野花紫野花得意时芳草正委靡

堂堂复堂堂羲和何奔忙三日不见君见君髮半苍五日别故人故人天一方世事如飘蓬聚散那有常中庭罗酒浆烹豚剖肥羊满酌金屈卮笙箫奏两旁劝君且饮酒莫负好时光

天地一逆旅光陰乃过客如何百年中更促驹过隙劳劳长安道役役洛阳陌车马争春风管弦拥上席但见庭中花那见路旁柏柏树日以老落叶无人扫朝夕牧儿来抛砖击神道

冬至羣芳歇松柏乃青青衆人赏後凋松柏转伤情伤情亦何为见赏岁寒时岁寒不可回良材将安施不如同枯槁免使独树奇君子苟相顾莫信桃李姿

玉?横长夜斗柄向西指寒风拂象牀爽气生兰帟美人伤独处拜月更衣起去年月圆时良人同妾视今年月满时出门求金紫金紫亦难求得之何足喜不如早言归与君长共此

马贲牧牛图

平川苜蓿含烟緑牧童羣集云山曲乌犍远放晚风凉偷闲笑语相徵逐但愿禾稼如云收足供租赋免卖牛安得太守如龚遂腰间乐劝解吴鉤夕阳在山寻归路烟气蒙蒙暗林树河中一幅景物繁监门图绘意略具

中枢歌

秉钺托干城坐谋称媼相奏对百官前供奉金华上谏词饰进报功勲中枢威焰天下闻健儿自卫弱攻战董兵权重唐监军呜呼徽宗犹不悟自恃可用唯宦?草窃虽平内寺横坐令宋室成南渡

青青水中蒲三首

青青水中蒲如剑森池沼下有双鸳鸯同生亦同老青青水中蒲间以芙蓉花自问无颜色相对重咨嗟青青水中蒲忽萎秋风里终始不离波嗟君不似此

鴈奴谣

临秋霜信排空书雌雄一失为衆奴飞随天际不敢後为恐羣鴈相招呼芦荻萧萧白花亚成羣分偶眠秋夜寄语弯弓美少年当时何不连双射

丹青树

终南有佳树其名曰丹青孤干挺百尺上结车盖形青赤叶相间望若锦绣明崔黄好手笔一一画难成抽条应春和呈祥藉地灵鸟雀不敢巢映日独葱菁梁栋未试用徒传奇树名不如松杉质犹足架轩楹良材苟终弃空劳造化生

度竹钟声

月窗清映檀栾影细吟轻籁孤梢静萧疎透响送霜钟招提何处山僧醒韵杂琅玕度绮寮点滴寒更发深省玉露频敲淅沥微断续如传青箬冷今宵参破耳根禅乍回残梦清怀永

古别离

古别离天上牵牛织女星一年一见徒含悲银河清浅欲度难何况白槐亏蔽之人间有怨妇七夕夜半呜呜啼空抱心事不得诉仰窥双星欲寄词鹊桥岁一驾犹有交会期那似良人戍陇上生去未必生还归

唐寅秋林高士图

寒溪引入仙乡深一川风景含秋林霞衣云帔结知心徘徊称意羞华簪或浮轻舫或卧岑把钓芦?垂丝沈有来童子斜抱琴高山流水弹清音拏空松柏虬龙吟白鸥为伴浮碧浔商山遗迹复见今箴箴晚籁寒窗侵生绡一幅重南金唐君妙笔何森森乘槎他日拟追寻只今卧游潇湘涤烦襟

新月

七月哉生明露坐寥天濶碧梧影渐稀清映蛾眉月古镜吐微芒银钩光出没况当早秋夕素娥逾皎洁对此新光流逸想随时发盈亏始何年照耀无休歇古来对月人胡为流波忽际兹玉轮生胷怀正清越无须秉烛游何用上探窟对月不畅吟转瞬三五阙

七夕词

孤桐泣露阑干湿绦河迢递离怀急双星契濶动经年宝婺生尘掩云笈欢娱却被离恨牵天
鷄唤曙良宵残谁家弱妇高楼上何处金针玉指穿弱妇穿鍼羣乞巧那知个里光陰老万里
远戍祁连城十年不返长安道长安月夜临风叹空羡双星渡银汉龙輶旋轡鹊桥收天上人
间肠共断

弋鴈篇

三秋月如水风杂喧菰蒲羣鴈自北至飞飞集平湖稳向沙汀宿梦与秋波俱谁与弋鴈者巧
计突泽虞潜身苇?侧持灯照鴈奴鴈奴嗷嗷叫羣鴈惊眠初避射各分飞旋顾矰缴无无端回
幽梦共疾鴈奴诬喙啄更爪击忍辱声呜呜雌?各安眠孤身痛始苏弋者还复来嚙口不敢呼
随意恣弋取满载寻归途我闻传此事把笔长嗟吁嗟吁意何为覽古兴怀紆谏官君耳目谗
者百计图一朝诛斥尽旋亦亡其躯干刳周代殷员沈越灭吴自闭其耳目古今嗤至愚呜呼
兴亡事视此竟何殊

见桃下栽松感而有作

园中种树羣芳滋几年荣长纷葳蕤或列山侧或傍池同蒙雨露争参差阿谁位置失其宜山
桃下植青松枝蜿蜒未放拏空奇甘为蓊蔽嗟何辞春日抽条綠叶彼势高独占阳和私葱茏
待到岁寒迟吁哉已过煦妪时我欲借问场圃师种植颠倒意何为青松磊落龙凤仪山桃弱
质人所嗤胡居松上茂?垂因循坐令虬枝萎自古抡材还若兹坐对感慨抒幽思安得橐驼妙
手移或弃山桃付芟夷良材俾沐三春曦他年梁栋诚堪期

饥鹤行

松陰顾步霜翎拂徘徊本是山林物秋澄镜浦鱼深潜饥肠独立金风疾云间万里青田遥双
翅新剪难冲霄主人稻粱恩未报仰喉长空天沆寥

羽林执戟郎

香衢走马雄风生蹴鞠場开连夹城朝游玉圻春如画夜醉青楼酒似澠青楼留宿金貂脱
却一生花底活野老吞声哭忍饥儿今执戟黄金阙

御制乐善堂全集定本卷二十

卷二十一

钦定四库全书

御制乐善堂全集定本卷二十一

古体诗

题刘松年武夷九曲图忆闻之蔡先生

武夷层巘岚烟碧水墅山村变朝夕桃源祇许一舟通就中疑有神仙迹闻之先生八闽客为余曾说山川僻当时兴寄玉笋峰嗟吁道阻未寻屐钱唐笔墨超凡格半幅霜绡图咫尺题诗九曲足卧游还似书窗话畴昔

少年行

邯郸美少年平生好仗义白日佩剑出里门一声叱咤千人避舍身只为意气投生憎富贵夸交游为君复讐望君报千杯一醉酒家楼

雨

夜窗响芭蕉晓荷亚洲渚谁知梦觉中一枕新秋雨牀头蜡屐闲起走绕廊柱葛衫不禁风微凉添几许

同五弟月夜舟归

湖波潋灩当秋澄一轮寒浸秋月明上下清光星斗灿轻舠打桨中流行万籁閤寂天在水芦苇点点飞流萤长空沆寥堪妙会鴈行拈韵欣同赓诗成泊岸松窗卧还聽沿阶蟋蟀鸣

远将归

欲别恨时促将归恨日长庭前繫马双垂杨为君再整罗衣裳去时路即归来路别後新欢应胜故记得曾攀弱柳枝即今潇洒成枯树今宵梦不到天涯垂垂银烛初成花欲诉离愁犹未了一声鸡唤东方晓

城门歌

城门闭兮言路开羣惊铁骑燕山来城门开兮言路闭处堂燕雀欣得计同盟已悞复和亲坐令汴水成灰尘小舟黎阳渡五日却笑南朝无一人君不见当时首祸由童贯才见边烽先鼠

甯

废宅行

蛛丝密织珊瑚箔铜扉双敞堪罗雀花开寒砌为谁妍鸟啄风筝珠玉落当年甲第禁人窥此
日尘生秘阁帷寮垣欹倒村童入折取庭前丹桂枝老翁惊视伤衷曲忆种茆檐领芳馥薰人
势焰强移栽曾拆依家数间屋

蓼花风

秋潭彻底清岸蓼红低映西风水面来娉婷舞腰竞苍茫芦苇花寂寞菱荷柄日落晚烟横韵
写寒芳淨

有所思

置酒高堂上聽歌有所思所思在何处迢递天之涯有惠双南金不如心相知南金用有尽相
知无已时眇彼中庭树忽生连理枝连理非为贵所贵不相离同心而契濶咄哉徒含悲

月夜芦洲

似雪芦花满洲渚摇曳西风夜深语唤回清梦水亭幽秋色秋声迷处所清光潋潋月在江隐
映渔舟过寒浦

云台歌

紫气欲夺炎天赤南阳布衣提三尺昆阳一战扫豺烽洛中布治敷天泽攀龙附凤为侯王二
十八将名煌煌中兴功烈资赞襄云台图貌千秋扬君不见淮陰蒞醢英彭死子房从游赤松
子何似荣名保始终卓哉君臣能济美

除架

白露零场圃瑟瑟西风寒可怜含甲蔬生意忽摧残垂架青青叶引蔓已半乾呼僮为除治萧
然景物阑犹喜远山翠乍入踈窻观无须感代谢漫愁乏盘餐冷畦旋种韭会当凌霜攢

秋原草

迷离铺翠露珠湿村郊寒飈西风急锦蹊绣阪忆春游秋光满目扶筇立霜林叶落叠殷红犹
疑紫艷堆芳丛寒雀成羣噪新霁平原晚景烟蒙蒙

渔舟唱晚

蒹葭战夕风明霞入澄水罢钓荡渔舟欸乃波面起云山列远屏坐卧镜光里孤篷挂玉钩
浊醪宴妻子短笛咽凉颼诨解调宫徵秋来景寂寥渔乐独无比

秋浦泛舟

西风拂水烟波绿櫂过寒溪三四曲采采蒹葭颼白花临流惊起双鸥浴双鸥忽入芰荷丛
可怜寂寞余残红锦帆画舫披薰风犹忆竞渡夸天中转眼秋湖明似镜云山倒影澄波静岸柳
寥萧咽晚蝉舫舟月挂孤篷正

高其佩指头画鱼

玻璃几顷孤烟横修鳞数尾不辨名晴光荡漾耀金碧泳游波面依浮萍谁知潇洒濠梁兴
付与一指传其生挂壁沧浪秋意渺彷彿当年在藻情

有初行

君不见晋武曾焚雉头裘平吴还驾羊车游又不见明皇珠玉焚前殿太真宠盛长夜宴人心
靡不有其初几见历久常不渝当时焚宝博虚誉谁知欲炽翻焚躯汉文却马轻千里崇尚节
俭辉青史不闻号令付炎官祇觉中心淡如水

八月三日作

金乌才西下归鸟集疎林乍见中秋月弄影清池深徘徊倚石栏闲望抒清吟却忆去年秋今
夕送知音【癸丑年八月三日平郡王奉命西征】边陲渺天末飒沓霜风侵抚景怀契濶踟
躇思不禁南仲方出车颺利未生擒月明人尽望壮士秋思沉我方宴卧余风景聊追寻夜深
蛩语咽凉露湿衣襟

仲秋曲

银壶滴滴更漏长疎梧月影含秋光梦回幽枕蛩响切晓看残荷露气凉蓼花翻风亚洲渚惊
起宾鸿飞别浦一声孤唳碧天高二十四弦调玉柱

夜闻觉生寺钟

纱牖度凉颼桐枝弄疎影睡鸭篆纹消一榻深宵冷忽闻野寺钟十里传音永不知十方界谁
欵发深省

桑条韦

桑条韦继斌媚娘一朝封剑斩五王後车仍蹈前车辙可怜唐室多专房本为相怜更相倚谁知禍在椒房里神龙燄饼不可言总为龙裘欲加已呜呼开创事亦难太宗图治颇英贤惜哉家法未尽美致令女禍相连绵

游西海

轻舸荡入蒹葭丛波澄西海连长空云山倒影弄明媚寂寞残荷摇晚红萧斋习静过三伏今日扁舟晚景逐烟汀沙渚转苍茫却忆薰风吹岸绿

南苑雨中即景

萧萧绿槐枝彻夜滴疎响檐头唤晓频野雀三与两闲从阁道行金风透飒爽含润草犹芊凌寒菊初放墙外马声嘶悠然动遐想

双柳树

双双高柳拂长空繁枝低亚相青葱不知植此者谁氏秋来疎叶凌西风露浥平原猎骑出得意谁知消岁月南苑徘徊双鸟飞烟柳萧条仅存一漫言草木本无情可怜独树伤无朋寒郊彷彿灵和殿月上空余子影明

海子外行围

朝雾歛秋空遥天白如水猎骑出郭门寒郊行迢迢箭逐双雕飞鹰伺羣雉起相逢倚杖翁农话斜阳里悠扬墟里烟淡挂疎林紫归鞍拂晚风猎罢心犹喜

鹰搏兔

风吹衰草寒飕飕苍鹰在臂凝霜眸瞥然狡兔走平畴三窟已失空含愁高盘云翮孤星流厉爪下击势更遒怒气一奋谁能收嗟彼韩卢有技徒增羞呜呼汝鹰性匪柔却邀富室千金求古来英鸷半埋没凡雀嘈沓何其稠

南红门捕鱼

烟蓼亚寒汀澄波漾秋浦垂纶玉镜明潜鳞堪指数萧然秋意深数声离岸櫓渔笛横西风云山入新谱

寄衣曲

夜凉漏永声冬冬征衣自裁还自缝素丝牵恨纷难理银缸照泪阑干红香闺无那秋萧索频忆龙堆朔风作及时遥寄御君寒只恐到迟君不着

瀚海石子歌

昔闻瀚海石子奇今日几席得玩之瀚海渺在天之涯草不抽茎树鲜枝春光罕照秋风悲长年那得雨露滋其中产石羌谁为嗟彼从军戍边陲更过万里无归期故人天末相赠贻开匣忽覩光离离远寄用表长相思红如珊瑚碧琉璃硬黄深青各有差大如鸡卵未剖时小如钗上纷珠玑亦有奇峰异壑姿天然那事追琢施感君赠我置芸帷长日静对心神怡高歌消得梧月移吁嗟故人知不知

濬沼

圆池寛数亩秋水涵清虚植以芰荷花畜以文锦鱼岁月既云久其下积泥淤泼刺碍游鳞相忘忆江湖物亦含其生与人岂异趋一朝深濬之爰为安其居快哉玉镜中潜跃随所如何殊濠濮上抚景襟怀舒

题唐岱秋山不老手卷

唐生胸中有庐霍为余一写秋山状毫端气韵擅萧疎?壑纵横出心匠远峰螺髻翠欲滴飞龙直下喷银浪招提想像晚钟鸣森列松杉作屏障我闻山水贵可居卧游亦足娱清旷展对萧斋秋意深拂拂金风侵几上

赋得霜花扑晓鞞

山路散晨光行人残梦醒欵段嘶寒风落月挂斜影空林霏素霜万壑朝岚静爱日晃征鞍点滴留清冷仿佛踏春游花落余残景

题李思训寒江待渡图

轻岚淡抹西风肃征人趋晓纷驰逐哑哑羣雀噪渡头渔舟犹伴残灯宿千林红叶正凋残欲落未落古月寒劳劳名利何时歇一幅寥萧几上看

风篁笙奏

明窗爱日多几案光生暖檻外竹千竿翠影欣疎散何来笙簧韵寥寥风送远繁节乍敲铿低拍殊幽缓清如啸遇孙胜比咸拨阮漫云耳根聒天籁三千满

雀噪

东方欲生明纖月西南落平林曙景通哑哑鸣寒雀霜风断续吹繁音转高阁似话五更寒如语栖枝乐萧晨入聽幽明窻兴堪托爱日已三竿暖影侵帷幕快哉黄棉袄人鸟同时着

冬夜对月书怀

乌鹊栖稳人行少弗弗霜风窻外扫曲屏银烛含幽光独爱侵帷玉蟾皎地鑪然炭暖气徐俯仰丈室慚温饱此时緬想饥寒人茅屋欷歔愁未了境遇由来不可齐消怀聊把陈篇考忽聽霜钟送林杪疎棂影度梅香悄喜对清光延伫吟残更欲尽鸡啼晓

游法海寺即景

纖月挂空林曙鸦带寒影匹马冲霜风为访招提境村墟散炊烟回首眄斜岭扶桑耀朝晖寒谷添晴景我行已觉疲禅僧坐方静稍然石竈烟为我烹苦茗寻古断碑存探幽石径永谁能问法源暂可息浮梗帝京佳气多烟火笼万井却供眺远阁一览余清省【寺有眺远阁晴明望帝京如咫尺】

法海寺题壁

百年兰若云封户山僧静坐絶往还我来杖策寻幽胜啾啾山鸟鸣空山欲落未落枫叶赤乍断乍续秋云闲烟萝石径归路杳孤月已上临禅关

冬夜读韦诗

焚香对银檠夜静见明月迟迟玉漏寒万籟此时歇苏州五字诗披览逸兴发园客事独茧格调殊清越七窍总不凿安排活泼泼终卷不能释玉绳横未斡

蜡珠謡

香篝断续兰烟吐月窻细把长更数银檠明灭诗思迟一天霜影帘垂户谁敲仙掌铿锵鸣犹疑满斛珠玑倾却教吟兴娱清夜窻外寒賸緑玉声

村赛曲

老巫伐鼓声冬冬冬醅初熟霜柑红合家罗拜致?恭村村乐事传幽风黍稌堆西稻堆东仓箱万亿快年丰谢神默佑恩何穷赛罢福酒先酬翁老巫牵羊别家去来年大有神应助

霜晓炊烟

村墟寒曙晖霜重乌啼少微辨炊烟横旋向疎林绕缕缕披风寒依依散晴晓晨粥想已成曳

篆丝渐小长祝茅檐里欢然温且饱

嗇夫词

上林虎圈当晨开六龙飞骑官家来苑尉小臣乏口给谍谍独显嗇夫才霸陵汉帝称仁厚特地褒嘉颁墨绶若非采取释之言坐令佞者羣奔走君不见正色立朝周大夫廷议期期不出口

鹤氅裘

翩翩鹤氅如披银望之直是仙中人可怜落魄篱边者中心歆羨良艰屯君不见仙人不住人间世瀛洲方丈谁能济长安比户豪富家朝坐华堂暮空第吁嗟仙人不若此岂如垂钓披裘学严子

草色

勾芒鼓吹招摇东羲和御日骑苍龙暖云晴旭当天烘皇州十里辉春融女夷小试龙梭慢春信迟迟归别院繁红犹未上琼枝嫩黄乍觉铺芳甸光风转蕙物昭苏暗报阳和日日殊轻寒料峭天街晓试辨茸茸色有无

萍始生

泼刺游鳞才上水嫩萍拖翠春流始牵风摇漾縠纹轻试诘生生忘所以绿发新梳湿未乾半含清润凌波寒谁家一匹冰纨素忽织参差藻无数

石径松云

石涧盘纒云掩门长松落落擎云根虬枝飒沓泛清籁幽胜不数桃花源绿阴掩映苍苔翠仙家孤鹤偷闲睡醒来云气忽满身疑是丹炉烟绕翅

渔庄晚霁

夕阳天外明远浦归飏疾吴童盼阿依独倚柴门日晚烟漾澄流渔庄足萧瑟何来欸乃曲忽自丛芦出霁影射波红晒网棹皮室共拟金波上数杯醉椰蜜

野寺残阳

斜日照林低野寺钟鱼静亭亭塔影孤川风淡晚景片云出岫间余霞横抹岭谁欵牛背人归路歌声永暮色远苍茫金波忽流影山僧独趺跏炷香观平等

野店风帘

杏花村里春光好人家隐映回峦抱招得游人策蹇来一尺青帘挂林表轻风摇曳高复低斜拂垂杨绿未齐晓烟霏溶溶月夕簌低徊淡淡溪东皇鼓物标青帜临风无限悠扬意韶华撩眼兴陶然不缘野店新醪醉

过觉生禅房

十里轻阴路便觉非尘境缓辔到招提飒然松风静禅房花木香小憩耽清景上人息万缘跏趺坐观平等徘徊石径纡徙倚松轩永且吃赵州茶莫问云门饼归骑漫教催余霞亘西岭

御制乐善堂全集定本卷二十一

卷二十二

钦定四库全书

御制乐善堂全集定本卷二十二

古体诗

熏香谣

宝鸭昂头绿云吐湘帘几扇垂当户广座风生六月凉水沉一片熏炉炷熏炉几清无埃芝
印欲就光徘徊谁家才子红兰署何处佳人玉镜台篆丝细袅香烟散万境都来参鼻观主人
日午正高眠梦中留得残香伴

渔乡曝网

残阳西落射柴扉渔翁荡桨前溪归归来枯柳扁舟繫长竿曝网溪风微风吹网眼千珠落网
得鱼归儿共索老翁不与意非慳换取青钱供晚酌江乡有酒更有鱼一家长享丰年乐丰年
乐雨後明霞抹林脚

松陰午憇

长松夏亦寒嘉?如张盖白石堪坐卧清泉流一派有时微风起瑟瑟泛虚籁繫余闲步履小憇
松陰内枕簟延清芬涛声凉可爱徙倚林泉间兴寄云霞外

温泉荷花

首夏荷叶才田田温泉开花已如然六月池塘荷始盛温泉花谢余青柄温泉水暖荷花早羣
惊艷质凌波好那知消长不须时九夏未半先枯槁我欲乘兴弄扁舟兼葭青青压?头可怜荷
花转不若已作一段横塘秋

闻鸡起舞曲

闻鸡鸣中夜舞英雄志气冲天宇闻鸡鸣舞且歌功业未就可若何古来壮士多消磨待旦不
寐空枕戈君不见士雅击楫意慷慨越石清啸胡兵退当年事蹟略相同恨不功成青史载

题林朝锴苍松霜隼图

长松落落擎龙虬下睨清浅之碧流何来霜隼脱羈鞬高枝独立态转遒搏风羽翮横九秋电

光闪闪辉双眸挂壁直使燕雀愁衔泥怯上雕梁头君不见将军臂上轩勇气饥饱由来受人制又不见王孙爱汝雪毛奇高飞不得遭缚繫岂如幻化生绡里厉爪秋空攫飞雉五方小儿漫张罗因风直欲凌云起

六月十四日闻蛩

今年秋信早六月蛩已鸣月檻纳凉天籁寂唧唧忽作三两声主人哦句绕径行砌旁幽韵如共赓几度振羽音逾亮转动经年离别情仰看疎梧魄影明银河如练碧落横葛衾生寒罗幕静秋声秋色今宵并

卧月

新月挂玉钩露下空庭湿高悬緑湘帘尽放清光入桃笙漪翠浪桐风来习习独卧看流萤千点星光集

题赵文敏中峰怀浄土诗画卷

了得心如幻西天即东土多少念佛人覓佛在言语妙哉松雪翁笔意脱凡腐借问是佛非灯笼答露柱

陌上桑

离离陌上桑桑叶初染緑郎在姑苏城妾在大堤曲相隔迢迢如万里大堤秋冷芙蓉紫风光春去复秋来可怜郎心不可恃郎心风中烛妾志水中石愿作白马逐君行天宇寥寥覓无迹

封鮓行

曾闻陆氏子怀橘饷其亲又闻陶氏母封鮓谨持身怀橘可云孝封鮓可云仁儿岂无母遗官物非济贫卓哉陶士行其後为显臣运甓久习劳分陰常所珍教子以义方湛氏真其伦

疾风劲草

金风飒沓至羣卉皆委靡岂无芳华姿时过不堪恃矫矫彼劲草特立秋原里枝叶已萧条坚心犹未死回顾羣卉悲非甘衆所奇春和苟回煦愿共芳菲时

七夕篇

白月皎皎欲上弦西风送爽侵帷筵秋声秋色相婉变抚景策杖庭梧前迢遥碧落横银汉此夕双星得相见脉脉盈盈一水间经年话别情何限桂宫云帐罢龙梭羽盖初严欲渡河天下

人间两无异惟有今宵秋思多秋思绵绵亘今古离愁渺渺迷处所可怜罗幔暗惊秋不比寻常乞巧楼谁家砧杵伤独宿何处边笳泪欲流边笳砧杵断复续恨比蛛丝萦万曲仙人掌上露华寒曝衣楼畔金飏肃天鸡唱曙各东西榆影茫茫路更迷可知此夕双星会便是当年古别离

古风

矗矗山头峰忽为山下道泛泛水中萍倏作原上草何异人间世梦幻频颠倒朱墨分贵贱彭殇齐寿夭万境何萦心潇洒舒怀抱池水淡以深一泓秋月皎

暮出城东门见彼耘田者伛偻畦壠间红日正西下挥汗立片时薰风散平野指日卜西成篝车赛秋社还忧租税重催迫不相假终岁事辛勤农夫获利寡

黄金镂为钿明珠饰为珥袅袅瘦腰肢若不胜罗绮佳人命多蹇嫁与薄情子劝君觅封侯出门求金紫虽去万里遥脉脉甘守此朝游花陌间暮宿青楼里终老迄无成妾身安所恃

有客天一方遗我尺幅书开缄肃起拜如获双明珠还君以空函非缘友道疏相思在衷曲覩缕不能抒明月照高楼上有窈窕人秋风冷蕙带舞?欲生尘肠断望斑骓心灰忆锦鳞叠我鸳鸯被收我芙蓉茵相思隔万里罗帐为谁春

独树少嘉?两树陰扶疎彼此相托藉春风摆叶初茏葱森天宇绿影含绮疏雨露岂有私生理颇自殊忽然萎其一孤立等无徒草木尚如此交情慎莫渝

秋风西北来庭砌凉以清玉魄映踈梧唧唧寒蛩鸣双星在河汉新伤离别情谁家砧杵动良人方远征而我晏然卧凉飏拂画楹残梦回枕簟吟哦月影明

细柳营行

壁垒传呼天子来将军无令门不开介胄不拜识军志棘门灞上真儿戏君不见淮陰多多称益善汉王夜入恣调遣从知持重胜多谋亚夫名望从兹显扫平六国智不浅

折槛行

建章殿上垂龙裘槐里小令面请求愿断佞臣一人头佞臣为谁安昌侯触犯天威攀殿檻抛将血性涂肝胆免冠叩首老将军却令遗直出屯坎严威忽霁回春暄令勿完葺留断痕徒教事後旌忠直何如聽取当时言

寄衣曲

绦河西亘天欲秋声声砧杵杂风流谁家少妇伤离别并剪裁衣明月楼新棉絮罢开香笈手把金针灯下泣旧衣棉少不禁寒新衣棉多线缝澁线缝澁衣寄迟梦中识得龙堆远衣到愁过洹冻时

咏塞上达兰海兰松木笔格

迢遥絶塞隔万里其间乃产海兰松虬枝劲直傲霜雪盘盘偃盖苍翠浓故人戍回言其略悬知风景边壤同开笈更赠我笔格云即此木已所攻视之脉理颇密致内黄外白如两重磨礲光泽全天巧素茎幻出幽兰崇背上题字选名句疑镂玉叶镌青铜吁嗟沙漠所生物何期得伴书斋中韵助挥毫杨柳月秀生觅句梧桐风芸窗宛觉添芬馥研山更似增玲珑感君雅意恣吟玩良材朴斲思无穷

观刈

秋露零场圃金风气萧索百谷已告成呼童庀钱鏹为地只盈亩颇可验耕凿届兹西成候策杖课收获转忆东作时雨阳卜时若入夏秀以实日中驱鸟雀念此终岁勤亦得一朝乐园林喜空明爽气侵帘箔抚景独吟哦允矣兴所托

月夜泛舟

西山斜照秋江暮东林乍涌银蟾露队队归鸦噪树烟一叶扁舟凌晚渡风闪水轮缕缕光波含玉镜如如去长天一色望欲迷点点疎星堪计数髣髴河汉坐乘槎白榆茫茫夹两路秋景寥萧已可人更兼秋月明寒素便卧芦花任所之何须更问归来处

招鹤行

主人招鹤鹤不来云中洒翮空徘徊徘徊有语不得诉一声长唳告鹤媒翁家白石间苍苔林园胜絶无尘埃饮啄更喜稻粱足翱翔无复驾鵩猜淡沲清池供暮浴迷离晓冲烟开絶异华亭怨明月不殊瀛海栖瑶台吁嗟不返胡为哉臞骨自知与世乖主人虽容奴仆恨不如小凤巧语谐珍重深恩从此去烟峤茫茫不知处

秋江曲送梁学士假归省亲

秋江月印秋水明行人弄棹江上行帆指钱塘促离恨来北塞多凄声凄声离恨何时已只为高堂念游子从知计日赋归来绕膝承颜无限喜秋江颭荻芦花故乡风物依然嘉慈亲早慰门间望再谒金门卷绦纱

慕容垂

慕容奇男子低头初入邕马上歌丁零得预陰山猎高繫白鼻騮共醉燕姬家燕山不知处健
马如飞去莫怪王景略封剑用诡计早知未遂时已有虎狼志

放灯曲

中宵弄桨芦荻洲幻成万朵金莲稠凉露涓涓月华白澄波几顷连天碧诗思因秋一快哉放
灯满湖归去来

待月

银河流素寒宵永檐牙挂树疎无影石栏徙倚望金波时有金风送微冷琼楼半开天际红香
熏睡鸭沉烟浓绣屏十二秋无色频聽阶前细语蛩蛩音留客为久立寥空露重衣衫湿

秋日泛舟西海

金飈漾兰渚霞光射明川两?荻芦花中流独放船水气含微冷棹破秋湖烟一派空明景与我
相周旋忆我临薰风轻舫弄清涟弹指九夏过秋水连长天击楫畅吟怀鹭起横塘前

题朱贞女传

卓哉朱氏贤女子柏舟矢志志不徙蔡公独展大手笔质言传记书盈纸窈窕少长相公家笄
年礼聘许适李李未昏姻中道捐女乃恸哭爷前跪儿已命字不可移儿未成妇不可死权衡
生死两涂间儿惟自尽儿心耳江头秋冷水无波市中火煽房不毁贞心幸托蔡公传传存人
亦归蒿里伊余耳闻此事熟几年宛转诗肠里今朝检传作题词题成凛凛秋风起

鹤唳行

长松落落经千岁下有孤鹤石边睡睡醒临风唳一声声中无限幽忧思欲上松梢卧月明可
怜剪却双飞翅主人稻粱岂易餐独步青莎不得意漫夸卫国乘华轩空传瑶岛陪鸾驭争如
野鹤不受羈飞止由心无个事

鸣鴈行

洞庭叶落寒林空雁行断续鸣金风烟波浩渺望无极好共衔芦明月中流黄弱妇起长叹银
河皎皎夜将半可怜鸿鴈尚知归郎似断蓬何处飞

奕

长夜苦无眠银檠灯花落丁东漏声寒风响葳蕤钥消遣凭何物楸枰差可乐布子定规模就

势觊强弱弃取大小间几许费忖度何须分胜负妙理应思索试从奕罢看本来无一着

金笼鹦鹉曲

芙蓉小苑曲栏东綠衣深贮黄金笼春来景色泼眼浓杏花微雨红蒙蒙翠毛丹喙饶佳丽独
傍罌罍剪双翅主家歌舞按凉州每闻入破垂珠泪稻粱饱饮金笼里不如饥饮罌头水

秋日过广通寺

鸣鞭御街过小憩招提境潇洒松竹秋因风弄清影咫尺红尘中便是山林景欲去夕阳西飒
然衣袂冷

西山下故宫曲

萧晨策马西山足岚气才分万峰綠飒沓霜风冷野桥霏微露气摇寒竹野桥寒竹接宫墙何
年帝子黄金堂苔鎖双扉人不见空余寂寞山花香当时綠鬟承欢处燕巢蛇穴迷烟雾金牀
文毯已成尘井栏想像梧桐树华清宫殿絕鸣銮建章万户图中看徘徊追赋前朝事藓篆题
碑字未残

瀛洲亭

木天储羣彦古蹟留芳馨咫尺树石间旧结瀛洲亭清风振瑶席花影落阶庭渺茫弱水遥荒
唐白玉京谁知通仙籍不隔水盈盈院松四时色天籁万古声成器皆琳琅裁诗或瑶瑛寄语
亭中客莫负登仙名

明窗秋影

秋日上窗窗纸明闲庭梧竹纷纵横扶疎更复含凉簌为我乍作萧骚声霜林败叶如染紫遥
漏螺峰淨初洗引入文疏弄影枝倍添一段秋光美

驄马御史歌

行且止避御史官道开驄马来驄马御史真雄才令行无阻厉风雷五日京兆诚惜哉民拥处
驄马去君不见鈎党禍起玉石焚一时清流羣避路

江臯曲

兰洲潏灩春波綠十里横塘曲复曲欢跨青驄上大堤妾在吴船夜独宿船头恰见冶游郎立
马赠我黄金璫还君金璫君莫恼不作钱塘苏小小

秋日同二十四叔父五弟游玉泉诸名胜即事志兴用爽气澄兰沼秋香动桂林为韵十首

秋光淡空碧萧萧天地朗今日胜游招双桨扁舟放倒影鸿鴈寒澄翠玻璃广残香度荷风飒然襟袖爽轻舸泝遥波荻花苍茫意眼界淡烟光心宇澄秋气便狎鸥鹭羣詎羨笙歌沸旧游境颇谙兹游足清味我闻好事者万里劳攀登咫尺苟会心邱壑咸可凭草枯石岸出霜落溪光澄泊舟古寺边欲觅净名僧渔村互掩映遥瞩凭阑干三秋稻已熟空畦野水寒繁艷萎堤花幽香剩涧兰最喜螺峰青不随时序残层台接曲阿梵宇凌霞晓红舒野蓼花翠点残莲沼川泳而云飞无心适鱼鸟触景乐相忘如游寥廓表萧晨步名园况复值高秋晴旭隔林上天宇岚烟收长空净如洗爽气澄双眸坐看衆木末如登百尺楼西风摇梧竹冷然泛笙簧石梁古月明华池淡冷光已见蒹葭白漫忆荷芰香妙哉嵇中散高怀一啸长云日掩映间遥峰乍清耸霜染槲叶丹临风枝乱动野鹤唳高空忽被闲云拥我亦棹归舟明湖泛瀕洞书帷卷午晴小山赋丛桂衣袂足清凉云山复开霁故知素节佳况是神仙地即景畅襟抱阳乌已西逝凉风起天末落照挂疎林栖鸦噪树杪寒烟湿衣襟胜游那可恋逍遥本无心归来坐明月苍然暮色深

题赵孟頫洗马图

平郊拖迢迢一川寒且泚怪石刺波青槲林红间紫奚官驱天闲尽就明波洗酖顔斜坐鞍奚童任指使计数约百千量材皆駉駉名驹志气殊好境亦知喜或驰若龙飞或静若鸿止并驱争先後滾地烟尘起或牡求其牝或母乳其子亦有独立者昂昂鬃上指骏驰千里遥怒破万军垒我闻李伯时画马夙擅美雪翁传宗派妙意得神髓如游汾汉间似历渥洼里是时金风奏郊外秋蒐始拟欲试金鞭一箭落双雉

御制乐善堂全集定本卷二十二

卷二十三

[集部,别集类,清代,御制乐善堂全集定本]

钦定四库全书

御制乐善堂全集定本卷二十三

今体诗

御赐书经传说彙纂恭纪二十二韵

帝治布寰瀛天心佑永清奉三宏建极得一允居贞礼乐观明备诗书悦性情石渠抡硕彦天禄聚羣英谓是典谟语由来齐治程先朝曾纂辑今日重?明诸子收精粹羣言费品评孔门传伏氏汉代着康成自合抽丝细非如聚讼争紫阳经校定仲默几研精多士承明命儒臣殚惓诚午窻几上列乙夜案头横几岁青藜照逾时全壁呈奎文光有蔚

圣语奥难名非仅筌蹄得将俾天地平惠民符保赤卜相法调?佑起明良盛栽培宅俊宏千秋传治典万国仰躬行喜荷縹緲

赐恩叨雨露荣膺陈明国是往复绎歌赓识浅难窥秘心?等捧盈从知文治化海宇庆同声

暮春喜雨

正是三农望雨时甘霖应候为频施緑添香稻抽初颢红绽名花压故枝泽被园林新似染膏流村落滑如脂黄云会见田畴盛大有人歌击壤诗

恭和

御制三月三日得雨原韵

知时甘雨动春荑润物流膏泽孔皆绿野空蒙生意满平畴霖霖兆情谐丰亨景象占多庆晚晚风光喜更佳自是

天心馨至治嘉祥允慰

一人怀

题十八学士图

风虎云龙自景从画图冠佩盛雍容
侯山无客招王子尽向瀛洲傲赤松

赋得春风传我意

转蕙催?瑞霭纷十分春色占三分
泠泠入律浑难识习习过条静不闻
岸柳待梳青碧缕池波欲绉绮罗纹
吹嘘到处皆生意传我窗前大块文

白鹿洞

李渤结庐後绦帷开紫阳经纶归性命
道德焕文章剖析危微旨从容礼法場
祇今传鹿洞几席有余香

花影

花散清陰傍砌移半疎半密影迟迟
鹄飞空自周三匝鷖羽应难借一枝
轻护锦苔方掩映低临文石更参差
香红竞逞寻常事那比风前月下姿

柳塘送春

惜春无计可稽迟花信更番欲尽时
惟有柳枝低拂处烟丝依旧恋清池

綠柳烟浓度鸟声流光荏苒最关情
年年春事成功後消得长条几送迎

夏云

出岫还成岫从龙更似龙何当化霖雨
沛泽润三农

赋得秋水长天一色

天涵静碧水涵虚本色今朝见太初
决眦空明无下鹄印心澄彻有游鱼
已包物象三千界不数玻璃万顷余
试想沧浪垂钓客一竿相对意如如

水中楼影

清池潏潏映长空蘸影楼台入水红
轩爽龙盘金镜里觚棱凤翥玉壶中
仙翁宅近人难到帝子居遥路未通
眼底景光天外想画图一幅水晶宫

新秋夜雨

西风驱溽暑细雨送微寒洗竹枝逾绿经枫叶未丹乍披襟飒爽不觉夜阑干秋色今多少来朝仔细看

九日

乾清宫侍宴恭纪

绣错仙枝焕彩霞重阳侍宴佩萸华觥分

御笔亲标韵席撤

皇恩别赐瓜一德赓歌仁寿世太和景象

圣人家献诗爵跃追天保宴毕归来日未斜

寒夜闻霜钟

梦醒不成眠钟鸣欲曙天一声清夜气到处警官联绕阙华绅肃趋朝玉佩传披衣更危坐无逸诵终篇

题仙子图

紫芝瑶草满丹山特向高峯取次攀披荔不须霞作帔带萝何用玉为鬟绿华去後留条脱洛浦逢时解佩环行地暂辞鸾鹤驾五铢衣袖接仙班

游玉泉山见秋成志喜

天未风吹溽暑清家家銓艾庆西成宜人爽气山前景载我扁舟画里行田父村头闲共语牧童牛背笑相迎年来屡见三秋稔拟报农祥慰

圣情

恭祝

皇父万寿

太平天子应昌期五十欣逢献寿时华渚波澄虹烂漫瑶光霄烛月琉璃野农芹曝精诚会仙仗衣冠拜舞随正是太和充宇宙春晖照耀万年枝

雍正己酉仲冬阙里

文庙上梁前二日庆云见

上躬诣太学致祭恭纪二十四韵

化洽文明世风登熙皞时车书九有共礼乐万方绥至治乾坤应仁恩草木知崇儒钦往圣重道礼

先师特举

临雍典频行释奠仪宫墙新栋宇殿庑整罍罍【文庙以雍正甲辰年重修】轩爽盘青凤觚棱卧赤螭桷成辉玉碣竑立焕松楣上瑞方呈日卿云恰应期非烟笼紫阁似雾匝丹墀挹藻流光遍悬华曳曜奇鬱蓊承日丽紉缦布天垂文运重离炳嘉祥衆目窥守臣封表进大吏露章随喜气三宫满欢声九陌驰龙墀涣大号

凤诏凜如丝

圣德诚光被

宸衷益慎持命期勤

翠辇卜日展

鸾旗

诣学行殊典弘文答景禧因加登选额【恩旨明年会试加至四百名壬子科乡试十名加一名】用励作新思艺苑薰风普胶庠膏雨滋唐虞风更洽洙泗道逾弥玉烛绵

皇祚金瓯巩

帝基万年绥福履端拱乐无为

留侯

博浪金椎中属车圯桥遁迹得奇书坐谋帷幄追秦鹿立定中原覆楚狙乌喙事成多变诈鸱夷功遂弃簪裾复仇当日因韩出灭项兴刘亦绪余

郭汾阳

朱邸方酬盖世功苍蝇犹惑曙鸡中淮陰須让全身策诸葛应输破敌雄
涓惟闻一老卒宋盟祇用数家僮中孚可信豚鱼格博得朝恩泣令公

己酉冬十一月二十一日

皇父御书立身以至诚为本读书以明理为先一聯恩賜悬挂书斋以寓训海至意恭纪

文明雅化敷重译咫尺

奎章贲玉除妙义直須十四字至言已胜万千书天顏有喜龙鸾动绡案承

恩雨露舒从此就将当益奋敢违提训负居诸

临池柳

皇州春色满夹?柳先知渐吐鵲黄色低临鸭綠池每当韶景丽偏沐好风吹入水分斜影含烟
润细枝波光摇上下带缕漾参差鱼唼疑牵荇莺梭欲织漪絮飞洲点雪花落水添丝灞?空含
雨章台竞逞姿何如上林苑岁岁渥恩滋

行围

春郊萌动沐阳和嫩草新抽翠欲波回首凤城佳气绕林风时送牧童歌

芳圻剪剪草痕生柳浪聽莺莺未鸣猎骑云驰心更愜平原千顷不曾耕

春日雨後海子外行围

雨後观新柳垂丝带玉珠村村生意足处处早春殊马健方堪骋鷹雏未解呼万家烟火里簑
笠快何如绣陌连芳屿韶光十里繁绿深杨柳?红暗杏花村时雨占年稔新晴爱日暄游观回
勒晚残照落柴門

青云店民家见梁上双燕偶兴

春来吴楚方成别社到幽燕又见归掠水塘边相对语采芳帘外故低飞欲寻谢宅迷长巷不
借卢梁爱短扉一任处堂巢自稳等闲竈突事应稀

杨柳风

江南二月丽晴晖杨柳风和乳燕飞堤上马嘶芳草去湖中帆带夕阳归柔条漫着游人眼弱

线频牵过客衣待到清明寒食後池塘轻絮又霏霏

顾孝廉蒙

圣恩特赐进士诗以贺之

薄海同归雨露培宣尼宁独铸顔回得君初不缘多逊及第今还胜柳开青琐班聯宵漏永彤
墀肱唱庆云来会看五色生花笔长日挥毫视草台

赋得鹭立芦花秋水明

风起芦洲鹭翻斜欲飞还竚水程賒凌波雪羽轻翻节倒影罗纹皎夺花宛在伊人深白露几
分秋色淡明霞遥看景物苍茫意拟共鸥盟荻浦沙

九日讲武恭纪

四海遍雍熙三秋阅虎罴代当全盛际节应大蒐时日月中天丽旌旗旷野麾军容森甲冑垧
牧物黄骊爽气浮仙仗卿云映

御帷虎贲争蹻蹻戎御尽师师拂剑霜华动弯弓月影披马嘶黄菊野鴈过白云陞组练生光
焰衡鑣中式仪九宫罗画戟六甲载云旗舞鶚游丝袅穿正闪电驰古来歌七德今日炳重离

圣治辉千载

天威震四夷

銮舆归紫极扈从咏周诗

九日登高

节物推迁秋气深重阳今日此登临东篱露润花将放北塞风寒鴈有音气爽天高秋飒沓山
青水碧树萧森松梢鹤韵和清瑟竹里泉声杂古琴吹?还须穷絶壁整冠且复尽前岑地寛自
觉尘埃远境静全无俗虑侵白石卧云苔漠漠青巘引径洞沉沉已从兰若聽僧梵更杂寒村
送旅砧观海何须登泰岱到山已足散胸襟归来解却茱萸佩闲看东冈月上林

霜隼下晴臯

九臯秋气肃沙浄水痕明苍隼低青岫孤飞下碧泓摩空盘势矫收羽削风轻墉上无人射溟
东几度行攫拏藏利爪爽豁湛圜睛万里悠悠意金声寄一鸣

壽五弟

绣线添端始桑弧庆履长云书卿霁烂瑄度褓襦香音羽调分候天心复一阳慧根资岂弟醇
意发文章着纸霞朝丽挥毫玉夜光鵠原欣得侶鴈序愧先行愿挹层霄露言斟初度觴同携
瞻紫极霭霭萃千祥

帝京杂咏

雪瓣初收放晓晴西山一带湛虚明玉屏重叠玲珑樣若个神工造得成

岁腊欣逢蚤立春银旛彩胜逐时新漫言春色知多少寒谷阳回自此辰

儿童队队趋闲行市口新张卖画棚不惜金钱多买取归来弟妹笑相迎

古礼原称老妇祭於今礼拜祇诸男云车龙马昇天去户户争传二十三

大官清晓布

王言济济鵷行锡賚繁领得天庖鲜美味亲朋会食说君恩

君王锡福溥恩施凤翥龙翔莫并奇顷刻漏声传玉箭聯翩

御笔下彤墀

纷纷争向地炉边添满松枝扬碧烟燠岁成风传自昔一家烘煖话团圆

送旧迎新未得眠一番守岁列华筵却将旧学商量过培养新知胜往年

辛亥二月朔

皇父賜御书对聯恭紀

夹鍾应律普条风浩蕩春熙造化同雨露泽来三殿上璧奎文降九天中漫言北海书称健可
识山阳句独工【聯句系唐人赵嘏诗】最是

万几无晷暇

恩頒宸翰荷无穷

辛亥仲春

上幸丰泽园演耕藉礼

上躬四推

命臣等终亩恭拟应制十韵

大地阳和淑景韶潜苏土脉应风条洪钧普扇百昌序大造均舒万物调

翠辇临耕旗闪烁

金輿载驾玉钁雕行行西苑停鸾辂泛泛天池荡画桡帝耒四推膏壤沃

皇躬一墾甫田遥先期已见寅恭懋终亩还思

教泽饶种布期生连理穗壠开愿长九岐苗追思圣祖观耕地却值吾

皇演礼朝丰稔岁功九有遍太和景象万方昭放勲久颂

尧功茂協帝重瞻

舜德超

西廡习射即事

行行西廡路犹賒习射非关玩物华怪底今朝寒料峭平明宿雨湿桃花

拂柳穿花过小溪紫骝不用锦障泥东风可是能裁剪飘洒香红散马蹄

西海清流漾碧鲜相将此日荡兰船溶溶新涨春芜合始识分来自玉泉

佛手

天龙一指称禅伯接引犹闻爪甲香瓶鉢罢持忘色相珊瑚闲撒爱清凉灵根疑长兜罗树慧
质原生选佛場何事全身藏丈六玻璃盘内笑拈芳

晚眺

沉沉暮色迷烟鬢高楼半出松篁间樵牧归来晚烧起鴛飞集斜阳闲窻开蝶逐花片入帘
卷燕啄香泥还极目芳菲将九十杨柳春风为掩关

丁香花

细叶纖英不染尘微风时度暗香匀两般顏色分枝丽四出琼瑶着树新淡洗露华披宝粟斜
翻堦影卧花茵纵令百结犹须解那鎖芳园荏苒春

衍制乐善堂全集定本卷二十三

卷二十四

钦定四库全书

御制乐善堂全集定本卷二十四

今体诗

燕山八景诗

琼岛春陰

琼华瑶岛鬱嵯峨春日轻陰景色多云护凤楼松掩映瑞凝仙掌竹婆娑低临禁苑滋苔蘚远带郊畿?麦禾更向五云最深处好风时送九韶歌

太液秋风

秋到宸居爽籟生玉湖澄碧画桥横荷风晚送残香气竹露凉敲綠玉声翠合三山连闾苑波涵一镜俨蓬瀛由来禁籞林泉好行乐还同万物情

玉泉垂虹

涌湍千丈落垂虹风卷银涛一望中声震林梢趋衆壑光浮练影挂长空跳波激石珠丸碎溅沫飞花玉屑红自此恩波流处处公田时雨泽应同

西山晴雪

银屏重叠湛虚明朗朗峯头对帝京万壑晶光迎晓日千林琼屑映朝晴寒凝涧口泉犹冻冷逼枝头鸟不鸣只有山僧颇自在竹炉茗椀伴高清

蓟门烟树

苍茫树色望中浮十里轻陰接蓟?垂柳依依村舍隐新苗漠漠水田稠青葱四合莺留语空翠连天鴈远游南望帝京佳气绕五云飞护凤凰楼

卢沟晓月

兰若霜钟断续鸣卢沟晓月正西横苍烟淡接平芜迴曙色才分远水明傍?人行闻犬吠蹙波风动见鱼惊车驰马骤长安道何限低徊旅宦情

居庸叠翠

居庸天险列峰连万里金汤固九边雄峻莫夸三峡险崎岖疑是五丁穿岚拖千岭浮佳气日上羣峰吐紫烟盛世祇今无战伐投戈戍卒艺山田

金台夕照

燕台遥望澹烟蒙返照依稀禁籞东是处人家图画里一川风景夕阳中溪头棹响归渔艇牛背箫声过牧童千古望诸留胜蹟几回凭吊向西风

阙里祭器新成

赐观簠簋鏐登豆爵六色恭纪八韵

代啓文明炳崇儒

圣道光

皇心钦日月礼器备宫墙旧谱稽成式新图发尚方斑斓纷有耀簠簋列成行

颁示来三殿传观遍两庠涵光呈玉质绚彩灿金相万国同文轨千秋肃典常从兹先後圣一揆颂吾

皇

恭祝

皇母圣壽

蓬莱晓日照金扉紵纓云成五色辉觴捧六宫趋彩仗嵩呼四海仰

慈闈琼筵恭进仙人膳文锦欢呈玉女衣叨沐

恩勤逢令节年年拜舞庆春晖

赋得一雨便如秋

园林新霁後徙倚小亭前宿雨催残暑余霞抹远天风随轻扇度爽隔薄衫穿泉满澄潭里鸥闲野岸边苔痕侵履湿梧影落阶圆秋思先秋发於今卜有年

雍正九年六月

上以近畿三省雨泽愆期豫筹赈恤之策甘霖叠沛恭

纪十二韵志喜

帝念民衣食端惟农与桑粒民符后稷熙绩法陶唐乾惕通朝夕中和善弛张朱明三夏永甘雨万民望睿虑周三省

宸衷达九苍普天颁惠泽特地厪谘商精祷思无逸殷忧问未央贮仓施旧积转漕截新航更降停徵

诏仍颁捐赋章

恩纶过所望膏泽应非常对越何昭爽诚通自溥将从知

天佑

圣万国庆丰穰

赋得七月流火

玉律商声应金天大火流祝融朱旆卷少皞素车留炎气驱天末凉飈拂树头潭中波影净盘里露珠稠兴助西风客思添明月楼授衣期在即砧杵响清秋

秋露如珠

七月凉初至三危露渐零圆凝成颗粒纷坠散珑玲只许盈眸洗无能倾耳听平分素秋景梧叶老阶庭

秋日播麦新生

厘牟遍壠拂参差正是西风八月时翠毯乍抽新穎细緑波轻泛早苗披芊芊不畏秋阳暴靡靡长沾白露滋此日种成来岁获化工四气为全施

将猎南苑检点所携书籍

入高秋气肃郊垧南苑将除信宿停检点行牘整书籍不因校猎废谈经

校猎阻雨

崇朝秋雨细丝丝草湿平原滑似脂罢却行围何所事吟诗未稳独寻思

阁道游廊鬪角齐侵堦嫩綠草萋萋却怜苑外随围者上雨旁风下浊泥

辛亥秋九月出南苑行围以穡事未竣不果猎而还

糶翻云板敲塲圃钱利霜刀刈大田一幅 风图画似肯教猎骑悞民天

霜後平原地已坚青骢不用锦连钱相逢野老扶儿笑今岁丰收倍往年

读杨忠愍集

家学关西素行淳浩然惟与义为隣一生名节堂堂在两疏风霜字字新报国不辞履虎尾排奸直欲犯龙鳞开编省识忠良气不愧牵衣折檻臣

御赐诗经传说彙纂恭纪十韵

学古初循壁承

恩尚面墙二南风化首六义咏歌长邦国由闺闼声音叶纪纲孔门传卜氏汉代着毛萇考订凭先哲要归守紫阳胶庠遵注释艺苑藉翱翔秉一先生训排诸博士场羣言难约达萃美得微臧纂定遵

皇祖装潢出上方趋庭惭寡昧雒诵敢遗忘

恭瞻

皇祖恩赐御笔感赋

亭俯玻璃荷芰芳【赐书处名观莲所】孙枝获侍

圣人旁寸心已觉趋陪幸尺幅曾颁翰墨光羲画轩书叨赐屡玉函金笥贮

恩长只今空对

宸章丽瞻仰徒回九曲肠

分陰宵旰万几繁余暇精神寄笔端运腕力如撑海岳挥毫形似舞龙鸾当年欢忭承

荣赐此日依迟忍重看讵止宋臣飞白记涕流频拭那能乾

镜中灯

数尺玻璃镜中含烛影横光凝千树焰彩散一灯明圆相分来满空花对处生扑蛾浑不用剪
烬笑难成乍似水壶漾还如水月盈若令长照物莫彻玉堂繁

雍正九年十二月二十日

皇祖实录御训告成

皇父陞殿恭受礼成羣臣庆贺恭纪

承平岁久共尊亲万类欣游浩荡春六十一年縣郅治百千万国沐洪仁行昭日月瑶篇富言
揭山河宝册新圣主绍庭钦陟降显承允萃一人身

宝祚金舆瑞霭盈恭迎

帝辇出乾清起居本是当年注纪载欣看此日成佑啓万年隆国祚继承四海仰

皇情告成应受千官贺金殿曈曨旭影明

绩奏修和被管弦只今载笔尚依然精研始识

天心奥紬绎从知

圣学渊久道化成仁正溥重熙累洽庆方縣朝来阅罢昇平礼宝历初周已十年

史馆修成

圣典垂一番欢喜一番悲提携旧忆

音容在忝慕今惊岁月移光发琼囊临殿陞祥开玉帙焕罽毼几回拱手丹墀立感事沉吟七
字诗

薄海沾濡雨露匀

九重咨傲焕丝纶典谟从识唐虞圣功叙还同覆载仁忆昔追随

宸极久祗今瞻仰史书新光天黎献歌思永况复躬承渥泽人

吾

皇至德懋重华

实录成书自帝家经国大猷延宅俊务民本业重桑麻载功多藉羣工手纪实曾无一字夸受
贺礼成还紫极中天日灿五云斜

赐乌铜鑪恭纪

迢递三余永研精书室中窻明欣向日帘密为禁风布泽从金殿

颁恩自法宫名鑪传雅制新樣出良工素色青铅似圆形宝镜同细雕檀木案巧铸首山铜夜
爇兰烟紫朝熏兽炭红袖来寒却避着处煖频烘拜

赐回春德荣分解冻功年年长至日永得奉

恩融

平郡王修理

福陵前水法告成还京赋赠三十二韵

薄海承平日光天丕冒时奉三宏郅治得一普

恩施

列祖贻鸿业吾

皇绍大基

圣心通陟降孝治本型仪缅想

山陵地钦惟功德垂殿堂宜戎焕水法度重为

简命贤藩往工程鉅任裨星轺辞輶轂驷乘望

灵祠九十韶光半透迤周道迟嫩茵铺古路山鸟唤高枝日脚来孤鹜云边现彩芝奉天春满目望海翠凝眉【山海关有望海楼】言迈劳征骑遄臻止绣麾命徒勤匠作鸠衆发工师月斧千人举云斤万手持寻源疏旧道凿石濬新陂利便因形势高卑物土宜敬公常惓惓慎事每孜孜不惜司农帑还余御府资两年寒暑易再往路途知晴旭光明照和风左右吹归輿旋帝里返旆迈通達歲事封章奏论功

圣泽推逾时成契濶此日喜追随分韵笺同劈探微册共披心知才磊落意欲共磨治古有登临士游穷山水奇因之健笔力用以助文思况复三韩旧犹然万载?省风思

祖德考俗问乡耆益重圭璋品应叨雨露私篇章聊志喜讵比穆如诗

孟春十日夜偶成十六韵

天宇祥风布东方木德生入春旬已过望月璧将盈独坐披绡帙无眠对玉檠推敲裁律句吟咏费精评自忆髫童岁粗知书史名但能觅梨栗岂解协音声顾复皇恩厚提撕

圣训明选师皆宿彦教我尽披诚学识尊周孔诗知道性情韵宗金石响词薄伪刊轻茧纸浮光净兰毫蘸墨并绮思抽乙乙俗虑静营营堪会天人理兼消长短更烬生霜燕翦茶沸玉壶鸣旋裊沉香细迢遥永夜清吟成梅月朗天际玉绳横

玻璃盘

斐几无尘罽毼平玻璃盘子伴高清一般皎洁羞云母四射光芒突水精巧质非缘周玉府【周礼天官玉府合诸侯则共珠盘玉敦】嘉名讵数汉金茎几回拂拭澄如镜静对冰心一片明

恭读

皇祖御制避暑山庄三十六景诗并閱图感成长句五

首

天开胜境比卷阿浩荡春熙万物和祇为养

亲温清备非关奉已豫游过迎凉台榭依山迴延爽轩窗傍水多颌颌孙曾难数计扈游何幸沐

恩波

犹忆壬寅三月春随

銮方始奉恩纶

天顏近接承欢久

日角时临赐喜频在耳

德音犹似昨开函

御笔镇如新祇缘深眷吾

皇意爱育余波及小臣

金泉避暑辟离宫行乐还期兆庶同书史研求遵古训桑麻艺植爱幽风追陪六膳分银鱠趋侍三驱跃玉骢指点图中当日事

鼎湖何处可攀龙

灵台不见文王御仁壽空传唐帝宫楼阁帘栊虚夜月殿堂松柏老秋风当年游赏疑天上此日酸辛对画中賸有

宸章恭洛诵几回青睞忆

重瞳

鼓响春音梦里迁披图不觉泪潸然诗侔风雅传千载画聚烟霞局一编爽籟秋风嘘大块云章星彩丽高天冷窗课罢频吟讽回首光陰已八年

东作

东作三春始滋生万物稠公田平似掌新水綠如油虫卷柔桑叶针抽嫩穎头乘时功力备多稼定今秋

赋得花随春令发

青阳消息到春台嫋嫋风光费剪裁满院犹迟千树放傍檐早觉一枝开日烘不藉温房暖令至何须羯鼓催嫩萼半含春力薄悠扬蜂蝶莫频来

题蒋南沙相国画屏五景

桃柳

金丝锦浪舞东风点缀阳和尺幅中见说桃源春霭霭遥知灞雨蒙蒙轻绡杂间参差綠翠带
低临深浅红消息化工归變理丹铅未许画师同

苍松牡丹

锦绣堂中开画屏牡丹红间老松青日烘始识三春丽岁暮犹看百尺亭亭夭矫擎空欣得地辉
煌散彩正当庭一般都是生生意坐对从知笔有灵

荷

玉镜平铺一带长红衣翠盖俨明粧不争艷丽当春日独濯清涟傍夕阳云髻峩峩疑洛浦秋
风嫋嫋忆潇湘鹭鸶可是知人意双落明波领晚香

黄蜀葵

色是黄金花是盘迎风未舞已珊珊蕊珠宫里仙人佩姑射山头玉女冠承露更添千叶碧向
阳还有寸心丹鷲黄淡抹饶深意漫作寻常渲染看

梅

天上春阳回未回早传消息到庭梅暗香和雪寻常放嫩萼侵寒三两开每傍阶前照清浅更
於月下重徘徊一枝风物资清供调鼎还看济世才

春日寄朱可亭先生五十二韵

迟日山河丽青春风物妍皇州笼淑气天宇灿祥烟景媚韶华世人游熙皞年先生方抱病静
室独安眠当代穷经彦清时守道贤事

君欣际遇奉职佛仔肩

宠命登台辅鸿才掌选铨寅恭朝宁右弼亮

圣人前只此冰兢志那忘对命?

皇情常有眷臣节总无偏早岁承纶綍成童授简编芳?看表帅函丈获周旋义府优游永春风

坐卧便赋诗闲检韵味道细烹泉每自威仪谨从知学问全董生醇治术朱子续心传十载如
旬日高山复大川汲长难试绠质鲁诘窥渊惟借开陈力常资接引缘前途粗省识往籍事精
研方示寻邹展旋招泛泗船高深终莫测言象未忘筌窃意精神固何期衰病连道存看润貌
身老惜华颠解习安心法参明乐性禅三年常疾疾晚岁每迍邐更受

宸衷注频蒙

恩旨宣赐医经岁月资食列甘鲜几度秋梧落经时春草芊尊生资摄理养静悟鱼鸢入腊魔
才退频年疾稍痊经帷常一过日暮薄言还早识文如斗新叨笔似椽风披重幙外晴照绮窗
边坐久添光霁来频领蕙荃如何新岁到转觉旧牵呼仆长扃户飞花未扑鞦竹炉朝自焙汤
剂晚仍煎消闷凭书籍无心托管弦神清依素几守寂坐龕羶未及颁春俸应劳买药钱东皇
今布令黑帝久收权坦履宜悠尔沉疴定霍然追随私念切趋步寸心悬况乃须调鼎方看用
作舫时平交正泰君道健如乾宣力畴堪并陈猷未或先阳和敷化国膏泽被王田何日趋朝
陛多时隔讲筵裁诗羞未稳有暇赐雕镌

御制乐善堂全集定本卷二十四

卷二十五

钦定四库全书

御制乐善堂全集定本卷二十五

今体诗

三月十三日随

皇父驾幸圆明园得诗六首

春园初见百花开日午欣随

御辇来纈锦蒸霞呈丽景东皇雨露好栽培

最是蓬莱浩荡春东风如剪物华新裙腰草合平於毯滑笏溪流色似银

迩来甘雨润苗新走马天街絶点尘试策金鞭回望处翠条如染拂行人

黄繖当中映午暉

太平天子幸春园灵台灵沼同民乐夹道齐呼

万岁尊

寒食常年桃已谢今年寒食正开花天工有意供宸赏特教东君驻物华

御炉香煖惠风晴日映墀头唤上卿不是物华供玩少殿顔勤政意分明

赋得好雨知时节

漠漠春云布蒙蒙时雨飞点空方霰霖入夜转霏微正助资生德从知造化机东郊明晓步坂上麦苗肥

柳溪垂钓

傍岸青青一带遥玻璃镜净拂烟条持竿不为贪鲈膾天水空明万虑消

花屿南头曲水东石矶晚坐绿陰风临流暂作垂纶客兴与渔郎却不同

聽松

凉风过院里疎响度庭前乍觉蛟龙吼徐聽丝竹传春涛盈峡涨沸茗满壶煎入夜心偏静凭
参天籟禅

賦得泉和万籟吟

野迳无丝竹飞泉亦可聽千条流涧白万古韵松青自是饶天籁多缘借地灵跳波珠纍纍激
石玉丁丁乐奏箫韶曲图开十二屏何当铺翠毯终日对清泠

濯纓泉

碧映一泓清当年谁濯纓沧浪衣带水到此亦成名

恭和

御制咏竹原韵

琅玕敲雅韵苍翠布清陰远映山光入低临阶影侵寒梢蓊雨润劲节飒风吟仙苑供

宸赏还同松柏心

藻砌纷青箨芳园满綠陰最宜时雨洗不碍岁寒侵宸暇方游豫

皇情畅咏吟年年常近日清节与虚心

从军行

三边烽火照军营十万丁男夜练兵但使腰间悬宝劒丈夫何处不成名

关山月冷夜黄昏指日应擒吐谷浑谁忆楼头新少妇一声横笛正销魂

沙漠风高列戍连寒侵行帐不成眠狼山夜半闻新警披甲争聽号令传

辞家万里路迢迢龙虎军中夜击刁底事成功如约早将军闻是霍嫖姚

横戈结伴共游盘日久翻忘行路难却恨此方无鴈到凭谁传信报平安

夜战洮河马不嘶无边杀气与云齐偷闲一枕金戈卧半是人膏半是泥

二十三番月缺盈君王恩重致身轻辕门试射谁穿的十万军中最有名

戍儿约计看刀环对镜新惊发半斑不是亲擒生颡利何颜复进玉门关

送邵通参奉

命典试江西

天门旭日耀晴明

帝简儒臣典试荣虎观暂教违问难龙门旋见擢瑶瑛征轮正爱山花绕归路应看朔鴈迎一
载春风频坐卧可能不动别离情

昭代文明重棘闱雄州遥指四骢駉三秋瞻斗龙光射一月蒐才紫气围堂上频呼添蜡烛日
中俄见掷珠玑迢迢驿路回鞭日好载公门桃李归

豫章佳气鬱葱葱牛斗光芒映彩虹

帝遣文星司玉尺人钦精鉴咏敦弓骅骝遇主鸣方健鵬鹗摩天势更雄宗派西江还在否凭
君一振古人风放榜悬知聚彩霞归輿历历雪初花纵横礼乐文章盛来往山川道路賒日照
金台迎画幟风吹滕阁送仙槎天街十月阳春早光霁重看卷绛纱

顔鲁公祠堂

草长华清作古原鲁公祠宇至今存松围四面涛声飒户守千灵道貌尊一片忠诚光日表几
遭贬斥别君门平生浩气消奸气尽节从容且谩论

读项羽纪

鹿走荒郊壮士追蛙声紫色总男儿拔山扛鼎兴何暴齿剑辞雅志不移天下不闻歌楚些帐
中惟见叹虞兮故乡三户终何在千载乌江不洗悲

读武侯出师表

燎灭中原鹿又亡独留微烬炽炎方三分已是输全局七纵犹然保小康此日櫓枪须北指当
年鱼水忆南阳魏宫草树终摇落千古丹心表两章

裁衣寄从军者

玉关天气凉六月已飞霜惊理篋中素寄与远行郎长短尚如初寬窄想非旧那堪孤灯下缝
纫聽寒漏中庭度金风絨刀着手冷叹息厚装绵行将寄雪岭裁衣何所愿愿郎早树勲郎为
万户侯妾作郡夫人

送穀庵鄂相国奉

命经略西陲

清秋霁日照征鞍上相临戎剑气寒

诏旨钦承三殿密机宜默运寸心殫马腾士饱来裴度鹤唳风声避谢安欲别先生何所赠临
风握手劝加餐书文一轨泰阶平蠢尔戎夷敢弄兵

天子运筹频下顾相臣经略此西征风翻武帐三台入日耀军门万戟明伫看对扬歌虎拜边
烽永熄玉关清

赋得鹤舞千年树

太液池边千岁松飞来白鹤爱陰浓雪衣斜掠披风态丹顶高昂舞月容閬苑有书传秘信缙
山无处觅仙踪翩翩还就三清路翠盖徒看攫老龙

活水

滑笏流波不暂停鵙鵙鸥鹭满沙汀眼前解得空明理清浊何劳辨渭泾

冒雨寻菊

秋雨霏霏碧蘚滋闲情今日步东篱不知冷夜寒朝里开到西风第几枝

我爱秋来菊蕊开天工偏为洗尘埃倚栏闲咏衣衫湿应是才从篱畔回

挽戴九臯

都門握手別清儀生別重添死別离蒿里应怀埋玉恨龙堆想見致身時魂还故宅三秋冷名
列新編万載垂惟我思君勤懇意裁詩洒泪不胜悲

吊睢阳双忠

蚍蜉援絕守孤城遮蔽江淮九死撐可惜絕繩无复续翻教越俎共捐生一时慷慨多全节千古春秋有令名笏豆生光祠宇在双忠浩气焕丹楹

恭读

皇祖圣祖仁皇帝御题耕织图四十六景诗敬和原韵

浸种

气布青阳造化功东郊俶载万方同溪流浸种如油绿生意含春秀色笼

耕

宿雨初过晓日晴乌犍有力足春耕田家辛苦那知倦更聽枝头布谷声

耙耨

九重宵旰廛民依课量陰晴总不违缥缈云山迷树色綠蓑扶耙雨霏霏

耖

新田如掌水潺湲扶耖终朝那得闲手足沾涂浑不管月明共濯碧溪间

碌礪

帶雨扶犁一夕周作劳终亩敢辞休纵横碌礪如梭转膏壤匀铺惣旧畴

布秧

二月春风料峭寒原田鳞疊入遐观最怜旧谷生新穎欲布秧还仔细看

初秧

柳暗花明春正深田家那得冶游心老翁策杖扶儿笑却喜初秧摆綠鍼

淤?

短杓盛灰淤亩勤高原下隰望中分鸣鳩唤雨声声好岭外旋看起白云

拔秧

匀铺绿毯满平川万井风和花欲然移自南畴向西陌拔秧时节日长天

插秧

甫田万井水弥弥拔得新秧欲插时槐夏麦秋天气好及时树艺莫教迟

一耘

新穎鵞黄远似波握苗助长槁如何惟应芟薶勤人力自鲜苞稂害穉禾

二耘

壶浆饁妇大堤行最是畦边莠易生劳苦再耘还再饷可怜农叟望年情

三耘

朱火炎炎日午长三耘曝背向林塘那无解愠传风信天遣微薰动绿芒

灌溉

抱瓮终输气力微桔槔轮转迅如飞池塘水满新禾润树下乘凉待月归

收刈

桐风潇洒露珠曦满野黄云映落晖是处腰?收获遍担头挑得万钱归

登场

登场此日望西成大有频书庆帝京?稴满车皆玉粒比隣亦觉笑颜生

持穗

塲圃平坚灰甃成如坻露积最关情殷勤妇子争持穗好聽千家拍拍声

舂碓

木末金风阵阵吹松明火烧隔疎篱何来舂相深宵里可是村讴唱和时

簾

秋成那得暂游盘颗粒精粗欲别难周折不辞身手瘁犹余一掬几回看

簸扬

郭外人家茆舍深门前扬簸趁风林莫令飘堕成狼戾辜负耕夫力作心

砉

相将南亩苦胼胝望岁心酬庶免饥石磴碾来珠颗润家家鼓腹乐雍熙

入仓

霜点枫林似火然千仓满贮赐从天输官不假徵催力喜值如云大有年

祭神

击鼓吹豳报屡丰朝看索飧万家同更期来岁如今岁苗硕不知愿莫穷

浴蚕

曾读豳风七月篇迟迟日景丽光天新蚕未起先宜浴盆满明波人满川

二眠

女桑摇绿叶参差晓起人慵欲采迟双燕入帘长昼静再眠恰是仲春时

三眠

淑景频催喜载阳微行步步采条桑三眠三起新蚕老篝火看时夜未央

大起

春光荏苒去堂堂无那黄莺一日忙箔上吴蚕方大起水丝色映绿筠筐

捉绩

蚕筐高下架头纷食叶声烦似雨闻捉绩欣看光练练一家妇女共辛勤

分箔

柳絮飞时昼下帘桑柔繁细食徐添却凭纖手为分箔未暇朝餐日过檐

采桑

墙畔青条着雨滋繁陰初覆叶齐时春深八茧蚕争餒稚子携筐上綠枝

上簇

觅树寻枝手足疲柔桑采采饲蚕饥今朝报道新抽茧老幼羣欣上簇时

炙箔

重帘不卷畏风寒犹熱松明向夜阑皜雪霏霏堆满箔殷勤弱女把灯看

下簇

献茧由来重女功绘图今见列璇宫

圣人不为丹青玩玉谷珠丝此意同

择茧

弱茧何时成绮紈拮据冀免一身寒八蚕独蛹还须择几上分明取次观

窖茧

春日迟迟执妇功何心恋赏牡丹红茧成好向村头窖荷锺携儿綠?中

练丝

煮茧炊烟扬短篱丝肠累累练成时探汤试展纖纖手那聽枝头叫画眉

蚕蛾

蚕蛾丝淨方生子送向溪头任所之默祝明春盛今岁隔年生理计家资

祀谢

年年劳苦事耕桑及早还将租税偿今日蚕成?祀谢西陵功德戴无疆

纬

蚕缲轮卷遍千家午静人慵鸟语譁浸纬欣看供织作阿香轧轧转雷车

织

织女工夫午夜多何曾已自着丝罗银兰照处方成寸却早循环掷万梭

络丝

秋惹深闺无限情可堪蟋蟀送寒声玉关万里征夫远惆怅新丝络不成

经

砌下风飘待女兰新丝经理欲成纨安排头绪分长短约伴同来仔细看

染色

经纬功成尚染丝晴光万缕灿离离天工夺处关人巧棚上还看五色施

攀花

簇簇堆成锦绣纹攀花鬪巧最精勤堪怜织妇空劳勩着体无过大布裘

剪帛

溪尾如蓝秋水清裁衣寄远重关情金刀欲下躊躇意丝缕皆从素手成

成衣

戈戈束帛费缝纫只为祁寒事切身

圣意忧勤图画里宵衣永庇万方人

挽蔡忠烈公

公讳道宪号江门闽之晋江人为长沙司李献贼攻长沙吉藩及抚藩监司相率遁衡州公摄

太守事为死守计总兵尹先民叛附於贼城?百计胁降公不屈怒骂愈甚贼遂锥其胸断其手割鼻舌毁齿寸磔以死事闻赠太仆谥忠烈先是公就擒时有从役九人随公不去贼先杀五人以惧公公不动及以次斩及凌国俊国俊者九人之一也国俊请葬主而後就戮贼许之後与公同祀长沙

牧民身不典戎曹为守孤城展六韬振鼓纵能摧贼锐倒戈先已树降旄夜台有路丹心炳帝阙无门白日高沅芷澧兰芳不歇招魂只合诵离骚

御制乐善堂全集定本卷二十五

卷二十六

[集部,别集类,清代,御制乐善堂全集定本]

钦定四库全书

御制乐善堂全集定本卷二十六

今体诗

石鼓

桥门森矗两苍松翠护雕镌舞凤龙漫说晋臣精博物难稽周帝耀军容铜驼已见藏荆棘石鼓依然镇辟雍百里声闻今试扣太平留此溯遐踪

闻军营大捷志喜

旭日扬辉氛沴消光天雨露九瀛朝行间効命票姚霍斗畔推车相国萧沙漠忽闻收战马泮林伫见集飞鹄勒功一片留何处更过燕山万里遥

蠢尔西夷敢跳梁凶残肆取武维扬淮山无骑闻清鹤大漠千师扫骇狼破竹功成归有日采薇歌作岁云阳从兹德水清无外天际长悬月光

辕门鼓角万军鸣执讯连连繫大营日照三山光四垒风回千队动双旌已闻鱼海全销燧更看天河净洗兵最是王师征不战金瓯永固万方清

阃外专征将帅雄几年区画厘

宸衷欣看寇尽穷荒北可卜兵归汉苑东万里露章初奏凯千年麟阁定论功赉扬志喜葵忱切咸五登三祝圣躬

景陵宝城山上产石芝一本彩芝四本恭纪二律瑶光星耀丽重霄瑞产芝英玉露调最是显承通有赫可知陟降本於昭日暄

宝顶金幢粲风拂

明楼玉节飘千载嘉祥绵国祚由来虞舜继唐尧扶舆积气炳贞符芝盖缤纷护

鼎湖上瑞两逢得未有灵根五本自来无光天雨露讴歌切大地恩波浩荡濡总是覲扬同一

揆休徵草木庆昌图

赐哈密瓜恭纪

玉琯灰飞候璇玑斗纪辰阳从一气转

恩自九重新异品遐陬至名瓜

赐赆频分餐消永夜独喜沁清神霜刃丝丝剖冰瓢片片陈青门应让美朱火漫夸珍堆处盘
添冷尝来齿漱津中宵诗思润转盼是三春

恭和

御制冬至斋宫诗二章原韵

五云紉纁护斋宫晴旭才升暖绮栊气转初阳回玉律天开子月应祥风百昌新庆昭苏景万
彙均沾橐籥功可识泰禋绵福履

一人诚敬早潜通

日朗瑶宫瑞色新履长纳庆协芳辰精禋共识

皇心恪斋宿羣瞻

圣敬纯和气初融丹禁晓葭灰乍动玉衡春

宸居此际乾乾意为悬

苍穹佑兆民

再拟冬至斋宫三首

瑞霭氤氲满太清九华高曜凤墀明斋宫昼静炉烟直广殿风和梅蕊生气复一阳璇象转福
凝五位泰阶平春回大地鸿钧普始识天心飨

圣诚

亚岁芳辰景福臻欢声陌上

九重闻琯中鼓动回元气台上丰亨兆五云金阙祥光浮雉尾玉炉斜篆袅烟纹赓歌拜手葵
忱切长仰经天日月文

帝御斋宫敬且庄

泰坛寅祀亚初阳斗边看日方移晷谷口占风又协祥郅治平成过夏后

圣躬雍肃迈周王至诚已自通

天贶

万壽应知卜算长

橘

朱橘团团岭海滨年来包贡远通闽玉盘盛得珊瑚色为识江南霜信频

离离不让洞庭南玉液琼浆珠颗含未免一筹输土物春前进到九头柑

冻云凝雪

出岫云岚冻飞空雪霰凝漫天寒欲逼大地气难腾淅沥朝逾密氤氲日始升地炉熏不暖梅
谷踏何曾过屋驰苍狗敲檐落细水谁能分白黑乍不辨村塍列嶂眉如洗平湖镜似菱阳和
期尚远霽发候相仍锦绣帘重护玻璃窗暂凭喜看三白瑞预卜九秋登

冬早闻雀声

几日晨窗鸟乱鸣似来报晓最关情霜凝冻翅看双落冷逼寒喉辨数声乍似庭中吹急管忽
思春杪聽迁莺想伊预识阳和近为见南枝梅蕊生

恭读

御制丁未长至日诗敬依原韵

鸿钧气转中黄钟六出飘飘喜应农台上云霞看纪瑞天中颺项正司冬阳迎葭管方萌动礼
荐萧馨倍祗庸知是履端逢景运太平天子福重重

村墟夜春

霜落园林时届冬稻粱全获罢三农田家作苦无休息更聽村墟半夜春

万籟全收夜已分寒春声急隔窗闻高斋识得丰年景篆裊炉香独自焚

冬日寄蔡闻之先生

一綫阳回节近春先生独卧病兼贫釜漂白水薪为桂帘卷寒风雪作银未识命车期几日常已伏枕过三旬药炉静对无余事应有新诗付锦鳞

书斋十载接辉光屈指睽违一月长试问鑪锤何忽忽可知岁月亦堂堂腰围定减冬前带发际应添镜里霜伫待春风重坐卧新知旧学总商量

诗思

诗思竟如何都於静後多茧丝抽更细春水皱生波得意全由此忘言亦任他古人多达者谁是破诗魔奉和二十一叔父用蟬聯体赋得松风雪月天花竹鹤云烟诗酒春池雨山僧道柳泉原韵右二十字宋太宗试进士赵昌国题也叔父取以自咏创为蟬聯体属予和之予愧非所习勉强奉和观者得毋以效顰笑耶

龙鳞含秀色偃盖欲擎空不畏严霜偏宜细雨蒙贞坚有本性潇洒与谁同天籁还堪聽笙箫愧下风浴日纪尧渊生云传禹穴何如孟婆风冷然亦可悅飘飘散幽襟裊裊起苹末莫漫向春园吹搅梨花雪千山琼瑶堆万树青葱没砌面足虎盐波心冷石发冻鸦叫不已樵客歌独歇谁与把笔人孤吟对寒月良宵值三五皓魄正高悬海上初笼树空中恰印川征人榆塞外才子綺楼前对景情偏别盈亏欲问天苍苍标正色浩浩远无涯气结山河秀光分日月华问曾传正则补欲忆皇娲闻说空桑法曼陀更雨花薜荔繚为墙芙蓉盖成屋人疑是仙源客来探丹谷凌晨采春兰裊露掇秋菊为恐脚踏残短栏缚湘竹幽篁令人远隔亭看约略檀栾清影圆森疎余粉落冒露振青竿韵风鸣紫箨伶伦十二管吹集云中鹤振翮盘霄汉清标迴不羣九臯空外响午夜月中闻猴峤随王子瀛洲驾太君千年辽海上乡里隔浮云因风势欲牵出岫转悠然乍可同苍狗犹然?一蟬梳空纹似浪映日白於棉楼上分明看还疑谷口烟野烧致偏奇停车一望之初从山脚起俄向树头披最是村郊里爱看浓淡时右丞云水幅佳景妙於诗终朝静里吟聊试拈毫手即景自怡悅裁句觅对偶但期合古人未许甜俗口不学李青莲百篇酣斗酒瓮里香醪熟盃中湛露新麴红传綺席蚁綠献佳辰锡嘏尊三爵言欢历再巡兕觥方上壽天子万年春丽日烘窗暖条风拂面宜爱看民析候更值物华时鸟语呼名急花娇放朶迟寒冰已解冻料可泛前池夹镜抱花源曲栏围琼户凌晓远浮烟俯波倒映树水心舟响檝岸上人接武最爱夜深时隔窗聽点雨霏微迷远近徙倚小亭间树润苍龙甲花明织锦斑尘氛归閭寂涧水落潺湲更向天边望珠帘隔万山列嶂碧峻嶒乘间一眺登峰青高旋髻泉迸远拖縈谁识丹梯路羣观白玉楼飞来小鷺岭会遇淨名僧招提构灵境满树蟬声噪中有老尊宿拈芳坐深窈钟鱼共朝昏物外恣寻讨却笑红尘客劳劳洛阳道人歌行路难谁肯葺门守学士锦轮飞将军铁马走终日逐红尘为客成白叟何为祖离亭更复折杨柳灞

岸千条色章台万缕烟待看飞絮日正值暮春天摇绿栖新燕成陰噪晚蝉最怜横古渡渔父
钓清泉滴沥复琤琮幽人诗料供寻源迷半岭攀峡走双龙入眼心方洁烹茶兴更浓瓦盆声
叩罢翘首望高松

立春前五日以诗代书问蔡先生病

早起披衣唤小僮新裁柔翰走诗筒问师冷日迤邐景忆我春风坐卧中最是能安天与命况
於所遇病非穷寄诗正值韶华近可与宜春帖子同

腊月十九日立春

气转鸿钧万物新宝旛彩胜总宜人韶光破腊都逢霁玉历周年两立春暗数元正才几日须
知残岁只余旬朝来喜啜盘中饼明庶风飘送暖频

玉河水泮

霭霭春归帝里新玉河解冻泛清沦东风细拂纹如縠暖日晴摇色似银堤上爱看初绿柳汀
边凝望未生苹朝来添得流澌拥还恐游波碍锦鳞

玉河春柳

春柳碧如烟春流宛转沿低垂金镜畔斜拂玉桥边眉细波中画腰轻风里旋章台千万树美
尔沐恩先

探春花

宝粟堆枝翠叶飘年年长自报青韶隐辞残腊偕梅蕊逗漏阳和先柳条无事冶容争丽景别
余芳气散疏寮庭前试问春来未坐对方知春信饶

牡丹芽

消息东皇淑气调嫩芽新发鼠姑梢芳菲已许诗人赋丽艷犹迟画笔描风信频吹还未绽露
华暗润不须浇莫惊秃兀看来熟几日如霞映绮寮

奉和二十一叔父癸丑元日早朝原韵

昭苏万物乐春台初日天门晓景催雉尾风摇云影动龙鳞色焕曙光开蓼萧礼异周诗咏湛
露

恩从汉殿来深喜圭璋成特达髻年书史共追陪

花信风

欲识春来处先看花信风未摇枝上绿已绽蕊头红长养元功普吹嘘大造同何须催羯鼓列
绣杏园东

雍正癸丑二月七日

经筵恭纪

风光骀宕鼓春和讲幄宏张俊彦罗稽古直探谟典秘谈经远迈汉唐多炉烟袅袅香凝座鹄
列珊珊响振珂羣仰

九重敷化雨从知大地沐恩波

二月八日随

皇父驾幸圆明园恭纪五首

金輿赤羽凤城隈上苑

宸游向日开最是东皇偏有信都於此日送春来和风披拂物华妍细泛松篁胜管弦綠野陰
浓供胜览紫骝一路不须鞭

韶光先已到

枫宸芳籞迎阳景倍新

圣德体元七字里【是日御聯有节届仲春欣长养之句】由来化育即皇仁

柳堤冉冉才舒綠桃坞菲菲已吐红从识

御园春信早不关二十四番风

平湖解冻泛龙舸打桨中流一字过谩忆荷塘红十里且看春涨绿千波

千里镜

谁欵巧制过工倕玩景何须出绮帷视远惟明元在我监空无碍却凭伊光如水月初圆际了
若湖山尽历时闻道离朱能烛眇还疑千里未曾窥

清明奉

命恭祭

景陵感成八韵

犹忆髫龄际趋承

御案前可怜逾廿载瞻拜

鼎湖边锡类

皇仁切蠲辰孝享?应期春二月奉

命九重天晴旭辉征?和风拂锦鞞松榆深石路殿宇鎖云烟盛礼陈今日

深恩隔往年孙枝思

祖德回首泪潜然

憇慈云寺

晓跨征鞍日渐斜暂教小憇梵王家云深古殿苔衣润风入高松天籁譁语仆且闲从繫马问
僧何事乱鸣鸦比来尘境都消尽不用曼陀更雨花

渔阳

渔阳古名郡沃野遍桑麻士俗能知礼民风喜不奢长途来百里怀古忆三挝恰值清明日迎
神晚出衙【州民以清明日鼓吹迎城隍神谓之出巡】

盘山

盘山山色翠空蒙我欲登游雾半封寄语山灵还订约他时拟上最高峯

草色

次第和风日日殊裙腰嫩合翠匀铺芊眠大地春方半点缀寒村景不孤撩眼画图分别墅惹人诗思满归途凌晨却欲迟征马恐踏芳郊破露珠

春社

社日凭谁报梁头燕语新才看如画景已是可怜春风软游丝重晴烘花气醇赛神村鼓响酣舞太平人

赋得独倚修篁看鹤笼

万竿寒雨鎖寒烟瑞鹤笼来不计年漫忆松梢餐玉露且从竹外饮秋泉风霜纵幸离身畔鸟雀难堪噪耳边看鹤不如看放鹤一声嘹唳碧云天

盆鱼

圆池蓄水不须宽依藻文鱼自觉安待到夜深微雨滴跳波还似跃层澜

綠荇青萍可避陰一泓满贮足浮沉个中也有相忘乐不羡沧浪万丈深

赋得买夏欲论园

夏日凭谁买名园略可论青山列图画修竹是庭轩冰簟寒生簟香醅綠满樽泉声鸣石砌鸟语报松门消得三庚永浑忘九陌喧支公应问价欲告已忘言

芦塘放鸭

新蒲戟戟才生綠夏水油油欲绉波几队看他轻放去消闲不作右军鷺

老鸭湖中欲去迟回头着意顾雏儿沙塘芦岸苍茫意一幅徐熙落墨时

隐映芦洲是鸭洲一羣唼喋逐波流胜他霜信劳长路饥饿潇湘夜雨秋

风车【汤时奇肱国来朝所乘车御风而飞】

异物原非贵风车亦可称轻轻随籁动冉冉似云兴圣德寰区普遐方瑞应徵来宾非限远奉朔自相仍漫说鸾凰翼何劳騄駼腾夕轡指帝里朝轺发奇肱列子应惭捷工倕不擅能还输西旅贡鲁壁未曾登

鱼米树【一名康洋树出宜兴其结子似米则年丰似鱼则多水农家以此占年云】

春入灵根枝叶抽嘉名闻道数兴州求鱼缘木须防涝聚米成林定有秋砌荚饶他能识朔庭
萱空自解忘忧那如望树占年好岁岁农家社鼓稠

赋得船痕半载书

春水弱无力春船行觉迟饶他乘兴日是我读书时桂棹逍遥去芸编左右披纁长堪汲古何
用钓竿垂

弹琴峡【居庸关水流石罅声若调琴】

弹琴峡口聽弹琴清韵悠扬入聽深漫数成连工奏曲不须鍾子始知音调高流水谁能和响
薄焦桐更耐寻却笑陶公空挂壁何如大地是琴心

朱草【地祇格则朱草生贤人出】

圣德光天壤宸修格地祇瑞呈朱草出祥应紫云垂戟戟抽茎密离离擢干奇朝芳珠露润午
秀惠风吹不数椿知岁休夸萇应时彙征占有吉济济助无为

鹤迹

曲径苔迷路幽栖鹤作隣舞阶犹惜影步月不生尘印出留深迹翻将叠软茵松门未曾掩幸
得接嘉宾

御制乐善堂全集定本卷二十六

卷二十七

钦定四库全书

御制乐善堂全集定本卷二十七

今体诗

奉题二十四叔父裕德轩三十韵

圣治崇棠萼天心重鹄原诸藩多俊乂吾叔擅璵璠麟趾祥符厚宗璜介弟尊性情恒静正体貌更恭温尚友希千载成文易百言夙尝勤典籍频自惜朝昏深领书中味浑忘户外喧铭辞方刻器裕德重顏轩遂爽宜凉燠幽闲类涧村砌堆文石面柱立老松根谓我须题壁伊余似叩盆句羞青玉琢才愧墨花喷每忆髫童际亲承

圣祖恩漏声传禁切膏露自天繁辟咤依前膝含饴共夕殮七龄叔敏达十二我愚屯近岁

恩加渥书斋业共敦文章森义府翰墨焕崇垣绡帙循环诵琼编次第翻数曾相赏析几度易寒暄讲学欣同幄延师更一门晓晡常并席岁腊偶开罇聯骑趋香陌轻舟泛御园駉骊工步骤鸾凤必腾骞饕餮心方永从容道自存隔窗闻鸟哢傍砌长苔痕霭霭空云动迟迟午日暄春风频度处花信几更番愿永名轩志还陈攻玉论

君恩正如注砥砺待便蕃

萤

我忆去年秋飞萤几点流忽於今夏夕熠燿最高楼映月光无定随风散欲稠爲添诗客兴莫照旅人愁夜静千山寂天空万籁收苍茫芦苇岸把卷有行舟

芭蕉

几叶纷敷翠影亭却怜幽趣伴窗棂因君不是尘中质笑我常来雨里听卉谱应添居士传空阶常演涅槃经月明风静相忘处正是幽人梦蝶醒

逐凉

逐凉成独往得意亦忘言坐久看花落心闲识水源暑从尘外去风自静中喧潇洒吾何似云边白鹤翻

立秋夜作

瑟瑟金风报节频飘飏梧叶落阶新不嫌白日驰驹隙且喜轻凉上葛巾入夜渐长人未睡裁诗有兴句无尘空庭小酌龙团坐孤鹤一声隔绿筠

小园闲咏十五首

曲径通幽

爲隔尘氛远应怜曲径长纡回山势抱迢迢竹垣藏鹤步苔痕合春归花气香板桥流水外别有读书堂

芳屿围棋

乘兴步芳屿逍遥任所之已看苔作席最爱柳成帷漫煮蒙溪茗闲抛赌墅棋东山称盛事吟望寄遐思

桃溪步履

山桃开也未杖策试探寻好景春来遍芳溪曲处深明霞千树叠傍水一枝临何必武陵路随缘物外心

竹坞春深

闲过山坞里粉脱见新篁劲节当春绿疎竿泛籟长萧骚寒雨夜彷彿辋川庄不肯裁为管无劳引凤凰

芳港闻莺

春色堂堂去莺声恰恰来缙蛮聽处澁风景暗中催长日慵摊饭新缸喜拨醅笙簧随分有何必舞三台

春湖涵碧

碧水漾平湖空明一镜铺须眉应可监尘 杳然无点点浮青荇双双下白鳬春风浴沂水视此意何殊

石坂烹云

敲火乌卿炽烹云玉液清龙团曾未点鱼目已旋生漫说肠堪润应知眼倍明披襟成小啜孤鹤一声鸣

广厦冰壶

天伏三庚永堂开六月凉深深屏隔暑叠叠簟含霜底事挥纨扇无劳问蔗浆冰壶供坐卧乐意自相忘

镜水荷香

半夜芙蓉雨三间水月楼清香随处度风景一时收干密妨鱼跃花深隐鹭游诗情频入座不必问渔舟

月楼夕幌

雨洗尘氛静天空花鸟闲月楼开一面夕幌卷千山牧笛耳边过征鸿眼里还桂香依旧发付与阿谁攀

兰桡独钓

秋湖鱼怯饵把钓事如何绿水一竿竹清风几领蓑蒹葭尘外老星月个中多夜静独归去清光挂女萝

竹篱鹤步

结社松为宅看家鹤守门偏知人客至不负稻粱恩宿月精神古梳风毛羽繁由来好僮仆不必贵乘轩

芦岸秋晴

秋色知多少芦花尽白头战风摇夕浦饮露亚寒洲生意知将谢随时未肯休苍茫烟水里好去弄扁舟

板桥霜迹

隔溪亭子迴为架板桥通秋老碧天白寒流枫叶红卷帘吟夜月着屐步霜风爱此双双迹扶筇过水东

雪迳梅姿

四时花木足最喜是园梅傲雪三冬里因风几朵开清香流玉骨冷润滴水腮独有幽人赏巡檐杖策来

秋日寄高安朱先生

新凉初到北窗清闻道先生体暂平漫说春风违坐卧应教霁月仰澄明草长书带阶前思秋老荷衣槛外情遥忆匡牀闲梦蝶懒闻蟋蟀一声声

凉州词

关外风寒水不流戍儿望月唱凉州莫道凉州便絶塞还过万里去防秋

黄云漠漠连白沙秋声到处赛闻笳落日旌旗卷空碧陇头莫上上思家

戍久翻忘塞上尘笑提赌具向东邻宝刀不敢轻输与仗此区区报国身

破秋

破秋才旬日满目便秋光楼迥轻岚入林疎爽籁长镜波方淡沲芦花转苍茫淪茗烟生户开帘月上牀心如寥廓表境是水云乡敲句娱寒夕翻书趁晚凉风清尘不杂意适倦都忘个里无人会天边雁几行

荷灯

点点荷浮瑟瑟波丽华端不让湘娥灯明万朵莲心吐月印千潭法海多只是金英含绰约无须绿盖舞婆娑御湖锦绣凭谁织来往轻舸一夜梭

槐市【汉羣儒会市礼乐之器於此揖让论辨彬彬然】

文物东都盛声名槐市扬学渊深璧水义府俨宫墙特達珪璋器从容礼法場无劳评月旦此处定行藏

清河送平郡王西征

宗翰临戎剑气寒来廷屈指觀呼韩秋风惯拂征人面马上何须回首看

溶溶碧水向东流戎马催程敢重留莫把渭城新曲子翻成水调唱凉州

武略文韬藉指挥书斋倍觉有光辉六年此日清河畔君作行人我独归

秋社

秋社今朝是秋光迥不同庭前梧叶落梁上燕巢空村酒成新酿田禾飒晚风太平兼大有烟火万家中

卖菊翁

秋光未到小篱东已有街头卖菊翁满担寒芳霏玉露一帘清气韵金风

巧数花师夺女夷四时芳信总先知深红浅碧浑余事先买鵷黄第一枝

夜聽落叶声

半榻秋寒清梦魂纸窗飒飒响声喧浑如一夜风兼雨童子开门叶满园

霜後疎林叶已乾清宵风送打窗寒飘零今夜知多少晓起凭栏仔细看

始裘

霜满园林叶作声薄寒风度几窗清试开旧篋衣频换才着新裘体更轻冷暖由来皆有定推迂何事重关情薰炉沉水从添未消得三余乐事并

赋得野径寻梅见小春

幽谷香凝冰玉腮寻芳才见一枝开雪封野径行行远春到山村得得来最爱轻盈含数点莫愁狼籍落成堆明窗雅助新诗兴座上曾延萼绿陪

櫟括苏子瞻後赤壁赋即用赋字

赤壁我曾识巉巖今复游千山木落叶十月夜登舟寥寂吾良乐风霜客不留横江一孤鹤不与岁时流

送桐城张先生暂假归里

丹凤衔书下紫廷枌阳早已望台星

新恩优渥荣旋里旧德绵长肃荐馨【时以故大学士文端公崇祀贤良祠於本籍赐祭】北阙丝纶方待掌东山弦管暂教听即看稳步沙堤上扬拜从容对御屏

西廂騎射

霜林葉落雀羣空馳射平坡試駱驄猶憶三春陌上過玉蹄滾滾踏香紅

萬年松

勁干挺森森窗前滴翠深依然臨水石即此是山林香氣蒙春霧華枝覆午陰瓶梅與盆竹聊結歲寒心御賜端硯恭紀

靄靄午窗明融融御苑晴

恩波流浩蕩緗案沐光榮雅質傳端石高標紀旧坑一泓秋水淡幾片碧雲清入席添詩興開囊粲玉英虬龍渾欲動藻采自然生學海慚無戢心田勉欲耕研精書史里總是被生成

歸鴉

歸鴉集庭樹翅影帶斜暉傍晚羣爭宿逢人馴不飛遠村霜月冷古戍稻粱稀始信鄉園好枯枝猶可依

十宮詞

吳宮

白苧輕盈屢響廊青龍舟里換晨妝夜游朝宴千年樂那管人間有越王

楚宮

渚宮春暖翠華遙帘幙风轻裊細腰不道君王深注意行云行雨隔迢迢

秦宮

春鎖阿房靜管絃塵生舞袖爲誰妍從來不識君王面忽過人間卅六年

漢宮

水晶盤淨玉腰酥舞態生伶可用扶底事天家萬乘富等閑難獲昼明珠

魏宮

平生戎马乐何曾铜雀成时几度登不爲夜台听不见悲歌一曲向西陵

晋宫

灭蜀平吴处上游大开武库甲兵收而今四海浑无事只驾羊车日夜游

齐宫

步步莲华步步春香凝罗袜不生尘何须洛浦遥相见已是人间有洛神

陈宫

结绮临春户对开后庭花发引金杯景阳钟晓方酣宴不信横江木柁来

隋宫

海错山珍杂绮罗銮輿空待未曾过夜深欲识君游处但看飞萤点点多

唐宫

沉香亭畔晚春妍玉树烟浓院宇连何事宫娥羣戏剧应缘分得洗儿钱

帝京杂咏

九点烟中古冀州万年天府壮宏猷
裔皇礼乐三千盛襟带山河百二稠
天上楼台悬日月人间车马富王侯
太平有象光遐壤况是神都处上游

高标象魏五云端帝座重重瑞靄攒
自古几朝称景运如今此地是长安
文章二马应惭盛吏治三王未足观
总是太和薰郅理天街十月不知寒

辐辏千家日月旁九衢风送玉尘香
欢腾履义行仁里春暖瞻云就日坊
驼背伊歌翻续续象奴蛮曲喜洋洋
六龙幸处阳和豫夹?平铺软土黄

玉螭桥头望禁林重重楼阁耸千寻
两行烟柳春光媚几顷澄波緑意深
池水皆成灋润泽宫墙常透市朝音
大家真是同民乐不异薰风解阜心

题宋徽宗竹枝双雀

两两珍禽翠羽修緑筠深处舞风流
笔端多少江南意何事终成塞北游

题吴梅村集

梅村一卷足风流往复披寻未肯休秋水精神香雪句西崑幽思杜陵愁裁成蜀锦应惭丽
细比春蚕好更抽寒夜短檠相对处几多诗兴爲君收

十一月十三日恭遇

皇祖忌辰感成长句

浩荡洪慈被九州

一人常厯万年忧丝纶允协衣裳治冠剑今惊岁月流自隔

音容周一纪敢忘

恩泽永千秋朝来更忆攀

龙日仰首高空泪不收

橄榄茶

吹雪磁瓯絶点瑕新烹异品味尤嘉山厨漫说玫瑰露高阁初尝橄榄茶兴入卢诗风满腋书
浇边腹响鸣车武夷应喜添知己清苦原来是一家

癸丑冬至

上躬祀

南郊回銮恭纪

星云紉纓灿神京玉路喧传警蹕声长至履端仪告备泰坛寅祀礼初成

龙輿喜见千祥集象輦旋看百辟迎最是一阳初复处永绵多福洽

皇情

顒若诚通显肃将天心消息复微阳和鸾九奏鸣韶濩奠璧三躔纪奉常候气羲和应告瑞书
云太史正占祥今朝纳庆

宸衷豫

宝祚绵绵日月长

鸳鹭千官拥

六飞午门钟响散晴晖阳回

御座衣裳暖风动龙旗日月辉霭霭上林暄玉树依依青琐敞彤扉近光兆庶瞻香雾共道

君王迓福归

冬至後一日同二十四叔父五弟游西苑试射

骏马紫藤鞭宫城九陌连平池铺玉镜晴雪晃金钱欢赏娱今日追陪忆往年东瞻

宸极近霭霭祥烟

轻风摇苑树碧宇散晴光气复初阳暖人迎化日长缘堤看冻柳系马坐冰床到此同携手临
风乐倍常蕉园成古刹乔木隐伽蓝贝叶飘花雨香云护宝龕随缘游胜地泯念礼瞿昙何用
僧雏引由来此路谙太液无劳渡羣欣步履行龙宫隔?耸玉螭跨波横不见潜鱼跃空闻寒雀
鸣平田丰泽北指日试春耕【丰泽园北有田 上演耕藉礼於此】

燕角敦弓劲轻杨翠羽修中时惊月落发处迅星流更步三梁阍因登百尺楼淑清迟胜约聊
待再来游【瀛台东北有淑清苑是日偶未到】

迎薰亭子畔山势鬱崢嶸松柏开三径冈陵列几层石龕穿洞入云窦扪萝登蜡屐肩輿胜都
输莲社朋乘兴到瀛台诗情入目来水心飞栋宇人世入蓬莱雪覆孤桐直风吹虚阁开旧时
听讲席亦复满尘埃烟光凝远岫晚景向西斜旧熟神仙境重游山水嘉风声送归骑月影照
栖鸦漫忆十年事心清一碗茶

御制乐善堂全集定本卷二十七

卷二十八

钦定四库全书

御制乐善堂全集定本卷二十八

今体诗

题唐岱画页

峨嵋铺云

春入冈峦暖欲烘翠云铺岫淡冥蒙寺临峰顶岚烟护阁跨川梁雾气通疑有王乔乘碧落那
无列子御清风海尘任起石山下长对方壶弱水东

秋涧鸣泉

滴滴复淙淙飞泉挂玉峯聽时秋韵肃望处翠烟浓丹改寒枫叶黄添细草茸披图饶逸兴拟
欲策孤筇

潇湘烟雨

瑟瑟潇湘烟雨秋凭将妙笔写风流苍茫云水望无极佳句都输赵倚楼

湖山春晓

我爱湖山好春来景倍嘉和风吹淡荡迟日丽穠华柳岸青垂缕桃谿锦叠霞新针抽嫩稻碧
叶暗疎麻峯黛疑灵鹫波光是若耶轻舟浮水面芳径引山家渲染毫添润游观兴自賒何须
蜡双屐小阁坐烹茶

山雨欲来

南峯北峯云布千树万树风生独凭危楼望远忽然檐滴琴鸣

远浦归帆

天末见扁舟顷刻来前浦塔院晚钟声客船一夜雨

浮岚暖翠

宿雨含朝润浮岚望处深溶溶流碧水冪冪暗疎林万壑轻风度重溪暖雾沉高低烟翠里终日愜登临

烟浮远岫

水阁临波结构奇秋澄千顷碧琉璃何人闲倚危栏望正是烟浮远岫时

渔庄雪霁

把钓寒江雪送归琼瑶埋径认依稀点空远色迷前墅积素遥岑对野扉此日定知鱼不饵长天乍见鸟孤飞晚来簑笠檐头挂隐隐村墟澹落晖

夜坐

月满窗棂风满帘地炉银烛暖帷幰更因静坐听逾永诗到寒吟兴屡添梅插几枝供绣佛香熏一炷阅楞严於今识得清凉乐向火何曾为附炎

水云榭

云无心出岫水不舍长流云水相连处苍茫数点鸥坐席生烟云石栏俯秋水空明是我心何如漆园史

读王安石传

保马青苗次第行累朝成法忽新更难将知己酬神庙都为违人用惠卿当日司权原作福昔年辞召岂真清试看安石居然出不道苍生转祸生

幻景四咏

鏐马

雨夜风晨梦里惊青骢去後只闻声嘶残落月溶溶色响动深闺脉脉情丹凤城头还独宿祁连河畔镇孤征将军功与云台并几见临风血汗生

镜花

个里春和分外长不随代谢镇芬芳香尘如雾何曾着彩蝶成羣那觉忙阶畔日暄同借暖檐间风度共飘香仙家若把壶中种诂向人间见阮郎

水月

一颗明珠镜里涵水轮孤影印千潭妙圆俱足真无碍形色难求最好参风动波纹光似烛水含云影碧於蓝池边掬起还凭手归路须盛无底篮

蝉猴

久竹青宁生不休阿谁妙慧制猕猴蜕身粧出看新巧薄质生时忆去秋深馆三更人共舞江陵千里客同愁万年松绿磁盆净时缀高枝最上头

冬夜忆平郡王

暖阁熏炉刻漏移闲情万里忆相知高斋趣永三余乐絶塞风寒列戍悲约计凯旋应指日欲缄书寄更无期难堪剪烛清吟夜念到寒更毳幙时

冬夜食哈密瓜

异域称奇品中宵润客肠霜刀剖翠质冰齿嚼黄瓢清解心头渴甘生舌本香东陵无此种包贡自西方

龙翰傅先生蒙

恩简署司寇诗以贺之

一纸宣麻特进班虞廷弼教典秋官平情早识悬冰监纠恶仍然领豸冠阶秩频膺八座贵

丝纶荣锡五云端从知刑措襄

王化台斗星明傍日看

游蕉园

冰牀声里过长湖远岸人行似画图雪覆蕉园松突兀云生古殿路虚无南临太液风铃语北望琼华塔影孤屐齿几番游历处寒林已聽噪归乌

赋得自鋤明月种梅花

溪畔梅花欲放迟数株分种傍堦墀锄翻夜月和香动手握寒根带影移花信漫愁催落蕊画檻初有照来枝何须秉烛寻幽趣举首冰蟾未墮时

与唐岱【唐善画山水】

范缓倪迂自古人而今绘事数唐寅安排邱壑浑无迹盘礴丹青别有神远坞人家烟淡淡野桥流水石粼粼买山不用闲寻访倩尔拈毫眼界新

百衲琴

涪公精物理百衲制名琴见说风流极悠然山水心桐孙劳细缀焦尾漫相寻指上宫商辨谁知弦外音

题易祖栴墨竹卷

翠扫琳琅绕曲池东坡妙笔写幽姿一声清籁露华湿万个寒梢月影披想像笙簧吹飒?依微烟霭辨参差香篝银烛消长夜恍似潇湘晤对时

雪事八咏

东郭履雪

敝履雪中行皑皑满地平无须怜玉趾真是踏瑶京晃朗花纹绽蹁跹鹤步轻等闲蓝缕客东郭独传名

苏卿啣雪

寂寞穷荒北飘飏冻雪凝饥肠寒可供浩气馁何曾聊共羶毛啣从知苦节胜少卿难共喻心事冷如水

袁安卧雪

雪深门巷迴僵卧有余清不作干人想何烦除道迎漫空飞淅沥扑户转轻盈素履幽人吉千秋仰令名

谢庭咏雪

谢家夸宝树咏雪一庭同独许闺中秀浑如林下风无心裁绮句有意惜飘蓬何幸三春柳能兼造化功

王恭涉雪

朝罢催归骑天街微雪连喜看三白瑞低覆九衢烟缓度高輿稳轻披鹤氅翩窥篱人落魄惊许是神仙

孙康映雪

积雪夜谈经寒光映满庭云铺难逐月冬破乏囊萤岂为怜飞白聊资照汗青朗然消万虑眉目觉清冷

陶谷烹雪

削玉更镂珠寒烹清味殊天香沁肺腑冷色上眉须玉食何须羨山厨且自娛羊羔千斛醉漫愧党家奴

程门立雪

洛学先生启巍然道德崇雪深双户外乐永一庭中久立情靡倦端居兴不穷伊人非耐冷应为坐春风

题董元山狩图

山境忽穷处潺潺野水流凭谁添略约引我度荒邱涧草深藏鹭巘藤细舞虬几株枯木冷一片白波秋挂壁延清瞩横溪足卧游爱耽风景别不必问孤舟

题邹一桂花卉十二幅

杏

春雨胭脂洗嫩华几枝浓叠赤城霞双鸾恒在云深处不遣飞琼到阮家

梨

比桃清絕比梅妍风送嫣香户牖传寂寞云鬟不堪整恼人天气暮春天

芍药

繁红艷紫殿春余第一扬州种色殊逞尽风流还自恨被人强唤是花奴

紫藤

紫藤花绕苍松树嫩蕊垂垂丽几多一夜西风吹白露还输老干耐消磨

葵

金盘向日如承露怜尔倾心为阿谁午静花砖风影直将开又是最南枝

碧桃

薄縠轻绡丽午风画堂人静暮春融重门难把芳心绾独露一枝深院东

酴醾

羞与羣芳争冶艷每於幽处见丰姿但教香色寻常在莫恨人间知不知

虞美人

一曲虞兮怆别神徘徊犹忆楚江滨那知爱玉怜香者不是当年姓项人

山丹

斓斑瓣纈黄金点错落花擎赤玉盘砌畔落残供上药旁人漫作女儿看

石竹

也向人前称此君一丛翠带衬红云但教色媚时人眼漫说檀栾独出羣

牵牛

脆蔓芳葩绕竹生锦裳披就下瑶京莫耽佳丽人间乐河畔盈盈最有情

菊花

看到东篱觉有神风流画史更诗人素华独殿羣芳後个里原藏万卉春

甲寅元日立春

青阳韶运会三寅节应王正景倍新万彙欣沾元旦雪【是日瑞雪】百年喜遇岁朝春昭融
气协鸿钧德浩荡

天开大造仁献岁椒觞还献壽永绵福履祝

君亲

雪消

皓素漫空映绮寮春回大地冻全消光凝玉树寒深浅水润兰阶影动摇梅已过时添旧蕊柳将应节放新条朝来最喜沾濡足指日芳畦透麦苗

春晓

绿野朝烟歛春生料峭寒披衣闲独步晓日正三竿兴逐东风去心随大地寬桃花开也未聊复倚栏看

上林花气

户外春光到几分嫩红新绿间缤纷清浮玉露琼葩润芳透珠帘沉水焚散彩偏承晴旭照飘香多为惠风薰锦丛绣径经行处蛱蝶惊飞已半醺

清明前三日

御试命和唐人韵口占应

制

千红万紫正纷纷暗引寻芳蛱蝶魂欲识太平真气象五风十雨杏花村

榆荚雨

紫房铸出沈郎钱庭院霏霏散暖天最爱一朝榆荚雨买成十里柳丝烟

春云

淡荡凝佳气氤氲散远天点空晴旭漏出谷晚霞穿麦陇将翻雨花街正暮烟天衣谁为织高映九霄鲜

题唐岱仿古十二帧

翠滴螺峰絶点埃几间板屋面波开为穿曲径通幽处惹得游人杖策来

萧寺高临云壑秋一声清磬万缘收却教健笔图清胜好与诗人作卧游
阁跨明波映水红开窗不断芰荷风巨然一幅风流意都入云烟淡抹中
飞流瀑水泻银铤散作平湖漾碧冷最爱高楼临树杪好山浓入四时青
米家家法有谁传渲染烟岚逼老颠最是披图堆湿润江南五月熟梅天
桃蹊柳径行行远水郭山村处处幽日暮高斋读书罢一篙新绿泛澄流
宗?吴兴皴法奇千峦万壑正秋时云间高阁依微辨为爱拏空松柏枝
板桥几曲接回塘烟树迷蒙晚影苍欸乃一声人卧月不知身在水云乡
翠含眉字列遥岑亭子临波暮靄沉淡墨天然饶气韵由来逸品数云林
两岸猿声一叶舟客窗钟醒梦魂留美君图写生绢里朵朵芙蓉天际浮
七尺青竿五尺纶春波镜面色铺银一声长啸沧浪濶不羡当年钓渭人
胸中邱壑三冬瘦手底琼瑶六月寒大地忽教成一色凌兢拟踏马蹄看
甲寅三月

上耕藉回銮迎驾恭纪

昭苏景物正勾芒千亩

躬耕典制详禹甸三春荣草木周官六礼焕旗常均平何用郊人耨丰稔遥占太史祥最是
圣情勤保赤欢腾父老列成行

御苑亲推步玉田青旗摇曳引祥烟

九重云拥千官仗万卉春和三月天乐奏回銮鸣凤管礼成

帝藉纪瑶编前期时雨霏微洒早卜寰瀛大有年淡荡和风霁景开天闲十二驾龙媒香街几
里花如雾绣陌千塍车似雷华宇共沾

恩泽普

御园羣仰

圣人来迎

銮蹕跃葵忱切独愧凌云献赋才

读董仲舒传

不问苍生问鬼神犹蒙宣室席前亲谁知寂寞江都相老抱春秋一远臣

同五弟舟过万壽寺小憩

桂櫂轻移过水村午风吹送孤园繫舟鴈侣同登岸迎客山僧远出门古殿灯明佛日照斋厨火熟野蔬温绿杨十里连归路弄影寒鸦语更喧

御园从耕恭纪六韵

上苑土泉滋

躬耕膏壤肥礼因加

帝藉心是念民依水暖流塍细光融向午晖省耕廛圣虑终亩沐

恩辉种布珠尘坠犁翻玉屑飞农劳诚可念丰稔愿无违

积书岩【河北层山岩有石室室中若有积卷故名见水经注】

杳杳层岩里依稀卷轴重瑶编余鸟迹石室有云封何异金泥密空怀玉检踪草青书带细苔碧篆题浓灵籙谁能识神仙或可逢洞天多秘藏蹊履欲相从

蜂衙

百忙忙里过三春晓色催衙欲放晨酿密应教输玉府添丁何事按鱼鳞花间户牖重重邃门外风光日日新采得琼葩无限喜更看归仗簇前陈

赋得沙留鸟篆斜

好鸟离芳树春晴下锦沙繁音奏丝管古篆印龙蛇纷错苍苔偃纵横绿字斜蹄近谁爲辨新涨莫教遮

辘轳声

渌水涨平湖春田转辘轳耳根鸣断续眼界乐沾濡漫厌繁音急从观生意苏机心缘力稼不与汉陰殊

蝉始鸣

浓陰一带暗溪烟曳响新蝉噪午天曾记去年嫌聒耳今朝初听转生怜

绿林高处弄微声似话寒暄最有情向晚临风吸清露枯枝遗蜕认前生

春园几日罢流莺又听新蝉嚶嚶鸣谁道耳根难摆脱请君听取噪前声

御制乐善堂全集定本卷二十八

卷二十九

[集部,别集类,清代,御制乐善堂全集定本]

钦定四库全书

御制乐善堂全集定本卷二十九

今体诗

烹茶

梧砌烹云坐月明砂瓷吹雨透烟轻跳珠入夜难分点沸蟹临窗觉有声静浣尘根心地润闲寻绮思道芽生谁能识得壶中趣好聽松风泻处鸣

石笋

朝岚浓处万峯连紫碧棱棱滴翠鲜疑是仙家炊玉版却教洞口扬轻烟

雷雨初过石榴痕远峯秀矗两三根化工造物原来巧翠映筠篁绿满轩

过雪上人禅房

上人飞锡处过客息车时花现优昙色林深贝树枝看门鹤影瘦聽法鸟声迟最爱清凉地尘襟天籁吹山僧静闭关白云镇封户金猊喷意香玉砌飘花雨法堂自鸣钟方丈频挥麈入座聽谈禅林间日过午

赋得得雨溪声壮

山雨昨朝过沿溪景倍多平添三尺水高涌几层波繁响鸣琴筑余纹散縠罗昨来游赏处乍喜放新荷

雨後池塘闲步

青鞵步履过桥西细草轻莎点活泥颤雨芦梢才卧起笑风莲萼乍开齐参差远岫烟犹湿摇曳长条翠欲迷霁後园林风景别好供诗料任拈题

颁水

金鎖开丹闕彤墀綴晓班政施依月令恩沐拜

天顏职是凌人掌时当仲夏颁清泠泉洒沫朗照玉堆山惠逮鵷鸾侶凉生几席间清都悬月镜溽暑避尘寰

题元佑党人碑

元佑清流号浊流党人镌石石遗羞祇今欲补名臣传犹喜残碑姓氏留

夏日园居即事

园有山为郭斋因树作墙开轩惟欲敞引径不嫌长淡月梧桐影轻风萝薜香无心潇洒客胜地足徜徉消闲凭笔墨无虑即渔樵为爱尘氛远宁耽景物饶清风满襟袖夜雨聽芭蕉好谢猴山客烟霞不可招宿雨润新葩红蒸一片霞看云闲藉草爱客缓烹茶坐弄流泉洁眠当皓月斜子西得意句分付与山家綠竹令人远青松迴出羣山明眉乍画溪暗带如分古帖闲来搨名香手自焚晚凉急雨过星汉淡微云为有披襟者林风拂面来芙蓉碧沼丽杨柳夏亭开爱鹤闲移榻呼僮淨洗盃往来依石径半为爱苍苔板桥波上跨步履似乘船綠水平铺掌青杨暗鎖烟鱼多原不釣花落自相怜一幅江乡画凭将俗虑捐催荷清籟急挂树夕阳低信步过桥北乘凉到水西添丁鹤生子营户燕衔泥更拟扶筇去裙腰翠欲迷梧竹影纵横轩窗倍觉清草青阶砌合荷放镜池平洗砚临流碧摊书卧月明谁家弹百衲流水一声声

夏日寄龙翰傅先生

轩檻闲敞午风凉为想高斋静趣长松柏蟠龙尘自远精神秋鹤病无妨竹牀拂簟醒残梦石鼎烹茶泛乳香试问何人施肘後早教霁月映书堂

雨中舟行看山

轻舟细雨杂微风十里青山杳霭中柳岸遥看新洗綠荷洲还似乍添红润含螺黛峰头滴曲转芳屏径里通何似水亭闲倚榻一帘烟景坐空蒙

避暑

避暑消长日浑忘户外喧午宜开北牖晚称卧南轩带月蝉声静临风树影翻凉秋弹指到何用苦歛烦

夏日寄二十一叔父索诗画

庭院清凉竹柏新悬知诗画倍通神胸中早贮千年史笔下能生万彙春临几兴来铺越练当

窗茶罢试龙宾琼瑶乞并缣绡惠景仰还期步後尘

赋得人立藕花风

徙倚眄莲塘凉飏引兴长披襟清暑气扑鼻送花香露滴珠玑颗波明锦绣粧余芬迷蛺蝶幽梦睡鸳鸯出水青罗盖临风紫玉裳谁能劳步履竚赏水云乡

六月晦日作

夏令今朝尽西风明日迎谁知销半岁都为过三庚榴火临窗暗荷香入座清夕阳蝉噪急已带早秋声林中闲避暑石上坐烹茶绿树引清籁红云叠绮霞葛衫输羽扇蛩响杂池蛙入夜清怀永微吟愧八义

咏史十首

乐毅

君臣知遇甚分明七十齐城智力胜可惜惠王承父烈却教名将避青蝇

屈原

千秋遗恨楚江滨宗社将倾敢惜身何事承平汉文代长沙偏欲学斯人

董仲舒

建章奏对策天人帝眷名儒礼独亲谁使江都终老去千秋史论恨平津

李广

平生义勇陇西闻命蹇终难与策勋回忆灞陵遭醉尉那知渠是故将军

苏武

嚼雪毡庐心似冰故乡远寄鴈书凭难堪持节旋归日秋草萧萧老茂陵

李陵

生降迹似负恩深谁信区区报国心他日王庭对苏武空教泣下数沾襟

东方朔

毕生玩世事诙谐朝隐端知是逸才却被何人入仙史虚夸阿母宴蓬莱

田千秋

高寝郎官能悟主应时一语便封侯试问两宫猜贰际长陵封事为谁休

萧望之

不知廷尉是何司饮药空教洒泪悲最恨老臣遭毒?显恭叩首只移时

王章

当年相对泣牛衣此日忠言触祸机漫道忤时缘激烈三王誉早播京畿

竹里流萤

琅玕清韵肃熠燿夜光浮翠影千竿静踈星几点流眄林何用烛应节已知秋犹忆隋堤畔王孙彻夜游

雨夜闻梵声

霏微萧阁坐秋霖点滴檐牙入夜深何处山僧散花雨却教仙梵杂潮音

不卷珠帘户半开经声还共雨声来明朝为凭朱栏看阶砌青青点嫩苔

新秋

松舍萤光点蕉窗蝶梦成风从今夕爽月比旧时明蛩响缘阶急蝉声向晚清新凉才可乐莫漫动秋情

秋热

踈梧叶落早知秋转觉如蒸暑气流翠竹尽闲天籁寂晶阳高暴午云收频挥葵扇凉颺动漫彻冰盘碧玉浮借问炎熇能几日祝融返轡肯重留

秋英

谁道西风急能摧衆卉残石栏纷翠缣藓砌簇金冠入夜香偏细凌晨露未乾化工工点缀转觉胜春寒前寄诗索二十一叔父近制承惠尺幅兼辱和章仍用元韵志谢

露润霜毫句倍新松筠潇洒鹤精神一天爽气高怀邈尺幅霞牋锦字春幸作开筒吟句客犹慙据案论书宾生绡惠我王维笔三远由来不染尘

为爱园林秋景新敢从芳藻覩丰神寒潭月影空中画落叶风情幻里春响奏阶前蛩促织书排天外鴈来宾阿咸近日尤无似杜老空劳洒玉尘

南华秋水一泓新抚景悠然觉爽神已媿徵诗裁下里还叨步韵咏阳春心情近似天边月花竹聊充榻上宾桂露满瓶熏手读恐教仙藻污凡尘

雨夜闻蛩

一枕新凉雨未休王孙何事独添愁吟残衰草空阶寂叫彻寒宵半榻秋清梦乍回银漏永踈梧渐隐玉蟾收声声入聽增吟兴彷彿深更互唱酬

陰阳石【荊州狼山有二巨石一燥一湿俗名陰阳石每天时不调鞭陰石则雨鞭阳石则晴见荊州记】

异石含精秘能为造物先凝灵原藉地应候忽知天旱涝无烦虑陰阳各异鞭楚民应击壤岁岁乐丰年

晴

浮岚散天宇爽籁拂秋晴光漏微穿牖霞残淡抹楹才添池水涨乍觉远山明萧阁尘氛淨新凉着体轻

郭河阳峩嵒霁雪图

积翠林峦湿未乾迢迢蜀道接长安石门冰雪尘氛淨驴背风霜客路难梵宇凌空知日近翠微开霁倚云看河阳一幅风流笔三十二峯春正寒

军装八咏

胄

虎皮蒙铁叶贝齿饰黄金犹忆絶纓会能收壮士心

铠

细铠攢金綫蛇鳞鎖玉环唐夷已穿破未入玉门关

刀

陇戍悲风起将军髮上指敌来知何处欲试匣中水

弓

三秋塞草长鼓臂挽弓强临风悬满月百步殪豺狼

矢

饮石称神力中环能制胜谁道天山遥只须三箭定

麾

纛曳流虹阵列长蛇势指挥王者师立使风波济

矛

画干凌风直屈卢立月寒沙場恒作伴应为苦羈单

袍

三军温挟纊天府制将来何似家乡寄伊人手自裁

昼漏

昼漏声催午籟长踈梧翠竹隐秋光目随野鹤神同远诗寄高岑句亦凉霜信排空寒淅淅芦花亚浦飒苍苍知心一片南华水潋灩含风荡夕阳

洞庭始波

岳阳楼下楚江分天净长空水蹙纹最是洞庭秋意好西风明月吊湘君

一天秋色晚云低碧涨寒江远欲迷棹破烟波三百里好风吹送岳阳西

楚水巫山秋意多轻颺一夜洞庭波谁知帝子无寒暑八月风凉试穀罗

鬪蟋蟀

养锐欲相争盆中鼓翼鸣庭莎铺翠褥璧室列坚城霸气撑双臂雄心突两睛可怜一朝忿微物也捐生

赠从军者

秋风吹塞草壮士往从军大节羣推汝平生此报君朔云天际暗寒袂路岐分迢逦交河道笳声不可闻

秋畦

秋畦零白露生意讵尝停残艸菠根赤新抽韭叶青架除通户牖叶脱豁轩庭曳履经行处寒蛩入晚聽

秋

瘦竹修梧接桂丛风帘半掩翠翳蒙晴光乍向疎枝漏寒影频从隔岸通白露润涵文几上凉颺潜入綺疏中披襟试向阶前看糝径还添几片红

中秋前一夕对月

丰隆知节近此夕密云收【连日陰雨是夕忽晴】规满疑金镜辉遥胜玉鉤入波光不定度竹影偏流为爱中秋景先期独倚楼

澄江如练

霜满江城叶落时洞庭秋意许谁知远澄潭影天光合净叠风纹练色披河伯波涛徒自诩天孙机杼未曾移晓来渔笛冲烟散恰似并刀欲翦迟

闻鴈

嘹唳长空鴈阵过行宫月影上松萝寒更半为抽思永秋韵无妨入耳多瑟瑟风凉愁欲断寥寥天末远相和芦花浦溱溱明如镜清怨潇湘意若何

暮过御河桥

太液风漪正作秋残荷疎苇冷飕飕爱看好景瞻天近漫忆春光付水流玉螭桥头催晓骑五龙亭畔起沙鸥归来无限低徊意月照桐窗影半鈎

吴殿怀古【在南苑中明时行宫也苑内有晾鹰台射鸭池】

烟柳残芜鎖败垣空庭寂静晚鸦喧晾鹰南望高台迴射鸭旁临废沼存想像朱廊曾响屐空传金屋最蒙恩客来指点前朝事极目寒晖散古原

瀛台观木变石

异质传何代天然挺一峯谁知三径石本是六朝松苔点犹疑叶云生欲化龙当年吟赏处借尔抚遐踪

水始冰

漫坐冰牀罢泛舟沿溪初看碎琼流芙蓉倚岸凌霜晚鸥鹭成羣忆夏游何处水亭珠箔卷谁家古渡钓纶收萧疎杨柳眉难画一片清光上绮楼

板桥霜迹

回溪霜月落略约带余寒曙色暄犹润晨行迹半残凭添驴背冷未许屐牙乾此趣何人会清吟倚石栏

刻漏

刻漏迢迢霜月凉曲屏银烛灿辉煌句排七字更忘永时到三余趣转长砌竹迎风敲緑玉窗梅和影弄明粧年来消得冬宵味半是煎茶半爇香

题焦秉贞人物画册十二帧【每帧二絶句】

雕阑曲曲倚云娥嫩日烘晴胜事多赌掷秋千携伴侣緑杨影外舞傞傞

小板涂朱贯彩?婵娟天上踏云登柳风拂处人吹过环佩声摇最上层

帘幙周遮重复重春情难绾倩云封蛾眉兀坐低无语金鸭烧香镇日浓

户外辛夷已放齐花光掩映碧栏西帘栊不闭虚堂敞飞集黄鹂恰恰啼

平台文石净无尘小立凝眸景物新春到人间饶富丽柳烟花雨总宜人

迟迟春日上回廊庭院深沉午昼长徙倚东风不归去撩人花气扑衣裳
佩环声响出帘帷结队双双莲步迟红紫隔垣纷泼眼临风小语立移时
望里重重绮作疏闲庭风暖午晴初能言鹦鹉窥人语报道春寒已尽除
廉纖细雨密如丝点滴檐声落玉墀消遣余寒香阁里花牋闲劈自题诗
绿窗高启对迷蒙云影垂垂满太空花好不禁遭剧雨落红明日扫晴风
晓风澹澹爽於秋笑语声喧绿水洲贪采莲花归櫂缓一轮红日上山头
高荷朵朵映波纹大叶田田散绿云清露滴盘珠万颗掬花倾湿藕丝裙
亭外无人夏日长名姝追暑倚匡牀临风试舞翩跹态消遣闲看小女郎
高柳陰浓暑不生小亭终日有余清筠帘卷处风吹到送过凉蝉断续声
瑤窗深闭静无声隔断凡尘院宇清闲赌围碁消乙夜祇闻膈膊响楸枰
漏滴银壶箭响时手谈无语罢碁迟烧残红蜡斜明月阶下梧桐影已移
闻道瑶池阿姥家琼宫璇室鬪高华就中俨亦成瀛阆几队仙姝倚立斜
翠壁撑空石气寒回廊屈曲倚漓岏姮娥镜檻粧初罢宝鼎香浓熱未残
晚凉庭院与人宜手把生花掬一枝罗袖高擎香不断轻风有意往来吹
踈篱巧樣织山屏点缀花枝映画棖多种芭蕉聽夜雨风旗舒綠覆檐青
月户团圞中有人文疏绣桷绮堂新琵琶一曲声清脆大小珍珠散落匀
松风谡谡拂香帟闲拨檀槽响彻扉惊起栖檐双白雀空中鬪舞绕林飞
一剪貂茸覆绿云温房煖室地炉熏任他帘外寒威重金璫仙醕注十分
华灯悬处影珑玲瑟瑟踈林朔吹生启户月高天宇迴雪峯数点映空明
御制乐善堂全集定本卷二十九

卷三十

钦定四库全书

御制乐善堂全集定本卷三十

今体诗

冬月盆菊

潇洒东篱已过时文罍佳色尚新滋未残绿叶纷千点初放金英簇几枝高格傲霜兼傲雪逸情宜画亦宜诗晚来篝火清吟处静领寒芳得句迟

冬日同五弟游西苑即事

上林冬日暖风物转暄妍草色余青毯晴光扑锦鞯探幽寻胜地抚景忆流年诗意催归辔飞鸦带晚烟

甲寅冬至

上躬祀

南郊恭纪四律

驰道曈曨散曙光祥凝玉辂焕龙章精诚

圣德通

乾祝肃穆

皇仪纪奉常黍谷灰飞方应律云门乐奏正迎阳微风不动柴烟直遥望天门辟九阊

一綫阳和何处生重重瑞霭映层城晓光彩映霜花动韶律春回朔气清百福均随长日至九瀛并奉泰阶平上林已先东皇令殿柳宫梅欲向荣

晴旭融融耀晓晖和銮鸣处启天扉一阳已复凝千祉万乘初旋拥六飞云物定书丰稔岁祥烟欲上

袞龙衣

圣衷乾惕昭寅祀兆庶羣瞻迓福归

昭苏景物漏春妍初动祥风拂晓烟五位福凝璇象转一阳德合

圣恩宣瑶编纪瑞飞琼管篆缕凝香绕

御筵最是欢声连九陌千秋同祝太平年

蜡日坐水牀渡太液池志兴

破蜡风光日日新曲池凝玉净无尘不知待渡霜花冷暖坐水牀过玉津

太液人行步玉花金鳌遥望鎖烟霞胜游不数琼华岛爱听寒林噪暮鸦

冬夜

八日方过蜡三余好是冬漏长银箭涩炉煖绣帘重梅帐春融雪松窗月舞龙忘言参鼻观一缕篆烟浓

灯花

兰烟凝宝鸭玉烛灿银檠坐久轻花结春来喜气迎辉煌纷散彩的烁镇敷荣锦绮新添瑞华堂更助明阳和一室满风月九霄清佳祉欣占报新诗藉尔成

探春

柳岸轻黄染薄纨风光摇曳许人看花砖度影晴初放锦甸成泥雪半残何处乍开金屈戌谁家试倚玉阑干闲情都被春情绾莫漫寻芳趁晓寒

春晓

春晓晴暎丽名葩宿雨滋红深新着色芳细润含姿蝶入花房重风舒叶带迟徘徊观霁景山阁梦醒时

隔花宫漏

禁籞芳菲淑景融遥闻漏滴百花中暗传日永迟催箭似染林香细度风声断续时鸟语杂韵悠扬处午晴烘谁知高阁轻移点消得春园几树红

过淋河

凭催诗思客途过得得轻蹄踏嫩莎拂面春风三十里一湾新碧小淋河

清明日奉

命恭祭

景陵感成五律

玉剑还依旧

龙髯未许攀

音容千载渺岁月十年还奉祀瞻依切追思涕泪潜春风送归辔愁对水潺潺

远烟

晓色轻岚布凭栏入望遥非云迷谷口似水抱山腰
暮?披千树苍茫隔几桥山灵驱雾轂飞谒九天朝

王原祁雨景画

竹树冥蒙处谿桥杳霭时水风翻柳浪雾雨沐山姿
气韵三秋润烟岚尺幅宜司农潇洒笔似读许浑诗

书开元遗事後

沉香亭接望春楼百面牙盘博笑眸一夕凄凉马嵬驿不教还保玉搔头

汉武曾求汗血蹄百蛮才服又安西当时颇有英?辈不及王元一弹泥

太阿倒柄奈如何阉拜将军泽已过那识将来犹未足门生天子负心多

金雕翡翠玉雕环一笑春生百媚顔试问洗儿钱在否可能容易赎潼关

雨中访僧不遇

烟雨蒙蒙暗石矶人行渡口鸟飞稀寻僧不遇空回棹还似扁舟访戴归

山僧闲踏芒鞋去留得苍松伴客茶我亦无心恋风景归舟轻拂雨丝斜

题赵松雪竹院鸣泉图

山花绕径竹梢椽一卷黄庭聽瀑泉幽韵清冷传别院寒光潇洒动明川依稀琴瑟调阶畔借
助琅玕宴座边试问飘然云水客就中消得几多年

题赵伯驹仙山楼阁卷

云山缥缈列仙乡海隔红尘路渺茫只许人间图上看广寒宫殿午风凉

彩凤骑来阆苑西瑶华枝上暂教栖晚来留却乘云去输与王乔一局棋

云衣散作几丝霞清浅蓬莱似若耶莫倩麻姑说接待此间不是蔡经家

霞帔蹁跹瑞靄生飘飘金舄步风轻飞花一任随流水刘阮何能借问程

夏兴三十首【用上下平韵】

水亭帘卷芰荷风香锦堆波点点红一幅生绡谁为展不知身在画图中

落落松篁綠?重高斋闲对乐无惊远山雨後堪摹似螺髻新梳黛色浓

梧桐月影上冰窗凉露微侵暑气降堦际蛩声才唧唧庭前萤火故双双

只将无事消长日不用松枰一局棋净洗端溪焦白砚凭栏又是课诗时

闲踏青莎憩石矶清风细雨正霏霏三庚预作三秋意润气轻沾白紵衣

匀碧玻璃万顷虚采莲一曲午风初南华秋水何须读都入扁舟一览余

风度修篁月上梧药炉茶鼎兴偏孤生绡欲觅倪迂笔好作高斋消夏图

叠叠红霞映碧溪远山犹在夕阳西几回步过横桥去十里轻莎覆软泥

溶溶月色淡空堦未尽蝉声咽绿槐高卧匡牀风味好从知陶令亦吾侪

雨余青篆长莓苔洗尽尘氛爽气来日暮凉飈拂巾履扶筇独上最高台

水榭水厨不受尘闲心消得作闲身桃花源里风光别来捉蒲葵得几人

一瓣名香静里焚篆烟缕缕白如云幽情未许旁人会手自繙书到夕曛

古树月明鸦影翻空堦露净泣王孙谁家少妇伤离别未到秋来已断魂

西池荷叶大如盘六月春光烂熳看【苏诗绕郭荷花一十里谁知六月下塘春】笑煞双鸳
花底宿不胜香雾欲飞难

采莲少妇满溪湾露重红裳涕泪潜转眼秋光到前浦依稀风景想榆关

安石榴开照槛鲜绿衣小凤语庭前遣情花鸟知人意为报山中过小年

茉莉香风透绮寮天街夜静漏声迢桂宫只在星榆里无那银河一水遥

石矶晚坐钓纶抛芦荻苍茫两岸交添得一番新鼓吹宫蛙雨後满池?

席间暑净三庚退楼上凉生百尺高白紵轻衫消受得西风闲倚吮霜毫

纨扇初收叠绮罗夜凉人静蹙双蛾幽情却恨秋风到细数流萤几点过

凭谁催得朱明去为有庭前夜合花三度芳菲俱已过一弯新月照枝斜

架上缥緗玉轴装呼童趣夏曝书忙綠槐庭院无人语时有天风送古香

松陰摊饭石牀平静聽寒涛汗不生那更闲情逐蝴蝶逍遥一枕卧桃笙

碧水弯环俯小亭倚栏独坐阅金经问谁识得菩提趣恰有芭蕉侧耳聽

纱窗竹簟静无蝇香吐金猊碧缕凝休向人间求避暑个中自有玉壶冰

漫忆秋凉秋易到不堪夏热夏难留眼前风景浑无定供我闲吟独倚楼

林泉潇洒愜幽?兴罢归来暮靄侵凉月照人人不寐一瓿香乳聽调琴

冰盘葵扇何须恋沉李浮瓜底事贪俯檻早占秋景近一湾水色已成蓝

昨夜微风拂屋檐荷亭爽气一番添今朝梦醒披衣处飞瓣飘香到绣帘

消夏才教脱葛衫藤萝月影上巉巖秋声欲倩欧阳赋白帝明朝又署衔

赋得岸痕新雨过

急雨初过溪尚喧綠堤苔漬带新痕烟低岸柳根疑失翠染平芜浪欲翻波涨渔船方弄棹景
供诗客正凭轩那知野老情偏异预卜丰登笑倚门

清簟看棋

松枰消夏日竹簟纳凉颺任尔机心密皆吾静赏时鼎鸣涛泛峡香炮篆萦丝黑白分明看踈
帘月渐移

郑宅茶

榴枕桃笙午昼賒红兰香细透窗纱梦回石鼎松风沸先试冰瓯郑宅茶

水邇何须古辣泉满杯香露侍儿煎浮瓜沉李浑无事为咏卢仝七碗篇

夏日园居即事

为爱林泉入座清临溪结屋敞轩楹枝头闲弄笙簧奏阶下平调水石声苔漬云根成古篆鸥
闲沙浦结前盟午余底事寻庄蝶恁逐晴莎信步行

绿苔满径竹梢檐午静薰风扑画帘鹿柴间开知客到鱼苗新涨识丁添藤牀恍带三秋爽竹
簟浑忘六月炎晚凭栏干闲极目红霞犹遶数峯尖

镜浦轻颺漾碧涟池亭霁景正澄鲜蝶依芳草能?路鹤习茶铛不避烟任去任来几点鹭半开
半落数枝莲晚来弄棹无人畔水满清溪月满船

古香斋伴几枝桐百尺扶疎翠色笼杖策每缘寻胜景披襟半为纳清风篆烟结细帘方静棋
局敲残日已中不住吟哦缘底事会心原与物偕同

有至自军中者诗以慰之兼忆如心居士

万里榆关罢戍回情怀如旧鬓毛皤如心居士知无恙两字平安藉送来

系马都门正落晖三庚未脱夹征衣因君略晓边庭令八月祁连雪已飞

几年别去经风雪今日归来话别离想像伊人归未得龙堆握手送君时

荷珠

曲池彷彿蛟人宅一夜明珠万斛倾翠盖敲风纷聚散红衣映旭转晶莹
虞妃佩上荧荧坠帝子钗头颗颗盈分付兰舟为停棹露盘终日镇教擎

题高其佩指头画鸡

淮南曾伴升仙去留得生绡幻里身秀隄昂昂夸独立可能风雨报寒晨

平湖雨渡八首

一堤杨柳树数里白莲花细雨霏霏处轻舟泛若耶烟云暗远天独坐孤篷里飒然风满湖
衣履皆寒水欲觅古渡头烟波不知处我亦无心客轻舸任来去参错渔樵舍
隐映菰蒲丛冒雨一声笛吹破千丝风细雨满湖秋扁舟泛碧流平分诗景去
恰有一羣鸥挂帆风力健不须荡双橹遥望翠微峯蒙蒙乱烟雨乍聽芭蕉鸣
却是残荷响梦中万里游只在扁舟上山围天欲暮风过雨初晴余景犹堪赏
平湖落照明

晚晴

净洗尘氛天宇清溪流新涨一声声芭蕉叶绿经雷长茉莉花香带雨荣
蝉抱柳枝初放响萤黏荻岸转添明东冈隐约金波上彷彿年来秋夕情

野塘月色

菰蒲亚水正青青月色寥萧淡晚汀野景乍疑秋寂寞新凉且喜夜清冷
波纹泻碧翻轻縠镜影流光闪碎萍独对池塘空濶意几家茅舍点郊垧

水底霞天

晚籟闲登百尺楼明霞倒映十分秋余光绮散蛟人宅返照晴摇芦荻洲
云际鸥闲波荡漾日边鱼跃景沉浮须臾天末残红卷依旧高空接碧流

新凉

连朝微雨促新凉独倚寒空意渺茫庭树早惊金气候幽人为换葛衣裳
月流梧榭添踈影风入荷池泛冷香欲效庐陵工体物含毫诗思共秋长

题唐寅画簃

芦荻萧萧颭碧流月明独去放扁舟谁知一枕庄周梦占断寒江万里秋

秋信

今年秋信较分明白帝初旋暑气平梧落井边天籁动蛩吟砌畔晚凉生已输纨扇三分爽闲对银河乙夜清占断一番潇洒意金风玉露动关情

题丁云鹏罗汉卷

幻化空中传幻化却教图作紫磨身机心息後龙能伏业境忘来虎亦驯鉾鉢缤纷饶法味伽黎围绕足精神悬知笑会拈花处倒退声闻八百人

曝书

天末金风至庭前昼曝书古香飘座永秀色入窗虚次第排青简纵横打白鱼绕廊吟赏处爽度葛巾徐

雨

骤雨催余暑幽香湿晚兰从知秋飒?渐觉夜阑干蛩咽阶前细蝉吟柳上残萧晨凭赏处添得几分寒

题石屏二絶

扁舟夜泛正秋清赤壁巉巉类削成欲共坡翁图画里月明风淡聽江声【赤壁图】

片石本来邱壑物却将邱壑个中看千林日上岚烟净七十二峯湿翠寒【木兰山图】

万壽寺方丈小憩

门枕秋河冷堂堂法界寬坐参真瓠落小憩且盘桓塔影含烟直檐铃奏响残徘徊无一事何用觅心安庭有参天柏阶饶匝地花鸟栖喧皓月鹤立对晴霞寥寂钟鱼静萧闲山水嘉閣黎公案熟让客赵州茶禅房隐修竹杖策试幽寻路僻莓苔长人闲花木深梵经书贝上古衲挂庭陰扫石聊趺坐悠然尘外心

秋晓

闲步空庭倚石栏寥萧秋色入澄观千章树叶随风落一夜蛩音到晓寒鴈字排空长不断荷衣贴水那胜单招提何处晨钟度隐隐霜声带月残

重乳燕【雏燕长成本年即能营巢更伏新雏】

才学翻飞下画堂?泥旋复上雕梁未能返哺同乌子且乳新儿作燕娘斜掠西风夸得意却归
南国俨成行卢家少妇凄凉甚两见双栖更断肠

过玉簫桥三首

芦荻萧萧颭碧流长空渺渺望中收御河八月芙蓉紫彷彿江南一段秋

秋烟漠漠散轻绡斜日西风玉簫桥乍聽扁舟歌欸乃芦花深处望迢迢

枫林叶落漏斜阳遥望瀛台隔淼茫却忆十年游息处水风吹送芰荷香

御制乐善堂全集定本卷三十

跋

钦定四库全书

御制乐善堂全集定本跋

乾隆元年冬

皇上万几余暇取前後所着散体古文诗赋彙为一集

而

命畴昔侍学之臣跋之【臣】尔泰以雍正十年入侍既尝

承

命敬序乐善堂文钞今年秋复敬序日知荟说

圣性之诚一

圣学之广渊

圣治之淳懿皆备於前文所称述而熟复是编益信先儒所称天下无二道圣人无两心洵深探本源之论也夫道之体於身者为德施於事者为治而见於言者为文道以久而益明德以久而益懋治以久而益光即文亦以久而益粹惟二帝三王能一以贯之故德为圣人之德而非大贤以下所能几也治为圣人之治而非三代以後所敢望也文成典诰後贤後儒力追而终莫能及焉然其所以致此者则惟诚之不息而已【臣】始入侍我

皇上之学已大成而惟日孜孜未见有晷刻之懈也及

登

宸极布德明教敷政宁人无一不与民心相应万邦忻戴如天地之盖容而犹歆然自以为未足文与治之日新皆由於

圣心之诚一可见矣伏读前後

御制序文所时切於

圣心者於乐善堂文钞则因文以检躬行於日知荟说则即文以考治法而是编之序言之尤深切焉体道不息而与时偕行将见

圣德

圣治直接武於三王而是编之传布於寰区皆以典诰

奉之矣是则【臣】心所厚幸也

乾隆元年岁次丙辰仲冬月少保大学士【臣】鄂尔泰恭跋

【臣】闻文以载道而道本於身故必实能明道而文始可贵必实能身体而道始能明我

皇上躬濬哲之姿夙承

庭训缉熙光明圣学渊茂【臣】自雍正元年蒙

世宗宪皇帝恩命得侍

左右於今十有余年伏睹我

皇上稽古逊修研精经术於六经四子之书儒先之绪论诸史之成蹟博观约取剖晰精微举天人性命之理政治之所从出皆有以得其大本大源之所在所学之正如此寒暑晨夕矻矻孜孜熟复?究融洽贯穿进进不已与道大适学之精且专又如此故发之於文日新富有麟炳裔皇充溢缙帙曩者

亲定乐善堂文钞十有四卷【臣】既承

命而敬序之矣

御极以来敕几清宴乃合前後所着选定编次为

乐善堂全集【臣】受而读之其义蘊之宏深则经纬天地无乎不包其辞藻之赡博则熔铸古今无乎不备仰泰岱而知衆山之卑观河海而知行潦之细诵圣言而知百家衆说之凡浅巍巍乎煌煌乎洵宇宙之钜观也【臣】仰惟

皇上圣学高深固非拟议所及而窃谓其所以发而为至文者由至道之蘊积者深也夫道岂独为文而已圣贤本是道而垂彝训帝王体是道而成治功

皇上本皇极之敷言既已见诸行事中外欣欣文德诞

被矣而犹夙夜孜孜因言考行所谓

圣天子建中和之极金声而玉振之者诚在今日而是编也天德王道合为一焉乾坤之容日月之光与诗书相表里而世为天下则又何疑哉【臣】校录之次伏读

御制序文窃有以知

圣心之所存兹奉

命缀言简末仰至文之炳蔚而拭目以观至治之日升

海内臣民涵泳

圣泽偕登大道区区蠡测所及盖不能自己云

乾隆元年岁次丙辰仲冬月少保大学士【臣】张廷玉恭跋

【臣福敏】叨陪侍从谬侧细轡广厦之间十有八年於此矣亲见我

皇上以天纵之聪明殚日勤之学问自六经四子以及诸史百家无不登其堂入其室啖其馀味其腴於道则宗二帝於法则统三王於学则承孔孟凡作为文章以及偶尔吟咏皆蔼然以万物为一体而与天地同流

御极以来以仁心布为仁政四方万姓莫不喁喁向风从欲丕变向也见之文章今也行之政事洵典谟之继响雅颂之嗣音匪徒有其文确有其实也夫圣神之德作式万邦今天下臣民皆以躬逢

圣世为至幸而【臣】不惟逢其盛且近其光不惟仰瞻殿陛之间而且侍从

左右积岁积时至於如此之久盖视天下臣民为尤幸也【臣】闻传说之告高宗曰知之非艰行之惟艰魏徵之告文皇曰始之非艰终之惟艰

皇上举平日所常言无不见之於实政则其知生知其行安行行既与知一则终必与始一如天不已应地无疆断可知矣【臣】又闻古人言礼乐之兴俟以百年王者之仁要诸必世我

国家定鼎以来

列圣相承於今百年正礼乐大兴之会而我

皇上好生之德洽於民心立之斯立动之斯和渐仁摩义捷於影响【臣】虽衰朽无能未克仰赞

高深犹得优游

禁籞曲沐

慈仁与海?羣黎共游昇平盛世作为歌诗以咏王化之成岂非至幸中之尤幸也欤【臣】区区至愚不胜厚望焉

乾隆元年仲冬月太子太保左都御史【臣】福敏恭跋

钦惟

皇上躬天纵之资单心稽古夙夜维勤粤自冲龄研精六籍旁及诸史百家以逮有宋大儒之书靡不荟萃贯通得其大本大原之所在致知格物诚意正心修身齐家治国平天下之道一以贯之矣臣窃惟二帝三王之学备见於尚书所谓上天垂文象有节度者是已其轶见於他书若帝尧战栗之戒帝舜南薰之歌成汤之铭帝甲之箴片义单词类皆阐发道妙昭兹来许後之贤君如唐太宗宋仁宗间有文词表见要亦随其所得之浅深以着爲篇章善乎唐臣李汉有言文者贯道之器也不深於斯道有至焉者否也我

皇上味道之腴声律身度夙承

世宗宪皇帝明理立诚之大训纯亦不已缉熙光明以圣贤之所得者治其心即以圣贤之垂训者显诸文包蕴天地熔铸万有而浑然默契於圣人制作之

原【臣】自辛亥入直

禁庭亲炙

圣顔敬闻绪论庚戌以前所制序论书记杂文诗赋十

有四卷【臣】皆得而伏读之数年以来

圣德日新极深研几文益充邃兹者

继序乘乾敕几余暇取前後诸编

亲加删定合为一集【微臣】恭与校对自惧爝火之照末

由上测

高深第就臣管见窥之举凡天地四时之行雨露风霆之变山川草木之丽名物象数之繁帝皇王霸心术事功之分井牧农桑礼乐兵刑之用仰观俯察援古证今千彙万状不可端倪而悉贯之於道至若涵泳性情流连光景无非万物一体之怀流露於翰墨间在易之贲曰刚柔相错天文也文明以止人文也

皇上学贯天人参赞位育观文以察理修辞以立诚自临御後薄海内外蒸然向风蠕动蠃飞无一物之不得

其所良由

圣心与道为际而本身徵民悉以验其言之实效向之蕴涵蓄积者已一一见之治法矣【臣】幸依

日月获窥

圣学渊微集古先哲王之大成谨拜手扬言推原於道德文章一贯之旨【臣】以知天下臣民由

宸章之炳焕求

皇极之会归

帝光所被与天无极而【臣】得附名简末窃媿於景星庆

云之先睹可不谓厚幸欤

乾隆元年岁次丙辰仲冬月吏部左侍郎今授江苏巡抚【臣】邵基恭跋

【臣】窃惟帝王御世有心源而後有治法然必基於学以成而文其学之散见也在昔唐虞授受危微精一为言心之祖未尝以学名而千古之圣学苞焉二典之垂三谟之作为帝王言治之极未尝以文着而千古之大文焕焉则夫文章之与政事通而治本於学学本於心一以贯之而已矣钦惟

皇上聪明天亶秉睿哲之资切就将之学

世宗宪皇帝尝以明理立诚

宸章锡训

圣敬祗承孜孜夙夜上探四子六经之渊微旁涉诸史百家之浩博精究於身心性命大周於天下国家细及於日用行习彙三才万物之理莫不探本索原兼综条贯而一发之於文自阐道明教之篇以至体物缘情之制无格不具无盛不臻大矣哉合作者之圣述者之明而一之故学为

圣人之学而文为天下之至文也【臣诗正】新进小臣甲寅入侍

内廷仰觀我

皇上学问高深日新岁益敬读

乐善堂文钞自庚戌以前凡十有四卷年来复数倍於

昔爰於

万几之暇总彙全编

亲定成集【臣】以在籍蒙

特旨宣召侍直

南书房恭与校对自惟扣盘搥瓮之愚何足以殚测海窥天之识窃见

圣主临御以来至德覃敷千载未有伦比凡行政用人仁民爱物之际羣生沾濡太和翔洽虽在万里之表四海之遥号渙言传罔不暨讫因以知

盛治郅隆实本於

皇心之纯一而缉熙光明之原基於学古之日者举尧咨舜傲之忧勤禹俭汤仁之典则文谟武烈之覲揚穆然如见心源治法之相接而陶铸羣言发皇

睿藻亦遂与典谟浑噩炳焉同风所由统自古圣君哲后之绪金声而玉振之用集制作之大成也诗曰訏谟定命远犹辰告书曰皇极之敷言是彝是训【臣】知

天章焜耀倬云汉而丽星辰传示万世永永无极而【臣】

蒙被

厚恩身侍

禁闕亲覩

日月之光摹绘万一谨附於拜手扬言之次是则【臣】之

殊荣也夫

乾隆元年岁次丙辰仲冬月侍讲学士【臣】梁诗正恭跋

【臣】闻乾坤之容无从仰绘而川流敦化以为大未始不可明言

皇上以生安之圣学倍懋於儒生盖惟圣而始尽学之能事也唐虞授受论学而未显言说命首揭之不及政事惟曰学于古训乃有获而万有悉包举焉尼山木铎谆谆勉人亦谆谆告君大哉学乎此先圣後圣所同揆者乎【臣】沐

世宗宪皇帝殊恩草茅之身备员

禁近亲炙於

圣德者深而窃窥於

圣学者畧稔谓不博於文礼不可得而约也故自通经贯史而後诸子百家以及诗歌骚赋靡不究其条理穷其旨趣所以灼见性天而正大之情充周洋溢全体太和昭融於翰墨之下机动神随自然合度今者

绍承大统惟日孜孜无刻不以敷政宁人为念间於万几清宴取向所作各体文诗赋彙为全集而以【臣】謏陋复得蒙

恩与於校对之列乃拜手稽首而为言曰凡物皆性凡人事皆天道而不明乎性与天道之旨则见物不见性见人事不见天道矣故舍本徇末者骛华而不既於实而稍窥理域则又简弃乎文辞以为非所急皆蔽也六经之垂显万世之道开万世之文道与文有二乎哉

皇上既敦敏夙成又承

先皇立诚明理至训一以贯之於文见道即於道见文斐然外见者皆粹然内蕴者也类万物之情以通神明之德礼乐之陶淑仁义之渐摩备於其中矣【臣】愿

颁之学宫播之天下以教育乎多士俾知

青宫养正之年崇高之地不自暇逸而学古以获治平之本勉勉我王纲纪四方畴弗仰

圣人而思圣功哉

乾隆元年丙辰仲冬月编修【臣】顾成天恭跋

乐善堂全集自颁示海宇凡在臣子操觚诵习训行近光殆如仰曜灵者求晖於阳谷导积石者向若於崑仑矣我

皇上圣学日新冲怀谦抑近复以全集卷帙綦繁命【臣】等重为厘定编节恭聆之余无任惶悚以【臣】等浅

识肤学何由窥溯巔涯顾

圣德下济之谦至於如此敢不勉竭区区祇承

盛意爰敬谨校阅数过精益求精拟为三十卷恭呈乙览

上复亲加裁定重付剞劂较之全集存者十之五六云

伏惟

鸿制昭垂万世发乾坤之秘奥焕奎壁之精英又何庸

【臣】等颂扬赘述惟是?绎初本

御制序文有云自今以後虽有所著述或出

词臣之手真贋各半【臣】等日侍

禁籞朝夕见闻窃於此有未能安於心而已於言者

皇上临御二十四年以来求衣问夜勤政健行每几务余闲即濡毫摘 诗或数篇或数十篇文则煌煌钜制或数千百言为时不逾晷刻脱稿浑若天成

御制诗初集四十四卷久已风行天下户诵家弦今二集且将编次告成矣篇什之富为古今大家所未曾有其他纪功书事碑版之文以及序记论赞无体不备皆诣极精微兼综谟诰若

平定金川伊犁诸碑勒石学宫

骏烈大文并烛天壤尤为有目所共覩此在廷诸臣流

汗頽首竭管蠡之见且不能窥测

高深而尚有能赞一辞者乎然则前

御制序所云乃

大圣人谦尊之德自然流溢於毫楮闲亦与删订斯编同一渊乎若谷之心云尔【臣】等荣与编校谨拜手稽首识於简末

乾隆二十四年岁次己卯上巳东阁大学士兼管户部尚书【臣】蒋溥协办大学士吏部尚书【臣】刘统勲礼部尚书【臣】嵇璜吏部左侍郎【臣】董邦达户部左侍郎【臣】刘纶户部右侍郎【臣】裘曰修礼部左侍郎【臣】介福兵部左侍郎【臣】观保署刑部左侍郎【臣】于敏中刑部右侍郎【臣】王际华工部左侍郎【臣】钱维城内阁学士【臣】钱汝诚恭跋

御制乐善堂全集定本跋